

IKINYARWANDA

Igitabo cy'umunyeshuri

Amashuri yisumbuye
Umwaka wa kane
Ishami ry'indimi

© 2021 Urwego rw'Igihugu rushinzwe Uburezi bw'Ibanze (REB)

Iki gitabo ni umutungo wa Leta y'u Rwanda

Uburenganzira bw'umuhanzi w'ibikubiye muri iki gitabo bufitwe n'Urwego
rw'Igihugu rushinzwe Uburezi bw'Ibanze (REB).

IBIMENYETSO N'IMPINE BYAKORESHEJWE

UR	University of Rwanda
REB	Rwanda Basic Education Board
nt	Inteko
GR	Ingombajwi y'indagi
D	Indomo
I	Inyajwi
C	Igicumbi
Co	Igicumbi kirimo \emptyset inyajwi O
Ce	Igicumbi kirimo inyajwi e
RT	Indanganteko
RS	Indangasano
RKZN	Indangakinyazina
Z	Umuzi
Zo	Umuzi urimo inyajwi O Umuzi
Ze	urimo inyajwi e
+	Ukwiyunga kw'inyajwi cyangwa ingombajwi
→	Ihinduka, bibyara
⊕	Iburizwamo / izimira ry'ijwi / ibura ry'akaremajambo gateganyijwe muri uwo mwanyana
ONAPO	Office National de la Population
FAO	Food and Agriculture Organization
UNESCO	

IJAMBO RY'IBANZE

Banyeshuri,

Urwego rw'Igihugu rushinzwe Uburezi bw'Ibanze (R E B) runejwe no kubagezaho igitabo k'Ikinyarwanda cy'umunyeshuri, umwaka wa kane, kigenewe amashami yiga Indimi. Iki gitabo kizabafasha mu myigire n'imyigishirize ishingiye ku bushobozi mu kunoza imyigire y'ibiteganijwe.

Intego u Rwanda rufite mu burezi ni ugukora ku buryo mugera ku rwego rushimishije rujyanye n'ikicro murimo. Ibyo bigamije kubategurira gukoresha neza amahirwe y'akazi aboneka mu muryango nyarwanda.

Mu rwego rwo kuzamura ireme ry'uburezi, Guverinoma y'u Rwanda ishyira imbaraga mu gutegura imfashanyigisho zijyanye n'integanyanyigisho kugira ngo bibafashe mu myigire yanyu. Hari impamvu nyinshi zituma mwiga, ibyo mwize bikabaha ubushobozi bwo gukora. Muri zo twavuga ibyigwa biteguye neza, abarimu beza, uburyo bw'imyigishirize, uburyo isuzuma rikorwa ndetse n'imfashanyigisho zateguwe.

Muri iki gitabo, twitaye cyane ku myitozo ibafasha mu myigire yanyu. Iyo myitozo muyubakiraho mutanga ibitekerezo ndetse munivumburira udushya, binyuze mu bikorwa bifatika bikorwa na buri wese ku giti ke cyangwa mu matsinda mato. Iyo myitozo ibafasha kandi kwimakaza indangagaciro zizatuma haboneka ubudasa kuri mwebwe ubwanyu ndetse no ku Gihugu muri rusange.


Mufashijwe n'abarimu bafite inshingano zo kubayobora, turizera ko muzunguka ubushobozi bushya muzifashisha mu buzima bwanyu buri imbere.

Mu nteganyanyigisho ishingiye ku bushobozi, imyigire yubakiye ku munyeshuri, aho ategurirwa ibikorwa bimwinjiza mu isomo, bikamufasha kwiyungura ubumenyi, kongera ubushobozi ndetse no kwimakaza indangagaciro zikwiye. Ibi bitandukanye n'imyigire ya

kera yari ishingiyeye ku bumwenyi gusa, aho umwarimu yafatwaga nk'uzi byose bityo agahabwa uruhare runini mu myigishirize. Ikindi kandi, ubu buryo buzabafasha mu gukora ibikorwa bitandukanye, mutekereza ku byo mukora kandi munakoresha ubumenyi musanganwe muri iyo myigire. Ni muri urwo rwego, mu mikoreshereze y'iki gitabo, mukwiye kwita kuri ibi bikurikira:

- Kuzamura ubumenyi n'ubushobozi mukora imyitozo yateganyijwe kuri buri kigwa;
- Gukorana na bagenzi banyu mukorera mu matsinda, mujya impaka ku nsanganyamatsiko runaka, muganira hagati yanyu, mumurika ibyo mwakoze mu matsinda ndetse mukora ubushakashatsi mwifashishije amasomero, murandasi cyangwa ubundi buryo;
- Kugira uruhare mu myigire yanyu;
- Gukora umwanzuro unoze ujyanye n'ibyavuye mu bushakashatsi.

Twizeye ko iki gitabo kizagufasha kwiganeza Ikinyarwanda, kigukundisha ururimi rw'Ikinyarwanda, umuco kibumbatiye, umuco wo gusoma no guhanga wigana ubuvanganzo wize, kugira ngo ukurane inyota yo kugira ubushobozi bwo gusabana n'abandi mu Kinyarwanda.


Dr.MBARUSHIMANA Nelson
Umuyobozi Mukuru, REB




GUSHIMIRA

Ndashimira abarimu bigisha mu mashuri yisumbuye bitanze kugira ngo iki gitabo gishobore gukosorwa.

Ndashimira kandi abakozi b'Urwego rw'Igihugu rushinzwe Uburezi bw'Ibanze, cyanecyane abo mu Ishami ry'Integanyanyigisho n'Imfashanyigisho bagize uruhare rukomeye muri uyu mushinga wo gukosora iki gitabo.

Habaye hari ubundi bwunganizi ku byanzwa muri iki gitabo twabwakira kugira ngo buzifashishwe mu ivugururwa ryacyo.



MURUNGI Joan

**Umuyobozi w'Ishami ry'Integanyanyigisho
n'Imfashanyigisho / CTLRD**

Ishakiro

<i>Iriburiro</i>	<i>ix</i>
1. Umuco nyarwanda	1
1.1. Akamaro k'ineza.....	1
1.2. Gusesengura umugani muremure n'uturango twawo	4
1.3. Ingeri z'ubuvanganzo nyarwanda bwo muri rubanda ...	6
1.4. Baciye urwa mbehe	7
1.5. Insigamigani.....	10
1.6. Butati na Nzabuheraheza	12
1.7. Gusesengura ibitekerezo byo muri rubanda	15
1.8. Irya mukuru... ..	17
1.9. Imigani y'imigenurano	20
1.10. Sakwe Sakwe...! Soma!	24
1.11. Ibisakuzo	25
1.12. Imfizi ikwiye Kigeli	28
1.13. Gusesengura igisingizo.....	32
1.14. Twivuge bahu!	34
1.15. Ibyivugo by'amahomvu	35
1.16. Kwita izina mu muco nyarwanda	37
1.17. Imbata y'umwandiko ntekerezo	40
1.18. Izina mbonera gakondo	42
2. Umuco w'amahoro	51
2.1. Umwana wahohotewe.....	51
2.2. Ntera	56
2.3. Rubundakumazi	63
2.4. Igisantera	66
3. Uburinganire n'ubwuzuzanye	75
3.1. Uburinganire n'ubwuzuzanye mu mirimo yo mu rugo	75
3.2. Ibiganiro mpaka	81
3.3. Imyandikire yemewe y'Ikinyarwanda	86
4. Kubungabunga ubuzima	115
4.1. Amagara aramirwa ntamerwa	115
4.2. Mpogazi na Magaramake	119
4.3. Ubutinde n'imiterere y'amasaku mu nteruro	121
5. Kubungabunga Ibidukikije	129
5.1. Kubungabunga amashyamba	129
5.2. Ikomorazina mvazina	134

5.3. Kubungabunga amazi n'ibishanga.....	140
5.4. Amoko y'imyandiko	143
5.5. Akamaro ko gusoma ibitabo.....	144
5.6. Umwandiko ntekerezo	148
5.7. Amatwi arimo urupfu ntiyumva.....	153
5.8. Umwandiko mbarankuru	158
5.9. Akagera, ubwiza bw'u Rwanda	163
5.10. Gusesengura umwandiko mvugamiterere	168
5.11. Igitekerezo k'ibigina	169
5.12. Umwandiko mvugamateka.....	175
5.13. Isi: Umubumbe utuwe n'ibiremwa bifite ubuzima! ...	176
6. Iterambere	185
6.1. Umurunga w'iminsi.....	185
6.2. Indirimbo	188
6.3. Tunoze umurimo	190
6.4. Umuvugo.....	195
6.5. Ubukorikori bwa Nzitunga	201
6.6. Ikomorazina mvanshinga	205
7. Imiturire.....	213
7.1. Gukumira imiturire y'akajagari	213
7.2. Ibihe bikuru by'inshinga	216
7.3. Ingaruka z'ubwiyongere bw'abaturage	220
7.4. Uburyo bw'inshinga itondaguye	223
8. Ikoranabuhanga	231
8.1. Akamaro k'ikoranabuhanga mu mashuri.....	231
8.2. Amagambo adahinduka	235
8.3. Ibitangaza by'ikoranabuhanga ntibisiba kwiyongera....	252
8.4. Inkuru y'ikinyamakuru	256
9. Ububi bw'ibiyobyabwenge	265
9.1. Inkuru ishushanyije: Ihene mbi ntawuyizirikaho iye	265
9.2. Inkuru ishushanyije	272
9.3. Iyiganteruro: Ibice by'interuro.....	274
10. Uburezi n'uburere	283
10.1. Uko ingimbi yarererwaga mu itorerero	283
10.2. Isanisha	289
2. Imimaro y'amagambo mu nteruro yoroheje	297
3. Interuro yoroheje	301
1. <i>Imyandiko y'inyongera.....</i>	<i>309</i>
2. <i>Ibisobanuro by'amagambo</i>	<i>318</i>
<i>Inyandiko n'ibitabo byifashishijwe</i>	<i>331</i>

Iriburiro

Munyeshuri dukunda,

Iki gitabo k'Ikinyarwanda cy'umwaka wa kane w'amashuri yisumbuye ni wowe kigenewe. Kwiga ururimi kavukire ukamenya Ikinyarwanda ku buryo buhamye, ukagikunda kandi ukagisobanukirwa koko ni umugambi Leta y'u Rwanda ikomeyeho. Ni igitabo cyanditswe gihereye ku nteganyanyigisho y'Ikinyarwanda yateguwe n'Ikigo Gishinzwe Guteza Imbere Uburezi mu Rwanda mu mwaka wa 2015. Integanyanyigisho ivuguruye ijyanye n'itego ndetse n'ibyifuzo by'Igihugu cyane cyane mu byerekeranye no gushimangira ubunyarwanda. Iki gitabo kiragufasha kumenya ibyo Ikinyarwanda kibumbatiye, imiterere yacyo, ubugeni gihetse, umuco n'imyumvire y'Abanyarwanda.

Iki gitabo k'Ikinyarwanda kirimo imyandiko ijyanye n'ubuvanganzo nyarwanda nyemvugo na nyandiko ndetse n'ikibonezamvugo. Mu kiciro rusange cy'amashuri yisumbuye, agaciro k'Ikinyarwanda karasobanuwe bihagije. Hagaragajwe ko kwiga Ikinyarwanda bifite uruhare rukomeye mu guhanya Umunyarwanda udafite isoni n'ubwoba bw'umuco we kandi utisuzugura. Kwiga Ikinyarwanda kandi bifasha mu kurera Umunyarwanda bimutoza kubaha abandi, kutabahutaza, kubana na bo mu mahoro, kugira urugwiro, ubusabane, ubworoherane, kuvugisha ukuri, kugaragaraho isuku yo mu bwenge n'iyo ku mubiri n'ibindi. Izo ntego zirakomeza no mu kiciro cya kabiri binyujijwe mu myandiko myiza yatoranyijwe.

Iki gitabo gikubiyemo imyandiko y'ingeri nyinshi: inkuru ngufi, imigani migufi, indirimbo, imivugo ibyivugo by'amahomvu n'iby'iningwa. Hakubiyemo kandi n'indi myandiko inyuranye ijyanye n'umuco n'amateka, gukunda Igihugu, uburinganire, kwimakaza umuco w'amahoro, kubungabunga ibidukikije, gukunda umurimo, kwirinda indwara z'ibyorezo

zizahaza abaturage,... Iyo myandiko isesenguye ku buryo bigufasha kunguka ubumenyi bunyuranye, guhanga wendeye ku by'abandi no kuvuga utajijinganya mu ruhame kandi wubahiriza inyurabwenge ndetse no kumenya gutanga ibitekerezo kandi wubahiriza n'iby'abandi mu mpaka. Imyandiko iri muri iki gitabo izagufasha kwiyungura ubumenyi mu rurimi rw'abakurambere bacu. Kumenya ururimi kavukire si ukumenya kuruvuga gusa ni no kumenya umuco, kurutekerezamo, kurwandikamo ushyikiriza abandi ibitekerezo byawe. Kurumenya kandi ni ugucengera ubuvanganzo bwarwo ugashyikirana n'abahimbyi, nawe ukazabigana, ukaba wavukamo umuhanzi. Ngicyo icyo twatekerezaga tugutegurira iyi myandiko.

Muri iki gitabo kandi urasangamo ikibonezamvugo. Hakubiyemo isesengura ry'amazina mbonera gakondo, ikomorazina, ntera, izina ntera n'igisantera, imikoreshereze y'ubwoko bw'amagambo adahinduka nk'imigereka n'indangahantu. Urasangamo kandi iyigamajwi, iyigamvugo n'iyiganteruro.

Ni igitabo kirimo imyitozo inyuranye izagufasha kumva neza imyandiko ikubiyemo, umuco nyarwanda n'amateka y'u Rwanda ndetse n'imisesengurire y'imiterere y'Ikinyarwanda bizagufasha gusobanukirwa no gusobanura uko Ikinyarwanda giteye. Amashusho ari muri iki gitabo, afasha kumva no gusobanukirwa ibikubiye mu myandiko kandi akagura n'ubumenyi bwawe cyane ko ashingiye ku muco nyarwanda.

Munyeshuri rero, uzasangamo imyitozo rusange izagufasha gukora isuzuma no gukora ihuzabumenyi ry'ibyo umaze kwiga nyuma y'igihe runaka. Mu mpera z'igitabo hari ibisobanuro by'amagambo akubiye mu myandiko atondetse yubahirije itonde ry'Ikinyarwanda. Igihe uhuye n'ijambo rikugoye mu kuribonera igisobanuro, wareba niba utarisangamo. Igihe ubonye ritarimo ushobora kwitabaza inkoranyamagambo. Hari imyandiko kandi y'inyongera yatoranyijwe, yagufasha uyisoma cyangwa se wisuzuma kugira ngo urebe urwego ugezeho mu isesengura ry'imyandiko y'ubuvanganzo nyarwanda.

Ntidushidikanya ko iki gitabo kizakubera inzira itaziguye izagufasha kumenya ubukungu bw'umuco nyarwanda binyuze mu buvanganzo ndetse no gusesengura imiterere y'Ikinyarwanda bityo ukarushaho kugikungahaza.

Impinduka mu myigire yawe

Iki gitabo cyanditswe hakurikijwe impinduka mu myigire no mu myigishirize isabwa n'integanyanyigisho ishingiye ku bushobozi y'amashuri yisumbuye mu Rwanda. Giteguwe ku buryo ibyo wiga bizakugirira akamaro mu buzima bwawe bwo hanze y'ishuri. Imyigishirize yari isanzwe yibandaga cyane ku kuguha ubumenyi mu byo wiga binyuranye. Ariko ubu ikigamijwe si ubumenyi gusa ahubwo ni ukugira ngo ubwo bumenyi buguhe ubushobozi bwo gutekereza kugira ngo ushobore kugira ibyo wikorera ubwawe, utange ibitekerezo byawe bwite, atari ugusubiramo gusa ibyo umwarimu yaguhaye cyangwa ibiri mu gitabo.

Imyitozo inyuranye usabwa gukora

Muri iki gitabo wateguriwe urunyuranyurane rw'imyitozo igufasha gushyira mu bikorwa ibyo wize utekereza byimbitse. Usanzwe ufite ubumenyi buhagije bushingiye ku byo wize cyangwa ku buzima busanzwe ubamo. Imwe mu myitozo usabwa gukora igusaba gutekereza ku byo usanzwe uzi cyangwa ubona. Mu mikoreshereze y'iki gitabo rero, urasabwa gukora iyo myitozo yose ikubiyemo. Ntacyo uzamenya neza udakoze iyo myitozo. Ni kimwe mu bintu by'ingenzi biri muri iki gitabo. Imwe muri iyo myitozo izagufasha kumenya uko wakwikura mu mbogamizi uhuye na zo mu buzima bwo hanze. Nubwo bigoye gutekereza ku buryo bwawe kurusha uko mwarimu yabikwereka ariko nugerageza kwitekerereza ku giti cyawe bizakuremamo umuntu nyawe uzashobora kwitwara neza mu buzima bwawe bwa nyuma yo kwiga.

Gukorera mu matsinda.

Umunyeshuri kandi ashobora kwiga neza afashijwe na mugenzi we. Niba hari ikibazo gisaba kubonerwa igisubizo, ushobora kucyunguranaho ibitekerezo cyangwa kukijyaho impaka na bagenzi bawe mu matsinda. Imyinshi

mu myitozo ikubiye muri iki gitabo isaba kungurana ibitekerezo no kuja impaka. Umwarimu azabafasha mu mikorere yanyu mu matsinda, abereka uburyo bwiza bwo kwicara murebana iyo mwungurana ibitekerezo kuko burya ntiwajya impaka n' uwo mutarebana amaso ku maso.

Ubushakashatsi usabwa gukora.

Nk'uko twabikomojeho mu ijambo ry'ibanze, gukora ubushakashatsi ni kimwe mu bigamijwe mu myigire mishya yawe isabwa n' integanyanyigisho ishingiyeye ku bushobozi. Uzasabwa gukora ubushakashatsi ujya mu isomero, uzasabwa kwitabaza ibinyamakuru, n' izindi nyandiko zinyuranye. Ibi bishatse kuvuga ko usabwa guhora wiga wiyungura ubumenyi n' ubumenyi ngiro n' igihe utari ku ishuri. Niba ishuri wigaho ritagira isomero cyangwa aho wabona interineti ku buryo bworoshye, umwarimu azabigufashamo akurangira ibitabo cyangwa ubundi buryo wakoresha.

Imyitozo n' ibimenyetso bikoreshwa.

Imyitozo inyuranye ifite ibimenyetso bigenda biyikugaragariza muri iki gitabo. Bimwe muri ibyo bimenyetso ni ibi bikurikira:



Ikimenyetso cy'umwitozo wo gutekereza ku buryo bwimbitse.

Iki kimenyetso kigaragaza imyitozo yo gutekereza, ku buryo bwimbitse, ku giti cyawe cyangwa uri mu matsinda ugakoresha ibyo uzi cyangwa ubuzima ubamo ugasubiza ibyo wabajijwe.



Ikimenyetso cy'umwitozo w'ubumenyi ngiro.

Ikiganza kigaragaza umwitozo w'ubumenyi ngiro nko gukina, inkuru, kuja impaka no kungurana ibitekerezo. Iyi myitozo izagusigira ubumenyi ngiro wazanakoresha mu buzima bwo hanze igihe uzaba warangije amasomo yawe.



Ikimenyetso cy'umwitozo wo kwandika.

Indi myitozo uzakora izaba igusaba kwandika. Iki ni ikimenyetso kiyikwereka mu gitabo cyawe.



Ikimenyetso cy'umwitozo wo gukorera mu matsinda.

Ni umwitozo wo kwishyira hamwe na bagenzi bawe mwigishanya, mwitoza gukorera hamwe mu gusubiza no gukemura ibibazo.



Ikimenyetso cy'umwitozo wo kujya impaka.

Imwe mu myitozo ikubiyemo isaba kujya impaka na mugenzi wawe cyangwa mu matsinda. Uyu mwitozo uteye nk'uko gukorera mu matsinda ariko wo ntusaba buri gihe ko hagira umwanzuro wandikwa nubwo hatabura kugira icyandikwa gituma ugira icyo wibuka ku byagiweho impaka.



Ikimenyetso cy'umwitozo kuri mudasobwa cyangwa interineti.

Hari n'imyitozo isaba gukoresha mudasobwa cyangwa gukora ubushakashatsi kuri interineti. Icyo ni ikimenyetso kiyigaragaza.



Ikimenyetso cy'umwitozo wo gukora babiri babiri.

Aha bivugako umwitozo ukorwa mu matsinda ya babiribabiri mwungurana ibitekerezo.



Ikimenyetso cy'umwitozo wo kumva.

Umwitozo wo kumva usaba umunyeshuri gutega amatwi yitonze akumva umwarimu cyangwa mugenzi we asoma nk'umwandiko, umuvugo,.. noneho akaza gusubiza ibibazo ku byo yumvise.




Ikimenyetso cy'umwitozo w'isuzuma rusange.

Iki kimenyetso kigaragaza umwitozo w'isuzuma rusange risoza umutwe.

Umutwe wa mbere

Umuco nyarwanda

1.1. Akamaro k'ineza



Habayeho umugabo abyara umwana w'umukobwa amwita Nyiragahinda. Akaba Nyiragahinda koko, izina ni ryo muntu. Uwo mukobwa aza kumererwa nabi. Ndetse se na nyina baza gupfa. Noneho ashaka aho ajya kwihakirwa ariko akaba yari arwaye ibisebe. Ajya guhakwa iruhande aho ngaho ibwami. Bari aborozi bafite inka nyinshi cyane. Ubwo inka zataha akicara mu muryango inka zikamurigata. Zajya kwanduruka zikabanza zikamurigata zikabona kwanduruka. Ndetse babonye zimukunze cyane, zajya no gushoka bakamujyana ku iriba na none zikamurigata zikabona kunywa zikamererwa neza.

Umunsi umwe, nyirabuja aza kumureba nabi aravuga ati: “Hari umunsi uriya mukobwa witwa Nyiragahinda azatumaraho inka kandi azimarishije ineza ye”. Yarazihanaguraga mu mpanga, akazihanagura ku mazuru, nuko akazibwira neza kuko na zo zamukundaga. Nyirabuja aza kumufata nuko acukura icyobo amurohamo. Inka zitashye zigeze ku irembo zumva Nyiragahinda ntazihumurira, zihera ko zabira cyane zimushaka. Uwo munsi ntizasinzira, ndetse zanga no gukamwa. Barekura inyana zazo inka zikazitera imigeri. Nuko haza kuboneka akanyamanza gahagarara ku gikingi k’irembo gatangira karirimba kati: “Inka zanze kunywa zabuze Nyiragahinda, inka zanze gukamwa zabuze Nyiragahinda, inka zanze izazo zabuze Nyiragahinda.” Nuko akanyamanza bakagatera ibuye kakigendera. Bwacya bajya kumva bikaba uko.

Noneho inka havamo eshanu zirapfa zizize kutarya no kutanywa, zizize kudakamwa, zizize kutonsa izazo, kuko zabuze Nyiragahinda. Rero baza kubaza aho yagiye, ndetse umwami nyiri urugo aza gutongana ati: “Nyiragahinda wange yagiye hehe ko amatungo yange agiye kunshiraho”? Umugore abirebye aherako azana Nyiragahinda ati: “Ngiri ishyano ryanyu ryaje aha ngaha ni ryo ryaje kuzansimbura”! Amushyize ahagaragara Nyiragahinda na we yanga kunywa, yanga kurya, yanga gukora ibyiza, bitewe n’uko yari yarababaye. Ati: “Kereka munyihereye amata”. Nyiragahinda ntiyabashaga guhaguruka kuko yari amaze guhinamirana, noneho baramuterura bamuterera mu gicuba cyarimo amata. Nuko amata amurekaho noneho bamuteruramo. Bagiyeye kumukuramo basanga yabaye mugari, baherako baterura cya gicuba, bagitura hasi kugira ngo kube cyaribora avemo. Bagituye hasi avamo abaye muzima bya bisebe byose byarakize. Nuko inka zihera zirarisha, ziranywa, ziranezerwa, ziraganga, kuko zari zimaze kubona inshuti yazo Nyiragahinda. Ubwo noneho umwami aravuga ati: “Uyu mukobwa Nyiragahinda ni we nkesha gutunga. None ubwo mukeshya gutunga nkwiye no kumurongora”. Umwami arongora Nyiragahinda aba umugore we.

Nyiragahinda yagiye ajya guhakwa nuko birangira ahindutse umugore w'umwami kubera kugira neza. Ku bw'izo mpamvu rero ineza iruta byose kandi ineza yiturwa indi. Iyo ataza kugirira neza za nka ntabwo yazaga kurongorwa n'umwami. Iyo aza kuzicyaha ntabwo ziba zaramukunze kugeza ubwo nyirabuja amugirira ishyari. Si ge wahera hahera umugani.



Tanga ibisobanuro by'aya magambo ukurikije umwandiko

Guhakwa, ishyari, kwanduruka, ishyano, guhinamirana, igicuba, kuba mugari, kuganga.

Umwitoto w'inyunguramagambo

1. Koresha interuro amagambo akurikira: ishyari, guhinamirana, igicuba, kuba mugari.

Ukoresheje utwambi huza amagambo yavuye mu mwandiko n'ibisobanuro byayo

Kuba mugari	Ingeso mbi igaragazwa n'akababaro umuntu aterwa n'uko mugenzi we ameze neza, atunze, akunzwe... Kuba munini cyane.
Ishyari	Kutabasha kurambura ingingo.
Guhinamirana	Igitutsi utuka umuntu kubera kumushima ko ari igihangange.
Ishyano	Igitutsi bakoresha kuri bagenzi babo batishimiye bagereranya n'umugizi wa nabi.



Ibibazo byo kumva umwandiko

1. Ni iki cyatumye Nyiragahinda aza ibwami?
2. Ni izihe nyamaswa zivugwa muri uyu mwandiko?
3. Kuki umugore w'umwami yanze Nyiragahinda?
4. Kuki umwami yafashe ikemezo cyo kumurongora?
5. Izina ni ryo muntu. Iyi mvugo ihuriye he n'ibivugwa mu mwandiko?
6. Ni izihe ngaruka zo kugira ishyari zigaragara mu mwandiko?
7. Wagira nama ki umuntu ugirira ishyari mugenzi we?
8. Ese ni byiza ko ababyeyi bita amazina nka Nyiragahinda?
9. Wagira iyihe nama umuntu uhohotera abandi nk'uko uyu mugore w'umwami yahohoteye Nyiragahinda?



Ibibazo byo gusesengura umwandiko

1. Tahura ingingo ndangamuco ziri mu mwandiko.
2. Garagaza ingingo z'ingenzi ziri mu mwandiko.
3. Hina umwandiko "Akamaro k'ineza" mu bika bitatu uhereye ku ngingo z'ingenzi wakuye mu mwandiko.

1.2. Gusesengura umugani muremure n'uturango twawo

Umaze gusoma umwandiko "Akamaro k'ineza" usanga utangira ute? Usoza ute? Ese imyandiko yose ni ko itangira? Uratekereza ko ari ukubera iki uriya mwandiko wo utangira utyo?

Usibye uburyo utangiye n'uko usozwa, hari ikindi usanga cyaba gitandukanya uyu mwandiko n'indi wize cyangwa wasomye? Sobanura.

a) Inshoza y'umugani muremure

Tugendeye ku bivugwa mu mugani, dusanga umugani muremure ari igihangano giteye nk'inkuru yiganjemo

amakabyankuru. Umugani ufatira ku bifatika n'ibidafatika: Abantu, ibintu, ibikoko, imyururu, Imana, urupfu, umuyaga, ubunyerere n'ibindi. Umugani "Akamaro k'ineza" urimo abantu: Nyiragahinda, umwami, ... amatungo : inka, inyoni (akanyamanza).

Akenshi umugani ubara ibidashoboka mu buzima busanzwe, nko kuvugisha ibitavuga. Nko muri uyu mugani akanyamanza karavuga, inka zanga kurisha, gukamwa ... kubera ko zabuze ukunda kuzigirira neza, ziritwara nk'izizi ubwenge.

Umugani nubwo uhera ku nkuru zitabayeho, uba ugamije kwigisha gukora igikwiye cyangwa gukosora amakosa y'imyitwaririre y'abagize umuryango uyu n'uyu. Ni yo mpamvu bavuga ngo: "Umugani ugana akariho". Umugani "Akamaro k'ineza", urigisha kugira neza, "ugira neza ineza ukayisanga imbere", ukanenga kugira nabi no kugira ishyari.

Umwadiko "Akamaro k'ineza" ni umugani muremure.

b) Uturango tw'umugani muremure

Iyo tugendeye ku miterere, tubona ko umugani muremure utangirwa na kera habayeho cyangwa umunsi umwe, ugasozwa na si ge wahera. Ubusanzwe hari amagambo yo gushitira abantu ngo bagutege amatwi, utangire umugani nta n'umwe urangaye. Bene aya magambo abimburira umugani nyiri izina ari ubwoko bwinshi, turafata urugero rumwe aho batangira bagira bati:

"Mbacire umugani, mbabambuze umugani, n'uzava i Kantarange azasange ubukombe bw'umugani bumanitse ku muganda w'inzu.

Ubusa bwariye ku manga, umuyaga urabwarurira, agaca karacuranga, uruvu ruravugiriza, nyiramusambi isabagirira inanga.

Akabuye kibiritse kajya epfo, nibirika njya ruguru, imbwa iti: "Mbwee"! Nti: "Gapfe". Inka iti: "Mbaa"! Nti: "Kura dukurane mwana w'Imana".

Harabaye ntihakabe, harapfuye ntihagapfe, hapfuye imbwa n'imbeba, hasigaye inka n'ingoma."

Kubera ko imigani bayicaga nijoro, hari igihe abantu bageraga aho bagashaka gusinzira. Mu rwego rwo

kubakangura, imigani imwe bayihagikamo uduka turirimba. Mu mugani “Akamaro k’ineza” akanyamanza karirimba kagira kati: *“Inka zanze kunywa zabuze Nyiragahinda, inka zanze gukamwa zabuze Nyiragahinda, inka zanze izazo zabuze Nyiragahinda”*.

Kubwira cyangwa kubarira abandi umugani babyita “guca umugani”. Umuntu uca umugani bamwita “gacamigani”.

Umukoro

Niba nta mugani wundi uzi, wegere ababyeyi cyangwa abo mubana bagucire umugani muremure nawe uzacira bagenzi bawe mu ishuri.

1.3. Ingeri z’ubuvanganzo nyarwanda bwo muri rubanda

Umaze gusoma umugani “Akamaro k’ineza” urasanga umugani muremure uri mu buhe bwoko bw’ubuvanganzo? Kubera iki?

a) Inshoza y’ubuvanganzo bwo muri rubanda

Inganzo ni ahantu ubundi bakura ibumba bakoresha mu kubumba inkono n’ibindi bikoresho bikoze mu ibumba. Kera umuhanzi yajyaga mu mwiherero akavayo azanye igihangano, akaba ari byo bita ko avuye mu nganzo. Bityo ubuvanganzo bwo muri rubanda ni ubuvanganzo nyemvugo bukubiyemo ubuhanzi bwamamaye muri rubanda, ubuhanzi bworoshye umunyarwanda abasha kumva no gusobanukirwa. Invugo yabwo ntihanitse, buri wese yabashaga kuyumva.

b) Ingeri z’ubuvanganzo bwo muri rubanda

Mu ngeri z’ubuvanganzo nyemvugo bwo muri rubanda twavugamo: imigani miremire, insigamigani, imigani migufi cyangwa imigenurano, indahiro, ibitekerezo bya rubanda, ibisakuzo, ibyivugo by’amahomvu, amahamba, amahigi, amasare (indirimo z’abasare), amagorane, ibitongerero (mu kuragura, guterekera, kuvura, kugombora...), indirimbo z’imandwa, imbyino, ibihozo (iby’abana n’iby’abageni), ibyidogo by’abahanzi b’ubudehe cyangwa abandi bantu bitabiriye umurimo wa rusange...

Turagerageza kuvuga kuri zimwe muri izi ngeri nk'imigani miremire, insigamigani, ibitekerezo byo muri rubanda, imigani migufi, ibisakuzo, ibisingizo n'ibyivugo by'amahomvu.

1.4. Baciye urwa mbehe

Uyu mugani bawuca bakurikije urubanza babonye ko ruciwe nabi ni bwo bavuga ngo "Baciye urwa Mbehe"! Wakomotse kuri Mbehe wo ku Ijwi muri Repubulika Iharanira Demokarasi ya Kongo; ahagana mu mwaka wa 1900. Mbehe yari umushi agatura ku Ijwi, ku ngoma ya Rwabugiri. Rimwe rero Abanyarwanda batera Ijwi ritegekwa na Kabego ka Mwendo. Baterayo inshuro ebyiri abaca mu myanya y'intoki, ku ya gatatu arafatwa baramwica. Abanyejwi barimo Nkundiye ya Kabego barayoboka. Rwabugiri abonye ko bamuyobotse Nkundiye akazana amaturo, aramurokora, amurekera uruhande rw'icyo gihugu cya se, urundi arugabira Nyiragisasirintore nyina wa Murinzi w'ingangurarugo, ari we bitaga "Incyahababisha ya Rwuhirandekwe".

Nuko Nkundiye atona kuri Rwabugiri cyane; yari afite umutware witwa Mbehe akamutwarira igice k'Ijwi yasigaranye; ni we wazanaga amakoro kwa Rwabugiri, bituma amenyekana ibwami. Umunsi umwe Rwabugiri araza inkera y'imihigo. Ingabo Nkundiye yatwariraga Rwabugiri zitwaga "Inkeramihigo" zirahiga, na Nkundiye arahiga avuga ko na we ari umugabo. Muri icyo gitaramo hakabamo umwega witwa Giharamagara cya Rwakagara. Yumvise imihigo ya Nkundiye aramubwira ati : "Wabaye umugabo wahakanywe n'ibishahu bya so"? Nkundiye biramurakaza abyuka asubira iwabo ku Ijwi ijoro ryose; arongora n'ingabo ze. Ni yo nkomoko y'umugani ugicibwa n'ubu, ngo "Incyuro mbi yashubije Nkundiye iwabo"!

Nkundiye rero amaze kugera iwabo agandisha Ijwi ariyimika. Abatasi bohereza umwe muri bo kubibwira Rwabugiri. Umutasi amena ishyamba yahuranya i Nduga yose n'u Bwanacyambwe asanga Rwabugiri i Rwamagana; asanga ibwami bari mu mihango yo gukura Gicurasi. Rwabugiri amubonye aramumenya amubariza kure ati: "Ko wuhanya aho ku nkiko ni amahoro"? Undi ati: "Nta mahoro Nkundiye yimye Ijwi"! Rwabugiri akaba afite

inkoni mu ntoki ayesa hasi icikamo kabiri; arahaguruka aboneza irembo ryose atabaye; atabara nta nama, nta mana, nta mugaba, nta kugisha (kuraguza by'ibwami). Ni yo mpamvu abasizi bamwise Katabyagira; kuko aticaraga hamwe, cyangwa ngo agende agishije inama abo bari kumwe. Ubwo rubanda rumuhombokaho. Nkundiye amenye ko Rwabugiri amuteye ashira ingabo ku cyambu yimiriza Abanyarwanda ngo babure uko bambuka.

Wa mugabo Mbehe w'umutware wa Nkundiye, we agira ubwoba; yigira inama yo kwambuka ngo asanganire Rwabugiri amuyoboke. Arambuka aramusanganira, yerekana inzira bambukiramo. Abanyarwanda batoranya abantu b'intwari mu mitwe yose; babagira magana abiri. Barambuka, bageze hakurya barema urugamba. Abanyejwi barabasanganira bararwana. Abanyarwanda basigaye hakuno baboneraho inkunga yo kwambuka, Ijwi barariyogoza; ariko Nkundiye ntiyaboneka. Yaje gupfa ku gitero cya kabiri. Bamaze kuhavogera bafata abantu, Rwabugiri ateguka Mbehe gucira urubanza ukwiye gupfa n'ukwiye gukira. Babateranyiriza hamwe bati: "Ngaho Mbehe tangira"!

Uwo akubise amaso wese agasanga ari umuvandimwe we. Mbehe arashoberwa aragingimiranya. Ubwo yaribwiraga ati, "Kubicisha ni bibi; kubireka kandi na bwo ni ukwikorera ishyano"! Igihe akigingimiranya bati : "Cyoo Mbehe ca urubanza"! Akareba umwe ati: "Uyu akwiye gupfa cyangwa gukizwa". Uwo bamweretse wese akavuga atyo. Abahungu babibonye batyo barabiseka, ariko babisekana impuhwe; bamuhakirwa kuri Rwabugiri bati: "Nyagasani buriya yabuze uko agira kandi n'undi wese ni ko yagira: ntawabona abavandimwe be bapfa"! Rwabugiri aragororoka abarokora bose. Kuva ubwo rero, icyo gikorwa cya Mbehe cyamamara mu Rwanda gihinduka iciro ry'umugani; noneho babona urubanza ruciwe nabi (bifitse), ndetse wenda rimwe na rimwe abacamanza babuze uko babikika, bati baciye urwa Mbehe!"

Guca urwa Mbehe (urubanza): gukirakiranya imberabyombi.

Byafatiwe kuri

Murihano Benedigito, Ibirari by'insigamigani



Tanga ibisobanuro by'aya magambo akurikira

Guca mu myanya y'intoki, gutona, amakoro, umwega, agandisha, amena ishyamba, imihango yo gukura gicurasi, ibishahu, kuhanya, ku nkiko, atabara nta nama, nta mana, nta mugaba, aragingimiranya, aragororoka, guca urubanza mu mafufu.

Umwitoto w'inyunguramagambo



1. Tanga ibisobanuro by'imvugo zikurikira, unazikoreshe mu nteruro ziboneye:
 - Guca mu myanya y'intoki.
 - Gutabara nta nama, nta mana, nta mugaba.
 - Guca urubanza nabi.
2. Uzurisha izi nteruro amagambo avuye mu mwandiko:
 - Bamubajije impamvu yamuteye gukererwa
 - Umuntu wese abandi arabihanirwa.
 - Yanze gutangay'umwami arabihanirwa.
 - Yahembwe amafaranga menshi

Ibibazo byo kumva umwandiko



1. Ni ba nde bavugwa muri uyu mwandiko?
2. Kabego ka Mwendo yafashwe ryari?
3. Kubera iki Mbehe yamenyekanye kwa Rwabugiri?
4. "Wabaye umugabo wahakanywe n'ibishahu bya so"? Bishatse kuvuga iki?
5. Uburakari bwa Nkundiye bwagize iyihe ngaruka ku Rwanda?
6. Mbehe yaciye urubanza ate? Urabitekerezaho iki?
7. Ari wowe wari guca ruriya rubanza ute?
8. Ni irihe zina rivugwa mu mwandiko abasizi bitaga Rwabugiri? Barimwitaga kubera iki?



Gusesengura umwandiko

Mutahure ingingo ndangamuco na ndangamateka ziri mu mwandiko.

1.5. Insigamigani

Gereranya umwandiko umaze gusoma n'umugani muremure mwize maze werekane ikibitandukanya, utsindagira cyane umwihariko w'uyu mwandiko. Uravuga iki? Ukivuga ute?

a) Inshoza y'insigamigani

Insigamigani ni imwe mu ngeri z'ubuvanganzo nyarwanda bwa rubanda, zikaba zaragaragariraga cyane, mu mivugire, mu migendere, mu myumvire, mu mikorere no mu mibereho y'ubuzima bw'Abanyarwanda bwa buri muni. Insigamigani ni ahantu cyangwa se abantu babaye abagenuzi b'imigani ubwabo cyangwa se inkomoko yayo. Kimwe n'ibindi rubanda bagenuriyeho, bakabigira iciro ry'imigani, nk'inyamaswa, inyoni, imyururu n'ibindi. Aha ni ho hava izina "IBIRARI BY'INSIGAMIGANI". Bikaba bishaka kuvuga, inkora y'aho ikintu cyanyuze kigana aha n'aha, bikaba kandi bivuga amayira abakomotseho amagambo yabaye umugani banyuzemo igihe iki n'iki, ku buryo ubu n'ubu, byagenze bitya na bitya.

b) Ingeri z'insigamigani

Insigamigani zigabanyijemo ingeri ebyiri:

Hariho insigamigani nyirizina: Ni iz'abantu bazwi neza amavu n'amajyo, ku buryo rubanda bemeye kwigana imigirire yabo no mu mvugo isanzwe igakoreshwa, bigahinduka inyigisho y'ihame. Dore nka Mbehe abura uko acira abavandimwe be urubanza akaruca nabi agira ati: "Uyu akwiye gupfa cyangwa gukizwa", maze babona umuntu uciye urubanza mu mafuti bakavuga ngo "yaciye urwa mbehe". Nka Nyiramataza muka Rukari ati: "Ngiye kwa Ngara". Kuri Bajeyi ba Sharangabo bati: "Yarezwe Bajeyi". Rugaju rwa Mutimbo ati: "Nguye mu Matsa"! ...

Mbehe, Ngara na Bajeyi babaye imvano y'imigani, na ho Nyiramataza na Rugaju rwa Mutimbo babaye abagenuzi b'imigani.

Hakabaho n'insigamigani nyitiro: Ni izo ibindi rubanda bagenuriyeho bikaba iciro ry'imigani, mbese nk'impyisi mu nyamaswa iti: "Harya ko kuvuga ari ugutaruka, nk'iriya Musheru ipfana iki na Mutamu"? Nk'inyombya mu nyoni yahagaze mu itongo rya Rugaju iti: "Mbatere akari aha" ! Nk'igikeri mu myururu, bati: "Gikeri utahe n'intashya", kiti: "Mfana iki n'ibiguruka"? Burya ibyo byose uko ari bitatu, babitwerereye amagambo y'abantu bahishiriye kubera umwanya bafite mu Gihugu cyangwa se mu muryango wubashywe. Si byo ubwabyo byivugiye ayo magambo.

c) Imirangururire y'insigamigani

Barangurura ibirari by'insigamigani, bagaragaza inkora naka yanyuzemo ubwe, cyangwa iyo Gacamigani we yahimbiye kunyuzamo ikindi yitiriye amageza yavuyemo umugani bati: "Umugani uyu n'uyu wakomotse kuri naka na kanaka cyangwa se na nyiranaka".

d) Itandukaniro hagati y'umugani muremure n'insigamugani

Umugani uvuga ibintu bitabayeho ugamije kwigisha kandi ugakoresha amakabyankuru. Ngo umugani ugana akariho. Batangira umugani bavuga ngo kera habayeho, bagasoza bavuga ngo si ge wahera. Mu gihe insigamugani yo itangira ivuga igihe runaka kizwi, abavugwa akaba ari abantu bazwi cyangwa se imyitwarire batsindira ibindi biremwa ariko bashaka kuvuga ibibaho mu mibanire y'abantu.

Umwitoto



1. Tanga inshoza y'insigamigani.
2. Imirangururire y'insigamigani ni iki?
3. Tanga urugero rw'indi nsigamugani uzi, uvuge n'ingeri z'insigamigani ibarizwamo.

1.6. Butati na Nzabuheraheza



Habayeho abagabo babiri, umwe akitwa Butati undi na we akitwa Nzabuheraheza. Butati yari atuye i Nduga, Nzabuheraheza atuye i Buganza; bombi bari abanyabwenge. Umunsi umwe, Butati ati: “Nzajya guhahira amasaka i Buganza”. Baramubwira ngo keretse najyanayo inyama, naho ibindi ntibakibikunda. Butati ati: “Ngicyo ikitabuze”. Areba ikimasa agikubita intorezo arakigusha, barakibaga, barakirya, bacira abo bari basanzwe basangira na bo, hasigara ibigufa, Butati arabihambira aragenda ajya guhaha.

Nzabuheraheza w’i Buganza na we ati: “Ngiye guhaha i Nduga”. Ni ko kubwira umugore ati: “Jya guhura amasaka maze nzigire i Nduga. Nzajya kwihahirayo numvise ko hahahika”. Umugore arayahura arayagosora arayatereka. Umugabo aramubwira ati: “Ndundarundira n’uriya murama, ni wo nzajyana guhahisha”. Umugore arawuyora barawuhambira. Mu gitondo Nzabuheraheza yikorera uruboho rwa wa murama, aragenda no kuri Nyabarongo, ahahurira na Butati na we ajya guhaha. Bararamukanya, baricara baraganira, basangira impamba bari bafite, bavuga n’uko bazinduwe no kujya guhaha. Butati ati: “Ge mfite inyama, none ngiye i Buganza gushaka akabuto k’udusaka”. Nzabuheraheza na we ati: “Ge mfite amasaka, none ndimo ndajya i Nduga guhaha inyama.” Bombi bati: “Ni twe tugira Imana, dusanze umwe afite

icyo undi yifuzaga tutarinze gukomeza urugendo"! Nuko baragurana bombi barikorera, umwe asubira iwe undi iwe. Mu nzira bataha, bibutse ibyo umwe yahaye undi bati: "Ndamuhenze nagende"!

Butati aragenda ngo agere iwe, ahamagara umugore we ngo nazane urutaro rwo gusukaho amasaka. Umugore araruzana; basutseho basanga ari umurama! Butati aratangara cyane ati: "Ni ge wari uzi ko nzi ubwenge, none mbonye undi tubuhwanyije". Nzabuhahaheza na we aragenda ageze iwe ahamagara umugore we ngo azane imbehe nini, yishyirireho inyama. Bahambuye basanga ari amagufa masa. Nzabuhahaheza arumirwa ati: "Mbonye umugabo duhwanyije ubwenge, nimara kuruhuka nzamushyira inyana yo kwigorora, ariko nkazamushuka akayoberwa dore ko yibwira ko azi ubwenge"!

Nuko Nzabuhahaheza ashorera inyana y'ishashi, ayishyira Butati. Ageze kwa Butati, aramubwira ati: "Yewe ga Butati, rya haho ryamfiriye ubusa". Arakomeza ati: "Kuva ubu tubaye inshuti, ndetse ngiyo n'inyana yange uzayindagirire; nzaba nza kuyijyana imaze kubyara". Butati aribwira ati: "Ntuzayibona ye"! Inyana iba aho, irima, bukeye irabyara, biratinda Nzabuhahaheza agaruka aje kujyana inka ye. Bumvise ko Nzabuhahaheza azaza kujyana inka ye. Butati ati: "Nimumpambe, mumubeshye ko napfuye, mumwime inka ye muti: 'Urayibaze uwo wayiragije.'" Nzabuhahaheza araza ati: "Nje kujyana inka yange". Abandi bati: "Ese ko Butati yapfuye atatubwiye iby'iyi nka twayiguha dute, tutazi amasezerano yanyu"? Bati: "Ntuteze kuyibona". Nzabuhahaheza arataha; ageze iwe, abwira ab'iwe ati: "Nimumpambire nk'uwapfuye, maze munjyane kumpamba hamwe na Butati; kandi murebe ihembe mushyiremo ikiremve kimaze iminsi mukinshyire iruhande." Nzabuhahaheza baramuhambira n'ikiremve kimaze iminsi kinuka, baramuzana baza kumuhamba hamwe na Butati. Ageze mu mva afata rya hembe ririmo ikiremve kinuka nabi aryerekeza kuri Butati, umunuko w'ikiremve uba wose, Butati ngo awumve ati: "Uno mupfu bamuzanye yaraboze yo kanyagwa". Nzabuhahaheza ati: "Ni wowe waboze wowe umaze iminsi myinshi". Nuko bombi mu mva umwe ashima undi bati: "Ni koko twembi

turi abagabo, duhwanyije ubwenge, kuva ubu tubaye inshuti, tuge duhana inka n'abageni, kandi ntituzongere kuja dushukana". Bahana inka n'abageni barabana.




Sobanura amagambo akurikira ukurikije inyito afite mu mwandiko

Intorezo, uruboho, impamba, imbehe, kwigorora, inyana y'ishashi.



Umwitoto w'inyunguramagambo

1. Hari magambo menshi akoreshwa mu kuvuga "intorezo." Tanga ayo magambo.



2. Tanga imbusane z'amagambo akurikira
 - Guhana abageni
 - Umugabo
 - Kuruhuka
 - Gushuka
 - Nimumpambirire



Ibibazo byo kumva umwandiko

1. Aba bagabo bombi bafite uwuhe mugambi?
2. Uwagiye guhahira i Nduga yajyanye iki?
3. Ari Butati ari na Nzabuheraheza uwahenze undi ni nde?
4. Ni irihe zina rindi wakwita aba bagabo ritari "abanyabwenge"?
5. Ni iyihe nyigisho y'ingenzi ukuye muri uyu mwandiko?



Gusesengura umwandiko

Garagaza ingingo ndangamuco zigaragara mu mwandiko.

1.7. Gusesengura ibitekerezo byo muri rubanda

Ugereranyije umugani muremure n'insigamugani, erekana ikibitandukanya n'uyu mwandiko umaze gusoma. Ese urasanga waba ari ubuhe bwoko bw'umwandiko? Kubera iki?

a) Inshoza y'ibitekerezo byo muri rubanda

Ibitekerezo byo muri rubanda ni imwe mu ngeri z'ubuvanganzo nyarwanda nyemvugo bwo muri rubanda. Ibitekerezo byo muri rubanda ntibitangizwa na kera habayeho ngo birangizwe na si nge wahera, kuko iyo bigenze gutyo kiba gihindutse umugani. Bishingira ku mazina y'abantu babayeho, cyangwa bagaragara nk'ababayeho mu mateka kuko usanga ari abantu bagenda bavugwaho ku buryo butandukanye. Ibitekerezo byo muri rubanda bigaragaramo amakabyankuru n'ibitangaza kandi ntibitanga amacishirizo agaragara neza y'igihe ibintu byabereye. Mu bitekerezo bya rubanda dusangamo kenshi ahantu hazwi ibivugwa byabereye, aho igihangange kivugwa cyari gituye, imisozi izwi iriho na n'ubu, ndetse n'ibintu bifatika bigaragara nk'ibimenyetso byasizwe n'igihangange kivugwa mu gitekerezo cya rubanda. Aha twatanga nk'ingeri z'udusozi twitwa amabimba ya Ngunda, aho Cacana yarwaniye n'urupfu ku gasozi ka Zoko hari imbuga ishije neza,...

b) Itandukaniro hagati y'igitekerezo cya rubanda, insigamugani n'umugani muremure

Imbonerahamwe yerekana itandukaniro hagati y'umugani muremure, insigamugani n'igitekerezo cya rubanda.

Uturango \ Ingeri y'ubuvanganzo	Umugani muremure	Igitekerezo cya rubanda	Insigamugani
Ingingo z'amateka yabayeho		✓	✓
Amakabyankuru n'ibintu bitabayeho	✓	✓	
Amakabyankuru agira umuntu usanzwe igihangange yaba yarabayeho cyangwa atarabayeho		✓	
Amakuru y'ibintu byabayeho cyangwa bitabayeho		✓	



Imyitozo

1. Tanga itandukaniro riri hagati y'igitekerezo cya rubanda n'umugani muremure ndetse n'igitekerezo cya rubanda n'insigamugani.
2. Tanga urugero rw'ikindi gitekerezo cya rubanda uzi unakibwire bagenzi bawe mu ishuri.

1.8. Irya mukuru...



Ku musozi wa Nkoma hogeye iyi mvugo ngo “Irya mukuru urishima uribonye” cyangwa ngo “Irya mukuru riratinda ntirihera”. Bitewe n’uko utazi ubwenge ashima ubwe, benshi mu rubyiruko bo kuri uwo musozi iyo biyumvamo imbaraga z’ubugimbi, biyongerera ku mazina yabo akabyiniriro ka Ryamukuru. Baba bashaka kwemeza bangenzi babo bangana cyangwa se baruta, ko babarusha ibitekerezo, ibigango cyangwa igihagararo, bityo ko ari bo bagomba kuyobora amatsinda y’imikino, imyidagaduro, kuvuga rikijyana, kuba ba nyambere mu gufata ibyemezo n’ibindi. Nyamara burya ngo “Utaganiriye na se ntamenya icyo sekuru yasize avuze”. Kandi abakuru bagira bati: “Ubuto bubeshya umuntu agaseka” na ndetse bati: “Amagambo atagira mukuru arumba ari indaro”.

Urwo rubyiruko ntiruzi aho imvugo ijimije ibatera ubwiraririzi yaturutse, kandi koko “nta kabura imvano”. Hariho umukecuru wari usheshe akanguhe witwaga Nyiramajoro wari utuye kuri wo musozi wa Nkoma, bukeye arembejwe n’izabukuru, kandi ntawumwitayeho, dore ko uburiza bwe, Rindiro, yari yaragiye guhaha mu Mayaga, umukecuru ahamagara abakobwa be babiri, abuzukuru be n’abakwe be, ariko ubuheta bwe, ari we Tereraho Mutimamuke, ntiyari ahari. Nuko arababwira ati: “Bana bange dore ndashaje, ndumva urupfu rungera amajanja... ariko se mwibagiwe ko indinde iri kabiri, ndinda dawo na ndinda mwana wange! Dore ubu narahorose inda yafatanye n’umugongo”.

Umukwe we witwaga Bwenge wari utuye hafi aho aba yaritaye mu gutwi, kuko n'ubundi ngo izina ni ryo muntu. Ahuta agana iwe, yenda amata mu cyansi, araza ahereza umugore, arakira, na we asomesha umubyeyi wamwibarutse. Ati: "Akira mawe, akira mubyeyi amata niyuzure amatama, wongere utambagire, utakwe mu mataba ya Nkoma na Nkomane. Izihirwe kuko watubyaye. Watureze ugira uti: 'Agato karakura'. Waraturuhanye, urateseka ubura kivurira, ni ko biri "Uwambaye injamba ntagira ijambo". Umukecuru amaze guhembuka ni ko kubabwira ati: "Cyono ejo muzagaruke ku gasusuruko mbarage ntarasanga abakurambere. Dore so yaratabarutse nange ndasodoka musanga". Yongeraho ati: "Mbe minsi waba umutindi! Ntiwanyambuye Nyirabwinturo nkiri urucanda, data agashaka Nyirabugare, akangaragura, akangira umwangavu, ntaraba umwangavu. Iryo nararibonye, iyo inkoko ivuye mu magi arabora kandi agahinda gashira akandi ari ibagara... nange ngo ndashatse ansigira inshuke izi, enye".

Amaso ye y'ibirorirori yasaga n'ayagiye, asigaye arondogora. Yifata mu nda arashinyiriza ati: "Ororororo! Ayiii! Ngiki kiranguguna kimpekenya ... muzanshyingure hepfo y'inzuzi, mukebere Pahulo inkurarwobo i Karugina ... Ahuuu! ... Inzu yo ni iy'abakobwa."

Tereraho akaba akubutse mu runywero aza yivuga ari na ko atembagarana inshyimbo iriho urugina rw'amaraso. Nyina umubyara yumva ijwi rye, dore ko yari atakirora, aramubwira ati: "Tereraho mwana wange ko nduzi wahembutse, kandi ko ubizi, urukwavu rukuze rwonka abana, wanshakiye umukuzo ukansomya ku musa ko inyota imbaga"! Umuhungu muzima ni ko gusubiza ati: "Ceceka wa gakecuru we k'inda nini, k'indashima y'indondogozi! Wahuhutse ugapfa, ukareka kudupfira nabi wanduranya! Uvuga uti: "Iyo urukwavu rukuze bararwica, bakarurya". Abangura ya nshyimbo ngo ayihonde nyina, abari aho baramufata, baramutwama ariko arushaho gusakabaka ati: "Tugabanye amasambu ubundi urapfe upfuye". Umukecuru ni ko kumubwira ati: "Tereraho, Tereriyo, Mutimamuke! Ntugapfe, ntugakire". Afata ku ibere ati: "Iri ryarakonje ntukabone umurambo wange, ntukabone

imva yange, nubiba ntugasarure, nuhinga ntukeze, ndi nyoko"! Akimara kuvuga aya magambo yuje agahinda n'uburakari, hinjira abaporisi babiri. Umwe muri bo ati: "Ni nde Tereraho muri mwe"?

Na we abadukana ya nshyimbo kuyibakubita, ariko yiyamira ati: "Ushaka ko na we mwica anyegere... namwishe ndakaba amacinya! Namwishe wa mwana w'imbwa! Inshyimbo yange, Rutajoma, nayimuhuye mu gihumbi ntiyasamba. Ba baporisi ntibazuyaza, aho tuvugiye aha baramutwara, bamuterera mu munyururu, Tereraho, Gasuzuguro, Nkoramaraso, Mutimamuke!

Bukeye umukecuru arapfa, bamuhamba aho yabategetse, Rindiro na we yari ahari. Pahulo ahabwa inkurarwobo nyirakuru yamugeneye, abakobwa bahabwa ingarigari, abasigaye bagabagabana iminani. Nguko uko Tereraho atatinze kugerwaho n'umuvumo wa nyina yubahutse, akamutukira hagati mu bakwe. Inkuru ikwira hose bati: "Umukuru aba ari mukuru". Utumviye se na nyina yumvura ijeri, kandi irya mukuru urishima uribonye.

Tanga ibisobanuro by'amagambo akurikira:

Ubugimbi, ibigango, imyavu, inshyimbo.



Umwitoto w'inyunguramagambo

1. Uzuzura interuro zikurikira ukoresheje amagambo yo mu mwandiko.
 - Iyo umuntu ashaje yitwaza
 - Abana bageze mu myaka ya barya cyane.
2. Andika imbusane z'amagambo aciyeho umurongo mu nteruro zikurikira:
 - Umuhungu ugeze mu gihe cy'ubugimbi ahindura imyifatire.
 - Ubwenge bwa benshi butera ubukire.
 - Umwana w'uburiza akora imirimo myinshi.





Ibibazo byo kumva umwandiko

1. Erekana ko igisobanuro urubyiruko rwahaga uyu mugani ngo, "Irya mukuru urishima uribonye" kitari cyo.
2. Amagambo akurikira bayita ngo iki?
 - "Tereraho, Terera iyo, Mutimamuke! Ntugapfe, ntugakire." Afata ku ibere ati: "iri ryarakonkeje ntukabone umurambo wange, ntukabone imva yange, nubiba ntugasarure, nuhinga ntukeze, ndi nyoko!"
 - "Namwishe ndakaba amacyinya!"
3. Hitamo igisubizo cy'ukuri.

Icyatumye Tereraho afungwa ni ukubera ko:

 - Yatutse nyina abakwe bumva.
 - Yimye nyina inzoga.
 - Yari yasinze bikabije.
 - Yishe umuntu.

1.9. Imigani y'imigenurano

Musesengure invugo zikurikira mugaragaze imiterere yazo ku byerekeye interuro n'amagambo azigize ndetse no ku bisobanuro zifite:

- Irya mukuru urishima uribonye
- Irya mukuru riratinda ntirihera.
- Utazi ubwenge ashima ubwe.
- Utaganiriye na se ntamenya icyo sekuru yasize avuze.
- Ubuto bubeshya umuntu agaseka
- Amagambo atagira mukuru arumba ari indaro.

a) Inshoza y' imigani y'imigenurano

Imigani y'imigenurano bakunze kuyita imigani migufi bitewe n'uko igizwe n'amabango magufi ariko akubiyemo ingingo nyinshi. Akenshi iba igizwe n'interuro imwe irimo ibice bibiri kandi amagambo ayigize yumvikana ku buryo busanze. Urugero: Utazi ubwenge/ashima ubwe.

Imigani y'imigenurano yaciwe n'abakurambere, ariko ntidushobora kumenya izina ry'uwaciye umugani uyu n'uyu. Imigani y'imigenurano yatugezeho binyuze mu ruhererekane mvugo. Ni yo mpamvu iyo bajya guca umugani bagira bati: "Bakunda kuvuga ngo...", Burya koko babivuze ukuri ngo..."

b) Kuki iyo migani bayita imigenurano?

Kugenura ni ukuvuga ikintu ariko ushaka kuvuga ikindi, utabizi akibwira ko ari aho ugarukiye, naho ubizi agafindura icyo washakaga kuvuga mu buryo buteruye. Kugenura ni nko guca amarenga. Hari abantu bafite amazina y'amagenurano. Ayo mazina aba afite icyo yerekeyeho. Ikerekana ko imigani igenura, nuko buri umugani wumvikana mu buryo bubiri. Uburyo bwa mbere ni ubwa kamere yawo mu mvugo iboneye, itagoronzoye; naho uburyo bwa kabiri n'ubwo mu mvugo y'amarenga ishushanya icyo bawuciriye. Mu buryo bwa mbere umugani wumvikanamo, ari bwo mvugo iboneye, kumva umugani ntibigoye.

Dufashe nk'urugero, uvuze ngo "arimo gishigisha ntavura," birumvikana ko amata atavura ugenda uyakozamo umutozo uyavuruga buri kanya (gushigisha ni ugukaraga umwuko mu gikoma kiri ku ziko ngo ifu yivange n'amazi itaza gufata mu ndiba bigashirira), iryo ni ihame. Urumva koko ari byo, nta kindi gisobanuro ugomba kugira ngo wumve uwo mugani. Uburyo bwa kabiri ni uburyo bw'amarenga, uwumvise agomba gutekereza agashishoza kugira ngo amenye icyo uwo mugani bawugenuriraho, mbese ingingo ishushanya. Uyu mugani urerekana ingorane umuntu aterwa n'abamusesereza mu bikorwa bye bagira ngo berekane ko ibye bidashobora gutungana kandi bifite kidobya. Uko kumutobera urogoya imigambi ye, ni byo bagereranya no "gushigisha amata" kuko amata ubusanzwe aba ikivuguto ari uko wayateretse ukayarekera hamwe agatuza, akabona gufatana, ari byo bita. "kuvura".

Imigani y'imigenurano ikubiyemo uturango twinshi tw'umuco wacu nk'uburezi n'uburere, imibanire, uko twumva isi n'ibiyiraho cyangwa ibitubaho n'ibindi.

c) Ingero z'isesengura ry'imigani migufi

Iyo inkoko ivuye mu magi arabora: Urumva ko ari byo koko, ni na ko bigenda nta gisobanuro bigomba kugira ngo wumve iyo nteruro. Inkoko iraririye amagi, iyo iyavuyemo ni byo arabora. Nyamara mu buryo bwa kabiri ari bwo bw'amarenga ugomba gutekereza ugashishoza kugira ngo umenye icyo cyangwa uwo bawuciraho. Uyu mugani ushushanya umubyeyi utaye abana bato kandi batagira kivurira. Abo bana bararuha kandi bakababara. Ni cyo kubora kw'amagi bishushanya. Iyo mvugo y'ingenurano rimwe na rimwe kuyifindura ntibyoroshye. Ndetse hariho imigani imwe itumvikana mu buryo bwombi, haba mu mvugo isanzwe, imwe twise imvugo iboneye, haba no mu mvugo y'amarenga igenura. Igitera umugani kutumvikana neza ni uko haba harimo ijambo ritumvikana kuko ryashaje ritagikoreshwa mu mvugo y'ubu cyangwa se uwo mugani ukaba ukomoka ku gitekerezo cya kera cyangwa ku mugani muremure utazwi neza.

Amagambo atagira mukuru arumba ari indaro: Utazi ijambo "indaro" icyo rivuga ntushobora kumva uwo mugani. Nturyite indâaro imwe y'abazimu cyangwa se inzu nto cyane. Indaro bavuga muri uyu mugani ni ikintu kinini kisanzuye. Umurima w'indaro ni umurima munini cyane. Kurumbya umurima w'indaro ntusarure n'irya kirazira ni ukugusha ishyano. Ikigereranyo cy'uyu mugani: inama igiwe n'abantu bato batagira umuntu wo kubagimbura, noneho inama yabo yajya kuzura bakabitaba kubera kudashobora kubitunganya ni yo magambo atagira mukuru arumba ari indaro kuko aba ahari ariko agasubira kuba ubusa.

Amatwi yuje amata ntiyumva: Hari abantu bakira bikabatera imico mibi. Bamwe biga kurengwa bagasuzugura abo bahoranye mu bukene. Amatwi yuje amata ni umukire warezwe. Kutumva ni ugusuzugura biterwa no kwibagirwa ko iby'isi ari intizo. Uwo mugani ucibwa iyo umuntu abonye umuntu uhindura indoro n'ingendo, akitwara uko atitwaraga, agasuzugura bitewe n'uko yateye imbere, cyangwa hari icyo yungutse mu buzima.

Indinde iri kabiri, ndinda dawe na ndinda mwana wange: Baca uyu umugani berekeje ku kamaro abana bagirira ababyeyi babo, babitura akamaro babagiriye bakiri bato. Umwana muto aba afite intege nke se cyangwa nyina akamuterura, umusaza cyangwa umukecuru na we aba afite intege nke umwana akamusindagiza.

Izina ni ryo muntu: Umugani ucibwa iyo abantu babonye umuntu ukora ibikorwa cyangwa ufite imyitwarire ihuje n'izina rye.

Inshamake

Mfashe ko: Imigani migufi bita kandi imigani y'imigenurano ari imvugo ngufi zivugira mu marenga igitekerezo umuntu adashaka kwerura mu mvugo ihishuye.

Ubu nshobora: Kunoza imvugo yange nsha imigani migufi mu biganiro bisanzwe, nandika cyangwa se mu biganiro mpaka kugira ngo nshyigikire igitekerezo cyangwa ingingo ku buryo bugufi kandi bunoze.

Umwitoto



1. Tanga imigani itanu y'imigenurano ifatiye ku nka.
2. Shaka mu mwandiko imigani yerekana ko:
 - Kutumvira ababyeyi bizana ingaruka.
 - Abana bakwiye kwita ku babyeyi babo no kubafasha bageze mu zabukuru.
 - Umwana ubuze nyina akiri muto ababara, akagira ubuzima bubi.
 - Ibyago bisimburana n'ibindi byago, ibibazo bikurwa n'ibindi bibazo.
 - Umuntu w'umukene naho yavuga ijamba ryiza nta wuriha agaciro.
3. Sobanura iyi migani ikurikira:
 - Aho ibyago byaje ibihaha bica umuhoro.
 - Amacumu y'inda ntashira igorora.
 - Amirariro atera aminaro.
 - icyansi k'impumyi cyoga itashye.

1.10. Sakwe Sakwe...! Soma!

Ica/findura ibisakuzo bikurikira:

- Mpiritse indobo ikwira ingo zose.
- Kinigirije umugara kijya kubaza umugambi wo gutabara.
- Ngesa bumera.
- Sakuzza n'uwu muri kumwe.
- Nyirabugenge n'ubugenge bwayo.
- Nkubise urushyi rurumira.
- Aho nagendaniye nawe wambwiye iki?
- Mpuye n'umuzimu atambana imbazo.
- Kakwica kakwigarika akambari ka Matene.
- Mama nararushye.
- Terera Rubona ubone ishyano.
- Ni ge muzindutsi wa cyane nasanze umuzimu yicanye ku kaguru.
- Nubatse urugo hejuru y'urupfu.
- Idagadure naraguharuriye.



Tanga ibisobanuro by'aya magambo akurikira:

Amazimwe, ururembo, kunigiriza, kugesha, ubugenge, umuzimu, akambari.



Umwitoto w'inyunguramagambo

Uzuza izi nteruro ukoresheje amwe muri aya magambo: kuringaniza, umuzimu, amazimwe, amahane, gutema, kugesha.

1. Uburo bwe bureze azajya.....ejo.
2. Ni ngombwa.....urubyaro kugira ngo uzashobore kubaho neza.
3. Uyu mugore agira.....kubera ko akunda kuvuga ibyo atahagazeho neza.

1.1.1. Ibisakuzo

- Mugendeye ku bisakuzo mwabonye, mubona ibisakuzo ari iki?
- Ese umuntu yasakuza ari umwe?
- Bifite akahe kamaro?
- Ni ba nde basakuza?
- Mukurikije ibisakuzo mwabonye n'ibindi muzi, mu bisakuzo hashobora kubonekamo ingingo z'umuco cyangwa iz'amateka? Mutange ingero mubyerekana.

a) Inshoza y'ibisakuzo

Ibisakuzo ni umukino wo mu magambo, ugendanye n'ibibazo n'ibisubizo byabyo, bihimbaza abakuru n'abato, kandi birimo ubuhanga kuko byigisha gutekereza. Ibisakuzo ni umukino nyurabwenge. Igisakuzo gisakuzwa mu magambo yacyo kikiwa mu magambo yacyo. Ibisakuzo byagiraga abahimbyi b'inzobere muri byo, bahoraga bacukumbura kugira ngo barusheho kunoza no gukungahaza uwo mukino. Umuntu asakuza n'uwo bangana cyangwa aruta. Mu muco nyarwanda kirazira gusakuza na Sobukwe cyangwa Nyokobukwe.

Usakuza abwira mugenzi we ati: "Sakwe sakwe"! Undi na we akiriza ati: "Soma".

Akamubwira igisakuzo, akakica cyangwa kikamunanira. Ugusakuza iyo abonye ko igisakuzo kikunaniye arakubwira ati: "Kimpe". Nawe cyananiye uti: "Ngicyo"! Ubwo akakiyicira, ukaba uratsinzwe.

Ibisakuzo bimwe na bimwe bigaragaza igihe byahimbiwe ndetse bikerekana amateka.

Ibyo bahimbye mu gihe imodoka, ifaranga, iradiyo, abazungu, byari bimaze kugera mu Rwanda.

Ingero

Igisakuzo	Igisubizo
Nyamwitera agashyarara mu ishyamba.	Imodoka
Rambagira bugondo.	Imodoka mu muhanda.

Ihirike naraguharuriye.	Imodoka mu muhanda
Abazungu bazanye byinshi n'ibizatuzura.	Ifaranga
Nagutera icyatumye umugabo ataryama.	Ifaranga
Ni nde watanze umuzungu kwicara ku ifoteye.	Ivunja
Nkandagiye itafari rimena itegura risakaza inkuru i Burayi.	Iradiyo

Mu bisakuzo habonekamo ingingo z'umuco.

Ingero

Igisakuzo	Igisubizo
Mama arusha nyoko amabuno manini	Igisabo
Mama nshuti	Ikirago
Abana bange barara bahagaze bwacya bakaryama	Imyugariro

b) Akamaro k'ibisakuzo

Ibisakuzo bifasha abana ndetse n'abakuru gukora imyitozo mfuturamvugo igamije kubamenyereza gutekereza, kuvuga badategwa no kumenya gufindura imvugo zidanangiye kandi bikabatoza umuco ndetse bikanabamenyeshya amateka.

Mfashe ko: Ibisakuzo ari umukino nyurabwenge wo mu magambo, ugendanye n'ibibazo n'ibisubizo byabyo, bihimbaza abakuru n'abato, kandi birimo ubuhanga kuko byigisha gutekereza.

Ubu nshobora: Kunoza imvugo nsakuza na bagenzi bange, tugakina kandi twiyungura ubumenyi.

Umwitozo



1. Tanga ingero z'ibisakuzo bitanu uzi maze unabisubize.
2. Ukoresheje ikaramu y'ibara garagaza muri iki kinyatuzu ibisubizo by'ibi bisakuzo:

Urugero

Mama arusha nyoko amabuno manini: Igisabo

- Mama nshuti.
- Abana bange barara bahagaze bwacya bakaryama.
- Nyamwitera agashyarara mu ishyamba.
- Abazungu bazanye byinshi n'ibizatuzura.
- Ni nde watanze umuzungu kwicara ku ifoteye.
- Nkandagiye itafari rimena itegura risakaza inkuru i Burayi.
- Ngeze mu ishyamba rirahubangana.

I	S	E	K	U	R	U	I	K	I	R	A	G	O
G	C	A	W	B	Y	A	M	H	M	B	A	B	M
S	A	H	D	C	V	G	Y	C	O	C	I	G	I
B	M	K	Y	I	A	O	U	B	D	P	G	B	G
O	C	V	G	I	N	Y	G	N	O	E	I	I	I
I	F	A	R	A	N	G	A	U	K	W	S	R	S
I	C	V	A	U	B	A	R	K	A	M	A	N	A
I	N	I	H	A	M	A	I	V	U	N	J	A	B
W	G	F	M	S	C	M	R	R	L	P	L	L	O
S	I	R	A	D	I	Y	O	B	A	T	N	K	R
I	N	Z	A	R	A	Y	U	M	U	S	O	R	E

1.12. Imfizi ikwiye Kigeli

Imfizi ikwiye Kigeli
Ya Rutigimbwa
Ndi ubukombe si ndi
ingimbi;
Aho nabaye ingenzi
Ni ubwo nambutse ingeri
ndende.
Indege yangurukanye
bidatinze,
Sinakurwa umutima
N'uko ngiye iyo batanzi;
Nari ntamirije igisingo,
Nsesekaje ikamba ku
mubiri,
Ngenda ndi rubibi
rw'igikaka;
Nkataje imbere y'abasore!
Ngisesekara i Buruseli,
Sinagira umususu
nk'abanyamusozi:
Nsanze abasirikari
bampagarariye,
Urebe ko ndi igihangange,
Sindagahindagara.
Abazungu bamparira
urwo rubuga,
Ngo abatanzi
banyitegereze,
Batanshyikirije amaso,
Bashinga urwego rwo
guhagararaho.
Ngo kundeba ni
uguharamba inzovu.
Izuba riranga
bakindangamiye;
Banshimye ko ndi indatwa
Iturutse i Nduga,

Nkubitanya n'ikamba.
Kayihura ati: "Dore
inyamibwa
Ngo iraturuka kwa
Ndahiro,
Abandi bami ababereye
indongozi".
Gashugi ati: "bamuroye
inshinguro,
Babonye ko agendera
ishema,
Atari igishagasha,
Ni ho yakuye iryo shimwe!
Nimwishongore
uruhehemure"!
I Burayi baririmba
uruhebuza
Bamperekeje,
Mpita iy'i Burundi
Kubaratira iyo mpeta,
Ndayikatarana ndinda
ngera i Butare,
N'abatware baje kuntega,
Bati: "Nkubito y'imanzi
Uracyagendana imbaraga?
Twagize ngo imbeho y'i
Burayi,
Uzaza yarakugize
imbumburi"!
Nti: "Burya ihimbira ku
mpomba;
Yasanze ndi umugabo
w'impambi,
Nyibera impangare ntiya-
tobora!
Ahubwo wasangaga ntu-
tubikana icyuya"!
Bati "Ni uko icyubahiro

Indirimbo bayihanikira
rimwe

Ngo ndi umwami
ndaboneye,
Si amogezo ya rubanda!
Bati "Rubazanganizi na
Ngoga
Uyu mugabe ko ari
urugangazi,
I Rwanda mumunganya
nde"?
Bati "ubugabo ni nk'ubwa
Ruganzu,
Icyo amurengeje ni uru
rugendo,
Urugero rwabo ni
rumwe".
Bati: "Ese ko agendera
igikabwe
Yakandagira isi
ikanyeganyega,
Abamukurikiye bagakuka
umutima,
Ngo bagiye kurigita,
Aho ntimwaduteje
intamati: "?
Bati: "Izo ni intambwe
z'ubukaka,
Ubwo bukwerere
yarabubyirukanye,
Si ibyo yigirira ino;
Nguwo ruribagiza
rw'ikirenga,
Ni rurikanwa rw'imirimba,
Ni uwo baririmbana ijabo
Ijabiro kwa rugambwa!
Ni ingangare ibereye
ingabo,

Usanzwe ukinganya
n'inkuba,
Uri inkaka ntibyijyanwa".
Rubabazanganizi aranyo-
geza burasohokwa!
Ageza mu museke
agisobanura ibigwi
byange!
Mbyuka kare bugicya,
Icyuma gicana imodoka
ndagikaraga,
Ndayikarurukana kuri
icyo kibuga,
Ndayiburabuza ntibo-
ngerera kuyibona,
Nyicana i Kibungo kuri
Buye,
Igihe bakibanze amatwi
Bumva inkuba ziresa ku
iteme!
Ntambika umucyamo wa
Mbazi,
Imbaraga nyongera mu
rutugu,
Umuhanda waho ndawu-
tabagura,
Irya mpinga ya Mwurire
Nsiga nyirimbuye
n'imipira.
Ndinda ndenga i Karama
ka Save,
Abanya Musasu
mbasakazamo urwamo
rw'ihoni.
I Buhimba nyihacana
umuhindo w'ivumbi,
Bumva ihorera mu kirere!
Bakiraranganya amaso,
Bumva Nyiringoma ngeze
mu Ngorongari.

Uwo ni Rugamba rw' i
Tanganyika"!
Batangira ubwo banyereka
ibirori,
Birangiye banjyana mu
biro,
Nkibigera imbere
sinajijinganya,
Ninjira nkataje;
Nkandagiye amatafari
araturika
Ku isima hasa imitutu:
N'ubu nasize batangiye
gusubiriza!
Sinazarira nzinduka
nzenguruka,
Iyo ntara bayintambagiza
bidatinze
Banyereka imidugudu
n'ibirorero,
Ari ko nsanganizwa
n'ibirori.
Mbizihiye bacuranga
imiziki
Imizigo ikererwa mu
modoka,
Amaduka barayakinga;
Nababereye urukerereza!
Impundu bazivanga
n'impanda,
Banyambika impeta
y'ubukuru,

Ndambagira njya i Nyanza
kumurikirwa inyambo
I Nyamagana ya Gitisi,
Iyo banshuranga
Rutayoberana;
Mpitira i Kabare njya mu
Rukari,
Niyereka Karinga
nyibwira akamaro
nayigiriye.
Nageze aho bantinya,
Ndi umutayihana wa
Kigeli.
Sindigera ngira ubwoba,
Ubwiza nabuvanze
n'ubugabo.
Bati: "Iyi nganji y'Igihugu,
Ubwo ahindukiranye
umwete,
Umwanya w'abami
yawugezemo,
Nta muhinza uzamuhitana
ngo age imbere ye,
Yitwa
imbangukanabigwi".



Shaka ibisobanuro by'amagambo akurikira

Rutigimbwa	Intamati	Indongozi
Ubukombe	Iribagiza	Imbumburi
Ingimbi	Rurikanwa	Impomba
Ingeri ndende	Imirimba	Impambi
Igisingo	Ijabo	Inkaka
Umususu	Ijabiro	Kubanga amatwi
Abanyamusozi	Ingangare	Urwamo
Sindagahindagara	Ibirorero	Umutayihana
Guharamba inzovu	Urukerereza	Inganji
Indatwa	Impanda	Umuhinza
Urugangazi	Inyamibwa	Imbangukirabigwi

Umwitoto w'inyunguramagambo



Ukoresheje akambi huza ibisobanuro n'imikarago yavuye mu gisingizo ukurikije ruriya rugero

Bwira bakinyitegereza

Narabashimishije

Sinatinya

Abera bandekera umwanya

Imitwaro itinda mu kinyabiziga

Sinagira umususu.

Imizigo ikererwa mu modoka.

Ubwiza nabuvanze n'ubugabo.

Abazungu bamparira urwo rubuga.

Nageze aho bantinya,

Izuba rirenga bakindangamiye.

Nababereye urukerereza.

Ndi umutayihana wa Kigeli.



Ibibazo byo kumva umwandiko

1. Ni nde bavuga muri uyu mwandiko
2. Baramuvugaho iki ?
3. Tanga interuro nibura ebyiri zigaragaza ko ari umwandiko urata.
4. Tanga urugero rw'amazina yakoreshejwe mu mwandiko asingiza uvugwa.
5. Ha undi mutwe ukwiye uyu mwandiko.



Gusesengura umwandiko

Garagaza amagambo ari mu mwandiko arata, cyangwa ataka uvugwa.

Garagaza insanganyamatsiko ivugwa mu mwandiko.



Umwitozo wo gufata mu mutwe

Fata mu mutwe uyu mwandiko maze uzawuvuge imbere ya bagenzi bawe wubahiriza isesekaza n'iyitsa.

1.13. Gusesengura igisingizo

Tanga itandukaniro hagati y'umwandiko umaze kwiga n'iyindi wize ugendeye ku kivugwa n'uburyo kivugwamo? Uhereye ku buryo bavuga ikivugwa, uyu mwandiko wawita iki?

a) Inshoza y'igisingizo

Izinaigisingizorikomokakunshinga "gusingiza" bisobanura kuvuga umuntu cyangwa ikintu ucyogeza kubera ibyiza bye cyangwa byacyo. Igisingizo rero ni umwandiko wa gisizi; wanditswe ku buryo bw'imikarago, ukubiyemo

amagambo yo kurata cyangwa yo kogeza umugiraneza. Ni na yo nkomoko y'imvugo zikurikira : "Kutavuga mu bisingizo uwagukuye mu kaga ni uguhemuka.",

"Uko yahaye abantu benshi inka na bo ni ko bamuhunda ibisingizo".

Ibisingizo rero si ingeri y'ubuvanganzo nyarwanda yihariye, ahubwo ingeri runaka y'ubuvanganzo ishobora kuba igisingizo bitewe n'uko insanganyamatsiko irimo yubakitse. Umuvugo, ikivugo cyangwa amayingabyivugo bishobora kuba ibisingizo igihe umuhanzi hari ikintu yasingizagamo.

b) Uturango tw'igisingizo

Uhangana igisingizo akoresha amagambo ataka cyangwa yogeza uwo cyangwa icyo asingiza, akagaragaza impamvu ituma amusingiza, akirinda kuvuga ibibi, akibanda ku byiza gusa.

Inshamake

Mfashe ko: Igisingizo ari umwandiko wa gisizi; wanditswe ku buryo bw'imikarago, ukubiyemo amagambo yo kurata cyangwa yo kogeza umugiraneza. Uhangana igisingizo akoresha amagambo ataka cyangwa yogeza uwo cyangwa icyo asingiza, akagaragaza impamvu ituma amusingiza, akirinda kuvuga ibibi, akibanda ku byiza gusa.

Ubu nshobora: Gusesengura no guhanga igisingizo nubahiriza imiterere n'uturanga twacyo.

Umwitoto



Hanga igisingizo kuri imwe muri izi nsanganyamatsiko

- Ibyiza bya Porisi y'u Rwanda
- Inshuti yange nkunda
- Ibyiza by'ishuri nigamo

1.14. Twivuge bahu!



1. Nagiye ku rusenge ibitugu ndabitigisa, imyambi ndayisakiranya, abo twari kumwe ndabacyaha, nitwa Cyaradamaraye.
2. Nivugiye ku rusenge, umwana yivugira mu nda ya nyina ntaho byabonetse.
3. Ndi inkubito idatinya, ndi Nyambo sinkenga, Mucyo wa Rudatinya, ndi umuhungu ntibyijanwa.
4. Ndi umuhungu ndi umuziraguhungu, mirindi y'abasore nanze guhunga iwacu twaraye ubusa.
5. Uri inyundo.... Ndi isata ibasumba ndi intore ya Rugayampunzi. Nakubitiye umubisha mu gikombe, ndamuzamura mukubitira mu gahinga ngo ejo batagira ngo ni inkangu yamumfashije.
6. Nahagaze mu Gasenyi ndasa mu Gasiza, umukobwa wambonye ati: "Uno musore ntarasa neza arakandongora".



Sobanura amagambo akurikira

Isata, igikombe, inkangu, urusenge, mu gahinga



Ibibazo byo kumva umwandiko

1. Ni iyihe nsanganyamatsiko usanga muri ibi byivugo?
2. Kuvuga ko umuntu ari Cyaradamaraye bishatse kuvuga iki? Birakwiye ko babivugira ku muntu w'umugabo? Kubera iki?
3. Ni ibihe bikorwa by'indengakamere usanga muri ibi byivugo? Sobanura igisubizo cyawe.

1.15. Ibyivugo by'amahomvu

- Muhereye ku byivugo by'amahomvu mwasomye murasanga birangwa n'iki?
- Mu byivugo by'amahomvu bavugamo iki?
- Ibyivugo by'amahomvu biba bigamije iki? Bimaze iki?

a) Inshoza y'ibyivugo by'amahomvu

Ni ibyivugo bigufi bisanzwe, abana bivuga.

b) Uturango tw'ibyivugo by'amahomvu

Akenshi haba harimo amagambo yo kwivuga birata ariko yo gusetsa no kwidagadura. Iyo rero bakitse imirimo baririmba akaririmbo ko guhamagarira buri wese kwivuga bagira bati: " Uri inyundo, uri inyana ya Rukara rwa Ruyange, uri inyundo. Nawe Kanaka (bavuga izina ry'umuntu umwe mu bari aho) ngwino utubwire icyo wamariye abandi bahungu uri inyundo".

Uwivuga yigereranya n'ibintu, inyamaswa, akaba ari byo ashingiraho ubuhangange bwe.

Aho kwirata ubutwari bwo ku rugamba uwivuga mu

mahomvu yirata ubwiza, ubuhangange mu kurya, mu gukundwa n'abagore n'abakobwa, ...

Mu byivugo by'amahomvu habamo ibigereranyo bisekeje. Nta bikorwa byo ku rugamba bivugwamo ahubwo biba bigamije kwidagadura, kandi biba bisekeje.

- Ibikorwa birata si iby'ubutwari uwivuga yagiriye ku rugamba, ahubwo ni iby'ubuzima busanzwe. Uwivuga kandi ashyiramo amakabyankuru.

Urugero


- Ndi isata ibasumba ndi intore ya Rugayampunzi
- Ndi umuhungu ndi umuziraguhungu. Nanze guhunga iwacu twaraye ubusa. Sinkenga
- Nagiye ku rusenge ibitugu ndabitigisa.
- Nitwa Cyaradamaraye.
- Nivugiye ku rusenge, umwana yivugira mu nda ya nyina.
- Nanze guhunga iwacu twaraye ubusa.
- Umukobwa wambonye ati: "uno musore ntarasa neza arakandongora"



Umwitozo

1. Ibyivugo by'amahomvu birangwa n'iki?
2. Himba ikivugo cy'amahomvu ukurikije ibiranga bene ibyo byivugo maze wivuge ikivugo cyawe imbere ya bagenzi bawe.

1.16. Kwita izina mu muco nyarwanda



Kuki umwana avuka bakamwita izina? Izina rihuriyehe n'umuntu? Izina ry'umuntu ni ryo rimutandukanya n'abandi, ni ryo rimuha umwanya mu muryango, bakamuhamagara, bakamuvuga. Ni ryo rigira umuntu uwo ari we. Izina ni icyubahiro cy'umuntu, uwubashye izina ryawe nawe aba akubashye. Igihe cyo kwita umuntu izina wabaga ari umuhango ukomeye, utumirwamo abana n'abakuru. Ese ni gute umuhango wo kwita izina umwana wagendaga ute mu muco nyarwanda?

Mu muco nyarwanda umwana ahabwa izina ku munsi wa munani avutse. Umwana yahabwaga izina mu museke. Se

yabanzaga guterura uwo mwana w'uruhinja akamusimbiza maze akamubwira ati: "Kura ujya ejuru, nkwise..... (akavuga izina)". Umugore na we yabaga ashobora kwita izina umwana wabo ariko izina ryahamaga ryari iryiswe na se.

Umugore wabyariye mu rugo rutari urw'umugabo we, yarahukanye cyangwa yarazindutse, yamaraga gusohoka agataha akajya kwitisha izina ku mugabo we. Iyo se w'umwana yabaga atariho, umuhagarariye ni we wamuhaga izina mu kimbo cya se. Umwana w'uruhinja wabaga agifite sekuru na nyirakuru, nyina yamaraga kuva ku kiriri akamujiyana kwa sebukwe, akaba ari we ubanza kumwita izina.

Ku munsu wo kwita izina hatumirwaga abana, abavandimwe, abaturanyi n'inshuti, ngo baze kwita umwana izina ari byo kurya ubunnyano. Babaga batetse, benze inzoga, abana n'abakuru bateranye. Abana babanzaga kujya guhinga. Bahingishaga ibiti by'inkonzo by'umutobotobo. Bagahinga, benda gutura ikivi, umwe mu bakuru akabatera amazi ati: "Nimutahe imvura iraguye", maze bagataha. Iyo abana babaga bahinguye, bajyaga mu rugo, bagasanga babateguriye ibyo kurya. Byabaga birimo ibishyimbo bacucumyemo imboga kandi bagizemo utubumbe twinshi, buri mwana akagira akabumbe ke. Akabumbe kose kaba kageretseho agasate k'umutsima. Bakazana amata y'inshyushyu n'ay'ikivuguto bagatereka aho, abana bakaza, bakabaha amazi bagakaraba, bakarya, bakazana n'amata bakanywaho uko bangana. Nguko kurya ubunnyano.

Iyo abana bamaraga kurya ntibabahaga amazi yo gukaraba; barazaga bagahanaguriza intoke zabo ku mabere ya wa mubyeyi, bagira ngo "Urabyare abana benshi, abahungu n'abakobwa". Ubwo nyina w'umwana akamukikira, buri mwana agahita, akamwitegereza ati: "Mwise naka". Abana barangiza hagakurikiraho abakuru.

Abana ntibatahaga iwabo imuhira, na nyina w'umwana ntiyahagurukaga aho yicaye, keretse umwana abanje kunya cyangwa anyaye. Nyina yabaga yamuhaye amata, yamuhaye ibere, agira ngo anye cyangwa anyare vuba. Iyo umwana yatindaga kunya cyangwa kunyara, bamu

haga amazi y'ibibabi by'inkeri yamara kunnya no kunyara bakabona kugenda. Kugenderaho byafatwaga nko gusurira umwana nabi, agapfa. Izina ry'umwana ryamenyekanaga bukeye.

Umunsi wo kwita izina babaga bakoshereje umwana ingobyi ebyiri, iy'intama n'iy'inka; bakazimukozaho, kugira ngo imwe nibura bamuheke mu yindi. Iyo babaga batabigenje batyo, bukeye bakamuheka mu yo batamukojejeho, icyo gihe byasuriraga umwana nabi, agapfa. Umwana w'uruhinja iyo yabaga afite mukuru we, ku munsi wo gusohoka baramumuhekesha, kugira ngo bazahore barutana, umukuru ntarutwe na murumuna we, bitewe n'uko yazingamye.

Umugore yasohokanaga icumu, ingabo, umuheto n'ishinge. Ibyo yabaga yasohokanye, babimanikaga mu ruhamo rw'umuryango, cyaraziraga kubijugunya gusa.

Uko rero ni ko umuhango wo kwita izina wagenaga mu muco nyarwanda. Dusigasire umuco nyarwanda twubahiriza umuhango wo kwita izina mu miryango yacu, kuko burya izina ni ryo muntu.



Sobanura amagambo akurikira

umuseke, Umuse, Ibiti by'inkonzo, Umutobotobo, umusambi, Bamukoshereje ingobyi, Intara, Ingabo, uruhamo rw'umuryango, sekuru, nyirakuru, ishingwe

Umwitoto w'inyunguramagambo

- Ni ayahe magambo ari mu mwandiko avuga kimwe n'aya akurikira: **umuce, mu rukerera urutaro, guharura ikivi.**
- Ntibavuga kugura ingobyi, bavuga....



Ibibazo byo kumva umwandiko

1. Uyu mwandiko uravuga ku ki?
2. Umwana wavutse yahabwaga izina ryari?
3. Kubera iki umwana bamuhekeshaga mukuru we?
4. Umuhango wo kwita izina witabirwaga na ba nde?
5. Ni nde witaga umwana izina iyo yavukaga se atakiriho?
6. Ukurikije umwandiko, umuhango wo kwita izina wakorwaga ute?
7. Utekereza ko ari ukubera iki umuhango wo kwita izina bawitaga kurya ubunnyaano?
8. Gereranya uko umuhango wo kwita izina wakorwaga n'uko ukorwa ubu.



Gusesengura umwandiko

- Tahura ingingo z'ingenzi ziri mu mwandiko.
- Hina umwandiko "Kwita izina" mu magambo yawe bwite.



Umwitoto w'ubumenyingiro

Kujya impaka

Mwungurane ibitekerezo ku kamaro k'umuhango wo kwita izina muri iki gihe. Ese mubona uwo muhango ugifite agaciro muri iki gihe?

1.17. Imbata y'umwandiko ntekerezo

1. Mukurikije ibika by'umwandiko "kwita izina" nimuvuge ibice biwugize (imbata yawo) kandi mugaragaze ibika ibyo bice biherereyemo.
2. Mukurikije ibice by'umwandiko "kwita izina" nimutange imbata y'umwandiko ntekerezo.
3. Nimusobanure ibice by'umwandiko ntekerezo.

Imbata y'umwandiko ntekerezo

Umwandiko ntekerezo utangirwa **n'umutwe**. Umutwe uba ugizwe n'interuro imwe ifitanye isano n'ibiri buvugwe mu kurambura ingingo, mbese ni inshamake y'umwandiko wose. Kugira ngo utandukane n'ibindi bice biwukurikiye, umutwe bawucaho umurongo cyangwa bagasiga umwanya mbere yo gutangira igice gikurikiyeho, cyangwa se ukaba wanditse mu buryo bwihariye (ugaragara cyane).

Usibye uyu mutwe, umwandiko ntekerezo ugira ibice by'ingenzi bitatu, ari byo intangiriro, igihimba n'umusozo. Intangiriro n' umusozo biremwa n'igika kimwe kimwe mu gihe igihimba cyo kiremwa n'ibika byinshi. Tumenye ko umwandiko wuzuye uba ufite nibura ibika bitatu. Iyo bigiye munsu, uwo mwandiko uba ubura igice kimwe cyangwa ibice bibiri mu bigize umwandiko.

Umwandiko “kwita izina” ugizwe n'ibice bine:

Umutwe	kwita izina
Intangiriro	igika cya mbere
Igihimba	kuva ku gika cya kabiri kugera ku gika cyamunani
Umusozo	igika cya nyuma.

1.18. Izina mbonera gakondo

Soma iki gika gikurikira cy'umwandiko "Kwita izina mu muco nyarwanda" maze usubize ibibazo bikurikira :

Umunsi wo kwita **izina** babaga bakoshereje umwana ingobyi ebyiri, iy'**intama** n'iy'**inka**; bakazimukozaho, kugira ngo imwe nibura bamuheke mu yindi. Iyo batabigenje batyo, bukeye bakamuheka mu yo batamukojejeho, icyo **gihe** bisurira umwana nabi, agapfa.

Umwana w'uruhinja iyo afite mukuru we, ku **munsi** wo gusohoka baramumuhekesha, kugira ngo bazahore barutana, umukuru ntarutwe na murumuna we, bitewe n'uko yazingamye.

Erekana uturemajambo tw'amazina atsindagiye mu gika cya karindwi n'amategeko y'igenamajwi yakoreshejwe.

Uhereye ku ntego y'ayo mazina, izina ni iki? Izina gakondo ni iki? Izina mbonera ni iki? Izina mbonera gakondo ni iki?

Nimwerekane andi mategeko y'igenamajwi atakoreshejwe mu mazina mwasesenguye.

a) Inshoza y'izina mbonera gakondo

Izina ni uburyo abantu bemeza kwita ibiriho, ibyo babona ibyo bumva, cyangwa ibyo batekereza.

Dukurikije inkomoko y'amazina, amazina karemano mu rurimi rw'Ikinyarwanda, amazina y'umwimerere yitwa amazina gakondo (igiti, umugezi, umurima,...), mu gihe hari andi mazina y'amatirano nk'ishati, ikoti, ishuri n'ayandi.

Dukurikije intego y'izina, amazina y'Ikinyarwanda afite uturemajambo tw'ibanze dutatu (indomo, indanganteko n'igicumbi), yitwa amazina nyakimwe cyangwa amazina mbonera.

b) Uturemajambo tw'izina mbonera gakondo

Kugira ngo umenye uturemajambo tw'izina, ubanza kurigoroza (uritubya, uritubura cyangwa ukarishyira mu nteko zinyuranye). Igice kidahinduka ni cyo bita igicumbi (C) kibanzirizwa n'indanganteko (RT) na yo ibanzirizwa n'indomo(D).

Igicumbi: Ni akaremajambo k'izina kadahinduka iyo ugoragoje izina

Ingero

- Inka
- Agaka
- Uduka
- Ibika
- Igika...

Witegereje urasanga akaremajambo –ka kagaruka iteka iyo ugerageje gushyira ijambo inka mu nteko zinyuranye.

Indanganteko: Ni akaremajambo kagaragaza inteko izina ririmo. Indanganteko z'amazina mu Kinyarwanda ni 16.

Ikitonderwa

Hari amazina atagaragaza indanganteko. Kugira ngo umenye inteko zayo uyashyira mu nteruro maze inteko z'amasano akaba ari zo zigaragaza inteko ayo mazina arimo. Bene ayo mazina akunda kuba mu nteko ya 5, 9 n'ya 10. Mu kugaragaza inteko z'ayo mazina hakoreshwa aka kamenyetso: ϕ

Ingero

Nt. ya 5	ibuye rinini riragaragara: i- ϕ -buye
Nt. ya 9	ihene nziza ni musheru: i- ϕ -hene
Nt. ya 10	ihene nziza ni iz'umusheru: i- ϕ -hene

Indomo ni akaremajambo kagizwe n'inyajwi itangira izina. Mu Kinyarwanda inyajwi zishobora kuba indomo ni i, u, na a.

Usibye igoragoza kugira ngo umenye indomo ushobora gukoresha impakanyi nta, indangahantu ku/mu, ijambo rihamagara "yewe"/"yemwe" imbere y'izina cyangwa se akajambo "ki" kabaza inyuma yaryo. Inyajwi itakara aba ari indomo.

Ingero

Nta mugabo mbona.	nta ϕ -mu-gabo
Yewe mugabo!	Yewe ϕ -mu-gabo.
Ese wagize ngo ni mugabo ki?	ϕ -mu-gabo ki?

c) Amategeko y'igenamajwi akoreshwa mu izina mbonera gakondo

Amazina mbonera gakondo yuzuye. Ni ukuvuga afite uturemajambo twose uko ari dutatu.

Ingero

Umuntu	u-mu-ntu
Umugabo	u-mu-gabo
Umusore	u-mu-sore
Umwana	u-mu-ana(u→w/-J) Bivuga ngo u ihinduka w iyo iri imbere y'inyajwi.
Inzoga	i-n-yoga (y→z/n-)
Induru	i-n-ruru (r→d/n-)
Imbeba	i-n-beba (n→m/-b)
Imfura	i-n-pfura (p→ ø /n-f) n→ m/-f
Imyeyo	i-mi-eyo (i→y/-J)
Amenyo	a-ma-inyo (a+i→e)
Abana	a-ba-ana (a→ ø /-J)
Inyoni	i-n-nyoni (n→ ø /-ny)
Imana	i-n-mana (n→ ø/-m) / i - - mana
Inuma	i-n-numa (n→ ø /-n)
Igicuma	i-ki-cuma (k →g/-GR)
Uduca	u-tu-ca (t→d/-GR)

Ikitonderwa

Hari ibicumbi bifata ingombajwi “z” mu nteko ya 10 bitari biyisanganywe.

Ingero

Urugi => inzugi	i-n-zugi
Uruzi =>inzuzi	i-n-zuzi
Urwabya =>inzabya	i-n-zabya

Ingero

	Izina	Uturemajambo	Itegeko
1	Umwiko	u - mu - iko	u → w /-J
2	Abana	a - ba - na	a → ø /-J
3	Akebo	a - ka - ibo	a + i → e
4	Imyuko	i - mi - uko	n → y /-J
5	Imbaga	i - n - baga	n → m /-b
6	Imfwati	i - n - fwati	n → m /-f
7	Impinja	i - n - hinja	n → m /-h; mh → mp mu myandikire yemewe y'Ikinyarwanda
8	Icyuma	i - ki - uma	i → y /-J; ky → cy mu myandikire yemewe y'Ikinyarwanda
9	Impapuro	i - n - papuro	n → m /-p
10	Imvura	i - n - vura	n → m /-v
11	Induru	i - n - ruru	r → d /n-
12	Igihaza	i - ki - haza	k → g /-GR
13	Udushaza	u - tu - shaza	t → d /-GR
14	Inzoga	i - n - yoga	y → z /n-
15	Insibo	i - n - tsibo	t → ø /n-s
16	Inshuro	i - n - curo	c → sh /n-
17	Imfizi	i - n - pfizi	m → m/-p; p → ø/m-f
18	Inzuzi	i - n - uzi	Igicumbi gifata z mu nt 10.

Amazina mbonera gakondo atuzuye. Ni ukuvuga atagaragaza kamwe mu turemajambo.

Amazina mbonera gakondo atagaragaza kamwe cyangwa tubirimo turemajambo tw'amazina mbonera, akaremajambo katagaragara gahagararirwa n'iki kimenyetso "ø"

Ingero

Umushiki	ø - mu - shiki
Ishyamba	i- ø-syamba
Izuru	i- ø-zuru
Data	ø -ø-data
Se	ø -ø-se
Mama	ø -ø-mama
Nyina	ø -ø-nyina

Umwitozo



Garagaza uturemajambo tw'amazina mbonera gakondo akurikira n'amategeko y'igenamajwi aho biri ngombwa:

Inzoga, inkonzo, icyungo, igicuba

Isuzuma risoza umutwe wa mbere



Soma umwandiko ukurikira hanyuma usubize ibibazo:

Amaraso y'ikinyogote

Umunsi umwe intare, umwami w'ishyamba yarwaje umwana. Intare ntisinzire ikajya irara yomongana mu ishyamba iboroga, iririra umwana wayo. Ibaza imiti biba iby'ubusa, umurwayi akomeza kumererwa nabi: bayoberwa iyo ndwara iyo ari yo.

Intare igeze aho iribwira iti: "Ingabo zange zimariye iki? Nabajije inyamaswa zose icyankiriza umwana, none aranga akanshika. Reka nzihamagare zose zimbwire abavuzi b'abahanga muri zo, maze nibatamvurira umwana bazabone igihano gikomeye". Inama y'abaganga ikabamo ingwe, yewe n'amasatura n'impiri nako ubwoko bwose bwari bwohereje umuhanga bwiyizimo. Indwara irayoberana: imiti igeragejwe igasubiza umurwayi iwa ndabaga.

Inama y'abavuzi imaze gushoberwa, havamo nyiramuhari ibwira intare iti: "Nyagasani, naje aha mvuye mu rugendo rwa kure, mbajije imiti myinshi. Ndagira ngo mbabwire umuti wakiza umwana". Intare iyikubita inzara iti: "Maze ugatinda bigeze aha ngaha"! Nyiramuhari iti: "Nibamuhe amaraso y'ikinyogote ashyushye anywe ahage. Nibidushobokera, turaba dusigaranye umurimo wo kondora gusa".

Ikinyogote cyari cyoherejwe kibyumvise kigira ubwoba. Kiraza n'imbere ya ya ntare gikoma mu mashyi, amavi kiyashita ku butaka kirayibwira kiti: "Nyagasani sinakwemera ko mwene databuja apfa nashobora kumukiza; ubuzima bwange ntiburuta ubwe. Icyakora umuti nari nawibagiwe, nange nari nywuzi: nyiramuhari yawibagiweho ikintu cya ngombwa. N'aho twawukuye ndahakubwira; tujya kuza mu nama twagiye kuri umwe muri ba bandi bagenda bahagaze ku tuguru tubiri aratubwira ati: "Ni mwe mwembi umuti uzaturukaho, bazashake ubwonko bwa nyiramuhari babuminjiremo amaraso y'ikinyogote umwana abirye, nadakira muzabwire ntare ko

mutegereje umutwe wange”.

Izindi nyamaswa zikaba zateze amatwi ziti: “Nimugire vuba umwana ataducika.” Nyiramuhari bayitema agahanga baragasatura bakuramo ubwonko; ikinyogote bagitera agashinge ku kuguru (kuko ahandi hari amahwa menshi) baminjira uturaso mu bwonko, ingwe yiyegereza umwana w’intare bamuha umuti.

Inama y’abavuzi irangira ityo, ikinyogote kigenda gicumbagira, n’ubundi ariko cyari kibisanganywe, bari bamaze iminsi bagitereye umujugujugu mu murima w’imyumbati. Umwana w’intare ruranga ruramunjanya.

Si nge wahera hahera ubugome bwa nyiramuhari n’abavuzi bo mu ishyamba.

I. Ibibazo byo kumva no gusesengura umwandiko



1. Uyu mwandiko ni bwoko ki? Sobanura.
2. Ikibazo nyamukuru kivugwa muri uyu mwandiko ni ikihe?
3. Ni izihe nyamaswa zivugwa mu mwandiko?
4. Ese umuti uvugwa mu mwandiko wari wo koko? Usanga icyatumye nyiramuhari ivuga ko umuti ari amaraso y’ikinyogote ari ikihe?
5. Ese ikibazo kivugwa mu mwandiko cyaje gukemuka? Sobanura.

II. Ibibazo by’inyunguramagambo



1. Sobanura amagambo n’interuro bikurikira:

- a) Biba iby’ubusa
- b) Kugera iwa ndabaga
- c) Gushoberwa
- d) Kondora umurwayi
- e) Amavi kiyashita ku butaka

2. Tanga imbusane z’amagambo akurikira:

- a) Gutinda
- b) Kwemera
- c) Shebuja
- d) Kwibuka

III. Ibibazo ku ihangamwandiko

1. Erekana imbata y'umwandiko "amaraso y'ikinyogote", werekane aho buri gice gihera n'aho kirangirira.
2. Hina umwandiko amaraso y'ikinyogote mu magambo yawe bwite.

IV. Ibibazo ku buvanganzo bwo muri rubanda

1. Mu mbonerahamwe gereranya insigamigani, umugani muremure n'igitekerezo.
2. Sesengura imigani migufi ikurikira uvuge n'aho wayikoresha.
 - a) Umwana utumviye se na nyina yumvira ijeri.
 - b) Kora ndebe iruta vuga numve.
 - c) Inkono ntihira ikibatsi ihira ikibariro.
 - d) Ntawurungira urunguruka.
 - e) Intongo y'inzara irusha iy'inyama kubasha umutsima.
 - f) Umusego mubi upfura amasunzu.
 - g) Uwambaye injamba ntagira ijambo.
3. Findura ibisakuzo bikurikira:
Sakwe sakwe.....soma!
 - a) Twavamo umwe ntitwarya.
 - b) Nshinze umwe ndasakara.
 - c) Nagutera icyo utazi utabonye.
 - d) Ngeze mu ishyamba rirahubangana.
 - e) Inka yange nyikama igaramye.

V. Ibibazo bijyanye n'umuhango wo kwita izina

1. Umuhango wo kwita izina wakorwaga ute?
2. Kubera iki kwita izina bavuga ko ari ukurya ubunnyano?

VI. Ikibonezamvugo

Izina mbonera gakondo riba riteye rite?

Garagaza uturemajambo tw'amazina mbonera ari mu nteruro zikurikira werekane amategeko y'igenamajwi yakoreshejwe:

- Intare iyikubita inzara.
- Umwami w'ishyamba yarwaje umwana.
- Inama y'abaganga iraterana.
- Bashatse ubwonko bwa Nyiramuhari.
- Ikinyogote bagiteye umujugujugu mu murima w'imyumbati.

VII. Ihimbamwandiko


Himba igisingizo cy'umwarimu wakwigishije neza.

Himba ikivugo cy'amahomvu.

Umutwe wa kabiri

Umuco w'amahoro

2.1. Umwana wahohotewe



“Uriya mugore se yasaze ko mbona ari kwivugisha amagambo menshi yiyesura byamugendekeye bite? Cyo re! Dore aricara agahita ahaguruka akajya kurunguruka mu idirishya akongera akicara. Uriya ni umusazi pe! Noneho ndabona atangiye kwishima mu mutwe ubanza yafashwe n’ibisazi uyu munsu abimaranye iminsi! Yewe ubanza yataye umutwe reka mwegere nankundira tukaganira ndareba icyo namufasha.” Nkimara kugisha umutima inama, nibaza uko ngiye kumwegera ngo muganirize, ntarahaguruka

atangira kuvugira hejuru mu ijwi riranguruye asakuza cyane.

“Ubu koko turerere he? Mu ngo tubasigira abakozi bakabahohotera! Mu baturanyi na ho harimo inyangabirama zibahohotera! Ku mashuri na ho hari abarezi bamwe na bamwe babahohotera. Iki ni ikibazo gikomeye Leta igomba gukumira amazi atararenga inkombe”! Ibyo yabivugaga ubona ababaye ariko kubera ko nta muntu yavugishaga abari aho dukomeza kumuhanga amaso gusa dukeka ko ari umusazi. Yari yambaye ingutiya ndende n’agapira gusa. Nta nkweho yari yambaye ariko bigaragara ko yari umuntu usanzwe ari umusirimu. Ibirenge bye byari uburimiro ndetse n’intoki zuzuye ibitaka boshye umuntu wahoze ahinga. Hashize akanya gato arongera atangira gusakuza. “Abana bacu tubahungishirize he? Mu ngo barahohoterwa, mu baturanyi ni uko, none n’abakabarinze barabahohotera! Ni ishyano! Ni ishyano nta we naribwira weee! Sinamutanga wee! Oya”!

Uko yakomezaga gusakuza ni na ko yajyaga ahaguruka akongera agakubita ijisho mu idirishya ryari hejuru y’aho yari yicaye. Hashize akanya hasohoka umuganga wari wambaye itaburiya y’umweru tubona amuhereje imyenda yari asohokanye asa n’umwihanganisha arongera arinjira wa mugore akomeza kwicara aho. Ngeze aho ndamwegera. Ku bibero bye yari ahafite imyenda muganga yari amaze kumuhereza, nitegereje mbona ni agakariso kabaye ubushwagi n’akajipo kakwira umwana w’imyaka itanu kacikaguritse kandi kahindutse amaraso. Mugeze iruhande ndamusuhuza anyikirizanya ishavu n’agahinda. Yari yataye umutwe ku buryo ibyo namubazaga byose yansubizaga ijambo rimwe gusa: “Ni se”. Nti: “Byagenze bite”? Ati: “Se.”

Nyuma yo kumara umwanya tunganira igisubizo ari icyo mpitamo kumuhagurutsa aho yari yicaye ndamusindagiza mugeza aho batangira ubufasha ku bahungabanye. Mwinjiza mu nzu tuhasanga umukobwa ubishinzwe amwereka aho yicara. Mu gihe atangiye kumuganiza nge ndasohoka. Nkigera hanze mpahurira n’abagore babiri bari bavuye gukingiza barimo baganira. Sininjije mu kiganiro cyabo ariko nkomeza kugikurikira. Baganiraga

bavuga umugabo wahohoteye umwana we wiga wiga mu mashuri y'inshuke amusanze mu rugo nyina yagiye mu murima. Nkimara kubyumva nsanisha iyo nkuru n'uko wa mugore yansubizaga, nibuka ko yasaga nk'uvuye mu murima nkeka ko umwana bavuga ari uwe. Nsubira mu nzu aho nari namusize nsanga yacururutse aganira na wa mukobwa. Mpageze ashaka guceceka ariko wa mukobwa aramubwira ati: "Komezana nta kibazo uyu ni we wakuzanye aha". Arakomezana aramutekerereza.

- Bahise bampamagara ndimo guhinga ngo Karake, uw'iwange, yaje avuye mu kabari yasinze kanyanga amufata ku ngufu. Nahise mva mu murima aho nufiraga amasaka nsanga umwana aravirirana ni ko kumuzana kwa muganga. Nongeye kugarura ubwenge nisanga aha tunganirira".
- None se Karake asanzwe anywa kanyanga?
- Yayinywaga ariko nta kindi gihe yigeze akora ishyano nk'iryo.

Wa mukobwa asa n'uguye mu kantu, aceceka akanya gato maze bimwanga mu nda akomezana kumuganiriza.

- Buriya rero sinaba ngushinyaguriye nkubwiye ko ishyano ryaguye iwanyu nawe warigizemo uruhare. Iyo ubonye uwo ari we wese akoresha ibiyobyabwenge ntabwo uba ukwiye kumuhishira. Kwinumira ni nko kureka igitambambuga iruhande rw'umunyotwe. Kigeraho kikawusandaguza boshye ivu. Nyamara iyo uba warabigejeje ku bayobozi bari kumugorora bakamugira inama akareka kanyanga. Ndakubwiza ukuri nta mubyeyi muzima wakorera umwana we ibya mfura mbi nka biriya. Ni ikibazo k'ingaruka z'ibiyobyabwenge. Ikindi ni ngombwa kujya tunganiriza abana bacu tubigisha gutahura abantu bafite ingeso mbi, bashobora kubahohotera. Ibyo byatuma bamenya kuvumbura ufite umugambi mubisha wo kubahohotera bakamuhungira kure.

Wa mugore yari yagaruye akenge yumva ibyo umukobwa amubwira atuje. Hashize akanya abaza wa mukobwa.

- None se ubwo Leta izamuhanisha iki? Si ukumufunga burundu ngahinduka umupfakazi?

- Leta nta nyungu iba ifite mu gufunga abantu burundu, icyo iba igamije ni ukugorora uwakoze icyaha. Iyo amaze kwigishwa imyitwarire ye ikagaragaza ko ibyatumye akora icyo cyaha atabisubira, baramufungura akagaruka gufatanya n'abandi kubaka igihugu. Si byiza rero guhishira uwakoze ishyano nk'iryo kuko uba umutesheje amahirwe yo kugororwa ngo ahinduke muzima. Umuzima arafungurwa naho umutindi unangira ntagaragaze ko yicuza ibyo yakoze ni we ufungwa burundu.
- Urakoze kubera ibisobanuro umpaye ndumva nacururutse reka nge kureba uko umwana ameze ubu muganga yanshatse arambura.

Akimara kumushimira turasohokana twerekeza aho bakirira abarwayi baje ari indembe hamwe nari namukuye yataye umutwe. Tuhageze umwe mu baganga bari bahari amubwira ko ategereza gato ko umwana bamujyanye muri raboratwari kureba niba nta bundi burwayi yaba yatewe n'ihohoterwa yakorewe.



Sobanura amagambo cyangwa imvugo bikurikira

Kwiyesura, inyangabirama, guhanga umuntu amaso, ishavu, gusindagiza umuntu, kufira, kugwa mu kantu, bimwanga mu nda, kwinumira, igitambambuga, umunyotwe, gukorera umuntu ibya mfura mbi.

Umwitoto w'inyunguramagambo



1. Koresha amagambo akurikira mu nteruro zawe bwite zigaragaza ko wumva icyo asobanura:
Gusindagiza umuntu, kufira, kugwa mu kantu, umunyotwe, kwinumira.
2. Ukoresheje utwambi huza amagambo yavuye mu mwandiko n'ibisobanuro byayo.

Kugwa mu kantu

Kwumufasha kugenda umwiyegamije

Kumuterura.

Kumusindagiza

Kumirwa ukabura icyo uvuga.

Kwinumira

Kutagira icyo uvuga ukicececera

Kumuhagurutsa

Ibibazo byo kumva umwandiko



1. Umugore uvugwa mu gika cya mbere cy'umwandiko yari he? Byari byamugendekeye bite? Kubera iki?
2. Kuki umugore uvugwa mu mwandiko yagaragaraga nk'umusazi?
3. Ni irihe hohoterwa rivugwa muri uyu mwandiko?
4. Ni nde wahohoteye undi? Yabitewe n'iki?
5. Mu mwandiko hari ahandi havugwa hashobora gukorerwa ihohoterwa ry'umwana w'umukobwa. Ni he?
6. Muri uyu mwandiko baratanga inama y'uko twarwanya ihohoterwa. Ni izihe nama?
7. Sobanura icyo umwanditsi yashatse kuvuga "Kwinumira ni nko kureka igitambambuga iruhande rw'umunyotwe. Kigeraho kikawusandaguzza boshye ivu".
8. Ni iki kigaragaza ko uriya mugore atazahishira umugabo we kubera ihohoterwa yakoze?
9. Ese mbere yo kuganira n'uriya mukobwa, uwo mugore yari afite umugambi wo gutanga umugabo we? Sobanura igisubizo cyawe.



Ibibazo byo gusesengura umwandiko

1. Ni iyihe nsanganyamatsiko ivugwa mu mwandiko?
2. Garagaza ingingo z'ingenzi zivugwa mu mwandiko.



Umwitoto w'ubumenyingingiro

Kungurana ibitekerezo

Vuga, muri rusange, izindi ngaruka z'ihohoterwa rishingiye ku gitsina n'isomo ukuye muri iyi nsanganyamatsiko.

2.2. Ntera

Itegereze izi nteruro maze ugaragaze isano amagambo aciyeho akarongo afitanye n'amazina ayabanjirije.

- Uriya mugore se yasaze ko mbona ari kwivugisha amagambo **menshi**!
- Ikindi ni ngombwa kujya tunganiriza abana bacu tubigisha gutahura abantu bafite ingeso **mbi**, bashobora kubahohotera.
- Uba umutesheje amahirwe yo kugororwa ngo ahinduke **muzima**.

a) Inshoza ya ntera

Ntera ni ijamba rigaragira izina rikisanisha na ryo, rigafata indanganteko yaryo ho indangasano.

Ingero

- Imihini **mishya** itera amabavu.
- Intege **nke** zitera imico myiza.

b) Uturango twa ntera

Ntera isobanura izina ivuga imimerere cyangwa imiterere yaryo. Ntera kandi ishobora kwinjira mu nteko zose uko ari 16.

Mu nteruro, ntera igaragira izina ikisanisha na ryo, igafata indanganteko yaryo ho indangasano.

c) Intego ya ntera

Mu rwego rw'iyigantego, ntera ni ijambo rirangwa n'indangasano n'igicumbi: RS+C

Indangasano za ntera

Inteko	Indangasano	Isanisha	Utoremajambo twa ntera
1	mu-	Umuntu mubi	mu-bi
2	ba-	Abantu babi	ba-bi
3	mu-	Umusozi mubi	mu-bi
4	mi-	Imisozi mibi	mi-bi
5	ri-	Iriba ribi	ri-bi
6	ma-	Amariba mabi	ma-bi
7	ki-	Ikibaho kibi	ki-bi
8	bi-	Ibibaho bibi	bi-bi
9	n-	Inkono mbi	n-bi
10	n-	Inkono mbi	n-bi
11	ru-	Urugo rubi	bu-bi
12	ka-	Akabindi kabi	ka-bi
13	tu-	Utubindi tubi	tu-bi
14	bu-	Ubwoba bubi	bu-bi
15	ku-	Ukuboko kubi	ku-bi
16	ha-	Ahantu habi	ha-bi

Ibicumbi bya ntera

Ibicumbi bya ntera bifatana n'indanganteko zose uko ari 16. Si byinshi, ni ibi bikurikira:

Igicumbi	Urugero	Igicumbi	Urugero
-bi	Umuntu mubi	-nini	Umurima munini
-bisi	Igiti kibisi	-niya	Akazu kaniya
-gari	Inzu ngari	-nuya	Akazu kanuya
-gufi	Umugore mugufi	-re	Ahantu kure
-hire	Urugendo ruhire	-sa	Umwana musa

-inshi	Inka nyinshi	-shya	Umwenda mushya
-iiza	Inzu nziza	-tagatifu	Umuntu mutagatifu
-ke	Abantu bake	-tindi	Umutego mutindi
-kuru	Umwana mukuru	-to	Umuntu muto
		-zima	Umugabo muzima

Ikitonderwa

- Igicumbi -re-re ni -re kisubiramo
- Igicumbi-to kigira impuzantego zisubiramo ebyiri: -toto: gitoto na -to- -to-to: gitogito.
- Ibicumbi-gufi, -to, na -ke bishobora gukorana n'umusozo -ya: mugufiya, bikeya.
- Igicumbi-niya kigira impindurantego nyinshi:-nuya, -nzinya, -nzunya, -nzuguronyu.
- Igicumbi shya kigira impindurantego yisubiramo: -shyashya.

d) Amategeko y'igenamajwi akoreshwa muri ntera

Urugero	Uturemajambo	Itegeko
Amazi meza	ma-iza	a+i→e
Utwana dutoduto	tu-to-tu-to	t→d/-GR
Ikijumba gitogito	ki-to-ki-to	k →g/-GR
Ihene mbi	n-bi	n→m/-b
Ibishyimbo byiza	bi-iza	i→y/-J
Ingoma mpire	n-hire	n→m/-h mh→mp mu myandikwa
Inkoni ndende	n-re-n-re	r→d/n-
Umwana mwiza	mu-iza	u→w/-J

Inshamake

Mfashe ko: Ntera ari ijamba riranga imimerere cyangwa imico y'izina igaragiye. Ntera imwe ishobora kwisanisha mu nteko zose bitewe n'inteko izina igaragiye ririmo.

Intego rusange ya ntera ari RS+C

Nshobora: Kugaragaza ntera mu mwandiko. Gusesengura ntera ngaragaza uturemajambo twayo n'amategeko y'igenamajwi.

Umwitozo



Garagaza ntera zakoreshejwe mu migani n'interuro bikurikira unazisesengure ugaragaza n'amategeko y'igenamajwi aho biri ngombwa:

- Utagera ibwami abeshywa byinshi.
- Inkanda mbi ibyara inda.
- Amashyi make yimisha umwana impengeri.
- Umutege mutindi wica nyirawo.
- Agahinda ntikica kakugira mubi.
- Muzagire umwaka mushya muhire.
- Kuvuga menshi si ko kuyamara
- Kwasama kubi ni ukurira.
- Utaziga neza azataha amara masa.
- Ugira nabi aba araga abana be ibibi.
- Imboga mbi ntizishira mu nkono.
- Imfura nzima isubira ku izima rya se.
- Kwasama kubi ni ukurira
- Nta mwiza nk'umubi wumva.

Shaka izindi mpindurantego igicumbi cya ntera –niya gishobora kugira.



Izina ntera

Itegereze amagambo atsindagiye muri iyi nteruro maze usubize ikibazo kiri hasi:

Umuzima arafungurwa naho **umutindi** unangira ntagaragaze ko yicuza ibyo yakoze ni we ufungwa burundu.

Gerageza gutahura imiterere n'umumaro by'amagambo yanditse atsindagiye.

a) Inshoza y'izina ntera

Izina ntera ni ijambo rifite intego nk'iy'izina nyakimwe cyangwa ry'urusobe, bigatandukanywa n'uko rishobora gukoreshwa mu nteko zose kimwe na ntera.

b) Uturango tw'izina ntera

Izina ntera rigira intego nk'iy'andi mazina yaba asanzwe cyangwa ari ay'urusobe.

Izina ntera akenshi rirangwa no kuba ari ntera iba yafashe indomo.

Urugero

Umwiza (u-mu-iza) arahenda

Amazina ntera afite imiterere y'izina ariko akagira umumaro nk'uw'izina ntera mu nteruro.

Urugero

Imodoka y'imvaburayi. i - n - vu - a - burayi (kuva+iburayi)

c) Amoko y'izina ntera

Izina ntera rikomoka kuri ntera

Izina ntera rikomoka kuri ntera riba ari ntera yafashe indomo.

Ingero

Umwana mubi (umubi)

Umwana munini (umunini)

Izina ntera riteye nk'izina

Izina ntera riteye nk'izina riba ari izina risobanura imiterere y'irindi zina rirugaragiye bigahuzwa n'ikinyazina ngenera, inshinga **ni** cyangwa **si**.

Urugero

- Umusore w'umurundi.
- Inka y'ikibamba.
- Umujinya w'umuranduranzuzi.
- Amazi y'amasabano.
- Uyu mwenda ni umutuku.

Ikitonderwa

Izina ntera ryisanisha n'izina rifutura keretse iyo rivuga ibara.

Urugero

- Inkweto z'icyatsi.
- Ikibaho cy'umukara.

d) Uturemajambo n'amategeko y'igenamajwi akoreshwa mu izina ntera

Izina ntera rigira uturemajambo nk'utw'izina risanzwe ni na yo mvano yo kwitwa izina ntera. Ni ukuvuga D-RT-C (indomo, indanganteko n'igicumbi). Cyakora hari amazina ntera akomoka ku mazina y'urusobe bityo akagira intego nk'iy'izina ry'urusobe.

Ingero

Ijambo	Utoremajambo	Amategeko y'igenamajwi
Umwiza yaje	u-mu-iza	u→w/- J
Amenshi twayaniste	a-ma-inshi	a+i → e
Imyinshi yakozwe	i-mi-inshi	i→y/- J
ikiza bakivuze	i-ki-iza	i→ Ø /- J
indede bayitemye	i-n-re-n-re	r→d/ n-
Ugutagatifu ni ukwezi kwa cumi	u- ku-tagatifu	k→g/-GR
Udutoto ni utwo	u-tu-toto.	t→d/-GR
Impire ni izo mpinja	i-n-hire	n→m/ -h, mh→mp mu nyandiko
Inini yaguzwe	i-n-nini	n→Ø/- n
Inziza ni iyo ndobo	i-n-iza	Ibicumbi bifata “z” mu nteko ya 9 n'ya 10
Inyinshi zahutse	i-n-inshi	n→ny/-J

Inshamake

Mfashe ko: Izina ntera ari ijambo rifite intego nk'iy'izina nyakimwe cyangwa ry'urusobe, bigatandukanywa n'uko rishobora gukoreshwa mu nteko zose kimwe na ntera. Izina ntera akenshi aba ari ntera yafashe indomo igasimbura izina yagombaga kugaragira.

Nshobora: Kugaragaza izina ntera mu mwandiko.



Garagaza amazina ntera ari muri izi nteruro,
unayasesengure.

- Igihangano k'ikiganano nticyubahisha nyiracyo.
- Umutima muhanano ntiwuzura igituza.
- Amenyoy' amagurano afasha abanyabihanga kugumana uburanga.
- Abeza ntibarama.
- Ibyinshi byotsa amatama.
- Agashya karashimisha.

2.3. Rubundakumazi



Rubundakumazi
Iyo ahembwe aragenda
Utubari akatubunga
Amakashi ayatanga

5. Agataha bukeye.

Ab'iwe agahonda
Bagahinduka intere

- Bagacika bahunga
Bagataha ibigunda
10. Ngo badasongwa bashonje.
- Abana yabyaye
Ntibigeze ishuri
Yabashoye ibishanga
Gushaka ibyo barya
15. Ngo bimenye ubwabo.
- Ifaranga bacyuye
Aribaka abahonda
Anabita ibirumbo
Bitigeze ubwenge
20. Bitazi guhaha.
- Nyiramama yabyumva
Agashengurwa cyane
Agatinya gukopfora
Ngo atotswa igitutu
25. Agatimburwa ashonje.
- Yamubwira guhaha
Ngo agaburire abana
Agahatwa inshyi nyinshi
Ati: "Ibirumbo wabyaye
30. Ntibyazanye inoti?
- Nge nazanye urwagwa
Rwo kumara inyota
Mwe muteke kayote
Murenzeho amazi
35. Muryame burije".
- Agisoza ayo ngayo
Haba haje gitifu
Umwe utwara ubwo bwatsi
Amukubita amapingu
40. Ati: "Ibyo uhomva urabizi?
- Urubyaro wabyaye
Ntirwigeze ishuri

Urataha uruhonda
Rugahinduka intere
45. Ngo utabaza uramwica.

Uyu munsu ndi nawe
Uraryozwa abo wica
Ubacira uburumbo
Wabateye ubabyara
50. Ngo bazirera ubwabo."

Tanga ibisobanuro by'amagambo akurikira



Rubundakumazi, intere, gutaha ibigunda, gusongwa, ibirumbo, gushengurwa, gukopfora, gutimburwa, guhomvwa.

Umwitoto w'inyunguramagambo



Simbuza amagambo atsendagiye amwe muri aya magambo akurikira: (aho ngaho, abo uhohoterwa, indembe, badahuhurwa, abana, agahinda, ugakubita, uyobora)

- Umwe **utwara ubwo bwatsi**.
- Urataha **ugahonda**.
- Ugahindura **intere**.
- Ngo **badasongwa** bashonje.
- **Urubyaro** wabyaye.

Ibibazo byo kumva umuvugo



1. Ni nde uvugwa muri uyu mwandiko? Ateye ate?
2. Nyiramama uvugwa ukeka ko ari nde?
3. Iryo hohoterwa rivugwa muri uyu mwandiko riterwa n'iki?
4. Abahohoterwa ni ba nde?
5. Kuki abahohoterwa batavuga ihohoterwa bakorerwa?
6. Garagaza imikarago ibyerekanwa. Abahohoterwa bavugwa muri uyu mwandiko batabawe na nde?
7. Umuyobozi w'Umurenge yamenye ate ihohoterwa bakorerwa?



Ibibazo byo gusesengura umwandiko

Ibivugwa muri uyu mwandiko bihuriye he n'ibivugwa mu mwandiko uheruka kwigwa?

Sobanura amoko y'ihohoterwa avugwa muri uyu mwandiko.



Umwitoto w'ubumenyingingiro

Gereranya ibivugwa mu mwandiko n'ubuzima bw'aho utuye.

Hari abo muturanye bameze nka Rubundakumazi? Ese ni izihe ngaruka ubona mu muryango wabo? Ni gute watanga umusanzu wawe mu kubarwanya cyangwa kubakebura.

Hanga umuvugo w'imikarago itarenze ijana uvuga ku ihohotera n'uko ryarwanywa.

2.4. Igisantera

Soma iyi nteruro maze ugerageze gutahura imiterere n'umumaro by'amagambo yanditse atsindagiye. Aya magambo urabona yitwara ate mu nteruro?

Rubundakumazi ntiyakurikizaga umuco nyarwanda wo guhahira urugo rwe, yari umusinzi rwoma akarangwa n'ingeso yo guhohotera abo mu rugo rwe.

a) Inshoza y'igisantera

Igisantero ni ijamba rijya kwitwara nka ntera bigatandukanywa n'uko igisantera kidakoreshwa mu nteko zose nka ntera.

b) Uturango tw'igisantera

Igisantero kirangwa no kugira umwanya n'umumaro nk'uwa ntera mu nteruro. Bimwe mu bisantero bifata indangasano isa n'iy'izina bigaragiye, ibindi ntibiyifata, ahubwo usanga bidahinduka.

c) Intego y'ibisantera

Intego y'igisantera igaragaza indangasano isa n'iy'izina kigaragiye utundi turemajambo tugasa n'utw'inshinga cyangwa izina ry'urusobe.

Ibisantera bifata indangasano

Ingero

Umwana murizi ntakurwa urutozi.

Umutima muhanano ntiwuzura igituza.

Inkuru mbarirano iratuba

Igisantero kidafata indangasano y'izina kigaragiye

Usanga buri gihe gifite indangasano isa n'iyoy mu nteko ya kabiri cyangwa iya cumi. Ntigifata na rimwe indangasano isa n'indanganteko y'izina kigaragiye.

Igisantero gikomoka ku mazina rusange cyangwa ntera.

Urugero

- Amazi buzi.
- Umukungu jumba.
- Umugore gito.

Ingero

Ibihingwa ngengabukungu

Ibiro mpuzamahanga

Ikigo ndangamuco

Inzira nyabagendwa

Umuco nyarwanda

d) Amategeko y'igenamajwi akoreshwa mu gisantera

Amategeko y'igenamajwi akoreshwa mu gisantera ni kimwe n'akoreshwa mu mazina y'urusobe.

Itegeko	Urugero
	Umuco nyarwanda = nya-ruanda
r→d/ n-	Inzu ndangamuco = n-rang-a- Ø-mu-co
n→m/ -h	Umuco mpuzamahanga = n-hur-y-a-Ø-ma-hanga
n→m/-b	Inkuru mbarirano = n-bar-ir-an-o

r+y →z	Umwana murizi = mu - rir - yi
n→m/-v	Ingeso mvukanwa= n-vuk-an-w-a
d+y-z	Umumarayika murinzi=mu-rind-yi

e) Kugereranya ntera, izina ntera n'igisantera

Ntera	Izina ntera	Igisantera
Ntera yisanisha n'izina igaragiye ikagaragaza imico cyangwa imimerere yaryo	Izina rigira intego nk'iy'izina nyakimwe cyangwa ry'urusobe, bigatandukanywa n'uko rishobora gukoreshwa mu nteko zose kimwe na ntera. Izinaantera akenshi ni ntera iba yafashe indomo igasimbura izina yagombaga kugaragira	Igisantera, mu nteruro, kigira umwanya n'umumaro nk'ibya ntera bigatandukanywa n'uko kitagira intego nk'iya ntera kandi ntigishobore kwisanisa, buri gihe, n'izina kigaragiye mu nteko zose.

Inshamake

Mfashe ko: Igisantera ari ijamba rifite umwanya n'umumaro nk'uwa ntera kuko rigaragira izina rikaranga imico cyangwa imiterere, ariko rikaba ritari ntera kuko ribuze bimwe mu biyiranga nko kwisanisha mu nteko zose. Igisantera ntikigira intego nk'iya ntera kuko cyo kigira uturemajambo tundi duteye nk'utw'inshinga cyangwa utw'izina ry'urusobe.

Nshobora: Gutahura igisantera mu mwandiko no kugisesengura ngaragaza intego yacyo.

Umwitozo



1. Sesengura ibisantera bikurikira aho bishoboka:

- Umumarayika murinzi
- Umunsi ntarengwa
- Ibisigo nyabami
- Ibihingwa ngandurarugo
- Ishuri mbonezamubano
- Ikigo ngororamuco
- Imyitozo ngororangingo
- Ibiro mpuzamahanga
- Ingeso mvukanwa

2. Gereranya izina ntera na ntera n'igisantera.

Isuzuma risoza umutwe wa kabiri



Ihohoterwa rikorerwa mu ngo, ni ibikorwa bibabaza umwe mu babana mu rugo, hagati y'umugabo n'umugore cyangwa hagati y'ababyeyi n'abana babyaye. Iryo hohoterwa rikorwa mu buryo bunyuranye, burimo ibijyanye n'imibanire rusange, kubabaza, guhohoterwa gushingiye ku mutungo, ku gitsina... Ihohoterwa rishobora kugera kuri buri wese, yaba ikigero k'imyaka afite, yaba umugore cyangwa umugabo. Rishobora gukorerwa mu rugo cyangwa hanze y'urugo rigakorerwa umwe mu muryango cyangwa umwe mu bashakanye. Umuntu yakwibaza bimwe mu biranga ihohoterwa rikorwa mu ngo n'uko uwo bikorewe yabyitwaramo.

Hari igihe umuntu mubana akubabaza, agukubita, rimwe na rimwe habaho kwirwanaho noneho ugasanga habayeho gukomeretsanya gukabije. Bene iri hohoterwa ribabaza umubiri akenshi rikaba ryaganisha no ku rupfu. Hejuru y'ibyo nta wakwirengagiza ihohoterwa ribabaza umutima rigaragarira cyane mu bikorwa byo guhimana hagati y'abantu babana, agasuzuguro, amagambo mabi atesha mugenzi wawe agaciro, kugenzurana birengeje urugero, kutizerana, kubwirana amagambo asesereza, kudaha agaciro mugenzi wawe n'ibitekerezo bye n'ibindi. Iri hohoterwa ntirikunze kuvugwa cyane, ariko abashakashatsi

n'abaganga b'indwara y'agahinda, bakomeje kugaragaza ko iri hohoterwa rikomeye cyane kuko rifatwa nk'iyicarubozo, aho rigenda rimunga umuntu gahorogahoro, rikaba ryamugiraho ingaruka zikomeye nko kurwara indwara z'umutima, kurwara indwara zo mu mutwe, kwiyanga no kwiyahura.

Hari kandi ihohoterwa rishingiye ku mutungo rikorwa cyane hagati y'abashakanye, aho urusha undi ubushobozi, amafaranga, abigira urwitwazo rwo kudaha mugenzi we agaciro, kumwicisha inzara, kumusuzugura no kumwereka ko nta cyo amaze. Iri kandi rishobora no gukorerwa wa wundi noneho ufite ubushobozi, aho mugenzi we amutota gusesagura umutungo, akagira uruhare runini mu gucunga uwo mutungo no kuwugenzura, akaba ari we wenyine uwufatira ibyemezo yishingikirije ko ari we mutware cyangwa umuyobozi, akaba ari we wenyine ufata ibyemezo. Iri hohoterwa rishingiye ku mutungo na ryo riri mu rikurura cyane ubwicanyi hagati y'abashakanye cyane iyo hatabayeho kumvikana ku mikoresherezwe n'imirungire y'umutungo wabo. Bene iri hohoterwa mu muryango rishobora no gukorerwa urubyaro cyanecyane iyo abashakanye basesagura umutungo bafite, badahahira abana cyangwa bababuza ubundi burenganzira bagomba kugira mu muryango.

Imibanire mu muryango na yo ishobora kugaragaramo ihohoterwa rikorwa hari n'abandi bantu batandukanye baba inshuti cyangwa umuryango, rigakorerwa hagati y'abashakanye, aho umwe adatinya gucecekesha mugenzi we mu ruhame, kumumwaza, kumwangisha abandi, kumwangisha inshuti n'umuryango, kumusebya mu ruhame, kumuvuga amagambo ateye isoni mu bandi bantu ndetse no kumukubita mu ruhame. Iri hohoterwa

na ryo rishobora gutuma umuntu yiheba, akiyanga akaba yarwara indwara y'agahinda cyangwa akiyahura. Hari kandi ihohoterwa ridakunze kuvugwa cyane, rikunze kugaragara mu ngo hagati y'abashakanye cyane nko mu gihugu nk'u Rwanda gifite amateka ya Jenocide cyanyuzemo. Iri hohoterwa rikunze kugaragara iyo umuntu adaha agaciro ukwemera kwa mugenzi we, akamutoteza ashaka kumuhindura uko we yifuza. Ashobora kumubuza gusenga mu kwemera kwe, ashobora kumubuza imyambaro ijyanye n'ukwemera kwe cyangwa undi na we akamutota kugira ukwemera nk'ukwe. Ibijyanye n'amoko n'uturere abantu bakomokamo, umwe mu bashakanye ashobora kubuza mugenzi we kwitabira gahunda zo kwifatanya n'abandi bakomoka hamwe mu gikorwa runaka gifite akamaro. Umwe mu bashakanye kandi ashobora gukoresha amagambo asesereza mugenzi we ashingiye k'uwo ari we, akaba yamubwira incyuro zijyanye n'amateka yanyuzemo kubera uwo ari we. Iri hohoterwa na ryo rikunze gukurura amakimbirane n'impagarara mu muryango kugeza aho abashakanye baba batakihanganaye gukomeza kubana bityo bikaba byabaviramo gutandukana. Impamvu nyamukuru itiza umurindi iri hohoterwa twavuze, ni urukundo ruke, kutaganira hagati y'abashakanye, kubakira ku kinyoma no kutabwizanya ukuri, kutabohoka kuri buri wese n'umuco wo guceceka umuntu akamira bunguri ibimurimo. Iyo bigiye gusohoka bisohokana ubukana budasanze bikaba byasenyaye.

Nubwo mu bihugu bitandukanye ihohoterwa rishingiye ku gitsinaridasobanurwakimwemurwegorw'amategeko, bene iri hohoterwa, mu ngo, rishobora kwerekeza ku gukoreshwa imibonano mpuzabitsina utabishaka, cyangwa se ku ngufu. Rishobora no kwerekeza ku gikorwa cyo konona abana cyangwa ingimbi n'abangavu, gusambanywa n'umuntu wo mu muryango nk'ukurera cyangwa umubyeyi wawe. Bamwe mu bakorerwa iryo hohoterwa, haba mu magambo cyangwa mu bikorwa, babwirwa ko nibaramuka babivuze bazagirirwa nabi. Nyamara umuntu w'Umunyarwanda yaravuze ngo "uhishira umurozi akakumaraho abana".

Abashakanye nibige kuganira, kandi imibanire yabo ishingire ku rukundo nyakuri ruzira uburyarya,

rudashingiye ku kindi kintu icyo ari cyo cyose kitari urukundo ubwarwo. Ihohoterwa ryangiza imibanire myiza yari hagati y'abashakanye, rituma umuntu ayoberwa uko yifata n'umurongo yafata, rituma umuntu adatekereza birambuye uko yaryikuramo, rituma umuntu atamenya uburenganzira bwe, rikanatuma atamenya aho yakura ubufasha. Ukorerwa ihohoterwa rimutera kwigunga, akarwara indwara y'agahinda, ibyinshi mu bitekerezo bye bigasubira inyuma ku bw'ihungabana aba yatewe no guhohoterwa. Ni ngombwa gukangurira abantu kugira ubumenyi buhagije mu bijyanye n'amategeko arwanya ihohoterwa rishingiye ku cyo ari cyo cyose no guharanira kwamagana ingeso mbi yo kudahana abakoze ibyaha byo guhohorera.

I. Ibibazo byo kumva umwandiko

1. Ha uyu mwandiko umutwe ukwiye ushingiyeye ku bivugwamo.
2. Ni ayahe moko y'ihohoterwa rikorerwa mu ngo agaragara mu mwandiko?
3. Ihohoterera ribabaza rishobora kwigaragaza ku buryo bubiri. Ni ubuhe?
4. Ni gute uwo mwashakanye ashobora kuguhohotera kubera ko agusumbya umutungo?
5. Usumbywa umutungo we yahohotera ate mugenzi we ku bijyanye n'umutungo?
6. Abana bashobora gukorerwa irihe hohoterwa rishingiye ku mutungo?
7. Garagaza umugani w'umugenurano wakoreshejwe muri uyu mwandiko unavuge inama ugusigiye ku bijyanye n'ibivugwamo.
8. Ihohoterwa rishingiye ku gitsina ni iki?
9. Ni izihe ngamba zafatwa kugira ngo harwanywe ihohoterwa rikorerwa mu ngo?
10. Umuntu ashobora guhohotera mugenzi we amubuza kwitabira gahunda zo kwifatanya n'abandi bakomoka hamwe mu gikorwa runaka. Tanga urugero rwa bene iryo hohoterwa ugendeye ku mateka yaranze u Rwanda.



II. ibibazo by'inyunguramagambo

Garagaza amagambo yakoreshejwe mu mwandiko asobanura:

- Akababaro umuntu aterwa n'ikintu abuze cyangwa n'uko hari umugiriye nabi.
- Guhatira umuntu gukora ikintu
- Abana
- Kubwira umuntu incyuro imukora ibwoya ikamubishya umutima.
- Kutavuga ibimurimo

III. Ibibazo ku kibonezamvugo

1. Ntera n'igisantera bitaniye he bihuriye ku ki?
2. Tahura ntera, amazina ntera n'ibisantera bigaragara mu bika bibiri bya nyuma by'umwandiko ibyo ushobora gusesengura ubisesengure ukoresheje imbonerahamwe iteye itya:

Ijambo	Ubwoko	Intego	Amategeko y'igenamajwi

3. Tahura niba amagambo atsindegiye arimu nteruro zikurikira ari ntera, izina ntera cyangwa igisantera
 1. Umwana **mwiza**
 2. Umwandiko **mbarankuru**
 3. **Umwiza** arahenda
 4. Abagabo **batobato** baje.
 5. Umutego **mutindi** wica nyirawo
 6. Amasuka y'**amaberuka** arakomera.
 7. Umuco **nyarwanda** nituwubahe.
 8. Ihohoterwa ni **ribi** cyane.
 9. **Umunini** ni uwuhe?

VI. Ihangamwandiko

Mu mirongo itarenze 50 andika inkuru igaragaramo ihohoterwa n'uko ryarwanywa.

Umutwe wa gatatu

Uburinganire n'ubwuzuzanye

3.1. Uburinganire n'ubwuzuzanye mu mirimo yo mu rugo



Kugira ngo habebo iterambere ry'urugo ni ngombwa ko abagize urugo bose bafatanya mu bikorwa ibyo ari byo byose, baja inama, bungurana ibitekerezo, bafatanya imirimo yo mu rugo kandi bubahana. Burya ngo "Abishyize hamwe nta kibananira". Urugero rugaragara ni umuryango

wa Habimana na Mariyana n'abana babo babiri. Ubuhamya bitangira bwemeza ko uburinganire n'ubwuzuzanye mu muryango ari inkingi ya mwamba ku iterambere ry'urugo rwabo. Umuntu yakwibaza ati: "Ese uwo muryango wabayeho ute? Ubu umerewe ute?"

Habimana yabyirutse ari umuhanya, avukira mu rugo rusaba umunyu, nta gashuri yigeze. Ababyeyi be bari baritabye Imana kera bazize inzara. Nta karima n'aka kirazira bagiraga. Habimana arererwa kwa nyirakuru ntiyamushyira mu ishuri kuko atari kubona amafaranga y'ishuri ndetse n'ay'imyenda yo kwambara ku ishuri. Aho amariye kugimbuka, Habimana atangira umwuga wo gusoroma icyayi akawukuramo udufaranga duke two kugura utwenda. Nyirakuru aza gupfa, Habimana asigara ari imfubyi buriburi. Rimwe basoroma icyayi, mugenzi we amubwira ko umujyanama w'ubuzima yamubwiye ko hari amahugurwa ateganyijwe kuri icyo cyumweru maze bumvikana kuzayajyanamo.

Aho mu mahugurwa Habimana ahahurira n'umukobwa Mariyana na we wari imfubyi, baraganira baba n'inshuti. Biratinda bigira inama yo kurushinga barabana. Babanaga mu kazu k'ivundi nyakatsi nyirakuru yari yaramusizemo. Abaturanyi bakajya babaha urw'amenyo bagira bati: "Uruka afata uhitwa"! Abandi bakabaha inkwenene bagira bati: "Imfubyi ebyiri zitagira akarima na mba zizabaho zite? Urwazo ntiruzatera kabiri"! Nyamara Habimana na Mariyana ntibacika intege kubera ko bajya kubana babwiranaga ko ibintu ari ibishakwa. Ibyo bakoraga byose babanzaga kujya inama bakumvikana uko bari bubigenze kandi bagafatanyaga. Iyo Habimana yazanaga udufaranga yahembwe mu cyayi bumvikanaga icyo bari budukoreshe hagira igisigara umwe muri bo akaguramo utwenda. Igihe kimwe baryamye Mariyana azana igitekerezo.

- Twagerageje gushyira mu bikorwa ibyo twahuguwemo cya gihe twahuraga bwa mbere.
- None se ko kwihangira umurimo batubwiraga bisaba igishoro twagikura he?
- Reka ntekereze nzakubwira.

Bidateye kabiri Mariyana yisunga ikigega k'ingwate

cy'abagore kimwemerera kuzamuha ingwate maze ageze mu rugo abyumvikanaho n'umugabo we baka inguzanyo muri banki. Amafaranga babahaye bayashora mu bworozi bw'inkoko banatisha imirima bahinga ibirayi.

Ikirere kirabakundira maze umusaruro wa mbere utuma bishyura inguzanyo ya banki. Bajyanaga mu murima bagafatanyo muri byose, bataha bagafatanyo n'iyindi mirimo yo mu rugo. Iyo Habimana yajyaga gushaka ibiryo by'inkoko Mariyana yasigaraga azikorera isuku. Imishwi baguze imaze gukura babona isoko ryo kugemurira amagi Hoteri Urumuri yari hafi y'iwabo.

Hashize igihe gito, ubuhinzi bwabo butera imbere cyane baba abatubuzi b'imbuto y'ibirayi mu Ntara y'Amajyaruguru yose. Bigira inama yo kwiyubakira inzu nziza no kugura imodoka izajya ibafasha muri ako kazi k'ubuhinzi n'ubworozi bakoraga banumvikana kubyara umwana dore ko bagishakana bari barumvikanye kutabyarira mu bukene. Amezi ikenda ashize babyara abana babiri b'impanga; umuhungu n'umukobwa babita Gakuru na Nyiragato. Bakomeza gufatanyo muri byose, umugore yaba ari mu mirimo y'isuku umugabo akaba ari mu matungo cyangwa ari kumwe n'abana.

Iyo igihe cyo gukingiza abana cyageraga umwe yafataga Gakuru undi agafata Nyiragato bakabajyana kwa muganga. Uko igihe cyashiraga ni ko ubutunzi bwabo bwakomezaga kwiyongera, bagura imirima myinshi banubaka n'amazu anyuranye y'ubucuruzi. Abana bamaze gukura babatoza imirimo yo mu rugo, bakajya bafasha ababyeyi babo koza amasahani, kumesa imyenda no gukubura imbuga. Bagiraga imbuga nini ku buryo Gakuru na Nyiragato bumvikanaga aho umwe ahera kugira ngo bahurize hagati. Abana babo babyiruka bakundana kandi bafatanyo muri byose nk'ababyeyi babo. Iyo bavaga ku ishuri bakoraga imirimo yo mu rugo barangiza bagasobanurirana amasomo.

Umunsi umwe abana bagiye ku ishuri Habimana na Mariyana bamaze gupakira amagi baja mu modoka berekeza kuri hoteri Urumuri. Mu gihe bagendaga, Mariyana aterura ikiganiro.

- Imana yaduhaye ibyo twayisabye byose ntitugahweme kuyishimira. Ahubwo twari dukwiye kureba icyo natwe twafasha Akarere dutuyemo.
- Ibyo nange ni ko nabitekerezaga numvaga icyo gitekerezo nzakikugezaho muri iyi minsi. Ahubwo urumva twabakorera iki?
- Bitewe n'uko ivuriro ryacu riri kure, reka tububakire ivuriro tunazane amazi bityo abarwayi bo muri aka gace tube tubavunnye amaguru bage bivuriza hafi banavome amazi meza.

Nuko muri ako gace, umuryango wa Habimana uhazana amazi meza y'urubogobogo, wubaka n'ivuriro riramira abarwayi bagombaga gukora urugendo rw'urucantege; rwasonyaga indembe.

Umunsi wo gutaha icyo gikorwa, Muganga asaba Habimana kwandika amazina ye mu gitabo cy'abanyacyubahiro, Habimana aramushwishuriza ati: "Bwana Muganga ubimbabariremo cyane sinzi kwandika". Na we ati: "Mbega ibyago! N'iyi mitungo ufite iremereye! Iyo ugera mu ishuri wari kuba igitangaza".

Umuyobozi w'Akarere afashe ijamba avuga byinshi ariko asoza abwira abari aho ati: "Ibi byose mureba umuryango wa Habimana ubigezeho kubera uburinganire n'ubwuzuzanye mu muryango we, mu gihe bamwe mu bagabo mukivuga ko uburinganire n'ubwuzuzanye hagati y'umugabo n'umugore ari ukwemera kuba inganzwa y'umugore. Ababyumva mutyo mbahaye umukoro muzamushake mubiganireho na we, azababwira ibanga ryamufashije kugera kuri ibi byose".

Sobanura amagambo akurikira



Umuhanya, urugo rusaba umunyu, kutagira akarima ka kirazira, kugimbuka, imfubyi buriburi, akazu k'ivundi nyakatsi, guha umuntu urw'amenyo, kudatera kabiri, kwatisha, kuvuna abantu amaguru, kuramira abarwayi, gushwishuriza umuntu, inganzwa.

Umwitozo w'inyunguramagambo



1. Koresha aya magambo mu nteruro zigaragaza ko wumva ibisobanuro byayo:
 - Imfubyi buriburi
 - Kutagira na mba
 - Kwatisha
 - Kuvuna abantu amaguru
 - Inganzwa
2. Uzaza izi nteruro ukoresheje amwe muri aya magambo yavuye mu mwandiko (umuhanya, kugimbuka, guha umuntu urw'amenyo, kudatera kabiri, kwatisha, kuvuna abantu amaguru, kuramira abarwayi, gushwishuriza, inganzwa.)
 - a) Namusabye ntiyagira icyo amarira.
 - b) Nta jambo namba yagiraga iwe kubera ko yari
.....
 - c) Bamufashebahita bamufunga.
 - d) Ntiwirirwe ubinze nohereze umwana ubimumpere.



Ibibazo byo kumva umwandiko

1. Habimana yavukiye mu muryango umeze ute? Andika interuro yo mu mwandiko ibigaragaza.
2. Ni iki kigaragaza ko Habimana yari azi kwirwanaho akiri umwana?
3. Habimana yamenyanye ate na Mariyana?
4. Ni uwuhe mugani wakoreshewe mu gika cya mbere cy'umwandiko?
5. Garagaza ibiranga ihame ry'uburinganire n'ubwuzuzanye bigaragara mu mwandiko.
6. Urugo rwa Habimana rugishingwa rwabonwaga rute n'abaturanyi? Ese ni ko byagenze? Sobanura igisubizo cyawe?
7. Garagaza uruhare rw'uburinganire n'ubwuzuzanye mu iterambere ry'urugo rwa Habimana.
8. Vuga ibindi bintu nibura bibiri bigaragaza ihame ry'uburinganire n'ubwuzuzanye mu mirimo yo mu rugo bitagaragara mu mwandiko.



Ibibazo byo gusesengura umwandiko

Garagaza insanganyamatsiko rusange n'ingingo z'ingenzi zivugwa mu mwandiko.

Hina yu mwandiko mu magambo yawe bwite.

3.2. Ibiganiro mpaka

Soma iki gika gisoza umwandiko maze usubize ikibazo kiri hasi yacyo.

Umuyobozi w'Akarere afashe ijamba avuga byinshi ariko asoza abwira abari aho ati: "Ibi byose mureba umuryango wa Habimana ubigezeho kubera uburunganire n'ubwuzuzanye mu muryango wabo, mu gihe bamwe mu bagabo mukivuga ko uburunganire n'ubwuzuzanye hagati y'umugabo n'umugore ari ukwemera kuba inganzwa y'umugore. Ababyumva mutyo mbahaye umukoro muzamushake mubiganireho na we, azababwira ibanga ryamufashije kugera kuri ibi byose".

Utekereza ko ikiganiro hagati ya Habimana n'abagabo bavugwa muri icyo gika kizaba giteye gite?

a) Inshoza y'ibiganiro mpaka

Iyo umuntu agiye gutanga ibitekerezo ku nsanganyamatsiko runaka, hari uburyo butandukanye aba ashobora gucishamo ibitekerezo bye. Impaka ni bumwe mu buryo bushobora gukoreshwa mu itangwa ry'ibitekerezo. Ubu buryo ni ibiganiro bikorwa hagati y'abantu batandukanye ku nsanganyamatsiko ihari. Mu by'ukuri ibiganiro mpaka bikorwa iyo hari ikibazo gikeneye umuti buri wese agatanga uwe uko abyumva ku buryo bya bitekerezo bikusanywa bikaba ingirakamaro mu gukemura ikibazo runaka. Muri ibi biganiro abantu baganira bari mu matsinda atandukanye hagamijwe kungurana ibitekerezo. Ni ukuvuga ko atari impaka za ngo turwane. Muri ibyo biganiro, haba hari itsinda ry'abashyigikiye insanganyamatsiko yatanzwe, hakaba n'abatayishyigikiye.

Abashyigikiye insanganyamatsiko

Aba batanga ibitekerezo byabo bashyigikira insanganyamatsiko yatanzwe bagamije kugaragaza ko ibivugwa mu nsanganyamatsiko ari ukuri cyangwa se ihame. Berekana ko uko insanganyamatsiko yatanzwe ari byo byakemura ikibazo gihari.

Abadashyigikiye insanganyamatsiko

Aba batanga ibitekerezo byabo basenya insanganyamatsiko yatanzwe bagamije kugaragaza ko ibivugwa mu nsanganyamatsiko atari ukuri cyangwa se atari ihame. Baba bagamije kumvikanisha ko uko insanganyamatsiko imeze atari byo byakemura ikibazo ahubwo ko hari ukundi cyakemuka, bakagaragaza uko kundi cyakemuka.

Kugira ngo ikiganiro mpaka kigende neza, haba hari n'umuyobozi w'ikiganiro ushobora kuba ari umwe cyangwa se afite n'undi umwunganira.

Umuyobozi w'ikiganiro

Uyu ni we uyobora ikiganiro mpaka, akagenda aha umwanya abajya impaka ndetse akanabagera igihe bakoresha. Iyo umwe mu bajya impaka arangije gutanga ibitekerezo bye, umuyobozi w'ikiganiro aha mugenzi we badahuje ibitekerezo ijamba, kugira ngo agire ibyo avuga ku byo mugenzi we yavuze. Uyu kandi ni na we usubiza mu murongo abajya impaka iyo basa n'abagiye gutandukira insanganyamatsiko yabo.

Indorezezi

Aba ni abantu baza kwitabira ikiganiro mpaka bagamije kumva ibitekerezo bitandukanye by'abajya impaka. Iyo abajya impaka barangije gutanga ibitekerezo byabo, abaje kwitabira ikiganiro baba na bo bashobora kwaka ijamba bagatanga ibitekerezo byabo bishyigikira cyangwa bidashyigikira rimwe mu itsinda ry'abajyaga impaka. Aha ni na ho uyobora ikiganiro ashobora guhera agaragaza ko uruhande uru n'uru ari rwo rwatanze ibitekerezo

bifatika bitewe n'umubare w'indorerezi washyigikiye ibyo bitekerezo.

Amabwiriza agenga ibiganiro mpaka

- Mu kungurana ibitekerezo, umwe mu baja impaka, iyo agiye gutanga igitekerezo ke, abanza kugaragaza ko ibyo mugenzi we wamubanjirije batari mu itsinda rimwe atari byo, akabisenyesha ingingo zifatika maze akabona gutanga igitekerezo ke bitewe n'uruhande abogamiyemo.
- Mu kiganiro mpaka uvuga agomba kumenya ko arebwa cyangwa ajorwa n'ababwirwa, ni na yo mpamvu agomba kwita ku mivugire n'imiterere y'ijwi rye, ku guhinduranya amajwi, ku gusubizanya ukuri no gusubiza akoresheje ingingo zuzuye.
- Uri mu kiganiro mpaka agomba kudatinya no kuterekana ko ikibazo abajijwe kimutunguye, akamenya kwihanganira ibitekerezo by'abandi, ntahubuke cyangwa ngo atongane.
- Mu gihe k'ikiganiro, abatumirwa bamaze kwicara, uyobora ikiganiro amaze kubavuga mu buryo bubangutse, agomba kwirinda kugira ibisubizo we atanga cyangwa abahatira ahubwo akibanda ku kubereka umurongo w'ikiganiro.
- Iyo umwe mu baja impaka atanze igitekerezo ke, biba byiza ko uyoboye ikiganiro agisubiramo muri make kugira ngo undi agihereho atanga ike. Iyo impaka zikomeye, umuyobozi w'ikiganiro ahwitura abihaye ijambo.
- Mu kiganiro mpaka, buri wese agomba guhabwa ijambo ariko ntaryiharire, ushatse kuryiharira, uyoboye ikiganiro arimwaka mu kinyabupfura cyane nk'iyi abona ibitekerezo byari bimutegerejweho yabitanze.
- Umuyobozi w'ikiganiro mpaka agomba guhoza ku mutima uburyo n'intego y'icyo kiganiro mpaka.

c) Uko bicara mu biganiri mpaka

Abari mu kiganiri mpaka bicara ahantu haboneye kandi habona. Hagomba kuba hafasha mu buryo bwo kwicara kugira ngo ikiganiri kibonere. Mu kiganiri mpaka, hari uburyo butandukanye bicaramo kugira ngo ikiganiri kigende neza. Iki gishushanyo gikurikira kirerekana uko abakora ikiganiri mpaka bicara:



Ubu buryo bwo kwicara ni bumwe mu buryo bwiza bukoreshwa mu kiganiri mpaka, kubera ko umuyobozi w'ikiganiri aba ashobora kugenzura neza abajya impaka ndetse n'indorerenzi zitabiriye ikiganiri. Ubu si bwo buryo bwiza bwonyine, icya ngombwa ni uko umuyobozi aba ashobora kugenzura abajya impaka, kandi mu baja impaka ntawuteye undi umugongo.

Inshamake

Mfashe ko:

Ibiganiro mpaka ari ibiganiro bikorwa hagati y'abantu batandukanye ku nsanganyamatsiko ihari. Mu by'ukuri ibiganiro mpaka bikorwa iyo hari ikibazo gikeneye umuti buri wese agatanga uwe uko abyumva ku buryo bya bitekerezo bikusanywa bikaba ingirakamaro mu gukemura ikibazo runaka. Muri ibi biganiro abantu baganira bari mu matsinda atandukanye hagamijwe kungurana ibitekerezo. Ni ukuvuga ko atari impaka za ngo turwane. Muri ibyo biganiro, haba hari itsinda ry'abashyigikiye insanganyamatsiko yatanzwe, hakaba abatayishyigikiye n'indorerenzi.

Nshobora:

Kuyobora ikiganiro mpaka cyangwa kugeza ibitekerezo byange ku bandi no kubibumvisha ngusha ku ngingo ngaragaza n' ikinyabupfura nshyigikira cyangwa nenga ibitekerezo by'abandi.



Umwitoto w'ubumenyiringiro kuja impaka

Mu mirimo yo mu rugo ntayagenewe umugabo cyangwa umugore kimwe n'uko ari ntayagenewe umwana w'umukobwa cyangwa umuhungu. Byemeze cyangwa ubihakane wifashishije ibitekerezo bifatika.

3.3. Imyandikire yemewe y'Ikinyarwanda

Itegereze aka gace k'inkuru yo mu kinyamakuru maze usubize ikibazo kiri hasi.

Gakenke: Ihame ry'uburinganire n'ubwuzuzanye rirubahirizwa ariko ntirishirwa mubikorwa

Nubwo ihamwe ry'uburinganire n'ubwuzuzanye ryubahirizwa n'abatuye mu karere ka Gakenke ariko ngo ntirishirwa mubikorwa kuko abashakanye batashobora kubyumva kimwe, ku buryo hariho hariho abuma ko haribyho batagomba gukora murugo bakabiharira bagenzi babo.

kudashirwa mubikorwa ry'uburinganire n'ubwuzuzanye nibyo usanga keshi bituwa imiryango idatera imbere, kuko habaho gusigana kubashakanye, aho umwe aharira mugenzi we imirimo runaka kandi nyamara kugira ngo iterambere ry'umuryango rigerweho bisaba ubufatanye hagati y'abashakanye.

Kurundi ruhande hari naho usanaga abagore nabo barabyumvishe nabi kuburyo nabo basiganya abagabo babo kandi bose bagakwiye kuzuzanya.

Kuko kwigisha ar'uguhozaho inzego z'ubuyobozi zikaba zasabwe kugumya kujya barushaho gusobanura ihame ry'uburinganire n'ubwuzuzanye kugirango ritaba intandaro y'ubutane hGti y'abashakanye.

Gira icyo uvuga ku myandikire y'amagambo cyangwa imigemo yashyizwemo biciyeho akarongo. Ku bwawe ni ko wabyandika? Kubera iki?

Inshoza y'imyandikire y'ururimi

Imyandikire inoze y'ururimi ni urusobe rw'amategeko ashyirwaho mu rwego rwo kugena ibimenyetso bishushanya amajwi y'ururimi runaka. Mu rwego rwo kunoza imyandikire hakaba hifashishwa amahame

y'iyigandimi nk'ubumenyi bugamije kwiga indimi zivugwa akaba ari na yo mpamvu imishinga yose igena imyandikire inoze y'ururimi ikorwa hitabajwe impuguke muri ubwo bumenyi bw'iyigandimi. Aya akurikira ni amategeko agenga imyandikire y'Ikinyarwanda:

1. Imyandikire y'inyajwi

Inyajwi z'Ikinyarwanda zandikishwa inyuguti zikurikira: a, e, i, o, u.

Uretse mu nyandiko ya gihanga ikoreshwa mu mashuri no mu bushakashatsi gukurikiranya inyajwi birabujijwe mu myandikire isanzwe y'Ikinyarwanda keretse inyajwi ebyiri mu myandikire y'ijambo ry'iritirano "(i)saa" rivuga igihe. Mu magambo y'amarangamutima, imigereka n'inyigana birimo isesekaza, hakoreshwa inyajwi zitarenga eshatu zikurikirana.

Ingero

- Irangamutima: "yooo"!
- Umugereka: Ndagukunda "cyanee"!
- Inyigana: "pooo"; "mbuu"!



Umwitozo

Vuga aho inyajwi zishobora gukurikirana mu myandikire y'Ikinyarwanda ugende unatanga nibura urugero rumwe.

2. Imyandikire y' ingombajwi shingiro

Ingombajwi shingiro z'Ikinyarwanda zirimo amoko akurikira:

- Ingombajwi shingiro zandikishwa inyuguti imwe: b, c, d, f, g, h, j, k, m, n, p, r (l), s, t, v na z.

Mu Kinyarwanda inyuguti ya r ntabwo itandukanye na l mu rwego rw'imivugirwe ndetse no mu rwego rwo kurema amagambo. Umuntu yavuga ko atari amajwi shingiro abiri atandukanye ko ahubwo, kuba zigaragara uko ari ebyiri byaratewe n'uko Abazungu bagennye imyandikire y'Ikinyarwanda bahereye ku ndimi zabo.

Inyuguti "l" ikoreshwa gusa mu izina bwite "Kigali", umurwa mukuru wa Repubulika y'u Rwanda, mu ijambo "Repubulika", mu ijambo "Leta" no mu mazina bwite y'amanyamahanga y'abantu n'ay'ahantu.

Ingero

- Ntuye i Kigali.
- Repubulika y'u Rwanda
- Angola, Londoni, Lome, Lusaka, Buruseli, Aluberi.

Icyakora, inyuguti "l" iguma gukoreshwa mu mazina bwite y'amanyarwanda y'abantu yari isanzwe ikoreshwamo kandi bayiswe mbere y'amabwiriza mashya.

- **Ingombajwi shingiro zandikishwa inyuguti ebyiri:** ny, sh, pf, ts.
- **Ingombajwi shingiro yandikwa n'inyuguti eshatu:** shy
- **Inyerera:** w na y
- **Ingombajwi z'ibihekane:**

3. Inyuguti zandika ingombajwi z'ibihokane:

Inyuguti zandika ingombajwi z'ibihokane mu Kinyarwanda, ni ukuvuga ingombajwi shingiro ibanjirijwe n'inyamazuru, ingombajwi shingiro ikurikiwe n'inyerera imwe cyangwa ebyiri, ingombajwi shingiro ibanjirijwe n'inyamazuru igakurikirwa n'inyerera imwe cyangwa ebyiri, zikubiye mu rutonde rukurikira:

mb, mf, mp, mv, nd, ng, nj, nk, ns, (nts), nsh, nshy, nt, nz;

bw (bg), cw, dw, (fw), gw, hw, jw, kw, mw, nw, nyw, (pfw), (pw), rw, shw, shyw, sw, tsw, tw, (vw), zw;

by, cy, jy, my, nny, pfy, py, ry, sy, ty, (vy);

byw, myw, pfyw, (ryw), (vyw);

mbw, (mfw), mpw, (mvw), ndw, ngw, njw, nk, (nshw), (nshyw), (nsw), ntw, nzw;

mby, mpy, (mvy), nshy, ndy, njy, nsy, nty;
(mbyw), (mvyw), njyw.

Usibye "bg" mu ijambo "Kabgayi" ingombajwi z'ibihokane zitari muri uru rutonde zirabujijwe.

Ikitonderwa

Hari ibihokane bigira imyandikire yihariye bitewe n'inyajwi bikurikiye.

Ingero

Imyandikire y'ibihokane "(n)kw", "(n)gw", "hw", bikurikiwe n'inyajwi "o" cyangwa "u"

Ibihokane "(n)kw", "(n)gw", "hw", bikurikiwe n'inyajwi "o" cyangwa "u" ntibyandikwa; mu mwanya wabyo handikwa "(n)ko", "(n)ku", "(n)go", "(n)gu", "ho", "hu".

Ingero

- Kwanga koga ni bibi.
- Kubaka ni ukugereka ibuye ku rindi.
- Pariki ya Nyungwe ibamo inguge nyinshi.
- Ngwije na Ngoboka bava inda imwe.
- Korora inkwavu n'inkoko bifite akamaro.

- Iyo ngiye kwinjira mu nzu nkuramo inkweto.
- Mariya ahwituye Hoho kugira ngo yihute.
- Mahwane aragesa amahundo.

Imyandikire y'ibihokane "(n)jy" na "(n)cy", bikurikiwe n'inyajwi "i" cyangwa "e"

Ibihokane "(n)jy" na "(n)cy" byandikwa gusa imbere y'inyajwi "a", "o" na "u". Imbere y'inyajwi "i" cyangwa "e" handikwa "(n)gi", "(n)ge", "(n)ki", "(n)ke".

Ingero

- Umugi ntuyemo ufite isuku.
- Gewe / ngewe ntuye mu magepfo y'u Rwanda.
- Njyanira ibitabo mu ishuri gewe ngiye gukina.
- Njyana kwa masenge.
- Iki ni ikibabi k'igiti.
- Ikibo cyuzuye ibishyimbo.

Ibihokane bigizwe n'ingombajwi "ts", "pf" na "c"

Ibihokane bigizwe n'ingombajwi "ts", "pf" na "c" zibanjirijwe n'inyamazuru byandikwa mu buryo bukurikira: "ns", "mf", "nsh".

Ingero

- Insina za kijyambere zitanga umusaruro utubutse.
- Imfizi y'inshuti yange.

Imyitozo



1. Tanga urugero rw'amagambo abiri agaragaramo ingombajwi z'igihekane: mvy, nshy na pfy
2. Kosora aho biri ngombwa:
 - Kwanga kwogo amazi ashushye nge bituma ntameregwa neza mu mubiri.
 - Inshuti yange yambwiye ko invura yaguye nijoro ari intsindagirabigyega.
 - Ikibo ke yakibohesheje ibirere by'instina z'inyamunyo.

Gukata

Mu myandikire y'Ikinyarwanda hari inyajwi ziba zigomba gukatwa ariko hari n'izidakatwa.

Ikata ry'inyajwi zisoza ibinyazina ngenera n'ibyungo "na" na "nka"

Inyajwi zisoza ikinyazina ngenera n'ibyungo "na" na "nka" zirakatwa iyo zikurikiwe n'ijambo ritangiwe n'inyajwi ariko inyajwi isoza ikinyazina ngenera gikurikiwe n'umubare wanditse mu mibarwa ntikatwa.

Ingero

- Wakomerekejwe n'iki?
- Ntakibyara nk'intare n'ingwe.
- Umubare w'amashuri y'imyuga uriyongera.
- Nyereka uko batsa tereviziyo n'uko bayizimya.
- Umwaka w'ibihumbi bibiri na cumi n'ibiri
- Umwaka wa 2012.

4. Inyajwi zisoza zidakatwa

Usibye inyajwi zavuzwe haruguru, inyajwi zisoza andi moko y'amagambo ntizikatwa.

Urugero

Kabya inzozu

Inyajwi "i" isoza akabimbura "nyiri", n'inshinga mburabuzi "ni" na "si" ntizikatwa.

Ingero

- Nyiri ubwenge aruta nyiri uburyo
- Amasunzu si amasaka
- icyatumye ejo ntaza iwawe ni uko natashye ndwaye.

Icyakora ijambo “nyiri” iyo riri mu mazina amwe n’amwe y’icyubahiro rifatana n’ijambo ririkurikiye.

Urugero

Nyiricyubahiro Musenyeri.

Naho “nyira” ivuga “nyina wa” ikoresha mu mazina, ifatana n’ijambo ibanjirije.

Urugero

Nyirabukwe aramukunda.

Ikitonderwa

Inyajwi zitangira amazina akurikira indangantu “mu” na “ku”.

Inyajwi itangira amazina bwite n’amazina rusange akurikiye indangantu “mu” na “ku” iratakara, keretse mu ijambo ritangirwa n’inyajwi “i” ikora nk’indanganteko.

Ingero

- Mu Mutara higanje imisozi migufi.
- Mu Kagera habamo ingona.
- Amatungo yanyuze mu murima.
- Kwita ku nka bigira akamaro.
- Abana bavuye ku iriba baja mu ishuri.
- Banyuze mu ishyamba.

Inyajwi zisoza indangantu “ku” na “mu” ntizikatwa kandi zandikwa iteka zitandukanye n’izina rikurikira.

Ingero

- Amatungo yanyuze mu murima.
- Kwita ku nka bigira akamaro.

Imyitozo



Kosora interuro zikurikira aho ari ngombwa:

- Karangwa ati: "Uyu n'umwana wange nkunda cyane."
- Akigera k'umuhanda yahasanze imodoka ya nyir'aya mazu iparitse kw'isoko.
- Ni ngombwa kwita cyane kw'ihene ze kugira ngo zitazamera nkiriya nka yahoroteshejwe no kubura ibyo irya.

5. Amagambo afatana n'adafatana

a) Amagambo y'inyunge

Amazina y'inyunge harimo n'amazina bwite y'inyunge yandikwa afatanye.

Ingero

- Umwihanduzacumu
- Rugwizangoga
- Umukangurambaga
- Umuhuzabikorwa
- Amayirabiri

Icyakora mu bisingizo, mu byivugo no mu migani, amazina nteruro agizwe n'amagambo arenze ane (4) yandikwa atandukanyijwe kandi agashyirwa mu twuguruzo n'utwugarizo.

Urugero

Ubwo “Inshyikanya ku mubiri ya Rugema ahica” aba arashinze.

b) Amagambo afutura

Amagambo mfutuzi yandikwa atandukanyijwe n’amagambo afuturwa.

Ingero

- Inama Njyanama
- Umuco nyarwanda
- Umutima nama
- Umutima muhanano
- Inyandiko mvugo.

c) Ibyungo “na” na “nka”

Ibyungo “na” na “nka” bikurikiwe n’ibinyazina ngenga bivuga nyakuvuga na nyakubwirwa (ngenga ya 1 n’iya 2) byandikwa mu ijambo rimwe ariko bikandikwa bitandukanye n’ibinyazina ngenga muri ngenga ya 3.

Ingero

- Ndumva nawe umeze nkange.
- Ndabona natwe tumeze nkamwe.
- Ndumva na we ameze nka bo.
- Ndabona na ko kameze nka bwo.
- Ikinyazina ngenera n’ikinyazina ngenga

Iyo ikinyazina ngenera gikurikiwe n’ikinyazina ngenga byandikwa mu ijambo rimwe.

Ingero

- Umwana wange
- Umurima wacu
- Ishati yawe
- Amafaranga yabo

d) Impakanyi “nta”

Impakanyi “nta” yandikwa ifatanye n’inshinga itondaguye iyikurikiye ariko iyo ikurikiwe n’ubundi bwoko bw’ijambo biratandukana.

Ingero

- Iwacu ntawurwaye
- Muri iri shuri ntabatsinzwe
- Ya nka ntayagarutse
- Nta we mbona
- Nta cyo ndwaye

e) Ibinyazina ngenga ndangahantu

Ibinyazina ngenga byo mu nteko ndangahantu “ho”, “yo”, “mo (mwo)” n’akajambo “ko” bifatana n’inshinga bikurikiye, keretse iyo iyo nshinga ari “ni” cyangwa “si”.

Ingero

- Wa mugabo nimusangayo turagenderako ntitugaruka.
- Ya nama yayivuyemo.
- Kuki yamwihomyeho?
- Ni ho mvuye.
- Si ho ngiye.

f) Akajambo “ko”

Akajambo “ko” kunga inyangingo ebyiri kandikwa gatandukanye n’amagambo agakikije.

Ingero

- Mwarimu avuze ko dukora imyitozo.
- Ndatekereza ko baduhembye.

Urujyano rurimo ijambo “ngo” kimwe n’ibinyazina “wa wundi”, “bya bindi”, “aho ngaho”, “uwo nguwo”.

Urujyano rurimo ijambo “ngo” kimwe n’ibinyazina: “wa wundi”, “bya bindi”, “aho ngaho”, “uwo nguwo”, n’ibindi biremetse nka byo byandikwa mu magambo abiri.

Ingero

- Kugira ngo wa wundi adasanga wagiye, ukwiye kuba ugumye aho ngaho.
- Bwira uwo nguwo yinjire.
- Fata aka ngaka, ibyo ngibyore bireke.

j) Ijambo “ni” rikurikiwe n’inshinga irimo inshoza yo

“gutegeka” no “guteganya”

Ijambo “ni” rikurikiwe n’inshinga ifite inshoza yo “gutegeka” cyangwa iyo “guteganya” ryandikwa rifatanye na yo.

Ingero

- Nimugende mudasanga imodoka yabasize.
- Nimugerayo muzamundamukirize.

h) Amagambo yerekana ibihe n’ahantu

Amagambo yerekana ibihe yandikwa mu ijambo rimwe: “nimunsi”, “nijoro (ninjoro)”, “nimugoroba”, “ejobundi”.

Ingero

- Aragera ino nijoro.
- Araza nimugoroba.
- Yatashye ejobundi.

Ijambo “munsi” ryerekana ahantu na ryo ryandikwa mu ijambo rimwe.

Urugero

- Imbeba yihishe munsi y’akabati.

Amagambo “ku” na “mu”

Amagambo “ku” na “mu” yandikwa atandukanye n’ikinyazina ngenera ndetse no mu magambo “ku wa” na “mu wa” abanziriza itariki cyangwa umubare mu izina ry’umunsi.

Ingero

- Sindiho ku bwabo.
- Navutse ku wa 12 Ugushyingo.
- Azaza ku wa Mbere.
- Yiga mu wa kane.

Ijambo “saa”

Ijambo “(i)saa”, rikurikiwe n’umubare byerekana isaha byandikwa mu magambo atandukanye.

Ingero

- Abashyitsi barahagera saa tatu.

- I saa kenda nizigera ntaraza wigendere.

i) Imigereka ndangahantu

Imigereka ndangahantu iremewe ku ndangahantu “i” (imuhira, iheru, iburyo, ibumoso, ivure, ikambere, imbere, ibwami, inyuma...) n’amagambo akomoka kuri “i” y’indangahantu ikurikiwe n’ikinyazina ngenera “wa”, n’ikinyazina ngenza yandikwa mu ijambo rimwe.

Ingero

- Nujya iburyo ndajya ibumoso.
- Mbwirira abari ikambere bazimanire abashyitsi.
- Nuza iwacu nzishima.

Indangahantu “i” ikurikiwe n’izina bwite ry’ahantu.

Iyo “i” y’indangahantu ikurikiwe n’izina bwite ry’ahantu yandikwa itandukanye n’iryo zina.

Ingero

- i Kirinda
- i Muyunzwe

g) Inshinga mburabuzi “-ri”

Inshinga mburabuzi “ari” iyo ikoreshejwe mu nyangingo ngaragira yandikwa itandukanye n’ikinyazina kiyibanziriza n’ikiyikurikira.

Ingero

- Itegeko rihana umuntu uwo ari we wese wangiza umutungo wa Leta.
- Ibyo ari byo byose sindara ntaje kukureba.
- Sinzi uwo ari we.

k) Amagambo arema inyumane

Amagambo afatiwe hamwe akarema inyumane y’umugereka, inyumane y’icyungo, cyangwa iy’irangamutima akomoka ku binyazina bitakibukirwa amazina bisimbura yandikwa afatanye.

Nyamara iyo ahuje ishusho n’izo nyumane kandi ibinyazina bikerekeza ku kintu kizwi cyangwa kibukwa mu buryo bugaragara, byandikwa bitandukanye.

Ingero

- Niko? Uraza?
- Uko arya ni ko angana.
- Urahinga nuko uteza.
- Uku kwezi ni uko guhinga.
- Amutumaho nuko araza.
- Ukuboko ashaka ni uko.

1) Amagambo ashingiye ku isubiramo

Amagambo ashingiye ku isubiramo yandikwa afatanye.

Ingero

- Perezida yavuze ijamba arangije abari aho amashyi ngo "Kacikaci".
- Babwire bage binjira umwumwe.
- Mugende babiribabiri.



Imyitozo

Kosora aho ari ngombwa

- Ako nako niko ko nta ko ntagize ngo kamere nka bwabundi.
- Tugomba gukora vubavuba uyu mwitozo mu matsinda ya bane bane kugirango tuzawurangize nibura ejo bundi mu gitondo.
- Yaje ni uko arambwirango njyane yo nabo gusura wa mwana; nawe numuntu nk'abandi.

6. Imyandikire y'amazina bwite

Amazina bwite y'ahantu afite indomo.

Amazina bwite y'ibihugu n'ay'aturere afite indomo yandikwa atandukanye n'iyo ndomo; iyo ndomo ikandikwa mu nyuguti nto, keretse iyo itangira interuro.

Ingero

- A Marangara n'i Gisaka ni tumwe mu turere twa kera tuvugwa mu mateka y'u Rwanda.
- U Rwanda rurigenga.
- U Mutara wera ibigori, ibitoki n'ibishyimbo.
- U Bubirigi buri mu majyaruguru y'uburasirazuba bw'u Bugaransa.

a) Amazina bwite y'abantu arenze rimwe

Amazina bwite y'abantu arenze rimwe akurikirana muri ubu buryo: Habanza izina yahawe akivuka, hagakurikiraho andi mazina y'inyongera.

Ingero

- UWASE Ikuzo Laurette
- VUBI Pierre
- KARIMA Biraboneye
- MUNEZERO Salima

b) Amazina bwite y'abantu n'ahantu y'amavamahanga

Amazina bwite y'abantu n'ahantu y'amavamahanga atari ay'idini n'amazina bwite y'ibihugu n'ay'uturere y'amahanga yandikwa uko avugwa mu Kinyarwanda, nyuma bagashyira mu dukubo uko asanzwe yandikwa mu rurimi akomokamo.

Ingero

- Enshiteni (Einstein)
- Shumakeri (Schumacher)
- Ferepo (Fraipont)
- Cadi (Tchad)
- Kameruni (Cameroun / Cameroon)
- Wagadugu (Ouagadougou)
- Ositaraliya (Australie / Australia)

c) Amazina y'idini

Amazina y'idini yandikwa nk'uko yanditswe mu gitabo k'irangamimerere akaza akurikira izina umuntu yahawe akivuka cyangwa izina rindi rifatwa nka ryo. Izina rya mbere ryandikwa mu nyuguti nkuru naho izina ry'idini rikandikwa mu nyuguti ntoya, ritangijwe inyuguti nkuru.

Ingero

- KARERA John
- KEZA Jane
- KAMARIZA Jeanne
- RUTERANA Abdul
- MFIZI Yohana

Amazina bwite yatanzwe kandi yakoreshejwe mbere y'aya mabwiriza akomeza kwandikwa uko yari asanzwe yandikwa.

Ingero

- Intara y'Amajyepfo
- Umujyi wa Kigali
- Akarere ka Rulindo
- Akagari ka Cyimana
- Umurenge wa Cyeru



Imyitozo

Kosora niba ari ngombwa

- Yohani Kayitare yambwiye ko Urwanda n'Uburundi ari ibihugu byaboneye ubwigenge icyariwe.
- Mbere y'ubwigenge, igihugu cya Belgique ni kimwe mu byakoronije Urwanda.

7. Imikoreshereze y'utwatuzo n'ibimenyetso byihariye

Utwatuzo

1°Akabago/akadomo (.): Gasoza interuro ihamya n'interuro iri mu ntegeko.

Ingero

- Umwana mwiza yumvira ababyeyi.
- Utazi ubwenge ashima ubwe.
- Mpereza icyo gitabo.

2° *Akabazo (?)*: Gasoza interuro ibaza.

Ingero

- Uzajya i Kigali ryari ngo tuzajyane?
- Wabonye amanota angahe?

3° *Agatangaro (!)*: Gasoza interuro itangara, kagashyirwa n'inyuma y'amarangamutima.

Ingero

- Mbega ukuntu kino kiyaga ari kinini!
- Ntoye isaro ryiza mama weee!

4° *Akitso (,)*: Gakoreshwa mu nteruro kugira ngo bahumeke akanya gato.

Ingero

- Umunyeshuri ushaka kujijuka, yirinda gusiba, ntakubagane mu ishuri kandi agakurikiza inama za mwarimu.
- Abagiye inama, Imana irabasanga.

5° *Uturegeka (...)*: Dukoreshwa iyo berekana ironhora ritarangiye, interuro barogoye cyangwa iyo mu nteruro hari ijamba bacikije.

Ingero

- Mu rugo rwa Kinyarwanda habaga ibikoresho byinshi: ibibindi, ibyansi, ishoka, ibitebo, isekuru...
- Baragenda ngo bagere ku Ruyenzi bahahurira na mwene... simuvuze nzamuvumba!

6° Utubago tubiri (:): Dukoreshwa mu nteruro iyo hari ibigiye kurondorwa, gusobanurwa cyangwa iyo bagiye gusubira mu magambo y'undi.

- Dukoreshwa kandi inyuma y'ingirwanshinga "-ti" n'ijambo "ngo".

Ingero

- Burya habaho imirimo myinshi: guhinga, kubaka, kubaza n'ibindi.
- Mariya ati: "Ibyo uvuze bingirirweho".
- Mu Kinyarwanda baravuga ngo: "Ifuni ibagara ubucuti ni akarenge".

7° Akabago n'akitso (;): Bikoreshwa mu nteruro kugira ngo batandukanye inyangingo ebyiri ziremye kimwe kandi zuzuzanya.

Urugero

- Gusoma neza si ugusukiranya amagambo; gusoma neza ni no kumva ibyo usoma.

8° Utwuguruzo n'utwugarizo (" "): Dukikiza amagambo y'undi asubirwamo, imvugo itandukanye n'imvugo isanzwe, cyangwa ingingo igomba kwitabwaho.

Dukikiza amagambo ateruwe n'ingirwanshinga "-ti" n'ijambo "ngo".

Dukoreshwa na none iyo hari inyito ikemangwa cyangwa kugira ngo bakikize amazina nteruro n'amazina y'inyunge

agizwe n'amagambo arenze ane.

Dukoreshwa kandi mu magambo y'amatirano atamenyerewe mu Kinyarwanda.

Ingero

- Igikeri kirarikocora kiti: "Kuba mu bibuba si ko guhunika ibigega".
- Nuko ya "nyamaswa" iravumbuka maze havamo umusore mwiza.
- Ubwo "Inshyikanya ku mubiri ya Rugema ahica" aba arashinze.
- Ibyo nabisomye kuri "internet".

9^o Akuguruzo n'akugarizo kamwekamwe ("): Dukoreshwa iyo utwuguruzo n'utwugarizo twinjira mu tundi mu nteruro.

Urugero

- Umugaba w'ingabo ati: "Ndashaka ko 'inshyikanya ku mubiri ya rugema ahica' aza hano".

10^o Udukubo (): Dukikiza amagambo cyangwa ibimenyetso bifite icyo bisobanura cyangwa icyo byuzuzura mu nteruro.

Banadukoresha iyo bashaka kwerekana uko amazina bwite y'amanyamahanga yanditswe mu Kinyarwanda bayandika mu ndimi akomokamo.

Dukikiza kandi umubare wanditse mu mibarwa mu nteruro iyo uwo mubare wabanje kwandikwa mu nyuguti.

Twerekana n'ibihekane cyangwa inyuguti bidakunze gukoreshwa.

Ingero

- Umuyobozi w'Akarere yabwiye abaturage ko kugira ngo barwanye inzara, bagomba gushoka ibishanga (impeshyi yari yabaye ndende) kandi kwirirwa banywa bakabifasha hasi.
- Bisimariki (Bismarck)
- Koreya (Korea)
- Kamboje (Cambodge)
- Igihembo twumvikanyeho ni amafaranga y'anyarwanda ibihumbi magana atanu (500 000 Frw).
- (l) cyangwa (vy)

11° Akanyerezo (-): Gakoreshwa mu kiganiro kugira ngo berekane ihererekanywa cyangwa iyakuranwa ry'amagambo.

Urugero

- Wari waragiye he?
- Kwa Migabo.

Gakoreshwa kandi bakata ijamba ritarangiranye n'impera y'umurongo, bikurikije imiterere y'umugemo.

Urugero

Semariyota yansabye ko tuzajya-na i Rukoma, ariko sinzamwe-merera.

Kanakoreshwa imbere n'inyuma y'interuro ihagitse.

Urugero

Ejo nzajya mu misa-sinzi niba wari uzi ko nsigaye njyayo - ntuzantegereze mbere ya saa sita.

12° Udusodeko ([]): Dukikiza intekerezo cyangwa insobanuro bongeye mu mvugo isubira mu magambo y'undi.

Urugero

Yaravuze ati: "Sinshobora kurara ntariye inkoko [ayo yari amirariro], keretse narwaye".

Dukoreshwa kandi berekana ibyo banenga mu magambo y'undi.

Urugero

Yaranditse ati: "Ikinyarwanda ni ururimi ruvugwa n'abatu [ikosa] benshi muri Afurika yo hagati: ".

Tunakoreshwa mu magambo y'undi mu kugaragaraza ko hari ayavanywemo cyangwa yasimbutse.

Urugero

Aravuga ati: "Nimureke abana bansange [...] ntimubabuze".

13° Agakoni kaberamye (/): Gakoreshwa mu kwandika amatariki, inomeru z'amategeko no mu mwanya w'icyungo "cyangwa".

Ingero

Kigali, ku wa 15/10/2012.

Itegeko N° 01/2010 ryo ku wa 29/01/2010.

14° Agakato: : Gakoreshwa mu gukata ibyungo cyangwa ibigenera iyo bikurikiwe n'inyajwi.

Urugero

- Ivu n'umuriro
- Amashuri y'imyuga.



Imyitozo

Shyira utwatuzo dukwiye aho ari ngombwa

- Uriya mwana ko mbona arira yakubiswe na nde. Genda umumbwirire uti icecekere
- Yoo, mbese ni uku wabaye. Umaze igihe kinganaiki urwaye se
- Kurya neza si ukurya ibihenze, kurya neza ni ukurya ibifite intungamubiri

8. Imikoreshereze y'inyuguti nkuru

Inyuguti nkuru ikoreshwa aha hakurikira

a) Mu ntangiriro y'interuro.

Urugero

- Ifuni ibagara ubucuti ni akarenge.

b) Nyuma y'akabago, akabazo n'agatangaro.

Ingero

- Twese duhagurukire kujijuka. Wabigeraho ute utazi gusoma? Ntibishoboka.
- Ntoye isaro ryiza shenge wee! Reka nge kuryereka nyogokuru.

c) Nyuma y'ingirwanshinga “-ti” n'ijambo “ngo” bikurikiwe n'utubago tubiri n'utwuguruzo. Ariko inyuguti nkuru ntitangira amagambo asubirwamo iyo uwandika yayatangiriye hagati mu nteruro yakuwemo.

Ingero

- Kankindi arasubiza ati: “Ibyo uvuze bingirirweho”.
- Igihe Kankindi yavugaga ati: “ibyo uvuze bingirirweho”, yari yaramaze gusabwa na Kamana.

d) Ku nyuguti itangira imibare iranga iminsi, amazina y'amezi n'ay'ibihe by'umwaka.

Ingero

- Ku wa Gatanu, ku wa Gatandatu.
- Ugushyingo gushyira Ukuboza
- Mu Rwanda haba ibihe bine by'ingenzi: Urugaryi, Itumba, Iki (Impeshyi) n'Umuhindo.

e) Ku nyuguti itangira amazina bwite y'abantu, ay'inzuzi n'ay'ahantu, kabone nubwo indomo itangira izina ry'ahantu yaba yatakaye.

Ingero

- Rutayisire atuye i Huye hafi ya Cyarwa.
- Mu Mutara hera ibigori.
- I Washingtoni (Washington) ni ho hari ikicarwo cya Banki y'Isi.
- Uwitwa Enshiteni (Einstein) yari umuhanga cyane.

f) Ku nyuguti itangira amazina y'imirimo, ay'inzego z'imirimo n'ay'amashyirahamwe.

Ingero

- Bwana Muyobozi w'Akarere
- Minisiteri y'Ubuhinzi n'Ubworozi
- Umuryango w'Abibumbye
- Koperative Dufatanye

g) Ku nyuguti itangira amazina y'impamyabushobozi, ay'icyubahiro, ay'inzego z'ubutegetsi, ay'ubwenegihugu n'amoko, ay'indimi, ku mazina y'ibikorwa byamamaye mu mateka no ku nyuguti itangira ijambo "Igihugu" iyo rivuga u Rwanda.

Ingero

- Dogiteri Karimanzira
- Nyakubahwa Perezida wa Repubulika
- Umurenge wa Nyarugenge
- Abanyarwanda barimo Abasinga n'Abagesera
- Dukwiye guteza imbere Ikinyarwanda.
- Mu Ntambara ya Kabiri y'Isi Yose hapfuye abantu benshi.

- Umwami Mutara III Rudahigwa ni umwe mu ntwari z'Igihugu.

h) Ku nyuguti itangira umutwe w'inyandiko, igitabo cyangwa ikinyamakuru.

Ingero

- Nuja mu mugi ungurire *Imvaho Nshya*.
- Musenyeri Kagame Alegisi ni we wanditse *Indyoheshabirayi*.

i) Izina bwite umuntu yahawe akivuka cyangwa irindi rifatwa nka ryo riri ku ntangiriro no ku mpera y'inyandiko (nk'ibaruwa, nk'itegeko, nk'umwandiko uwo ari wo wose,...) no mu rutonde rw'amazina y'abantu ryandikwa ryose mu nyuguti nkuru. Nyamara rikandikwa mu nyuguti nto uretse inyuguti iritangira yandikishwa inyuguti nkuru mu mwandiko hagati.

Ingero

- GAHIRE Rose
- UMURISA Keza
- BUTERA Simoni
- Nagiye kwa Gahire Rose anyakira neza.

Imyitozo



Kosora amakosa ari muri izi nteruro utange itegeko rituma uyita amakosa

- Ku wa gatanu no ku wa gatandatu duzajya dukorana inama.
- Minisiteri y'uburezi yavuguruye ikigo k'igihugu gishinzwe integanyanyigisho.
- u Rwanda ni igihugu cyo muri afurika yo hagati.

Inshamake

Mfashe ko: Hari amategeko agenga imyandikire y'ururimi rw'Ikinyarwanda agomba gukurikizwa kugira ngo imyandikire ibe inoze.

Ubu nshobora: Kwandika neza nubahiriza imyandikire yemewe y'Ikinyarwanda no kujora imyandikire itanoze y'Ikinyarwanda.



Isuzuma risoza umutwe wa gatatu

Karisa na Nyirakanyana

Nyirakanyana akimara kuva mu bitaro yumvaga yahita atandukana na Karisa ariko abo yagishaga inama bakamwumvisha ko atakwisigira abana. Amezi atandatu yamaze mu bitaro yasanze mu rugo harononekaye byinshi ibintu byaradogereye. Umurima w'ibirayi yasize ahinze ntiyagezemo. Ibikoresho byo mu rugo ntibyaherukaga irizi, abana babiri yahasize bari bakiri bato ntibashoboraga kubigirira isuku. Iyo batahaga bavuye kwiga bakwakwanyaga bateka ibyo barya se yabaga yasize mu ruganiriro. Iyo batabiryaga byashiririye byabaga birimo umunyu w'igisoryo cyangwa amavuta menshi. Bariraga ku masahani atogeje neza, amaga yari yarabarenze, imyenda bambaraga yari yaracupiye indi yuzuye ibizinga by'amakakama. Mu ishuri bari barasubiye inyuma.

Mu mezi atandatu Nyirakanyana yamaze mu bitaro, Karisa ntiyigeze atekereza ku byakorera mu rugo. Yazindukaga iya Marumba akagaruka igicuku kinishye. Ibyo yahahaga yabisigaga aho ntakurikirane uko byatetswe. Karisa amurambagiza, Nyirakanyana yigishaga mu mashuri abanza dore ko yari yararangiye mu Ishuri Nderabarezi. Bamaze kubana amubuza kugira ahandi ashaka akazi; amubwira ko agomba kumenya imirimo yo mu rugo gusa na we akajya azana amafaranga azatunga urugo. Karisa iyo yahembwaga amafaranga yo guhaha yayashyiraga ku kameza kabaga imbere y'uburiri akigendera akagaruka aryama. Nyirakanyana ni we wibwirizaga agahaha andi asigaye akayashyira mu buhinzi.

Hashize iminsi ibiri avuye mu bitaro, Nyirakanyana abona atakomeza kwinumira. Karisa atashye aramwegera amuganiriza afite ishavu n'agahinda.

- Iyo bavuze uburinganire n'ubwuzuzanye mu rugo ubyumva ute?
- Ibyo se ni byo wigiye mu bitaro aho wabaga. Bakwigishije ko uzajya unshyomokaho, unshiraho isoni umbaza ubusa?
- Igihe kirageze ko nkubwiza ukuri. Ni ngombwa ko


abashakanye bafatanyaga muri byose.

- Hari icyo wigeze umburana muri uru rugo se? Nta mafaranga yo guhaha ahari se ngo nyaguhe? Dushakana nakubwiye ko nzajya menya amafaranga yo guhaha nawe ukamenya imirimo yose yo mu rugo.
- Dukomeje dutya nta cyo twazageraho. Reba nawe uko imyenda y'abana yabaye! Nta safuriya nzima tukigira aha mu rugo, abana amaga yarabarenze, mu ishuri babaye aba nyuma nta mwanya wihaga ngo ukurikirane isuku n'imyigire yabo. Umurima w'ibirayi nasize mpinze ntiwigeze wufirirwa cyangwa ngo uterwemo umuti. Ni gute wumva ko tutagomba gufatanyaga muri ibyo byose koko? Umunyarwanda yaravuze ngo: "Inkingi imwe ntigera inzu".

Amaze kumubwira ibyo byose yibuka ko umwana yari arwaje yazize uburungare bwa Karisa igihe yamusiganye na we ku buriri, we arimo amesa imyenda y'abana akaza kumanuka ku gitanda akavunika umugongo.

Ibyo amaze kubyibuka yagize intimba n'agahinda amarira amuzenga mu maso maze abwira Karisa n'izindi ngaruka nyinshi zatewe no kutagira ubwuzuzanye mu rugo rwabo. Muri ako kanya Karisa nta cyo yahise amusubiza ariko yararanye inkomanga ku mutima yishinja kuba intandaro y'ingaruka umugore we yari amaze kumusobanurira. Ijoro ryose ntiyagoheka arara yibaza ku byo Nyirakanyana yamubwiye. Bukeye amusaba imbabazi ku byabaye byose aramubwira ati: "Nubwo nibutse ibitereko nasheshe, kuva ubu nkwemereye kujya tujya inama muri byose dusenyera umugozi umwe". Nyirakanyana aramushimira cyane batangira ubuzima bushya.

Kumva no gusesengura umwandiko



I. Ibibazo byo kumva no gusesengura umwandiko

1. Kuki Nyirakanyana yumvaga yatandukana na Karisa? Yabibujiwe n'iki?
2. Ni iki kigaragaza imibereho mibi abana ba Karisa bagize nyina ari mu bitaro?
3. Vuga ingaruka umuryango wa Karisa wagize kubera kutuzuzanya mu mirimo yo mu rugo?
4. Nyirakanyana ajya mu bitaro yari yasize ahinze umurima w'ibirayi. Yakuyemo umusaruro umeze ute? Kubera iki?
5. Kuki abana ba Karisa basubiye inyuma mu shuri? Utekereza ko mbere byaterwaga n'iki kugira ngo bagire amanota meza?
6. Ni ubuhe buzima bushya Karisa na Nyirakanyana batangiyeye?
7. Usibye kutuzuzanya mu mirimo yo mu rugo uwavuga ko Karisa yahohoteye umugore we yaba yibeshye? Sobanura igisubizo cyawe.
8. Garagaza akamaro k'ibiganiro, ku bashakanye, kagaragara mu mwandiko.
9. "Karisa iyo yahembwaga amafaranga yo guhaha yayashyiraga ku kameza kabaga imbere y'uburiri akigendera akagaruka aryama." Ni iyihe nama wagira Karisa?
10. Kuki Karisa avuga ko yibutse ibitereko yasheshe?

II. Ibibazo by'inyunguramagambo



Garagaza amagambo yakoreshejwe mu mwandiko asobanura:

- a) Yararumbije
- b) Kuzinduka kare cyane
- c) Ibintu ni magirirane
- d) Kwangirika
- e) Kwicecekera

Garagaza imbusane z'amagambo atsindagiye muri izi nteruro:

- a) **Bukeye** amusaba imbabazi ku byabaye byose
- b) Karisa atashye aramwegera amuganiriza afite **ishavu n'agahinda**.
- c) Iyo batabiryaga byashiririye byabaga birimo umunyu **w'igisoryo**.

Koresha aya magambo akurikira mu nteruro zigaragaza ko wumva icyo asobanura:

- a) Gukwakwanya
- b) Kwinumira
- c) Kugira inkomanga

III. Ibibazo ku kiganiro mpaka

"Bamaze kubana amubuza kugira ahandi ashaka akazi; amubwira ko agomba kumenya imirimo yo mu rugo gusa na we akajya azana amafaranga azatunga urugo." Umugabo ni we ugomba gukora akazi kazana amafaranga yo gutunga urugo naho umugore akamenya imirimo yo mu rugo gusa? Tanga ibitekerezo byawe bishyigikira cyangwa binenga iki gitekerezo.

IV. Ikibazo ku myandikire y'Ikinyarwanda

Kosora aho biri ngombwa amakosa agaragara muri aka gace k'inyandiko yo mu kinyamakuru [...]

Hari abagabo bumva ko iryo hame ngo ryaje kubasumbanisha n'abagore ngo rituma abagore batacyubaha mu ngo bigatuma abagabo batabyumva neza bakaba banahohotera abagore babo bakanabasiganya mu mirimo y'urugo.


Ku rundi ruhande hari naho usanga abagore nabo barabyumvishe nabi ku buryo nabo basiganya abagabo babo kandi bose bagakwiye kuzuzanya.

Kuko kwigisha ari uguhozaho inzego z'ubuyobozi zikaba zasabwe kugumya kujya barushaho gusobanura ihame ry'uburinganire n'ubwuzuzanye kugirango ritaba intandaro y'ubutane hagati y'abashakanye.

Umutwe wa kane

Kubungabunga ubuzima

4.1. Amagara aramirwa ntamerwa



Abagize umuryango wa Simbizi bahoreraga indyo imwe; ibyo bijumba n'udushyimbo duke ni byo bari baragize indyo ya buri muni. Ndetse byageraga mu itumba no muri gashogoro, ibishyimbo bikabura, ibijumba bakabirya byonyine byabaniga bakabimanuza urwagwa. Abana babo bari baragwingiye, abandi barwaragurika. Umunsi umwe barwaje umwana w'inshuke amaze kunegekara birukira ku mupfumu guteza inzuzi ngo barebe ko ahari

yabashakira insinzi. Burya koko ngo “iby’abapfu biribwa n’abapfumu”! Umupfumu yarabahabije, abamaraho udushaza n’udushyimbo bari bejeje, abaca inzoga nyinshi ndetse n’imfizi bari boroye arayibakiza, ababwira ko ari yo izavamo umuti w’umwana wabo.

Burya ngo “inzira ntibwira umugenzi”. Simbizi n’umugore we ibintu bimaze kubashiraho barashobewe, baza kwemera inama bahoraga bagirwa n’inshuti n’abaturanyi noneho baboneza iyo kwa muganga. Nyuma y’igikorwa cyo gusuzuma umwana, muganga yababwiye ko yazahajwe na bwaki biturutse ku ndyo ituzuye. Nyuma y’inyigisho n’inama bahawe na muganga, Simbizi n’umuryango we bageze mu rugo, bahinduye byinshi mu mirire yabo.

Bitabiriye guhinga kijyambere bahereye ku karima k’igikoni maze bihaza mu biribwa, bagaburira abana babo indyo yuzuye, yiganjemo imboga n’imbuto. Barakunda bagarura akabiri, indwara zabakurakuranwagaho zicika burundu mu rugo rwabo. Simbizi n’umugore we bababajwe n’uko ibyagombaga gutunga umwana wabo babigabije umupfumu akabyirira. Bashatse kumenya byinshi ku mirire myiza ni ko gukomeza kwitabira ibiganiro bikorerwa ku kigo nderabuzima cy’umurenge atuyemo akaba ari ho yashoboye no gusobanukirwa n’ibirebana n’indyo yuzuye ku buryo n’abo babishishikarizaga bagenzi babo bari barigeze kugira ibibazo by’imirire mibi. Inyigisho bahawe zikubiye mu ngingo zikurikira: “Gutegura indyo yuzuye ntibisaba gutegura amafunguro ahenze. Ibiribwa abantu barya buri muni ni byo bigize indyo yuzuye, ikibazo kiba mu mitunganyirize yabyo, aho usanga hari abantu batita ku ntungamubiri ziri mu mafunguro bagiye kugabura, maze bikabaviramo indwara ziterwa n’imirire mibi. Mu biribwa bikenewe kugira ngo umuntu ategure indyo yuzuye hagomba kubaho ibiribwa byubaka umubiri, ibiwutera imbaraga n’ibiwurinda indwara.

Ibyubaka umubiri twavuga nk’ibinyampeke, ibinyamisogwe, inyama, amafi, amagi, ibihumyo...

Umubiri ukeneye n’ibiwutera imbaraga nk’ibijumba, imyumbati, umuceri, ubugari...

Ibiribwa birinda umubiri indwara higanjemo imboga n'imbutu. Ibi byose bishobora kuboneka mu rugo rwa buri muryango w'Abanyarwanda. Nk'uko umuntu yubaka inzu ikomeye ndetse akanayitaho kugira ngo itangirika, umubiri na wo ukeneye ibiwubaka n'ibiwurinda ndetse n'ibituma ugira imbaraga.

Icyo umuntu aya ni cyo aba cyo. Kurya indyo yuzuye bituma umuntu agira ubuzima bwiza, ntarwaragurike kandi akagira imbaraga zituma akorera umuryango we n'igihugu ke. Nk'umugore utwite wabonye amafunguro afite intungamubiri zihagije abyara umwana ushyitse kandi ufite ubuzima buzira umuze. Ubwonko bw'umwana bukura neza ku buryo iyo umwana amaze kuba mukuru atagira ibibazo mu myigire ye.

Kugabura indyo imwe rero ni ukwica ubuzima bw'abantu. Umubiri utakaza ubudahangarwa ugasanga umuntu ararwaragurika kuko umubiri we uba warahindutse indiri y'udukoko dutera indwara zinyuranye, kandi agasaza imburagihe. Ikindi kandi ntareba kure mu mitekerereze ye. Birushaho kuba bibi iyo mirire mibi ijyanye no kunywa inzoga n'itabi. Umubiri urakayuka, ubwenge bukayoba bikaba byamuviramo indwara yo mu mutwe ndetse byarimba agapfa.

Abantu bagira ingorane zikaze ziterwa n'imirire mibi ni abana n'abagore batwite. Abana bazahajwe n'imirire mibi baragwingira, bakarwara bwaki, bakigunga ntibakine n'abandi bana, kandi ntibashobore kwiga neza. Abagore batwite na bo batabonye indyo yuzuye bashobora kubyara abana bapfuye cyangwa badashyitse.

Kugabura amafunguro arimo amavuta menshi cyangwa isukari nyinshi na byo ni bibi cyane.

Ibinure byinshi mu mubiri bigira ingaruka zitari nkeya mu kwangiza umutima, umwijima n'impayiko. Isukari nyinshi mu mubiri na yo ni mbi ishobora gutera indwara nka diyabete n'izindi. Indyo yuzuye rero ni ngombwa kuko ituma abantu bagira ubuzima buzira umuze, bagakorana ingufu, bagasabana n'abandi nta mususu, kandi bakagira ibitekerezo nyurabwenge.



Shaka amagambo udasobanukiwe mu mwandiko ugerageze kuyasobanura uhereye ku byo umaze gusoma kandi uyakoreshe mu nteruro:

Amagara, itumba, gashogoro, guhanyura, kunegekara, umupfumu, guteza inzuzi, gukayuka



Sobanura imvugo zikurikira:

Amagara aramirwa ntamerwa.

Inzira ntibwira umugenzi.

Iby'abapfu biribwa n'abapfumu.



Ibibazo byo kumva umwandiko

1. Ni bande bavugwa muri uyu mwandiko?
2. Bafite kibazo ki? Cyatewe n'iki?
3. Ni nde imirire mibi yagizeho ingaruka zikabije?
4. Bamuvuje kwa nde?
5. Nyuma yo gutakaza igihe ku mupfumu bafashe ikihe kemezo?
6. Ni iki cyahindutse ku buzima bwabo?
7. Akamaro k'indyo yuzuye ni akahe ukurikije ibiri mu mwandiko?
8. Ni izihe ngaruka ziterwa no kubura indyo yuzuye?
9. Iyo umuryango wa Simbizi uza kukugisha inama ku byerekeye kuvuza umwana wabo mbere y'uko baja mu bapfumu wari kubagira iyihe nama?
10. Vuga ibindi bitari mu mwandiko bigaragaza ingaruka z'indyo ituzuye ku buzima n'imibanire mu muryango.



Gusesesengura umwandiko

1. Garagaza kandi unasobanure ingingo z'ingenzi zivugwa mu mwandiko.
2. Hina uyu mwandiko mu magambo yawe bwite wubahiriza imyandikire yemewe y'Ikinyarwanda.

Imyitozo y'ubumenyingingiro



Kungurana ibitekerezo

Mu bihugu bikiri mu nzira y'amajyambere cyane cyane ibihugu bya Afurika biherereye mu magepfo y'ubutayu bwa Sahara hakunze kuboneka abantu bazahajwe n'imirire mibi. Ibyo biterwa n'iki? Ni izihe ngaruka zigaragara mu rwego rw'imiryango, mu rwego rw'igihugu? Ni uwuhe muti watanga kuri icyo kibazo?

4.2. Mpogazi na Magaramake



Ngwino Mpogazi wange
Dutoze ibibondo
Barumuna bawe:
Kirezi na Bwiza
Na Sheja na Sangwa
Gukunda ibirayi
Bitogosheje neza
N'izo pinari
Dusoromye mu wacu.

Aka kanya nkubwira
Dore na karoti
Bavanye mu kibaya
Ziteye umuneza

Magara make araje
Yitwaje ikibando
Ngo adatemba agahwera
Kubera ubusinzi.

Ati: " Mbega abazungu
Mwitereka izo ntekwa
Ukagira ngo ni byeri!"
Nti: " Ngwino ku meza.
Guteka ibikwiye
Ntibigomba ubuzungu
Iyo byeri utubwira
Uyinyoye utariye
Iguhuta uyireba".

Ngizo na puwaro
Zigira impumuro nziza
Iyo zitamye mu cyungo
Ni zo ziryosha potaje.

Uyikorane ubuhanga
Maze n' uwo mugati
Ubihuze mu kanya
Tubyite mahwane
Biryohere dushime.

Wari uzi n' ikindi
Nzanye isake kabombo
Uyiteke n' uwera
Maze nibihura n' isupu
rwatsi,
Byubake umubiri.
N' izo mbaraga dukeneye
Tuzunguke bwangu.

Mu mafunguro yacu
Hari imbuto nyinshi
Nitwegeka ibondo
Twariye ibyo byiza
Tukaryama n' aheza
Biturinda uburwayi.

Ati : "Nge nanga ibiribwa
Nk' uko umwana mutoya
Yanga kinini".

Nti : "None se mbwira
Ko ureba udashinga,
Abana wabyaye,
Bazarerwa na nde"?

Iyo ukomatanyije izo
ntekwa
Ukirinda gusinda
Urengera amagara
Uzi ko aseseka ntayorwe.

Ati : "Iyo nama ni nziza,
Na Gihozo tubana
Ahora antota iyo ngingo
Nkanga ngatsemba.
Ubu ngiye gutaha
Mbwire madamu
Angaburire mpage
Iyo ndyo yuzuye neza
Ngire imbaraga nk' abandi,
Nkorere umuryango
Wunguke byinshi
N' ejo hazaza
Hazabe umutako
Turatira abandi ;
N' iri zina bampimbye
Rizabe amateka"



Tanga ibisobanuro by' amagambo udasobanukiwe akurikira uhereye ku nyito afite mu muvugo

Mpogazi, Magaramake, ibibondo, isheja, ikirezi, guhuta...

Umwitoto w'inyunguramagambo



Koresha amagambo akurikira mu nteruro ebyiri ku buryo adahuza inyito: **gutota, guseseka, umuryango**.

Ibibazo byo kumva umuvugo



1. Ni bande bavugwa muri uyu muvugo?
2. Barakora iki?
3. Mpogazi yakundaga iki?
4. Magaramake atandukaniye he na Mpogazi?
5. Ni nde wahinduye imyitwarire? Yabitewe n'iki?
6. Ni irihe somo uyu muvugo ugasigiyeye?

Gusesesengura umwandiko



1. Uhereye ku nsanganyamatsiko nyamukuru, tahura ingingo z'ingenzi uyu muvugo ubumbatiye.
2. Andika ku gafishi ibiribwa n'ibinyobwa wategura mu ndyo yuzuye ugakora ifunguro rya mu gitondo, irya saa sita n'irya nimugoroba.

Umwitozo w'ubumenyingiro: Gufata mu mutwe



1. Fata uyu muvugo mu mutwe maze uwuvuge imbere ya bagenzi bawe ugaragaza isesekaza.

4.3. Ubutinde n'imiterere y'amasaku mu nteruro

Soma amagambo n'interuro zikurikira maze ushyire amasaku aho wumva akwiye kujya hanyuma ugire icyo uvuga ku myitwarire y'amasaku ku magambo amwe ugereranyije n'uko byari bisanzwe ijambo ari ryonyine:

- Imirire, indyo, abapfu, imboga.
- Abana bazahajwe n'imirire mibi baragwingira.

- Gutegura indyo yuzuye ntibisaba gutegura amafunguro ahenze.
- Kurya indyo yuzuye bituma umuntu agira ubuzima bwiza.
- Kugabura indyo imwe rero ni ukwica ubuzima bw'abantu.
- Simbizi na Mariya bararwaye.
- Umuryango wa Simbizi utuye mu Rugarama rwa Butamwa.
- Iby'abapfu biribwa na Mupfumu
- Nyiri ibiribwa ni we nyiri ubuzima
- Ubukana bw'imboga ntibwotsa imbehe.
- Ntuzarwaze bwaki nka Rugereka

Amasaku mbonezanteruro

Mu nteruro habamo amagambo ahindura amasaku kamere y'ayandi magambo bihuriye muri iyo nteruro. Bene ayo masaku masha, bayita amasaku mbonezanteruro.

Ingero z'amasaku mboneza nteruro

Ibyungo “na” na “nka”, ibinyazina ngenera n'akajambo “nyira” iyo bikurikiwe n'izina ridafite indomo, ariko rifite isaku nyejuru ku mugemo wa gatatu, icyo gihe ayo magambo atuma haza isaku nyejuru ku mugemo wa mbere w'iryo zina.

Ingero

- Shyoroongi na Kîgalî bireegeranye.
- Ngeenda na Bûtamwâ biri kure.
- Ruhaango ya Gîtarâma iri kure.

Iyo ibyungo “na” na “nka”, n'ibinyazina ngenera n'akajambo nyira bikurikiwe n'izina ridafite indomo kandi ridafite isaku nyejuru, nta gihinduka kuri iryo zina. Iyo ayo magambo akurikiwe n'izina ridafite indomo rikagira isaku nyejuru ku mugemo wa kabiri ariko riri ku nyajwi ya kabiri y'ubutinde, iryo saku rirahaguma hanyuma hakaza irindi saku nyejuru ku mugemo wa mbere.

Ingero

- Karimuunda na Mûsaâre
- Rukara na Mûraâmbi
- Akazaamuukana na Rwîntaâshya

Iyo isaku nyejuru riri ku nyajwi ya mbere y'ubutinde nta gihinduka

Ingero

- Muraâmbi na Zâaza
- Daatâ na mwâana

Iyo bikurikiwe n'izina ridafite indomo ariko rifite isaku nyejuru ku mugemo wa kabiri bituma rya saku ryimuka rikajya ku mugemo wa mbere.

Ingero

- Maara ya Bûtare
- Kagabo na Gâsore
- Ngarama ya Gâtsibo

Buri gihe nyuma yo gufata indomo ikurikira ayo magambo akatwa ihita ifata isaku nyejuru.

Ingero

- Umusôre n'ûmukoôbwa.
- Amatâ y'âbakinyi.

Ikitonderwa

Iyo izina rikurikiye icyungo cyangwa ikinyazina ngenera gikase rifite isaku nyejuru ku mugemo wa kabiri bituma indomo y'iryo zina igira ubutinde bufite isaku nyejuru ku nyajwi ibanza.

Ingero

- Ukwêezi n'îizûuba
- Igikiniisho cy'ûumwâana

Iyo kuri ubwo butinde nta saku nyejuru rihari, indomo ikurikiza amagambo akase igira ubutinde ariko noneho isaku nyejuru rikajya ku nyajwi ya kabiri y'ubwo butinde.

Ingero

- Iby'uûwo mwâana
- Iby'uûwo mwaanda

Buri gihe ikinyazina mbanziriza gihorana isaku nyejuru ku gicumbi cyacyo.

Ingero

- Ibyô wavuzê
- Ukô tumezê
- Ahô yanyuzê

Indangahantu "ho, yo , mo/mwo" n'akajambo "ko" buri gihe bigira isaku nyejuru kandi na yo ntigira integuza.

Ingero

- Tugiiyeyô
- Avuze kô
- Hô ndahâazi

Impakanyi "ta" yo mu nshinga akenshi igira isaku nyejuru kandi na yo ntigira integuza, ntishobora no kuba integuza.

Ingero

- Kutâzâajyayô
- Kudâkorâ



Umwitozo

Soma izi nteruro uko zivugwa umujyho umwe hanyuma uzandike mu nyandiko ya gihanga.

- Utabusya abwita ubumera.
- Imana y'abatindi ni yo ibogosha.
- Gera umuzinga ku wa Bugegera.
- Ntugakangwe n'iminsi mibi kandi imyiza iyiruta ubwinshi.
- Udakora ntakarye.
- Numusangayo umuntahirize
- Vamo nange ngemo.
- Akana k'umworo kirabura kataroga.
- Iby'abacuzi mbihariye abakannyi.
- Nyiri ubwenge aruta nyiri uburyo.
- Nyiri ibitugu binini ntarengwa n'imijugujugu.



Isuzuma risoza umutwe wa kane

Kurya neza

Munana n'umugore we Mukankusi bari bararahiye kunywa amazi. Kunywa inzoga bari barabigize itetu, ngo ikizaba bazanywa umuti. Bavuga ko amazi ari ayo gukaraba no kumesa. Ku bijyanye n'imirire, bikundiraga ifiriti, inyama zikaranze cyangwa zozeje. Umugore wa Munana iyo yasibaga inzoga yinyweraga amata, byongeye kandi akikundira n'ibiyakomokaho byose. Imbutu ntiyazikozwaga ngo ntakiri uruhinja ngo azinywera imitobe yo mu ruganda ngo ni yo imugwa neza.

We n'umugabo we baje guhozagara birenze urugero, ndetse bakurizamo no kurwara. Bagiye kwa muganga, babaza imibereho yabo cyanecyane ku bijyanye n'imirire. Muganga yabagiriye inama yo kujya barya neza. Bati: "Ese kurya neza ni iki ko ntawuturusha kurya neza"?

Muganga ati: Kurya neza ni ukwihata ibiryo binyuranye, bifite intungamubiri zose kandi nturenze igipimo ku ndyo imwe wikundiye. Amafunguro yanyu ya buri muni agomba kuba arimo imboga n'imbutu zinyuranye, ibinyampeke, ibinyamafufu, inyama, amafi, amagi ndetse n'ibinyamisogwe. Mu byo munywa muge munywa amazi menshi.

Munana: Amazi y'umugezi atera inzoka!

Muganga: Muge muyanywa atetse.

Mukankusi: Nge nikundira inyama sinzajya kuzironga ngo ndanywa amazi.

Muganga: Mada, urashaka kuba nka ba bandi bavuga ngo amazi anyobwa n'inka gusa. Mugomba kumenya ko amaraso yacu agizwe na bibiri bya gatatu by'amazi. Ni byo, inyama ni nziza ariko uriye nyinshi zigutera uburwayi. Dore nk'ubu wowe n'umugabo wawe murwaye indwara mwatewe no kurya inyama nyinshi zirenze urugero. Wowe by'umwihariko urwaye n'izindi ndwara yatewe no kunywa amata menshi no kurya ibiyakomokaho byinshi akarenza

urugero. Aha kandi ndongeraho ko urwaye n'indwara ziterwa n'isukari nyinshi.

Munana: None se twabigenza gute kugira ngo dukire izi ndwara ko mbona tubaye imbata zazo?

Muganga: Mugomba kwivuzza kenshi, mukarya neza kandi mugakora n'imyitozo ngororamubiri. Nimudakurikiza izi nama mbagiriye, izi ndwara zizaba twibanire. Mugomba kuringaniza ubwoko bw'ibiribwa, mukirinda gukabya ku ndyo imwe mwitwaje ngo murayikunda cyane. Kurya neza si iby'umunsi umwe ahubwo ni iby'ubuzima bwanyu bwose. Ubu ngiye kubandikira imiti ariko nimudahindura imyitwarire mu byo murya n'ibyo munywa, imiti nta cyo izabamarira. Mu by'ukuri, nta biryo cyangwa ibinyobwa bibujijwe, nta n'ibyo twavugaga ngo ni agatangaza, icya ngombwa ni ugufata amafunguro yubaka umubiri, awutera imbaraga, n'awurinda indwara. Amafunguro agomba kuba ahagije, anyuranye, kandi akungahaye mu ntungamubiri ku buryo bw'indinganire. Murabyumvise?

Munana: Ni byo rwose, n'ubundi ngo " Agapfa kaburiwe ni impongo", ubu tugiye kubungabunga ubuzima bwacu tubishishikarize na bagenzi bacu kuko amagara yacu ari bwo bukungu kandi ari nk'amazi aseseka ntayorwe.

I. Ibibazo by'inyunguramagambo

1. Sobanura amagambo akurikira ukurikije ibyo wasomye:
Itetu, imbuto ntazikozwa, guhozagara, ibinyampeke, ibinyamisogwe, imbata, indwara za "twibanire", kubungabunga.
2. Koresha mu nteruro amagambo akurikira: itetu, guhozagara, ibinyampeke.

II. Ibibazo byo kumva umwandiko

1. Ni ikihe kibazo kivugwa muri uyu mwandiko?
2. Cyatewe n'iki?
3. Cyaje gukemuka se? Sobanura igisubizo cyawe.
4. Hari amafunguro abujijwe cyangwa se ay'agatangaza? Sobanura igisubizo cyawe.
5. Tanga ingero ebyiri z'ibiribwa bikomoka ku mata.
6. Tanga ingero ebyiri z'indwara Mukankusi na Munana bashobora kuba barwaye usobanure n'impamvu.
7. Ni irihe somo uyu mwandiko ukwigishije?
8. Sobanura imvugo zikurikira uzihuza n'umwandiko
 - a) Ikizaba nzanywa umuti.
 - b) Agapfa kaburiwe ni impongo.
 - c) Amagara ni nk'amazi araseseka ntayorwe.

IV. Ikibazo k'ihangamwandiko

Andika mu magambo yawe ubutumwa bukubiye muri uyu mwandiko (kimwe cya kabiri cy'urupapuro).

III. Ikibonezamvugo

1. Soma izi nteruro uko zivugwa umujyo umwe maze uzandike mu nyandiko igaragaza ubutinde n'imiterere y'amasaku:
 - a) Munana na Mukankusi barahozagaye.
 - b) Ngiye kujya mfata indyo yuzuye nk'abandi.
 - c) Kwa Munana barariye ifiriti n'inyama.
 - d) Karimunda yaguye ivutu none aracyaryamye.
 - e) Bwira uwo mwana anywe amazi.
 - f) Utazi akaraye i Fumbwe araza ifu.
 - g) Nyiri inkwi ni we urya ibihiye.
 - h) Uvuyeyo?
 - i) Umukobwa wa Senyanzobe ntaramenyera kurya imboga.
 - j) Intamenya ntibwira umugenzi.
2. Andika interuro enye zinyuranye ugaragaza amasaku mbonezanteruro ukoreshejemo amagambo akurikira: na, nka, nyira, n'impakanyi –ta-

Amashyamba n'ibiti bifite akamaro ku buzima bwa buri muni ndetse no ku mibereho irambye y'umuryango nyarwanda. Mu buzima bwa buri muni, amashyamba atanga ibiti byubakishwa, n'inkwi zo gucana. Ariko na none, ibiti bituma habaho imihindagurikire y'ikirere ari byo bituma imvura igwa neza kandi ku gihe. Amashyamba abamo amoko menshi y'ibimera n'inyamaswa, ibyo bikaba bifitiye akamaro uruhererekane rw'ibidukikije. Mu mashyamba habamo ibinyabuzima bikurura ba mukerarugendo baduha amadovize atuma duhaha mu mahanga ibyo tudafite.

Amashyamba yugarijwe n'ibibazo binyuranye. Muri byo twavuga nko gutema ibiti byinshi kurusha uko biterwa; gusarura amashyamba mu kajagari; ibyorezo by'amashyamba nk'inkongi y'umuriro, kutamenya neza uruhare rw'amashyamba mu bukungu bw'igihugu n'imiryango. Hari impungenge ko amashyamba ashobora kuzazimira. Ibiti byinshi biri aho abaturage batuye no mu misozi byaratemwe, bisiga imisozi yanamye indi ari ibiharabuge. Mu mpamvu nyamukuru zituma ibiti bicika twavuga: inkongi z'umuriro zidakumirwa, itemwa ry'amashyamba hashakishwa amakara, imbaho,... Buri Munyarwanda wese akwiye kugabanya itemwa ry'amashyamba akoresha amashyiga cyangwa imbabura zirondereza ibicanwa. Hagomba kwirindwa gutema amashyamba hashakwa umwanya wo guturamo n'uwo guhingamo. Ikibazo k'ingufu zitekesha na cyo ni ingorabahizi kubera ko gifite ingaruka ku bimera. Kuba icyo kibazo k'ingutu gikomeje kubaho, kikaba kiyongera ku kibazo cy'ubwiyongere bw'abaturage buri mwaka, maze hakaza n'ikibazo cy'uburyo bwo gucana no guteka budahwitse, byatumye amashyamba akoresha birenze urugero.

Ingaruka zo gutsemba amashyamba ni mbi ku bantu bose. Gucika kw'amashyamba bituma habaho imihindagurikire y'ikirere imvura ntigwe uko bisanzwe. Bitera ubutayu, hakabaho imyuka mibi kuko umwuka mubi wa gaze karubonike wiyongera, imigezi n'andi masoko y'amazi bigakama, ibyo bigatuma ubutaka bwambara ubusa, kandi bimwe mu binyabuzima biba mu mashyamba bigacika.

Ubusanzwe abantu bakenera ogisijeni mu guhumeka kandi ibimera byo bikenera gazi karuboniki. Bityo mu ihumeka ryabyo biduha umwuka mwiza duhumeka naho umwuka mubi dusohora ukaba ibiryo byabyo. Iyo rero ibimera bidahari, umwuka mwiza duhumeka uragabanuka, gazi karuboniki ikiyongera maze imyuka yangiza ikirere n'ibidukukije ikiyongera kugeza n'aho yangiza agakingirizo k'izuba katurinda imirasire yangiza, nuko ubushyuhe bukiyongera ari na ko amazi agenda agabanuka.

Turebye ibintu bibangamiye amashyamba mu Rwanda muri iki gihe, birakenewe ko hafatwa ingamba zo kurinda uwo mutungo ukomeye w'Igihugu. Guverinoma yashyizeho poritiki n'amategeko bizagenda uburyo umutungo w'amashyamba wakwitabwaho. Kuba poritiki yo kwegereza abaturage ubuyobozi yarashyizwe mu bikorwa, inshingano zo kwita ku mashyamba zavuye kuri Leta ziba iz'abaturage.

Hari ibikorwa byinshi bishobora kongererwa ubushobozi maze bikarinda amashyamba. Ibyo ni nko: kwita cyane ku gukangurira abatuye mu turere, imirenge n'utugari gutera ibiti, kandi hagaterwa gusa ubwoko bw'ibiti bikenewe; gukoresha amashyiga n'imbabura zirondereza ibicanwa; gushaka ubundi buryo bwo kubona ingufu zo gutekesha aho guhora hakoreshwa inkwi; guca itwikwa ry'amashyamba, cyanecyane mu gihe k'izuba hagahanwa ababifatiwemo; gushishikariza abantu gutera ibiti mu mirima iruhande rw'imyaka no kwigisha abantu uburyo bunoze bwo kubahiriza itegeko ry'amashyamba.

Minisiteri y'Ubutaka, Ibidukikije, Amashyamba, Amazi na Mine, 2005

Tanga ibisobanuro by'amagambo akurikira



Ishyamba kimeza, ibiharabuge, amadovize, gaze karubonike, ibyorezo, ingorabahizi.



Umwitozo w'inyunguramagambo

- a) Amagambo akurikira ashobora kugira inyito zirenze imwe. Yakoreshe mu nteruro ebyiri zitandukanye ukurikije inyito zayo zitandukanye: Ingano, ubuzima, kubaka, gutema.
- b) Shaka amagambo atanu mu kinyatuzu, afite ibi bisobanuro biri hasi (uyashake ugana: Iburyo, ibumoso, hasi, hejuru, imberame). Koresha ikaramu y'ibara uca umurongo werekana aho wakuye ijamba mu kinyatuzu.
1. Ishyamba ritatewe n'abantu, ryimejeje.
 2. Indwara zanduza, zica abantu benshi kandi vuba.
 3. Umwuka usohoka iyo umuntu cyangwa ibindi binyabuzima bihumeka, uba wanduye.
 4. Ahantu ubutaka bwashizeho hagasigara hambaye ubusa
 5. Amafaranga y'amahanga akomeye, akoreshwa mu isi hose.

I	S	H	Y	A	M	B	A	K	I	M	E	Z	A
B	D	U	R	W	I	V	A	N	B	A	R	B	I
I	F	U	M	U	S	U	B	I	I	O	E	A	R
H	G	I	A	M	A	D	O	V	I	Z	E	Z	A
A	S	C	C	U	F	G	R	V	A	A	M	I	D
R	X	I	N	G	O	R	A	B	A	H	I	Z	I
A	D	C	T	A	I	D	H	G	A	C	R	A	G
B	S	R	H	I	N	Y	A	M	A	S	W	A	E
U	B	U	K	E	Z	K	A	G	U	J	K	E	N
G		R	I	Z	U	O	B	Y	G	M	A	N	A
E	K	V	D	I	B	Y	O	R	E	Z	O	G	U
G	A	Z	E	K	A	R	U	B	O	N	I	K	E

Ibibazo byo kumva umwandiko



1. Vuga akamaro k'amashyamba n'ibiti.
2. Ni akahe kamaro ko kubungabunga amashyamba?
3. Hari ibibazo byugarije amashyamba? Sobanura igisubizo cyawe.
4. Vuga ingaruka ziterwa no gutsemba amashyamba?
5. Ni izihe ngamba zafashwe kugira ngo iki kibazo kitaba ingorabahizi?
6. Ni irihe somo uyu mwandiko ugusigiye ryagufasha mu buzima bwa buri muni?

Gusesengura umwandiko



1. Mutahure ingingo z'ingenzi zigize umwandiko
2. Musobanure iyi migani migufi ivuga ku giti:
 - Igiti kimwe si ishyamba.
 - Igiti kigororwa kikiri gito.
 - Igiti umusaza azacana agitera akiri umusore.

Umwitoto w'ubumenyingiro



Mukoreshe abanyarubuga bakurikira mukine mwigana ibivugwa mu gika gikurikiraho.

Abanyarubuga

- Abaturage batatu bahora batema ibiti mu ishyamba. ry'Akarere baja kubigurisha.
- Ushinzwe kurinda ishyamba.
- Ushinzwe amakuru mu mudugudu.
- Ushinzwe iterambere mu mudugudu.
- Ushinzwe umutekano mu mudugudu.
- Indorerenzi z'abasore n'inkumi bakinaga umupira hafi aho, biganjemo abanyeshuri bari mu biruhuko.

Igika

Abaturage bamenyereye gutema ibiti, ushinzwe kurinda amashyamba abafashe arababuza bashaka gutera amahane. Yitabaje inzego z'ibanze zo mu mudugudu. Abagize inzego z'ibanze basobanuriye abaturage akamaro ko kubungabunga amashyamba n'ibihano biteganyirijwe abayonona. Abaturage barabyumvise, basaba imbabazi biyemeza no gutera ibiti aho batuye.

5.2. Ikomorazina mvazina

Sesengura amazina ari mu nteruro zikurikira ugaragaza amazina mbonera gakondo n'andi atari mbonera kandi ugerageze gusobanura imiterere yayo:

- Kalisa yagiye gutora udukwi mu gashyamba ko mu gacyamo.
- Yiyumvagamo ubugabo bwo guhangana n'ibinyabwoya.
- Abasizi bakunda gukoresha invugoshusho
- Databukwe na Sobukwe ni inshuti nyanshuti.
- Amasaka ya nyiragikori avamo igikoma kiryoshye.
- Twagiye kubona nyamuntu arahahingutse.
- Umwana wa samusure avukana isunzu.
- Shabukuru ni indwara itavurwa.
- Wari wajya mu rwingwe? Oya, aho nageze ni mu rwimbogo.
- Umwamikazi n'umugabekazi bari abagore bakomeye ibwami.
- Uriya mugabo yahishije akayogazi.

1. Inshoza y'ikomorazina mvazina

Ikomorazina mvazina ni ihimba ry'amazina mashya uhereye ku bicumbi by'andi mazina asanzwe mu rurimi.

2. Inzira z'ikomorazina mvazina

a) Ikomorazina mvazina ripfobya

Ni iryongera ku ngingo isanzwe indi ngingo igaya nk'iy'ubunini, ubuto, ububi bukabije...

Ingero

- Inka → agaka → igika → uruka
- Umugabo → akagabo → ikigabo → urugabo

b) Ikorazina ryitirira

Ni irihimba amazina mashya, rishingiye ku masano y'ingenzi ayo mazina afitanye n'ayo akomokaho.

Ingero

- Umwarimu → ubwarimu
- Igitebo → ubutebo
- Igitoki → urutoki
- Umugano → urugano
- Umucaca → urucaca
- Umwangavu → ubwangavu

c) Amazina afite ibicumbi bifatanye n'indangazina

Ni amazina usanga afite indagazina ebyiri: Indangazina ya mbere ni yo igaragaza inteko iryo zina ririmo, naho iya kabiri ikaba ari iy'izina nyakimwe iryo zina rikomokaho.

Ingero

- Ijisho → Akajisho → ikijisho
- Umuntu → ubumuntu
- Ubugabo → akanyabugabo

Amazina y'inyuge aranga amasano

Ni amazina yiyunga akaba izina rimwe riranga isano abantu bafatanye mu muryango. Ayo mazina yashyizwe muri iki kicio kubera ko abashakashatsi basanze ayo mazina agizwe n'amazina abiri yagiye ahindura intego ku buryo butandukanye.

Ingero

- Databukwe = data-ubukwe: ø- ø-data- ø-bu-ko-e
o → w/-J
- Mabukwe = mama-ubukwe: ø- ø-ma- ø-bu-ko-e
o → w/-J
- Sobukwe = so-ubukwe: ø- ø-so- ø-bu-ko-e
o → w/-J
- Nyokobukwe = Nyoko-ubukwe: ø- ø-nyoko- ø-bu-ko-e
o → w/-J

Ikitonderwa:

Aya mazina yose ari mu nteko ya mbere. Ntabwo afite indomo n'indanganteko, inteko yayo igaragara iyo bayashize mu nteruro.

Urugero

- Databukwe ni munini

Amazina akomoka ku tubimbura

Akabimbura ko mu mazina ni akaremajambo k'amagambo agoragorwa kaza mbere y'indanganteko cyangwa mbere y'igicumbi kakagira intego zitandukanye.

Utubimbura tw'ingenzi two mu mazina ni tune: a-; -nya; -nyira; -sa/sha

a) Akabimbura nyira karema

- Amazina y'amasano akurikira: Nyirabukwe, nyirabuja, nyirasenge.
- Amazina bwite y'abantu b'igitsina gore: Nyirabagenzi, Nyirangirente, Nyirahabimana...
- Amazina rusange: Nyiramasibira, nyiragikori.

b) Akabimbura nya

- Kajya imbere y'ibicumbi by'amazina. Gafite umumaro wa ngenera

Ingero

- Umunyakigali,
- Umunyabintu,
- Ba nyakabyizi.

Kagira inyito yo kwibutsa

Urugero

- Tugiye kubona tubona nyamugore araje.

Kagira inyito ihamya

Ingero

- Dutere intambwe nyantambwe.
- Inshuti nyanshuti.
- Inka nyanka.

c) Akabimbura sa ni impuzanyito ya nya

Karema amazina bwite	Sabizeze, Sagihobe, Sagitwe...
Karema amazina rusange	Agasamunyiga, Samusure...
Gashobora kugira impuzantego sh	Shabukuru

d) Akabimbura -a

Gafitanye isano n'ikinyazina ngenera. Kabanziriza indanganteko cyangwa indomo.

Urugero

- Rwimbogo → ru-a-i-n-bogo

Amazina afite inyongera cyangwa umusuma

Umusuma ni akajambo kiyongera inyuma y'igicumbi k'izina kakaryongerera ingingo y'igitsina gore, yo gutubya cyangwa yo gusebya.

Umusuma-kazi ufite inyito y'igitsina gore

Ingero

- Inkokokazi
- Umugabekazi
- Umunyarwandakazi

Umusuma -rume usobanura igitsina gabo

Ingero

- Isekurume
- Marume

Umusuma -azi ukoreshwa mu kugaya agaciro k'umuntu cyangwa k'ikintu.

Ingero

- Ikintazi/ Ikintagazi
- Uruntagazi
- Akayogazi

Amazina afite igicumbi gisubiwemo

Igicumbi gisubiwemo cyonyine

Ingero

- Igikobokobo
- Ikigorigori
- Igishakashaka
- Insoresore
- Umugwegwe
- Ikigwagwa

Igicumbi gisubiranywemo n'indanganteko

Urugero

- Urunturuntu
- Ibicumbi bisubiwemo bifite inyunga –a hagati yabyo

Ingero

- Ingeragere
- Ivumavuma
- Intokatoki
- Umusangasange


Umwitozo



Garagaza amazina ari mu nteruro zikurikira akomoka ku yandi werekane ikorazina ryakoreshejwe, ugaragaze uturemajambo n'amategeko y'igenamajwi yakoreshejwe:

Ubuhinzi bw'urutoki bufitiye akamaro kanini Abanyarwanda. Umuhinzi nyawe yicira urutoki akuramo intokatoki. Ku mwero w'imyaka, ibigorigori, ibishogoshogo n'ibishazashaza babikoresha mu gufumbira urutoki.

5.3. Kubungabunga amazi n'ibishanga



U Rwanda ni igihugu gifite umutungo mwinshi w'amazi. Uwo mutungo ugaragara mu migezi, ibishanga, ibiyaga n'amazi ari munsu y'ubutaka. U Rwanda rufite ibiyaga makumyabiri na bitatu bifite ubunini butandukanye. Ikiyaga cya Kivu kikaba ari cyo kinini kuruta ibindi. Hari n'inzuzi nyinshi, ariko uruzi rw' Akagera ni rwo ruzwi cyane. Abenshi bemeza ko isoko ya Nili iri mu Rwanda. Nubwo ayo mazi tuyasonzana, leta yiyemeje guteza imbere gahunda yo kuhira imyaka ikoresheje ayo mazi dufite.

Ibinyabuzima ibyo ari byo byose bikeneye amazi. Inyamaswa, ibimera n'abantu bakeneye amazi. Ibimera bikeneye amazi ngo bikure. Inyamaswa zikeneye amazi yo kunywa kugira ngo zibeho. Abantu bakeneye amazi kubera impamvu zinyuranye. Amazi akenewe mu ngo kugira ngo anyobwe, atekeshwe, akarabwe cyangwa amesheshwe. Inganda na zo zikeneye amazi mu byo zikora. Amazi

akoreshwa mu kuvomerera imyaka kandi akoreshwa mu gutanga amashyanyarazi. Ntitwakwiyibagiza ko imigezi n'ibiyaga bituma habaho imibereho myiza y'ibinyabuzima biba mu mazi nk'amafi, imvubu, ingona n'ibindi.

Hari ibibazo bibiri nyamukuru byugarije umutungo w'amazi, ari byo guhumana no gukama. Guhumana kw'amazi yo mu Rwanda guterwa n'isuri, kuyajugunyamo imyanda, amafumbire mvaruganda ava mu mirima n'ibindi bikorwa by'abantu bibera hafi y'amazi nk'icukurwa ry'umucanga. Gukama kw'ibiyaga n'imigezi bibaho kubera impamvu nyinshi zirimo gutemwa kw'ibiti birinda isuri, guhinga hafi cyane y'ibiyaga n'inzuzi, gukamura ibishanga, kugomera amazi hashakwa kuvomerera imyaka, kumera kw'ibyatsi bibi nk'amarebe n'imihindagurikire y'ikirere itewe no gucika kw'amashyamba.

Ingaruka zo guhumana no gukama kw'amazi ziteye inkeke. Nk'uko twabibonye, impamvu ibitera ni uko ibinyabuzima byose bibaho kubera amazi. Amazi ahumanye atera indwara nka za tifoyide, macinya, korera n'izindi. Amazi ahumanye na yo ashobora gutera urupfu rw'ibinyabuzima biba mu mazi nk'amafi. Gukama kw'ibiyaga n'inzuzi bituma habaho ibura ry'amazi yo kunywa, hakabura amazi yo kuvomerera ibihingwa, ayo gukoresha mu nganda, hakabura amashanyarazi n'izindi ngaruka nyinshi ziteye inkeke.

Kuba twabonye akamaro k'amazi n'ibibazo byugarije umutungo w'amazi mu Rwanda, hagomba gukorwa ibishoboka byose ngo tuwurinde. Ibi ni bimwe mu bikorwa byakorwa bikagira akamaro:

- Kwirinda ko inzuzi n'ibiyaga byuzuramo imyanda harwanywa isuri.
- Kurwanya ijugunywa ry'imyanda yo mu nganda no mu ngo mu nzuzi cyangwa mu biyaga.
- Guha imbaraga itegeko rivuga ko nta bikorwa bishobora gukorerwa ahantu hari munsu ya metero mirongo itanu uvuye ku nkengero z'ikiyaga na metero icumi uvuye ku nkengero z'umugezi.
- Kurinda ahantu hari ibimera birwanywa isuri ngo bidacika.

- Gukoresha no kureka amazi y'imvura hakoreshejwe ikoranabuhanga ritabangamiye ibidukikije.
- Guhugura abantu bakamenya ko amazi ari umutungo ushobora gushira. Uwo mutungo rero ugomba kurindwa n'abantu bose.

Kubungabunga amazi bijyana akenshi no kubungabunga ibishanga kuko ibishanga birangwa no guhorana amazi. Igishanga ni ahantu harambuye hagati y'imisozi harimo amazi menshi n'urusobe rw'ibinyabuzima hamera urufunzo cyangwa urukangaga cyangwa ibimera byo mu muryango wabyo. Akenshi abantu bibagirwa ko ibishanga ari bimwe mu bigize ibidukikije. Igishanga gishobora gusobanurwa nk'igice cy'ubutaka gishobora kumara igihe kirekire, kigifite ubuhehere kandi kikaba gishobora kweramo ibimera bimwe na bimwe gusa. Ibishanga bifite akamaro. Ni utuyunguruzo tw'umwimerere tw'amazi, bitanga ibikoresho gakondo by'ubugeni, nk'ibikoreshwa mu kuboha uduseke kandi bimwe mu bimera biba mu tubande bivamo imiti. Ikindi kandi, ibishanga bibamo amoko menshi y'ibinyabuzima.

Ni yo mpamvu ibishanga bigomba kwitabwaho. Gusa muri rusange, ibishanga ntibyitabwaho kandi binakoreshwa nabi, hatabanje kwigwa ingaruka ibikorwa by'ubukungu bishobora kugira ku buzima bw'abantu, cyangwa se kwiga imikoresherezwe irambuye y'ibishanga birimo gukoreshwa.

Minisiteri y'Ubutaka, Ibidukikije, Amashyamba, Amazi na Mine, 2005.



Inyunguramagambo

Tanga ibisobanuro by'amagambo akurikira.

Guhumana, umwimerere, inkengero, urufunzo, urukangaga, ubuhehere, gakondo, ubugeni.

Umwitozo w'inyunguramagambo



Koresha amagambo akurikira mu nteruro ziboneye
Ubugeni, guhumana, umwimerere, inkengeru, urufunzo.

Ibibazo byo kumva umwandiko



1. Usanga uyu mwandiko ubwirwa ba nde?
2. Rondora akamaro k'amazi
3. Vuga bimwe mu bibazo byugarije umutungo w'amazi.
4. Bigenda bite iyo amazi ahumanye cyangwa akamye?
5. Ibishanga bifite akahe kamaro?
6. Wagira iyihe nama abantu bahumanya amazi, abubaka mu bishanga? Abavoma amazi y'ibishanga?
7. Ni irihe somo ry'ingenzi wakuye muri uyu mwandiko ryagufasha mu buzima busanzwe.

Umwitozo w'ubumenyigiro: Gukora inshamake



Nyuma yo kugaragaza ingingo z'ingenzi zikubiye mu mwandiko, kora inshamake yawo ku gice cy'urupapuro.

5.4. Amoko y'imyandiko

Nimusome umwandiko "Umutungo w'amazi ukwiye kubungabungwa" maze mugaragaze ibice biwugize muhereye ku bika biwugize, ibivugwamo n'uburyo bivugwamo. Nimugereranye uyu mwandiko n'ingeri z'ubuvanganzo bwo muri rubanda muhereye ku kivugwa, ikigamijwe n'uburyo bivugwamo.

Duhereye ku buryo ibitekerezo biri mu mwandiko bitondetse no ku buryo bwo gusesengura ikivugwa, imyandiko ishobora kugabanywamo amoko atanu ari yo: umwandiko mbarankuru, umwandiko mvugamateka, umwandiko nsesengurabumenyi, umwandiko mvugamiterere n'umwandiko ntekerezo.

5.5. Akamaro ko gusoma ibitabo



Umuco wacu ni ihuriro ry'ubumenyi n'ibikorwa byakusanyijwe n'abakurambere. Ntitwashobora rero kubicengera tutamenye imitekerereze n'imibereho byabaranze, kandi kugeza ubu, uburyo bwo kubigeraho butuma twitwa intiti, ni ugusoma.

Nta gishobora gusimbura gusoma, zaba inyigisho zitangwa mu mvugo cyangwa amashusho tureba muri firime na tereviziyo, ntibifite ubushobozi bwo kwigisha nko "gusoma". Amashusho, ni meza mu kwerekana ibivugwa cyangwa ibyanditswe, ariko ntabwo atanga ibitekerezo ngo anabisesengure! Firime inyuraho igahita, nyamara igitabo cyo gihora ari umugenzi n'inshuti tuyana. Umwanditsi Montenye (Montaigne), ni we wavugaga ko yari afite ibintu bitatu nkenerwa mu buzima, ari byo: urukundo, ubucuti no gusoma.

Gukunda ibitabo rero birakwiye. Tubigire inshuti nyanshuti. Igitabo kimwe gisabanya za miriyoni z'abantu mu bihugu byose. Bityo abanditsi nka Balizaki (Balzac), Shekisiyiya (Shakespeare), Bodoleri (Beaudelaire), Kami (Camus) n'abandi; usanga basabanya abantu batagira ingano ku isi, bahuriye ku kuba barasomye ibihangano byabo.

Gusoma ni uburyo bwo kwagura ubumenyi. Nta muntu n'umwe wagira ubumenyi bwite ku buryo yashobora kumva abandi no kwimenya we ubwe. Umuntu udasoma aba ameze nk'imfungwa yigunze muri iyi si nini imuzengurutse. Tubabazwa n'akarengane n'ingorane z'ubuzima; mu bitabo rero twigiramo ko n'abandi bakurambere bababariye muri iyi si, bakanashakashaka kimwe natwe. Bidukingurira amarembo y'imibereho y'abandi bantu, ndetse bikanatwaturira akari mu mitima yabo. Ibitabo biduha kwagura ubumenyi, bikadufasha kureka guhora dutekereza ibintu bimwe bidafite icyo bitwungura. Ibitabo ni bwo buryo buduha kumenya ibyabaye mu bindi bihe n'ahandi hantu tutaragera. Nk'ikinamico yo mu gihe cyashize ituma tumenya imibereho y'abantu b'icyo gihe.

Muri make, dusoma kugira ngo turenge imbibi z'ubuzima bwacu, tumenye ubw'ahandi. Nyamara si wo munezero wonyine dukura mu bitabo. Nko gusoma igitabo cy'amateka bigirira akamaro kanini cyane imitekerereze yacu. Kigisha umusomyi gushyira mu gaciro no kwihanganira abandi. Kimwereka ko ihangana rikomeye ryateje intambara z'isi yose n'izagiye ziba hagati y'amako, kuri ubu ryagombye kubonwa nk'imishyamirano idafite akamaro. Iryo rero riba ari ivomo ry'ubunararibonye utapfa kubona ahandi. Usomye igitabo kiza, ntakomeza kumera nk'uko yari ameze atarahura na cyo; kiramuhindura, kikamwubaka bushya.

Nta kintu rero cyagirira abantu akamaro nko kwegerezwa ibyo byiza bibafasha kwirenga, no kwagura ubumenyi, bituma duhinduka, bikatwongerera agaciro mu mibereho yacu. Inzira yonyine yo kubigeraho, ni ugushyiraho inzu z'isomero. Mu by'ukuri, tugeze mu bihe abantu bose bakwiye kugira uburenganzira bungana bityo rubanda ikagira umwanya n'ijambo mu miyoborerere. Icyo gihe, rubanda ni yo igomba gufata ikemezo mu guhitamo

amahoro cyangwa intambara, imigendekere y'ubutabera, mbese ikaba ari yo igena ikerekezo iganishamo igihugu cyabo n'isi muri rusange. Ubwo butegetsi bwa rubanda ari bwo twita demokarasi, busaba ko abaturage bigishwa ku bibazo nyamukuru bihanze isi. Twakwemeranya ko bagenda babyiga mu mashuri; nyamara izo nyigisho ntizaba zuzuye inzu z'isomero zitunganiye ayo mashuri. Gutega amatwi umwarimu w'igihangange, ntibihagije kugira ngo ubwenge bwuzure ubumenyi. Hagomba kwiyongeraho umwanya wo gutekereza no gusesengura mu mutuzo ibyo wasomye. Akamaro ka mwarimu ni ako gutanga umuyoboro ngenderwaho, ibindi bikuzuzwa n'umurimo bwite w'umunyeshuri.

Gusomarerosi umwitozow'ubwenge gusa. Biha urubyiruko kumenya ukuri kudashobora kwigishwa uko kwakabaye mu ishuri, ahubwo kugomba gushakishwa n'umuntu ku giti ke, mu gukorana umwete, akubaka umutimanama we. Inzu z'isomero ni icyuzuzo cy'amashuri na za kaminuza, kwiga bikaba urufunguzo rudukingurira imiryango yazo. Ibyo bihinduka ihame ku bifuzwa gukomeza kwihugura nyuma yo gusohoka mu mashuri.

Umuturage wo muri Demokarasi, wifuza kuzuzura inshingano ze uko bikwiye, agomba guhora asoma igihe cyose agifite ubuzima. Amateka akomeza kwiyandika kandi akazana ibibazo bishya bihanze ubuzima bw'abantu. Washyigikira iki, wahagarara ute ku bitekerezo bifite ishingiro, warwanya ute ubusazi bukoma ku bwicanyi, udafite icyo uzi kuri bene ibyo bibazo? Uko imyaka ishira, ni ko ibintu bigenda bihinduka. Ni nde uzakwigisha ubwo bumenyi bushya, ibyo bintu imibereho yawe myiza ishingiyeho? Ni iki cyagufasha gushingira imirimo yawe ya buri muni kuri ibyo bintu bishya bigenda bivumburwa? Soma rero, ujyane n'ibihe.

Byafatiwe ku byanditswe na A. MAUROIS muri Le Courier de P'UNESCO, yo muri Gicurasi 1961, bihindurwa mu Kinyarwanda na NDINDA Blaise Pascal.

Tanga ibisobanuro by'amagambo akurikira



Intiti, gukora iyo bwabaga, gutekereza ku buryo bwimbitse, amayobera y'igitabo, ubunararibonye.

Ibibazo byo kumva umwandiko



1. Ni iyihe mpamvu gusoma ibitabo ari ngombwa?
2. Kuki bikwiye gukunda ibitabo?
3. Ni gute umuntu udasoma aba ameze nk'imfungwa?
4. Ni uwuhe mumaro urenze ubumenyi umuntu akura mu gitabo kiza asomye?
5. Kuki abantu bakwiye kwegerezwa amazu y'isomero?
6. Ni izihe ngamba mwafata kugira ngo mushishikarize umuryango wanyu, inshuti zanyu, abaturanyi na bagenzi banyu umuco wo gusoma?
7. Umwanditsi aravuga ati: «Ibitabo ni inshuti z'indahemuka zihoraho». Mwemeranyijwe na we cyangwa muramuhakanya?
8. Umunyeshuri wakwishingira kugendera ku byo umwarimu amuhaye yagira ubumenyi buhagije? Kubera iki?

Gusesengura umwandiko



1. Uyu mwandiko wanditswe n'umunyamahanga, ibitekerezo biwukubiyemo wabisanga no mu Rwanda? Sobanura igisubizo cyawe.
2. Muhereye ku bika bigize umwandiko nimushake ingingo z'ingenzi zigize umwandiko.

5.6. Umwandiko ntekerezo

Uyu mwandiko “Akamaro ko gusoma” murasanga umwanditsi yarawanditse agamije iki?

Ugereranyije n’umugani muremure urasanga mu miterere yayo itandukanira he? (intangiriro, uko ibitekerezo bikurikirana n’umusozo)

1. Inshoza y’umwandiko ntekerezo

Umwandiko ntekerezo ni umwandiko ugambiriye gutanga ibitekerezo ariko noneho bigomba gusobanurwa, kugaragazwa n’ingero, ndetse n’ibipimo by’imibare n’ubundi bumenyi. Uwandika bene uwo mwandiko agomba gutanga ibisobanuro bifatika kuri buri gitekerezo atanze, akerekana ko hari abandi babibonye nka we, akagaragaza n’inkomoko y’ibyo uvuga; kuko aba agambiriye ko babyemera.

Urugero

Uramutse ufite insanganyamatsiko yo kuvuga ku ishyamba rya Nyungwe, ushobora: kubara inkuru iryerekeyeho, kuvuga amateka yaryo, kuvuga imiterere yaryo urishimagiza cyangwa ugira ibyo unenga, gusesengura aho riri ku ikarita, impamvu habamo amoko y’ibiti ibi n’ibi, akamaro rifitiye u Rwanda n’isi, ...

Imyandiko ntekerezo rero ni yo yagiye ihindura isi kuko akenshi yibasira igitekerezo rusange, gishobora kuba kemewe na benshi kandi kimaze igihe, nyamara wenda atari cyo, cyangwa kikaba kitakijyanye n’ibihe. Bityo, iyo ibivugwa bigaragaye ko ari ko kuri, bihindura byinshi ku bantu no mu mibereho yabo.

Umwandiko ntekerezo uba ugambiriye kwemeza abandi igitekerezo cyawe, no gutuma bahindura icyo bo bari bafite. Kugira ngo rero ubigereho witwerereza ubumenyi bwose. Bityo rero muri wo dushobora gusangamo agace kavuga amateka, akabara inkuru, agasesengura ibintu mu buryo bwa gihanga, ... ariko byose bigambiriye kwerekana ukuri kw’igitekerezo ushyigikiye.

2. **Amabwiriza yo guhanga umwandiko ntekerezo**

Guhanga umwandiko ntekerezo ni ugutanga ibitekerezo uhitamo uruhande ubogamiraho ku nsanganyamatsiko yatanzwe, wabanje kwiga ikibazo, ukifashisha ingingo zumvikana kandi zifatika ndetse ziherekejwe n'ingero. Insanganyamatsiko ishobora kuba ijyanye n'iby'umuco, ubukungu, poritiki, imibereho y'abaturage, iyobokamana, ubutabera n'ibindi.

Insanganyamatsiko ushobora kuba wayihawe cyangwa wayitekererejeho. Insanganyamatsiko ni ikintu k'ingenzi kigomba kwitonderwa, kuko ibyandikwa ni cyo biba bishingiyeho, kandi uburyohe bw'umwandiko buturuka ku nsanganyamatsiko n'uburyo wayambitse.

Nubwo buri muhanzi agira inganzo ye mu buryo bwo kuryoshya igihangano, hari ibikorwa by'ingenzi agomba gukurikiza kugira ngo umuntu aboneze igihangano ke. Ayo mahame ni ugutekereza cyangwa kumva insanganyamatsiko, kwegeranya ingingo, guhitamo inzira, gukora imbata no kwandika.

a) **Gutekereza no kumva insanganyamatsiko**

Mbere yo kwandika ubanza gutekereza ku nsanganyamatsiko ushaka kwandikaho, ukayiyumvisha, ukayigira iyawe, cyanecyane iyo ari iyo wahawe. Kumva ingingo wandikaho bikorwa mu byiciro bibiri:

- Kuyisoma witonze, ukayisesengura, ushaka inyito z'amagambo ayigize kuko ijambo rimwe rishobora kugira inyito nyinshi.
- Gushakamo ijambo cyangwa amagambo fatizo yaguha inzira n'imbibi by'insanganyamatsiko. Iyi ntambwe ya mbere ni ingenzi kuko ntushobora kubona ibitekerezo utanga ku bintu nawe ubwawe utumva neza.

b) **Kwegeranya ingingo (ibitekerezo)**

Iyo umaze kumva neza insanganyamatsiko, utangira kwandika ku rupapuro rwo guteguriraho ibitekerezo. Ukusanya ingero, amagambo meza yavuzwe n'abandi,

ibyawe ubwawe waba uzi, n'ibindi. Biba byiza iyo insanganyamatsiko wandikaho uyizihoh byinshi, kandi ugashingira ku bintu bifatika.

Iyi ntambwe ya kabiri na yo irakomeye kuko ari yo igufasha gukurikiranya neza ibitekerezo byawe, ugahitamo iby'ingenzi, ukegeranya ibihuye, ukabikurikinya mu buryo bwuzuzanya kandi hakurikijwe inyurabwenge.

c) Guhitamo inzira (guhita mu uruhande ushyigikira)

Mbere yo kwandika ugomba guhitamo imwe mu nzira eshatu zishoboka: niba igitekerezo gikubiye mu nsanganyamatsiko ari cyo uragishyigikira, niba atari cyo uragihinyuza, niba ubona nta ho wabogamira ujya hagati no hagati ugatanga igitekerezo kidafite aho kibogamiye, ariko gikosora impande zombi: urw'abakirwanya n'urw'abagishyigikiye. Niba insanganyamatsiko yatanze ari ikibazo, ushaka uburyo wagisubiza uhereye ku ngingo wegeranyije.

Mu rwego rwo gutanga ibitekerezo biboneye ni byiza kwita cyane ku ngingo zishyigikira ibitekezo byawe cyangwa byatanze no ku ngingo zivuguruza ibyo bitekerezo.

Iyi ntambwe irakomeye kuko ari yo yerekana aho ibitekerezo byawe bigana kandi guhitamo inzira ni byo bikurinda kujandajanda, bikanagaragaza ko ufite ubushobozi bwo guhagarara ku byo wemera.

d) Gukora imbata

Imbata y'umwandiko igira ibice bitatu by'ingenzi:

- Intangiriro.
- Igihimba.
- Umusozo (umwanzuro).

Intangiriro

Muri iki gice hashyirwamo ibikubiye mu nyandiko n'inyungu bayitezeho, ibice by'ingenzi bikubiye mu nyandiko yawe n'impamvu ugiye kwandika.

Intangiriro igomba kuba yujuje ibi bikurikira

- Kuba ari ngufi, ifite ireme, yanditse ku buryo uyisomye agira amatsiko yo gusoma ibikurikiyeho.
- Mu ntangiriro, ntugomba kunyura kure cyane; ugomba guhita umenyeshya icyo ugiye kwandikaho.
- Mu ntangiriro, ntugomba guhita werekana uruhande ubogamiyeho ku nsanganyamatsiko, kuko waba umaze amatsiko abasoma, ntibakomeze gusoma.

Igihimba

Ni igice kivuga ku nsanganyamatsiko ku buryo burambuye. Iki gice kerekana ibitekerezo n'ingingo zinonosora kandi zumvikanisha uruhande nyiri ukwandika ashyigikiye. Kubera uburebure bw'igihimba, n'ibitekerezo binyuranye bikigize, iki gice kigenda kigabwamo ibika. Ku ntangiriro ya buri gika, hajya ijambo rigihuza n'icyakibanjirije, ku buryo hagaragaramo uruhererekane rw'ibitekerezo. Ibyo bikorwa no hagati y'intangiriro n'igihimba, ndetse no hagati y'igihimba n'umusozo.

Ayo magambo yunga igika ku kindi ni nk'aya:

- Nk'uko tumaze kubivuga haruguru,
- Nyamara,
- Bitabangamiye ibyo tumaze kuvuga,
- Bityo rero,

Ikitonderwa

Inzira wahisemo, ntihita igaragara mu ntangiriro y'igihimba. Ahubwo igenda iyobora ibitekerezo byawe, yumvikana ku buryo buziguye mu bitekerezo, mu ngero, mu magambo yavuzwe n'abandi usubiramo, ... Buri ngingo y'ingenzi, igenda yiharira igika. Hari igihe ikibazo cyagira ibisubizo cyangwa ibitekerezo bibiri. Icyo gihe ubanza kwigizayo icyo utemera (kugisenya), kitajyanye n'inzira yawe, hanyuma ukabona gukurikizaho igitekerezo wowe ushyigikiye.

Urugero

Bamwe bavuga ko isi n'ibiyiriho bitaremwe n'Imana. Nyamara, iyo witegereje ubuhanga byaremanywe ntiwabura kuvuga ko ababitekereza batyo bibeshye. Ntukagaruke ku gitekerezo wavuze kuko ingingo zigenda zikurikirana ukurikije ingufu, inyurabwenge n'injyabihe ku buryo ugenda wumvisha umusomyi inzira yawe kandi uyimwemeza.

Umwanzuro

Umwanzuro ni igice kerekana ku mugaragaro uruhande rw'umwanditsi ku kibazo cyavuzwe mu intangiriro. Nta ngingo nshya izamo. Iki gice gishobora gufata intego zikurikira:

- Kwanzura ibitekerezo byawe muri make.
- Kwagura amarembo ku bandi banditsi, ngo bazakomerezeho, bagusubize cyangwa bakuzuze.

e) Kwandika

Kwandika, ntibikorwa umujyo umwe, ndetse iyo ari ngombwa byafata n'iminsi, kugira ngo ushobore kwandika utuje neza. Nyuma rero usubira mu byo wateguye, ugakuramo ibitari ngombwa, ibyisubiramo, ibikabya, ndetse ukongeramo ibyaba bibuzemo. Muri iki gice kandi, ni ho ushakisha amagambo yabugenewe kandi aryoshye. Byongeye kandi uboneraho ugakosora amakosa y'imyandikire n'utwatuzo.

Mu nyandiko, ntugatinye gushyiramo ibitekerezo n'ingero zishimishije, izisekeje, ariko byose bigusha ku byo wiyemeje kwigisha.



Umwitozo

1. Guhanga wandika bifite akahe kamaro?
2. Kora imbata y'umwandiko ntekerezo kuri imwe mu nsanganyamatsiko zikurikira:
 - Uburinganire bw'umugabo n'umugore.
 - Ubutabera n'amahoro.
 - Kubaho mu mudendezo bishingira ku ifaranga.

5.7. Amatwi arimo urupfu ntiyumva



Umusore Sinamenye yahagurutse iwabo i Nyagasambu aya kuraguzwa ku mupfumu Cyambarangwe. Ageze mu mudugudu umupfumu yari atuyemo, hari ku manywa y’ihangu, umudugudu wasaga n’aho nta bantu bawurimo. Yumvaga amajwi ariko ntabone abantu. Bibanza kumubera urujijo. Ashakisha ko yarabukwa inzu ya Cyambarangwe nk’uko bari bayimurangiye, araheba. Aho bigeze abona utwana tubiri dutera agapira. Ahamagara kamwe arakabaza ati:

- “Mbwira sha, waba uzi aho umupfumu Cyambarangwe atuye”?
- Yeee! Ndahazi, ngwino mpakwereke! Akurikira ka kana, bagera imbere y’urugo.
- Dore ni aha! Mwinjire, ahora mu nzu, ntajya guhinga, nta kintu ajya akora.
- Urakoze mwana wa, urakoze cyane!

Ku rubaraza koko hari hatatse impu zitonye amabara y’ingwe. Ariko se zari impu koko! Reka daaa! Byari ibishushanyo! Sinamenye abona ko impamvu atari yahamenye, ari uko yari yiteze kubona impu nyampu. Sinamenye arinjira ariko afite ubwoba. Ageze mu nzu yumva ijwi atazi iyo riturutse rigira riti:

- Icara musore, ndaza kuguhamagara umbwire ikikugenza!

Sinamenye yiyumvisha ko ibyo bari baramubwiye ari byo koko. Bari baramubwiye ko Cyambarangwe ari umupfumu rwoma uzi byose, ko icyo aguhanuriye ukibona, ko hari abari abakene yahaye gukira, ko hari abarwayi babaye bazima ku bwe. Bari baramubwiye ko atanga impano yo gukundwa n'umukobwa cyangwa umugabo ushatse, ko kandi nta cyo adashobora kuguha wamugezeho.

Muri ako kanya hahinguka akana kamuzanira amazi afutse yica akanyota, yihanagura ibyuya ategereza ko umwanya we ugera. Mu mwanya akana karagaruka.

- Ni wowe utahiwe, urinjirira mu rugi rwa gatatu usohokere mu muryango w'inyuma.

Sinamenye arinjira, abona icyumba gifite ibishushanyo byinshi ku nkuta, abona umugabo wambaye umwenda utonnye nk'ingwe, yegamiye uruhu rw'ingwe rubambye ku rukuta. Ibyo birushaho kumutera ubwoba. Umupfumu atiriwe yubura amaso, aramubwira ati: "Icara imbere yange umbwire ikikugenza". Sinamenye yicara ku ruhu ruhanda kandi rukonje. Aratangira ati: "Mvuye kure cyane, maze imyaka itatu nifuza kukubona, nahuye n'ingorane n'ibigeragezo n'inyatsi mu buzima bwange, ndashaka ngo umbwire ikibintera ukanambwira n'insinzi yabyo".

Hashira umwanya nta cyo amubwira, Sinamenye yumva atangiye kunanirwa no kugira ibinya mu maguru, kubera kwicara hasi kandi hakonje. Aho bigeze, Cyambarangwe aramubwira ati: "Dore mugenzi, mbonye ibyawe byose, ibyo ngiye kukubwira si byiza, ariko ni ngombwa ko mbikubwira, nta gihe kirekire usigaje cyo kubaho".

- Ngo iki, ngiye gupfa?
- Si ibyo mvuze. Mvuze gusa ko usigaje igihe gito cyo kubaho!
- Nzapfa ryari?
- Ibyo sinabikubwira, nange sinashobora kukubwira umunsi n'isaha; simbizi.
- Sinamenye arahaguruka, ashaka gusohoka.
- Ntabwo wanyishyuye!
- Ni byo, nari nibagiwe.

Arishyura, arasohoka. Yari yahinduriye. Yagendaga ahomvomva, asa n'utazi iyo ajya. Afata inzira igana ku kiyaga, ageze mu mudugudu Munyabugingo yari atuyemo, ayoboza iwe.

- Muzee, bambwiye ko ngiye gupfa!
- Ni nde wabikubwiye?
- Umupfumu muzee!

Amarira yamubungaga mu maso, ijwi ryajemo amakaraza. Umusaza atangazwa no kubona umusore nk'uwo arira, amujyana iwe.

- Umusore nkawe ntashobora gupfa none aha. Uracyakomeye ku buryo utapfa gupfa.
- Ko ari ko umupfumu yambwiye se?
- Reka turebe, hari ubwo urwaye se, hari aho ubabara?
- Oya, ntaho mbabara?
- None se ufite ubwoba?
- Yiiii! Mfite ubwoba, ubwoba bwinshii!
- Ibyo si byiza Siname, umupfumu yavuze ko ugiye gupfa, ariko se ubundi wowe wari uzi ko uzatura nk'umusozi, ugomba gukomera, n'urwo rupfu ukarutegerezanya ubutwari. Ni nde se utazapfa? Abantu twese ntiduhora turwiteze umunsi ku munsi. Tugiye kugumana, dukorane, uzabona ko nta kizakubaho.
- Mfite ubwoba bwo gusiga mama na barumuna bange batishoboye, kandi ari nge wabafashaga.
- Imana yabaremye se izaba iyobewe ko ubasize? None se kuki so yagusize, hari ubwo wari wishoboye, ntiwabayeho se?

Igihe cyo kurya, bazana ibiryo, Sinamenye biramunanira, bajya kuryama abura ibitotsi, akaguma asimbagurika, avuga ko agiye gupfa, burinda bucya. Mu gitondo umusaza amukwikirira isuka, amusaba ko bajyana gukora. Bageze mu murima, Sinamenye arahinga, yibagirwaho nk'isaha imwe akorana umurava, ariko mu kanya aribuka.

- Muzee, ndumva nacistse intege, ngiye gupfa!
- Ongera ugeragezeho gato.
- Oya muzee, nta mbaraga na mba ngifite!
- Tuge mu rugo noneho! Bamaze kugenda umwanya muto, Sinamenye aricara.

- Muzee, ndumva ndimo kunanirwa guhumeka!
- Biratangaje rwose, nta n'ubwo turatera intambwe zingaha? Ubwo koko urananiwe! Ishyiremo ko utananiwe uhaguruke tugende.
- Ushobora kuba ufite ukuri koko! Ntabwo naniwe cyane.
- Ni byo Sinamenye, ngwino dukomeze!

Barongera bafata urugendo, Sinamenye agatera intambwe atambuka neza, ariko mu kanya, akagenda ategatega. Amaguru ye yamufashaga kera kwiruka agafata ingeragere, yari yabaye ubusa, amuremereye nk'umutwaro. Sinamenye ntiyashakaga kuyaterura, nuko koko biramunanira. Arahagarara, aratitira, ahamagara umusaza.

- Muzee, amaguru yange....
- Abaye iki se kandi amaguru?
- Sinshobora kuyaterura. Ngiye gupfa.

Oya ntabwo upfa. Haguruka tugende! Aho bigeze, ndaguheka nkugeze mu rugo.

Umusaza aramwiyegamiza, baragenda bagera mu rugo. Bahageze amuha amazi aranywa. Arangije araryama. Ajya kumushakira ibyo yamuhembuza. Agarutse asanga Sinamenye akiryanye, aramukangura, amubaza uko amerewe. Sinamenye amubwira ko adashobora kureba, ko ndetse atari gushobora no guhumeka. Umusaza aramwinginga amuha agakoma arahembuka. Umusaza yakomeje kumuganiriza amuhumuriza. amubwira ko ntaguterwa ubwoba n'abapfumu. Mu minsi mike ariko Sinamenye arijajara asubira mu mirimo bisanzwe.



Tanga ibisobanuro by'amagambo akurikira wasomye mu mwandiko

Igihangamanywa, izuba rimena imbwa agahanga, zitonye/gutona, inyatsi, insinzi, guhinduriza, guhomvomvwa, umurava, kugenda ategatega, gutura nk'umusozi, kubika, ingeragere, umupfumu rwoma.

Umwitozo w'inyunguramagambo

1. Koresha aya magambo mu nteruro zigaragaza ko wumva neza icyo asobanura.
 - Guhomvomva
 - Inyatsi
 - Insinzi
2. Uzuza iyi nteruro ukoresheje ijambo rivuye mu mwandiko: Kamana azi kwiruka cyane nk'..... ntiwamwirukaho ngo umufate.

Ibibazo byo kumva umwandiko

1. Wowe wumva ute icyo Abanyarwanda bakunze kwita inyatsi? Wemera ko ibaho? Sobanura.
2. Ni iki kerekana ko Sinamenye yari umusore ufite imbaraga mbere y'uko aya kuraguzwa?
3. Hari abantu batagira ibibazo mu buzima bwabo?
4. Mu by'ukuri Sinamenye ubona yarishwe n'iki?
5. Uhereye kuri uyu mwandiko wavuga ko ibyo abapfumu baragura atari ukuri?
6. Kuraguzwa biracyabaho mu muco nyarwanda?
7. Abapfumu baragurisha iki?
8. Uyu mwandiko uratwigisha iki k'ingenzi?

Gusesengura umwandiko

Ongera usome umwandiko maze usubize ibibazo bikurikira:

- Abanyarubuga b'ingenzi bavugwa muri uyu mwandiko ni ba nde?
- Vuga muri make ibivugwa muri uyu mwandiko.
- Vuga uburyo bugaragara mu mwandiko bwo gutanga inkuru.
- Tanga ingero z'ibarankuru n'iz'ibiganiro.
- Hari aho umubarankuru yigaragaza?

- Ukurikije uko ubara inkuru avuga, akurikirana abanyarubuga, ahindura umwanya areberamo nk'aho abona byose, hitamo igisubizo kiza:
 - a) Uyu mbarankuru ni n'umunyarubuga w'inkuru.
 - b) Ubara inkuru si umukinnyi ariko abarimo hagati.
 - c) Ubara inkuru ni umuntu witaruye urebera hanze y'urubuga ashobora kubona ibiba byose ndetse n'ibiri mu mitima y'abakinnyi.

5.8. Umwandiko mbarankuru

Umaze gusoma umwandiko "Amatwi arimo urupfu ntiyumva" ni ibihe bintu wifuzaga kumenya wumva bitavuzwe? Kuki ibyo byose utabisanga muri uyu mwandiko? Ukurikije imiterere y'uyu mwandiko wawita iki mu rwego rw'ubuvanganzo? Sobanura.

1. Inshoza y'umwandiko mbarankuru

Umwandiko mbarankuru ni igihangano gishingiye ku kubarira abandi ibyabaye ubivuye imuzungu ukagera ku ndunduro; ariko mu buryo bworoheje butarimo isesengurabitekerezo ryimbitse, ridacukumbura insanganyamatsiko nyinshi.

Kubera ko gusobanura inkuru byatugora tutabanje kuvuga ku buryo butandukanye bukoreshwa n'umuntu mu kugeza ku bandi ibitekerezo bye, reka tubanze tuvuge kuri ubwo buryo muri make.

Ubwo buryo bushobora gukoreshwa ni imvugo y'ibiganiro hamwe n'inkuru.

2. Uturango tw'umwandiko mbarankuru

Imvugo y'ibiganiro

Iyo tuvuga tunganira, iyo twandika ibaruwa, iyo dutanga ibitekerezo ku ngingo iyi n'iyi, dukoresha uburyo bw'imvugo bwitwa imvugo y'ibiganiro, kuko haba hari uvuga n'ubwirwa.

Ubwo buryo bwo kuvuga cyangwa imyandiko ikozwe muri ubwo buryo, bugaragazwa mbere na mbere n'ibihe inshinga zitondaguwemo: indagihe, impitakare, n'inzagihe.

Izo nshinga zerekana igihe igikorwa cyabereye ugereranyije n'igihe bavugira. Ibyo bihe kandi bigaragaza uvuga uwo ari we n'ubwirwa mu gihe iki n'iki. Hashobora no gukoreshwamo impitakerandetsen'indagihe y'ubusanzwe, ariko nta mpitagihe yonyine ishobora kuzamo.

Imvugo y'ibiganiro ishingiyeye ku gutanga ibitekerezo, ikanarangwa n'ibi bikurikira:

- Ibinyazina ngenga bigaragaza uvuga n'ubwirwa (ngenga ya mbere n'ya kabiri mu bumwe cyangwa mu byinshi).
- Amagambo agaragaza igihe n'ahantu: Hano, none, ejo, mu minsi ibiri iri imbere, mu mwaka utaha, ...
- Amagambo agaragaza ibitekerezo by'uvuga uruhande abogamiyemo, n'ibindi.

Aho imvugo y'ibiganiro igaragarira cyane:

Mu byegeranyo ntekerezo: aho umuntu aba agambiriyeye gutanga igitekerezo ke cyangwa isesengura yakoze ku bintu ibi n'ibi agamije kwerekana aho ukuri guherereye.

Ingero

- Nge ndabibona gutya,
- Ndemeza ko, ...

Mu masengesho no mu mitoma: aho nyakuvuga asaba nyakubwirwa ibintu ibi n'ibi, akamuhimbaza, amutaka, amuryarya; ndetse akiha inshingano n'amasezerano y'ibyo azamukorera.

Ingero

- nzagukunda,
- nzagutonesha nguteteshe,...

Mu ikinamico: Aho abantu bagirana ibiganiro bavugana imbonankubone.

Mu masesengura y'ibinyamakuru, mu bisigo birimbwa, mu ndangamatwara y'imitwe ya poritiki (aho umuntu agaragaza ibyo yemera n'ibyo atemera, ibyo azakora naramuka atowe,...), mu bisingizo,

Mu mabaruka: aho umuntu asaba cyangwa akagira icyo ageza kuri mugenzi we.

Mu nkuru, hari igihe umwanditsi ahitamo kutigaragaza mu byo avuga, ibyabaye bisa n'aho byivugaga byo ubwabyo, nta sano igaragara bifatanyeho n'uvugaga, n'umwanya avugiramo. Ubwo buryo bwo kugeza ku bandi ibyabaye cyangwa ibyo utekereza utabigaragayemo ni bwo bwitwaga inkuru.

Imyandiko ikozwe ku buryo bw'inkuru, irangwa n'impitakera nk'igihe k'ibikorwa. Nta mpitakare igaragaramo. Uvugaga yirinda kugaragaza igitekerezo ke, nta ho anenga cyangwa ngo ashime ibyabaye.

Aho uburyo bw' inkuru bukoreshwa

Imvugo y'inkuru igaragarira cyane mu myandiko y'abanyamateka, mu nkuru ngufi cyangwa ndende, mu migani, mu bitekerezo, ...

Ikitonderwa: mu mwandiko umwe ntihabura kugaragaramo isimbuzura ry'izo mvugo zombi. Ibyo bigaragara nk'iyi mu nkuru rwagati nyiri ukuyibara ashyizemo ikiganiro, umuntu umwe avugisha mugenzi we akamusubiza, cyangwa nk'igihe mu ibaruwa, uwanditse agera aho akabarira inkuru uwo yandikiye.

Uburyo bwo kubara inkuru

Buri nkuru iba yubakiye ku bintu bibiri by'ingenzi:

Ku ruhande rumwe hari amateka y'ibyabaye, ababigizemo uruhare, mu gihe iki n'iki n'ahantu aha n'aha.

Ku rundi ruhande, hari imyubakire y'umwandiko (uburyo bwo kubara ibyo byabaye), bujyana n'uburyo uhitamo kuvugaga ibyabaye cyangwa ibyo utekereza.

Uvugaga

Ntihagomba kwitiranywa umwanditsi (umuntu uzwi wabayeho cyangwa ukiriho), n'umubazi w'inkuru ugaragara mu mwandiko nk'aho ari umuntu ufite ubushobozi budasanzwe.

Umwanya w'ubara inkuru

Ni uruhare afite mu nkuru abara. Ashobora kubara inkuru afitemo uruhare nk'umunyarubuga cyangwa akayibara atari mu rubuga; adafite uruhare mu byabaye. Dore aho abo babarankuru bombi batandukaniye.

Ubara inkuru adafitemo uruhare

Icyo gihe umwanditsi avuga ibyo abandi banyarubuga bakoze, adafitemo uruhare, ku buryo atagaragamo yivugaho, cyangwa ngo atange ibitekerezo. Iyi nkuru turangije gusoma yinjira muri urwo rwego.

Ubara inkuru ari n’umunyarubuga

Bene uwo munyarubuga aba avuga ibyamubayeho cyangwa ibyo we ubwe yagizemo uruhare cyangwa agatanga ibitekerezo abiyerekejeho. Ubu buryo bukunze gukoreshwa mu bitabo by’abantu bavugaga ku buzima bwabo.

b) Imiterere y’umubarankuru

Ashobora gufata imiterere itandukanye bitewe n’ubushobozi afite bwo kugera aho inkuru ibera hose no kumenya ibyabereye ahantu aho ari ho hose cyangwa ubwo bushobozi bukaba bufite aho bugarukira. Kubera izo mpamvu, ubara inkuru ashobora kwitwara ku buryo butatu butandukanye ari bwo: umubarankuru ubona byose (umumenyabyose), umubarankuru urebera imbere mu rubuga (utarenga urubuga), n’umubarankuru urebera hanze y’urubuga (utabona ibiri imbere mu rubuga).

Umubarankuru ubona byose

Ibyo uwo mubarankuru avugaga biba birenze ubumenyi n’ubushobozi bw’abanyarubuga. Ntagira umwanya umwe wihariye, abivugaga nk’umunyamateka uzi byose, uhindura umwanya n’uburyo aboneramo ibyo avugaga. Ashobora kuvugaga ibyabereye ahantu aho ari ho hose: mu ijuru, ikuzimu, n’ahandi ; akagaragaza ibitekerezo biri mu mitima, ibyabayeho kera n’ibizaza.

Ubwo buryo butanga inzira yagutse yo gusesengura insanganyamatsiko mu gitabo, ariko bushobora gutuma bigaragara nk’aho atari ukuri kuko buteganya umubarankuru ufite ubushobozi n’ububasha burenze ubwa muntu.

Umubarankuru urebera imbere mu rubuga gusa

Amakuru atanga ntarenga ubumenyi n’ubushobozi bw’umuntu. Ibyo avugaga ntibirenga ubushobozi bwite bwo kugera ku bivugwa.

Ubwo buryo butuma hari ibyo utabona uko uvuga, ariko bugatanga ibintu bishobora kwemerwa nk'ukuri, kuko bugarukira ku byashoborwa n'umuntu bityo usoma akabyumva mu buryo bumworoheye.

Umubarankuru urebera hanze y'urubuga

Amakuru atangwa n'umubarankuru ashingira gusa ku byo abonera inyuma. Nta sesengurabitekerezo rijyamo kuko aba atazi ibitekerezo biri mu mitima y'abanyarubuga. Ubwo buryo bukoreshwa cyane mu ntangiriro y'inkuru cyangwa mu kuvuga imiterere y'inyuma y'umunyarubuga. Ntabwo bikwiye rero guhita wemeza ko uburyo bwakoreshejwe mu gace k'inkuru ari bwo bwakoreshejwe mu nkuru yose mu gitabo. Nk'ibarakuru rirebera hanze y'urubuga rikoreshejwe kenshi mu ntangiriro gusa, ahasigaye hagakoreshwa ubundi buryo butuma hasesengurwa insanganyamatsiko zitandukanye.

Inshamake

Umwandiko mbarankuru

Ubu nzi ko: Inkuru ngufi ari igihangano kigufi. Kubera ko ari amateka y'ibyabaye, inkuru ngufi si imbwirwaruhame (aho umuntu ageza ku bandi ibitekerezo bye) si n'umugani kuko intego yayo atari iyo kutwigisha cyangwa kuduha isomo timangiro, ntitangizwa na kera habayeho ngo irangizwe na si nge wahera. Inkuru ngufi ni amateka agaragara nk'ayabayeho n'ubwo akenshi aba ari ibihimbano.

Iherezo ryayo riza ku buryo butunguranye rikagaragara mu mirongo mike gusa.

Abanyarubuga bo mu nkuru ngufi baba ari bake.

Ishobora gusohorwa mu bice (igice cya mbere, igice cya kabiri, ...)

Ubugufi bwayo butuma isigara cyane ku mutima w'umusomyi.

Mu gihe umugani ari igihangano cyuzuyemo amakabyankuru n'ibitangaza, inkuru ngufi yo ivuga ibintu byumvikana bigaragara nk'ibishoboka ku bwenge bwa muntu.

Nshobora: Gusesengura no guhanga umwandiko mbarankuru nshingiye ku turango twawo.


Umwitozo



Hanga inkuru ngufi itarengeje impapuro eshatu ku buryo hagaragaramo uturango twayo kuri imwe mu nsanganyamatsiko zikurikira:

1. Ubuzima bwange nkiri muto.
2. Umunsi mukuru nagiyemo.
3. Ikintu cyanshimishije kuruta ibindi.

5.9. Akagera, ubwiza bw'u Rwanda



Igihugu cyacu kiri mu bihugu byiza muri Afurika ndetse n'iyisi yose. Si Abanyarwanda babivuga ngo ahari ni ukwikunda, n'abanyamahanga barabyemeza. Ni koko kandi ngo "uwambaye ikirezi ntamenya ko kera" kandi ngo "akeza karigura". Uwagenda u Rwanda ntabone ko ari rwiza yaba atazi kwitegereza no kureba. Aramutse yigijije nkana akabaza ubwo bwiza aho buherereye kandi

yarugenze byaba ari nko kubaza amenyo y'inkoko areba umunwa cyangwa guhakana umuriro kandi umwotsi ucumba.

Mu bizana abagenzi b'amahanga ntimuyobewe ko icyanya cy'Akagera kiri mu bya mbere. Siniyibagije ik'ibirunga, ibiyaga n'imigezi, imisozi n'amashyamba, no kuza kwihera umutima ku mucu w'i Rwanda (intore, imitako, ubukorikori, n'inseko y'abavukagihugu).

Mu cyanya cy'Akagera hari inyamaswa n'izindi ngo ngwino urore! Zose kandi ntako zisa. Ubwiza bwazo bwabaye ihogoza burenga impande z'Igihugu, maze busesekara mu mahanga. Ugera i Gabiro ukumva umutima wawe uranezerewe. Iyo ubonye imigenge n'iminyinya bifatanye urunana usanga gucudika atari ibya muntu gusa, ahubwo ko n'ibimera bishobora kutubera urugero mu nzira turimo. Imikoma n'imikoyoyo byo ni ihogoza, imyiha n'imikerenke n'ibindi biti by'inganzamarumbu byose usanga bigutegeye yombi bisa n'ibikubwira ngo "kaze neza urisanga". Iyo izuba risekera ibigarama, imisozi iganira n'udusozi, inseko yabyo uyumva mu kayaga kaba gahuha kanasuhuza icyo gahuye na cyo icyo ari cyo cyose.

Nta rwiri n'umutsina, nta rukoko, nta rutumbwe ge nahabonye. Nahasanze umutekano w'ibimera impande zose. Nta gitekerezo cyo kuba mu ishyamba nigeze ngira ahubwo numvaga ari nk'imuhira. Icyanya cyose gituwe n'inyamaswa zitagira uko zisa kandi na cyo ni kiza. Ubona zose zishishe kandi zifite umubiri uyagirana. Mu z'amajanja ushobora kubona intare, ingwe, urutarangwe, imbwebwe, imondo, isega, impyisi, umukara, inkobe, urutoni n'ingona (nubwo zidakunda kuboneka, ni nyinshi cyane muri ibyo biyaga byaho). Ibisiga byo nta wabibara usanga byiyanitse aho hose, cyane ahaguye inyamaswa cyangwa aho intare yiciye. Mu biguruka twavuga umusambi, inkongoro, kagoma, sabadede, ikiyoni, uruyongoyongo, nyirabarazana, inkorokoro, mukoma, inkware, iswikiri, inkurakura, ishwima n'inyanze. Hari andi moko menshiy'innyi ku buryo kumenya amazina yazo bitoroshye na gato. Usanga

gusa amabara yazo ari urukerereza bagenzi, cyanecyane iyo ziteraniye hamwe mu mashami y'ibiti byegamiye amazi y'ibiyaga.

Nibagirwe se kubabwira inzovu nyiri ishyamba? Zo ntabwo ari nyinshi cyane kandi ntabwo zizerera ishyamba ahubwo zifite ikigo cyazo ku kiyaga k'Ihema. Ushatse kuzireba ni ho uzazisanga. Imbogo, inyemera, inimba cyangwa itamu, impara, imparage, inkoronko, isatura, inzobe, na zo zituye iryo shyamba.

Uko ugenda iryo shyamba na none uhura n'inyamaswa nyinshi cyane. Ariko iyo witegereje usanga imbogo, impara n'imparage ari zo ziganje rwose. Intare zo ntizikunda kuboneka nta n'ubwo zororoka cyane. Biterwa n'uko zibyara igihe k'imvura, ibyana bimwe bikicwa n'umuvu w'imvura, cyangwa ingore n'ingabo zigiye guhiga bigasohoka bitazi iyo bijya, bigata indiri yabyo ubwo izindi nyamaswa zigashobora kubihitana.



Tanga ibisobanuro by'amagambo n'imvugo bikurikira












- Akeza karigura.
- Kubaza amenyo y'inkoko ureba umunwa.
- Hari inyamaswa n'izindi ngo ngwino urebe.
- Ihogoza.
- Gufata akabando.
- Umurambi uteta umukenke.
- Ibiti by'inganzamarumbu.



Umwitozo w'inyunguramagambo

Uzuza izi nteruro ukoresheje amagambo yavuye mu mwandiko

1. Kubera ko Kamariza ari abasore benshi bashaka kumurambagiza.
2. Imyenda nacuruzaga bahise bayimara. Baca umugani mu Kinyarwanda ngo: "....."
3. Impara n'imparage zikunda kwibera mu kubera ko ari ibyatsi bizifasha kwihisha intare
4. Izi ni zimwe mu nyamaswa zivugwa mu mwandiko. Huza izina ry'inyamaswa na nimeru yaryo. Urugero: Inyange (11).

1 	2 	3 													
			5 												
4 	<table border="1"> <tbody> <tr> <td>Imbwebwe</td> <td>Inuma</td> </tr> <tr> <td>Impyisi</td> <td>Ingona</td> </tr> <tr> <td>Isatura</td> <td>Umusambi</td> </tr> <tr> <td>Ingwe</td> <td>Inkware</td> </tr> <tr> <td>Impara</td> <td>Twiga</td> </tr> <tr> <td>Imbogo</td> <td></td> </tr> </tbody> </table>		Imbwebwe	Inuma	Impyisi	Ingona	Isatura	Umusambi	Ingwe	Inkware	Impara	Twiga	Imbogo		7 
Imbwebwe			Inuma												
Impyisi			Ingona												
Isatura			Umusambi												
Ingwe	Inkware														
Impara	Twiga														
Imbogo															
6 			8 												
 Inyange(11)	10 	9 													

Ibibazo byo kumva umwandiko



1. Igituma uwitegereje u Rwanda asanga ari rwiza ni iki?
2. Ni izihe nyamaswa z'amajanja zituye mu ishyamba ry'Akagera?
3. Hari ubundi bwoko bw'inyamaswa wasanga muri iryo shyamba?
4. Kuki intare atari nyinshi cyane?
5. Inzovu zihereye ahagana he?
6. Ni ayahe moko y'ibiti yiganje muri iryo shyamba?
7. Vuga amoko y'ibisiga n'inyoni bakunda kubona mu ishyamba ry'Akagera.
8. Vuga ibindi umunyamahanga yashobora gusanga mu Banyarwanda kandi byashobora kumushimisha.

Gusesengura ingingo z'umwandiko



1. Garagaza amagambo y'invugo shusho yakoreshejwe muri uyu mwandiko kandi uyasobanure
2. Garagaza invugo itaka: ahantu, ibiti, inyamaswa.
3. Uru rwunge rw'amagambo ataka rumarira iki umusomyi?
4. Uyu mwandiko ugizwe n'ibice bingahe? Bigaragaze.
5. Garagaza ingingo z'ingenzi buri gice kibumbatiye.

Umukoro

Shaka muri iki kinyatuzu amazina 16 ya zimwe mu nyoni n'inyamaswa zavuzwe mu mwandiko (umanuka, uzamuka, ujya iburyo cyangwa ibumoso)

I	M	P	Y	I	S	I	N	G	O	N	A
M	U	K	O	M	A	U	U	A	I	L	A
M	G	H	Y	B	U	K	M	Z	N	C	E
U	I	B	A	W	A	U	U	I	E	Z	W
I	T	N	C	E	S	M	S	N	R	E	G
I	N	K	O	B	E	U	A	O	A	I	N
O	R	J	A	W	S	K	M	Y	W	L	A
O	A	I	S	E	G	A	B	I	K	J	R
D	M	O	O	T	T	R	I	K	N	L	A
N	K	A	G	O	M	A	Y	I	I	D	T
O	V	B	N	R	I	N	O	T	U	R	U
M	Z	K	I	E	E	W	J	V	A	Y	R
I	N	T	A	R	E	I	N	G	W	E	U

5.10. Gusesengura umwandiko mvugamiterere

Uhereye ku mwandiko "Akagera ubwiza bw'u Rwanda" garagaza imvugo yakoreshejwe maze ugerageze no gutahura ubwoko bw'umwandiko.

1. Inshoza y'umwandiko mvugamiterere

Ni umwandiko uvuga imiterere y'ikintu, ukaba ugambiriye gutanga ishusho yacyo. Nyiri ugukora uwo mwandiko yivugira ibintu uko abibona. Ashobora kuvuga ibyiza aho abandi babona ibibi, cyangwa akabona ko icyo abandi bita kiza kuri we ari inenge. Nta wamusaba kwisobanura ku gitekerezo ke.

2. Uturango tw'umwandiko mvugamiterere


Umwandiko mvugamiterere urangwa n'imvugoshusho zikoreshwa ndetse n'amagambo avuga imiterere cyane cyane ataka ikivugwa, agaragaza ubwiza bwacyo.



Umwitozo

Hanga umwandiko uvuga imiterere y'ikigo k'ishuri wigaho ndetse n'abagituriye.

5.11. Igitekerezo k'Ibigina



Mu mateka y'u Rwanda rwo hambere, abahungu ba Kigeli III Ndabarasa n'ababakomokaho bakunze kubita "Ibigina". Iryo zina baryiswe n'umuhanuzikazi wahoraga abatega amakuba. Ati: "Muzamarana kandi amaraso yanyu anabahinduke". Abatekereza bavuga ko iryo zina uwo muhanuzikazi yaribitiye kandi ko bari inzobe (kimwe n'abami bose kimwe n'ibikomangoma kugeza kuri Rwabugili).

Iki gitekerezo kigaragaza ukuntu ibigina byagerageje kabiri kose kwimika Gatarabuhura, “Kigina Muheto w’amatwi yera”, bari bahisemo bakanamukunda cyane. Babanje kugambanira umuvandimwe wabo Sentabyo, wari umaze kuragwa ingoma, izina ry’ ubwami ari Mibambwe III. Bakurikizaho umwana wabo Gahindiro ka Sentabyo wazunguye se ku ngoma iry’ ubwami akitwa Yuhi IV.

Ku ngoma ya Ndabarasa, Rukali ni we wari umutware w’umutoni, ukize cyane, ukomeye mu gihugu. Akaba n’inshuti magara ya Gatarabuhura. Nyina Nyirampumuro akaba inkundwakazi ya Ndabarasa. Kugira ngo rero hatazagira ike gihungabana, Rukali yari yariyemeje kuzaha ingoma mucuti we w’igikomangoma, se amaze gutanga. Kugira ngo amahirwe azagume kumusekera, yari yarigoroye n’ibikomangoma n’abandi batware bari baramurakariye kubera ubutegetsu bukomeye yari afite. Arabagabira, abatera n’izindi nkunga. Bamwe banahamya ko Shebuja yari yamuhishuriye uzamuzungura. Cyakora yaje kwiyicira arabyigamba, yongeraho n’icyaha cyo guhesha akato umwami abonye ashaje, yitwaza ko atangiye kurindagira, ko rero ibye birangiye. Urebye yashakaga kumubuza kubwira abiru uzamusimbura; ibyo bikerekana ubwoba yari afite bw’uko Gatarabuhura atazaragwa ingoma.

Aho ubwo bwenge bwe bwari kumuhira, iyo abiru batamwicira, bagaca ku mategeko ye, aho bamenyeye ko umwami ari hafi gutanga. Mbere y’uko atanga yatumije umuhungu we Sentabyo, amuraga ingoma, anamwereka abiru, bamwe mu bana be n’abatware batari bashyigikiye ubugambanyi bwa Rukali. Hacyeho gato, umwami aratabara.

Abo biru ntibazuyaza, batumira abatari bari mu murwa mukuru kugira ngo babamenyeshe uko umwami yaraze n’uko ingoma ari iya Sentabyo. Banamagana Rukali kubera kwigizayo Kigeli mu minsi ye ya nyuma, kimwe na buri mutware, buri mwiru, buri gikomangoma bari mu bugambanyi bwe.

Rukali nta cyo yashoboraga guhakana, kuko abantu bose bari bazi ko Kigeli yari yarabujije uwo mutware we kumwegera ajya gutanga. Ni bwo rero Rukali bamuciriye urwo gupfa, apfana n'abahungu be na bene wabo ba hafi. Ibyinshi mu bintu byabo bihabwa Kimanuka, mukuru wa Sentabyo. Abenshi mu bagaragu ba Rukali bayoboka Sentabyo. Gatarabuhura ariko ntibyagira icyo bimubwira: yari intwari kandi akomeye kandi yayobotse ingoma. Mwene se (ntibari bahuje nyina) wari wimye yari Imana y'i Rwanda. Ariko abanyamicomyiza ntibamenya ko uwagize nabi we atababarira! Uko kuyoboka kwa Gatarabuhura byari rero urwiyerurutso kuko bitamubujije kwigomeka ku mwami afatanyije n'ibindi bigina, dore ko banakekaga ko abagaragu ba Rukali bayobotse byo kwikiza gusa.

Ubwigomeke bw'Ibigina kuri Mibambwe III mu mateka y'u Rwanda bwitwa "ubugambanyi bwa Kinyambi", Kinyambi y'i Rukoma, aho ibyigomeke byimikiye Gatarabuhura. Urugamba yashoje rwabaye inkoramaraso, ariko igihe Gatarabuhura yari agiye gutsinda, hagobotse iby'Imana Vuninka wa Nyarwaya, azana Nyaruguru. Bazana amavamuhira, ibintu byadogereye, batsinda ibyo byigomeke. Gatarahabura aracika, acikana n'inkoramutima ze z'abagaragu n'umugore n'abana. Nyuma ibindi Bigina birimo Gasenyi na Rubaba bimusangayo; abasigaye bayoboka Sentabyo, bamaze guhanwa no gutanga impongano. Umwami arabababarira, bicuza, baticuza. Yari intwari akagira n'impuhwe, agakunda abavandimwe be cyane ku buryo yari gushavura iyo aza kwicamo n'umwe.

Naho Gatarabuhura yamaze kugera mu Gisaka – kari agahugu gato – ajya kwishingana ibwami, asabayo inkunga n'ubuhungiro. Umwami w'i Gisaka aramwakira ariko amwima ingabo zo kurwanya Sentabyo. Ati: "Keretse nundekera Gasabo n'u Buganza bwose, numara gutsinda". Yihaga uruhu rw'ingwe kandi atarayica! Gatarabuhura arita mu gutwi yanga kwirirwa abeshya ati: "Oya, urakoze! Nahaguha se nkazaragira he inka zange"? Kimenyi umwami w'i Gisaka ati: "Nta ngabo zange rero ukibonye"!

Icyo gihe mu Gisaka hakaba icyorezo cy'ubushita. Gatarahabura ashaka uko yabwanduza Sentabyo bukamuhitana, dore ko icyo gihe hahonokaga mbarwa. Asanga umwami, maze aramubwira ati: "Dore wanyimye ingabo ngo nge kurwana na Sentabyo, none mpa nibura uruhu rw'ingwe runini rushya kandi rwiza. Nzishakira umuntu urwaye ubushita, aruraremo kabiri cyangwa gatatu. Hanyuma tuzaruhanagura, turumareho umwanda ugaragara; dushake umuntu urushyira Sentabyo ngo amwereke ko amuyobotse kandi amwisunze, asezeranye umwami kuzanyicisha cyangwa kuzandogesha yifashishije bene wabo b'ino aha. Azamucacura kugeza ubwo amwizera, akaryama muri urwo ruhu. Ni ukunshakira ariko urukwiye uburiri bw'umwami".

Umwami w'i Gisaka aremera. Yumvaga Mibambwe namara gupfa, azica Gatarabuhura; imirwano y'izungura yatangira i Rwanda akigarurira u Buganza yifuje kuva kera. Uruhu rurabonetse, uwo kurujyana ni uko. Igitangaje ariko, byahiriye Gatarabuhura kurenza uko yabikekaga. Ntituzi ikizere ibwami bagiriye uwo Munyagisaka, ibyo ari byo byose, bakiriye urwo rutindi rw'uruhu!

Umwami n'umuvandimwe we barashimye, barurayamyemo; (kandi barararanaga kugira ngo nibaterwa bazarwananeho) icyahi kirabahitanye! Bahise bandura, bapfa inkurikirane hagati y'iminsi cumi n'ibiri. Nyagakora ishyano ntawamenye aho yarengeye, Kimanuka na Sentabyo bajya gupfa Igihugu gicika umugongo.

Sentabyo yasize agahungu gato, Gahindiro, yabyaranye na Nyiratunga. Ab'indahemuka bitegura igitero cya Gatarabuhura n'umwivumbagatanyo w'ibindi Bigina byamushyigikira. Nuko ntibatindiganya kwimika Gahindiro, bamwita izina rya Yuhi IV. Ibyo ntibyabujije ariko intambara, yaje kurota hashize amezi atanu gusa, ryunamira i Mwendu mu Kabagari. Abari bashyigikiye Gatarabuhura ubwo babanje kubihishahisha kubera iyimikwa rya Gahindiro ryabantuguye. Uwo mwana yari arinzwe cyane, rubanda na rwo rufitiye umujinya icyo Kigina cyahitanye "Kigina cyagwaga neza", Sentabyo.

Buhorobuhoro ariko, abari baragomeye Mibambwe

bakahanyagirwa ibyabo, nta n'ukundi kugaragara nta cyo bakigira, barongerera barigomeka. Bohereza intumwai Gisaka kugarura Gatarabuhura. Yakirirwa ku nkiko n'abayobo be benshi, aboneza iya Kabagari kwica Gahindiro ngo yime ingoma. Aba Gahindiro bayobowe n'igikomangoma Semugaza ntibihutira kubarwanya, bagira ngo ibyigomeke bibanze byigaragaze. Nuko Gatarabuhura n'ingabo ze bagera i Mwendo nta nkomyi kugira ngo babanze bitegure, banagure abatware bamwe. Ku bw'Imana Semugaza yumva ko nakomeza kusingimiranya bizababyarira amakuba. Ngo buke, atera Gatarabuhura. Urugamba rwiriza umunsi, ishyerezo ariko Gatarabuhura atsindwa uruhenu. Arafatwa, hamwe na Gasenyi murumuna we na bamwe mu bayoboke babo batari bahunze. Nyuma y'iminsi mike, abari bazwi cyane muri bo babatsinda i Bugesera hamwe n'ibyo bigina byombi.

Haba hasigaye gutanga ihumure. Ibyo ntibyaruhanyije kuko ba kidobya bari bamaze guhunga, abandi bamaze gupfa, baguye kuri urwo rugamba rw'i Mwendo. Nguko uko umwami w'umwaka umwe yakize se wabo amukijijwe kandi na se wabo wundi.



Inyunguramagambo

Tanga ibisobanuro by'amagambo akurikira uhereye ku nyito afite mu mwandiko.

Umuhanuzikazi, guha akato, urwiyerurutso, inyaruguru, amavamuhira, ibintu byadogereye, kwiha uruhu rw'ingwe utarayica, guhonoka, gutsindwa uruhenu...



Umwitozo w'inyunguramagambo

Ni ayahe magambo yakoreshejwe mu mwandiko avuga:

- kwirata ko uzi cyangwa ko ufite ikintu.
- gupfa k'umwami (amagambo abiri).
- umuntu mwiza cyane (ku mico).
- gushidikanya.



Ibibazo byo kumva umwandiko

1. Gereranya imico ya Gatarabuhura n'iya Mibambwe III Sentabyo.
2. Rukali yagize uruhe ruhare mu bushake bwo kwimika Gatarabuhura? Yashakaga kugera ku ki?
3. Gatarabuhura yateye umwami inshuro zingaha? Garagaza icyamutsinze kuri buri gitero. Ni izihe ntwari z'u Rwanda zigaragaje ?
4. Umwami w'i Gisaka yari ateye ate?
5. Ni iyihe ndwara yayogoje u Rwanda n'i Gisaka ku ngoma ya Mibambwe III Sentabyo?
6. Muri uyu mwandiko ni ba nde bita "Nyagukora ishyano", "kidobya"? Kubera iki?

Gusesengura umwandiko



1. Mu bantu bavugwa mu mwandiko ushima ba nde? Ugaya bande? Sobanura igisubizo cyawe.
2. Garagaza muri uyu mwandiko ingingo zijyanye n'amateka y'u Rwanda.
3. Indahiro y'Abanyarwanda ivuga ngo "Ndakaba ubushita bwakoze ishyano" ishatse kuvuga iki?
4. Umwami Gahindiro yimye ingoma afite umwaka umwe, utekereza iki kuri kino kemezo?

5.12. Umwandiko mvugamateka

Umaze gusoma umwandiko w'igitekerezo k'Ibigina urasanga wibanda ku ki? Ese wawushyira mu buhe bwoko bw'umwandiko? Kubera iki?

Inshoza y'umwandiko mvugamateka

Ni umwandiko wibanda ku gukurikiranya neza ibyabaye mu gihe cyashize, ugambiriye kubimenyesha abatarabibonye cyangwa kwibutsa ababibonye ariko batakibyibuka. Wibanda rero ku kubikurikiranya neza mu gihe, ukavuga ababigizemo uruhare, icyabiteye n'ingaruka byagize.

Umwitozo



Shaka ibindi bitekerezo bigaragaza amateka y'u Rwanda maze uzabibwire bagenzi bawe mu ishuri.

5.13. Isi: Umubumbe utuwe n'ibiremwa bifite ubuzima!



Isanzure ry'ikirere isi yacu irimo, ririmo indi mibumbe myinshi itariho ibinyabuzima. Turebye gusa nko ku mibumbe izenguruka izuba, ari na cyo gice isi iherereyemo, harimo Ukwezi, Marisi, Venusi, Palato...; nyamara muri ibyo byose nta na kimwe gitambaho ikinyabuzima, mu gihe isi yacu yo isabagiraho ibiremwa bifite ubuzima ni ukuvuga ibiremwa bivuka, bikagira ubushobozi bwo kwinyagambura no kwikoresha ubwabyo, bigahumeka, bikarya, bigakura, bikabyara, ndetse mu iherezo bigapfa.

Umubumbe w'isi wose utuwe n'ibinyabuzima. Uhereye mu rubura rwo muri Arikitika, ukagera mu mashyamba akonja ya Amazone, mu butayu bwa Sahara, mu icuraburindi ryo mu ndiba z'inyanja no ku bitwa by'imisozi ahagera urumuri, hose uhasanga ibinyabuzima bitangaje.

Ibyo binyabuzima byose bigaragara mu mashusho atandukanye, imibyimba ndetse n'imibare byihariye.

Amoko arenga miriyoni z'amarumbo y'udusimba atuye isi yacu. Mu mazi hogamo amoko asaga ibihumbi makumyabiri y'amafi, amwe angana n'akabuto k'umuceri, andi angana n'imodoka ya Rukururana. Hari nibura amoko arenga ibihumbi magana atatu na mirongo itanu y'ibimera, bimwe usanga biteye ku buryo budasanzwe, ibindi bikaba biteye amabengeza, bikadushimisha.

Ntitwakwibagirwa uruhuri rw'inyoni zirimo amoko arenga ibihumbi ikenda, imikumbi n'ubushyo bw'inyamaswa zirisha, amasibo y'izitungwa no kurya izindi, n'ibindi binyabuzima tutabona n'amaso.

Muri ibyo binyabuzima byose icy'agahebuzo kikaba umuntu washoboye kubirusha ubwenge no kwirwanaho kuri ubu akaba amaze gukwira isi yose na ndetse ku buryo burengera ubw'ibindi binyabuzima. Abantu rero na bo bakagira amoko atandukanye arimo: abirabura, abera, abatukura, abagufi, abarebare, abavukana ubumuga, abo bose bakaba babana kuri iyi si mu mico n'imigenzereze itandukanye. Dukurikije uko abantu bashoboye kororoka bagakwira isi yose, twavuga ko isi yabereye muntu ingobyi imubereye, imuha ibyo akenera byose kugira ngo ubuzima bwe busugire busagambe.

Ikintu gikomeye umuntu arusha ibyo binyabuzima byose, si uko ari we washobora gucengera imibereho y'ibyo binyabuzima, si n'uko ashobora kubivutsa byose ubuzima kuko abirusha intwari, ahubwo ni uko we ashobora kumenya ko biriho no kumenya akamaro bimufitiye.

Turenze ibiri ku isi tugaterera ijisho mu kirere, tuhabona izuba, ukwezi n'inyenyeri. Nyamara ibyo ni ibyo tubona n'amaso yacu karemano. Izuba ni imwe mu nyenyeri zitabarika ziri mu kirere cyacu. Kugeza mu myaka ya 1920, abantu bakekaga ko ikirere tureba n'amaso twaremanywe, ari cyo cyonyine kiriho n'urujije rw'inyenyeri tubonamo. Nyamara abahanga mu by'ikirere bakoresheje ibyuma bireba kure byitwa telesikopi bashoboye kwemeza ko isanzure ry'ikirere ririmo nibura miliyari 50 z'ibirere nk'icyo tubona; byumve neza ko ari miliyari mirongo itanu z'ibirere nk'icyo tubona kandi buri kirere kikaba kirimo za miliyari z'inyenyeri zimeze nk'iri zuba ritumurikira.

Muri iryo sanzure ryose uko ringana, abahanga mu by'ikirere ntibarabonamo undi mubumbe uteye nk'isi. Mu byo barebesha ibyuma kabuhariwe, hari aho babona imibumbe minini cyane izenguruka zimwe mu nyenyeri, ariko isi yacu ni wo mubumbe ufite imiterere ikwiye kugira ngo ube waturwa n'ibinyabuzima. Muti kubera iki?

Duhereye ku mubyimba wawo, umubumbe w'isi uramutse urengejeho kuba munini, wagira imbaraga rukuruzi nyinshi, ku buryo zatuma umwuka wa idorojeni uwuhamaho, kandi uwo mwuka ntabwo ubangikana n'ibinyabuzima. Na none isi ibaye ntoya ho gato, umwuka wa okisijeni

duhumeka ndetse n'amazi byakwigendera, ubwo ngira ngo muriyumvisha ingaruka byagira ku binyabuzima biyiriho.

Ikindi gituma ubuzima bushoboka ku isi, ni intera iri hagati yayo n'izuba. Mwarimu David Buroke (David Block) mu gitabo ke yise "Our Universe: Accident or Design?" Tugenekereje twavuga ko ari: Isanzure ry'ikirere cyacu ryaba ryariremekanyije cyangwa ryaremwe ripanzwe neza"? yaranditse ati:"Imibare yerekana ko isi yegereye izuba ho 5% byonyine, ku isi haba ubushyuhe bukabije, ku buryo ubuzima bwahanagurika. Naho isi iramutse yitaje izuba ho 1% byonyine, igice kinini k'isi cyahita gitwikirwa n'urubura. Ibyo wenda twavuga ko birenze ubushobozi n'ububasha bwa muntu, nyamara twibuke ko ubu umuntu yatangiye gukoresha ingufu za kirimbuzi zishobora kugira ingaruka nk'izo, ngo agambiriye guhangana n'umuntu mugenzi we da!

Reka twongereho gusa ko isi yizengurukaho mu masaha makumyabiri n'ane. Tugereranyije na Venusi yizengurukaho mu minsi 243, isi igenze buhoro bigeze aho twajya tumara icyo twakwita iminsi 121 izuba riducanyeho, ritararenga n'umunsi n'umwe, tukongera kumara igihe kingana gutyo turi mu icuraburindi ry'umwijima tutarabona urumuri rw'izuba. Ese ubwo twaba dutunzwe n'iki? Twazaba se tugifite ubushobozi bwo kongera kureba urumuri"?

Mu kwanzura, twavuga ko imiterere y'isi, ikirere cyayo, intera iriho ugereranyije n'izuba, byose bituma tubaho, tukanabona ku isi ibyo turya, n'ibindi byose bidushimisha. Kuba muntu yarashoboye kumenya ibyo byose, byagombye kumuha isomo ryo kuyifata neza no kuyirinda ibyayonona byose.

Byafatiwe ku byanditswe muri: *Y a-t-il un créacteur qui se soucie de vous?*, Watchtower Bible and tract society of New York, Brooklin, New York,U.S.A., URUP., 15-22-23.

Umwitoto w'inyunguramagambo



Shaka amagambo ari mu mwandiko asobanura ibi bintu iyo ari byinshi:

1. Inyamaswa nyinshi zirisha nk'inka, imbogo,...ni:
2. Inyamaswa zirya izindi nk'intare, imbwa, imbwebwe, ...ni:
3. Udusimba nk'inzuki, isazi, imibu, ... ni:
4. Inyenyeri nyinshi:

a) Shaka mu mwandiko amagambo avuga:

1. Ikirere (kizengurutse isi):
2. Ikirere cyose hamwe n'ibikirimu byose:
3. Kugendagenda ahantu unezerewe.

Ibibazo byo kumva umwandiko



1. Uhereye ku byavuzwe mu mwandiko biranga ibinyabuzima, washobora gusobanura ikinyabuzima icyo ari cyo?
2. Izuba n'inyenyeri na byo byashyirwa mu bidukikije? Kubera iki?
3. Hari inyandiko n'amafilimi tubona mu kirere hari indi mibumbe iri mu kirere ituwe n'abantu. Urabivugaho iki?

Gusesengura umwandiko



Garagagaza ingingo z'ingenzi zigize uyu mwandiko unawukorere inshamake ku rupapuro rumwe.

5.14. Umwandiko nsesengurabumenyi

Musome umwandiko “Isi, umubumbe utuwe n’ibiremwa bifite ubuzima hanyuma musubize ibibazo bikurikira:

1. Uyu mwandiko “Isi, umubumbe utuwe n’ibinyabuzima” murasanga umwanditsi yarawanditse agamije iki?
2. Mugereranyije uyu mwandiko n’indi myandiko mwize murasanga mu miterere yawo utandukanira he na yo? (ikivugwa n’uburyo kivugwamo).

1. Inshoza y’umwandiko nsesengurabumenyi

Umwandiko nsesengurabumenyi ni urubuga rwo gutuma abantu barushaho gusangira amakuru agamije guhanga cyangwa kwimakaza ubumenyi. Ni umwandiko ugambiriye kwigisha no gutanga ubumenyi, wibanda ku mibare, ugaharanira gutanga ibisobanuro nyurabwenge uhereye ku bipimo n’ibigereranyo by’imibare. Inyandiko wakubira muri iri tsinda ni imyandiko irebana n’ubushakashatsi buba bugamijwe gutangazwa.

Urugero

Gufata ikirahure kimwe cya divayi ku munsu bishobora kugabanya ibyago byo kurwara kanseri.

2. Intego y’umwandiko nsesengurabumenyi

- Kumenyeshya amakuru y’ibyagezweho mu bushakashatsi, igitekerezo gishya, ubumenyi bushya, uburyo bushya bwo gukora ibintu, igisubizo kinyuranye n’icyari gisanzweho...
- Gutanga isesengura ry’ibyerekeranye n’imibanire y’abantu hakoreshejwe inyurabwenge.

3. Uturango tw’imyandiko nsesengurabumenyi

- Insanganyamatsiko ivugwaho isobanutse.
- Guhera ku biriho abantu basanzwe bazi, bamenyereye, ukagaraza ibishya kugira ngo umwanzuro bigaragare ko ufite ireme kandi wumvikane neza.

- Imyandikire inoze, ibitekerezo bikurikiranye neza.
- Gukoresha imibare, ibimenyetso, inganyagaciro.
- Umwandiko udafite uruhande ubogamiyeho.
- Imvugo itandukanye n'iy'ubuvanganzo hirindwa gukoresha imizimizo.
- Kwirinda gukoresha amagambo abiri uvuga ikintu kimwe.
- Gutumbera gusa icyo ushaka kugeraho nta guca kure kugira ngo ugere ku cyo ushaka kugeraho.
- Kuvuga ku buryo bunonosoye kugira ngo wumvikanisha neza icyo ushaka gutangariza abasomyi ariko utarondogoye.
- Kugaragaza inyandiko nsesengurabumenyi zindi wifashishije.
- Gukoresha amagambo yumvikana, interuro ngufi,...
- Ni ukwandika usa n'utanga isomo kuko intego ari ugutanga ubumenyi bushya.
- Gukoresha indagihe ku bizwi cyangwa ibyo wemeza, impitagihe ugaragaza amakuru yari asanzweho cyangwa imyanzuro yari yarafashwe.
- Gukoresha nginga ya gatatu.

Umwitoto

Ongera usome umwandiko "Isi: umubumbe utuwe n' ibiremwa bifite ubuzima"! Hanyuma ugaragaze uturango tw'umwandiko nsesengurabumenyi usangamo.

Isuzuma risoza umutwe wa gatanu

Ingagi n'ubukerarugendo

Mu bukungu bw'igihugu, bakunda kuvugamo cyanecyane amabuye y'agaciro acukurwa n'amariba ya peterori. Nyamara kuri ubu, ubundi bukungu kimeza bumaze gutezwa imbere mu bihugu byinshi bushingiye ku bukerarugendo. Ngayo amashyamba abikiriye inyamaswa zashize mu zindi ntara z'isi, ngibyo ibiyaga n'inkombe



zirihwo agasenyi gashyushye, ngibyo ibirunga nyamuraza bicumbeka iyo ijoro ryiroshye cyangwa bikavumbura amahindure. Ubwo bukungu bushingiye ku bukerarugendo ni bwo tutabuze mu Rwanda. Ishyamba ry'Akagera n'inyamaswa z'akangari zirituye, ibiyaga byuzuye amafi n'imvubu, biteye amabengeza. Ishyamba ryo mu birunga ribamo inguge zitwa "ingagi" zashize mu zindi mpande z'isi.

Ingagi ni yo nguge isa n'umuntu kurusha izindi. Ingagi zirimo amoko abiri y'ingenzi: izo ku nkombe y'imigezi ziboneka muri Kameruni no muri Santarafurika n'izo mu misozi miremire zisigaye mu cyanya k'ibirunga honyine.

Ingagi ishobora kugira uburebure bwa metero ebyiri igapima ibiro 250. Ifite amatwi asa cyane n'ay'umuntu; amaso yayo ni mato, aregeranye kandi arahenengeye, naho izuru ryayo rirabwataraye cyane. Nta murizo igira nk'izindi nyamaswa. Kimwe n'umuntu, ingagi zigira amenyo 32, ariko amabwene yayo agatema cyane n'ibintu bikomeye. Igira ubwoya bw'ikijuju, uretse mu maso no mu gituzi. Ishobora kugendesha amaguru abiri n'ubwo kenshi igendera kuri ane. Ingagi zikunda kubana ari nka 15 cyangwa 20, zikayoboka ingabo irusha izindi amaboko. Zirirwa zimuka zishaka ibyo zirya, bwakwira zigasasa zikaryama, ingabo hasi, ingore n'inzana mu biti. Iyo zitewe, zigerageza gukura umutima ikiziteye, zigahonda ku gituzi nk'uvuza ingoma zinasakuza cyane. Muri icyo gihe na zo zishobora kurwana.

Ingore ihaka amezi ikenda, ikonsa arindwi cyangwa umunani. Agahinja karahagatirwa, kamara gufatika kagahakwa. Kubyara impanga ntibikunda kubaho mu ngagi. Muri iyi myaka, hari ba rushimusi bifuzi gutega ingagi ngo bazijyane kuzikoreraho ubushakashatsi. Abo ni abajura ntibateza u Rwanda imbere.

Hakaba n'abandi nka Nyakwigendera Diyane FOSE (Diane FOSSEY) biyemeje kudufasha kuzirwanaho. Nitubatere ingabo mu bitugu, tugirira ko izo ngagi ari izacu zikaba zinasatwe kandi zikaba zinakamwa amadevize atuma igihugu cyacu gitera imbere. Tuzireke zisanzure mu Rwanda rwacu tunazisure tumenye uko zibaho.

I. Ikibazo k'inyunguramagambo

Sobanura amagambo akurikira, unakoreshe buri jambo mu nteruro mbonezamvugo

Akangari, ubukerarugendo, kubikira, icyanya, ibirunga nyamuraza, ijoro ryiroshye, amahindure.

II. Ibibazo byo kumva no gusesengura umwandiko

1. Ni ayahe mashyamba avugwa muri uyu mwandiko?
2. Ayo mashyamba afitiye Abanyarwanda kamaro ki?
3. Rondora ibyiza bireshya ba mukerarugendo bivugwa muri uyu mwandiko?
4. Mu bikurura ba mukerarugendo, ingagi ifite uwuhe mwihariko?
5. Gereranya imiterere y'ingagi n'iy'umuntu.
6. Ingagi ziryama he? Utekereza ko ari ukubera iki?
7. Ni ba nde bashaka kubangamira ingagi? Bashobora gusohozza imigambi yabo? Kubera iki?
8. Ubushakashatsi: Uretse ingagi, vuga ubundi bwoko bw'inguge uzi kandi uvuge imiterere yazo.

III. Ibibazo by'ikibonezamvugo

1. **Sesengura amazina akomoka ku yandi akurikira ugaragaze n'amategeko y'igenamajwi**
 - Ubukerarugendo
 - Agasenyi
 - Utwiso
 - Nyamuraza
 - Abanyakigali bagabanye ibisaruhande by'inka
 - Uriya mwana yigize rwankubebe
 - Sobukwe yagiye mu Rwimpiri
 - Marume atuye i Cyabingo
 - Saruhara ameze nk'uwanyoye akayogazi
2. **Andika amazina akomoka ku mazina akurikira:**
 - Ubukungu,
 - Igihugu,
 - Amabuye,
 - Ishyamba,
 - Ijoro.

IV. Ibibazo by'ihangamwandiko

1. Himba umwandiko ku rupapuro rumwe n'igice ugaragaza ubwiza bw'agasozi utuyeho cyangwa wasuye.
2. Andika icyo utekereza utanga n'ingero zifatika ku mugani uvuga ngo "Uwambaye ikirezi ntamenya ko kera". (Nibura ku rupapuro rumwe n'igice)

Umutwe wa gatandatu

Iterambere

6.1. Umurunga w'iminsi

Burya gusaza ni ugusahurwa
Kuko iyo tujya ni habi
Nariye iminsi ndayiyongeza
Nsigara nyitera inyoni ziguruka
None iranze iranyigabije
Iransigaranzuye yo gapfusha
Cyoro kibondo cyange
Igira hino nkurage intwari
Nitwaje iki gihe cyose
Ibihe bibi byose nkabyirenza
Uyitwaje azira kuneshwa
Utayitunze azira kuramba
Iyo ntwaro izirika iminsi
Nta yindi shahu ni umurimo
Iyo isi imaze kukurambirwa
Kuko nta cyo uba ukuyimariye
Imikaka y'iminsi irarindwa. Aaaa! Aaaa!
Mbese ye wakwizera ute ubuzima bw'ejo
Udakoze ngo wiyuhe akuye
Ngo uyishake uyitege iminsi iiiiii iiiiii



Inyikirizo

Aho wenda, x2

Aho wenda kibondo cyange

Aho wenda ntuzibuka yuko umurunga w'iminsi ari umurimo

Aho wenda, x2

Aho wenda kibondo cyange

Aho wenda buto bwange

Aho wenda ntuzabyibuka

Ni yo mpamvu itumye

Mbikubwiye nkwihanangirije

Ntugahaburwe n'ibyo hanze aha

Ibi bizanwa n'abagenzi

Ngo bigutware umutima wawe

Bikwibagize umurimo

Burya ga ni uko utabizi

Guterwa umutwe n'umwanda

Ntibitindana n'ubwo byizerwa

Ubundi kandi bihira bake

Inyikirizo

Uramenye x3

Utazazira iyo mikaka

Rindwa abagifite ubukaka

Cyane abo mu kigero cyawe (x2)

Indirimbo ya Kagame Alexis




Tanga ibisobanuro by'amagambo akurikira:

Kurya iminsi, kwigabiza, kwigaranzura, ikibondo, nkurage intwari, izirika iminsi, imikaka y'iminsi, kwiyuha akuya, gutega iminsi, umurunga w'iminsi, kwihanangiriza, ntugahaburwe, ubukaka.

Umwitozo w'inyunguramagambo



1. Kora interuro ukoreshaje amagambo akurikira: ikibondo, kwiyuha akuya, imikaka, kwigabiza.
2. Huza ijambo n'igisobanuro cyaryo:



Ibibazo byo kumva umwandiko

1. Uyu mwandiko uribanda ku ki?
2. Mu mwandiko ubwirwa ari mu kihe kigero?
3. Umubwira se we ari mu kihe kigero?
4. Ni iyihe sano iri hagati y'uvuga n'ubwirwa? Urabibwirwa n'iki?
5. Ubona ari iyihe mpamvu yamubwiye amwihanangiriza?
6. Ku bwawe ni irihe somo uyu mwandiko ugusigiye?

Gusesengura umwandiko



1. Garagaza mu mwandiko amagambo agaragaza indangagaciro nyarwanda.
2. Umurimo ugereranywa n'iki mu mwandiko? Nawe se ni ko ubibona?
3. Ibibazo umuntu ahura na byo mu buzima bigereranywa n'iki mu mwandiko?



Imyitozo y'ubumenyingingiro

Mwigane iyi ndirimbo muyiririmbe mukurikje injyana yayo.

6.2. Indirimbo

Uhereye kuri iyi ndirimbo, erekana imiterere y'indirimbo n'ikishamvugo rikoreshwamo.

Garagaza akamaro k'indirimbo mu gutambutsa ubutumwa.

1. Inshoza y'indirimbo

Indirimbo ni imwe mu ngeri z'ubuvanganzo irangwa n'injyana ndetse n'impuzarugwiro. Mu kuririmba indirimbo amajwi ashobora guherekezwa n'amashyi, umudiho, umucezo, ingoma ndetse n'ibyuma binyuranye byirangira. Injyana y'amajwi y'indirimbo iryohera amatwi, ikabyutsa imbamutima maze umubiri wose ukanezerwa kugera aho kunyeganyega ndetse n'ababishoboye bakabyina.

2. Uturango tw'indirimbo

- Yandikwa ku buryo bw'amabango nk'umuvugo.
- Ikoresha amagambo yabugenewe kandi y'indobanure.
- Hakenerwa ijwi ryiza
- Ikoresha impuzarugwiro.
- Hakoreshwa injyana
- Ikoresha intero n'inyikirizo
- Ikoresha ururirimbo.

3. Ikeshamvugo mu ndirimbo

Indirimbo kimwe n'ubundi busizi bukoresha ikeshamvugo riyahariye. Iri keshamvugo riba rishingiye ku kivugwa cyangwa ku buryo bwo kukivuga. Mu ndirimbo hakunze gukoreshwa ikeshamvugo rikurikira:

a) Injyana

Injyana ni nk'umutima w'indirimbo. Nta ndirimbo itagira injyana, iramutse nta njyana ifite byagorana kugira ngo iherekezwe n'amashyi cyangwa umudiho.

b) Isubirajwi

Isubirajwi ni isubiramo rya hafi ry'imvugwarimwe ifite indi iyibanziriza zisa cyangwa zijya gusa cyangwa ijwi na ryo rifite irindi riribanziriza bisa cyangwa bijya gusa, ku buryo bibyara ikintu cy'urujiyano mu kuryohera amatwi cyangwa bikagira icyo byibutsa ku muntu ubyumva.

Muri buri gice k'indirimo " Umurunga w'iminsi" harimo isubirajwi.

Urugero

Burya gusaza ni ugusahurwa

Cyo rero kibondo cyange

Ngo uyishake uyitege iminsi

c) Isubirajambo cyangwa itsinda ry'amagambo

Abenshi bakunda kwitiranya isubirajwi n'isubirajambo. Nyamara isubirajambo ni igihe isubirajwi rigaruka mu ijambo bihuriye ku gicumbi kimwe n'iryaribanjirije cyangwa se ijambo rikagaruka uko ryakabaye. Umuririmbyi agenda asubiramo inyikirizo cyangwa se amagambo amwe n'amwe.

Urugero

Aho wenda! Aho wenda

Aho wenda kibondo cyange

Uramenye! Uramenye

Utazazira iyo mikaka

Rindwa abagifite ubukaka.

d) Imizimizo

Ni uburyo umuririmbyi akoresha mu kuboneza imvugo ye atitaye ku myubakire y'interuro. Mu mizimizo ikunze gukoreshwa twavuga igereranya, ihwanisha, iyitirira, ishushanya

Urugero

Ihwanisha: Umurimo = intwaro.
Ibibazo = imikaka.



Umwitozo

Erekana ikeshamvugo ryiganje muri iyi ndirimbo.

6.3. Tunoze umurimo

Umurimo uteje imbere rubanda
Narababwiye aba Banyarwanda
Ngo bashishikarire umurimo iwacu
Kandi rwose ni ingirakamaro
5. Ababimenyereye murabiruzi.

Ngaho nguko umurimo ni uyu
Ni umwe dushishikarira dufite intego
Umubyizi cyangwa umusaruro
Ukatubera umurimo rwose
10. Iyo tubikesha imbaraga zacu.

Zaba iz'umubiri cyangwa ubwonko
Ingeri z'imirimo ngizi rwose
Guhinga, kwasa nk'ibiti yemwe
Guterura no kwikorera ibi tubona
15. Kubaka, kubaza, kwiruka rwose
Kubyina, guhamiriza uhimbawe
Ndetse n'iyindi namwe muzi.

Hari imirimo ikoresha ubwonko
Cyane rwose kurusha amaboko
20. Ingero ngizi mutazikeka
Mugira ngo rwose ntitwazihawe
Dore guhanga nko kuririmba
Kwiga no kwigisha nk'ibi twumva
Kugena imigambi ya buri muni
25. Na za gahunda twese twumva
Hamwe n'iyindi nko kugana inganzo
Izo ni gahunda z'umurimo tuvuga

- Hari n'ibindi nk'ubushakashatsi
Imirimo y'imyuga n'ikoranabuhanga
30. Iyo rwose ibisaba byose
Ubwonko n'imbaraga birahakenerwa
Umurava, umwete umutimanama
Ubwitange, ukwibwiriza umurimo
Ubushake n'ubushishozi bibiherekeje
40. Ni byo biranga umukozi mwiza.
- Akamaro kawo ntikagikengwa
Umurimo rwose udufasha byinshi
Ni na wo utunga uwukoze neza
Ukamutungira abe n'abandi
45. Ukamukungahaza kakahava
Bigaragarira cyane abanyenganda
- Ba rwiyemezamirimo ni bo babizi
N'abacuruzi baduha nkenerwa
Tuvuze kandi nk'Abanyarwanda.
50. Aho umwaga utari mwe murabizi
Hari ubwo usanga umukozi nk'umwe
Utunze abana be ndetse n'umuryango
Atari n'abo yibarutse ku bwiwe
Hakaba nubwo usanga abandi
55. Bafitanye isano n'uwo nguwo
Batunzwe n'umurimo wogahoraho
- Muramenye kandi mwese
Mbagire inama isumba izindi
Gukizwa n'umurimo ni ibisanzwe
60. Ntibikigomba kwitiranywa no guha icyuho
Ruswa n'ikimenyane, si byo rwose.
- Umushumba w'ino ntakiri umwe muzi
Utungwa n'izo aragiye nk'uko byahoze
Bikamuhira bikamutungira
65. Ahubwo yenda ubwo bikamufasha
Gupfusha ubusa igihe ke yenda!
- Gufungura, kwambara gutura heza!
Gucumbika yemwe no kwivuzza
Koroherwa n'ingendo ibi bigezweho
70. Kwinezeza, kurera no kwihugura

Umurimo rwose urabidushoboza
Umurimo uhuza abantu rwose
Bakuzuzanya kandi bagafashanya
Bagasenyerera umugozi umwe byiza cyane
75. Bakarangwa ndetse n'ubucuti
Ubusabane ndetse n'umushyikirano

Ubumwe disi busesuye
Bukaza rwose nk'abakuranye
Nubwo yenda ahari abantu
80. Hatabura urunturuntu nk'ahandi.

Twagereranya umurimo n'umuryango
Ishuri, itorero cyangwa idini
Burya abo uhuza basangira inyungu
Intego yumwe ikaba iyo uwundi
85. Kuko yenda abakora hamwe
Basangira akabisi n'agahiye

Baramenyana kandi bakihanganirana
Bakajya inama bakanafashanya
Burya rero bijya biba byiza
90. Iyo bafite ubuyobozi bubashyigikiye
Igihango cyabo kigasagamba.

Umurimo erega uteza imbere n'igihugu
Nko mu bicuruzwa mvaruganda
Ubucuruzi bw'amabuye y'agaciro
95. N'ubwa peterori twe n'amahanga

Abakozi n'abakoresha turiha imisoro
Burya kandi uteza imbere igihugu
Ibihugu bikize bifite inganda
Zimwe zifite umusaruro utubutse
Umurimo ubafasha muri byinshi.

100. Abakozi benshi b'impuguke
Nubwo n'umutungo na wo ufasha
Ntimukabange bagira byinshi
Imirimo y'ingufu barayishobora
N'iy'ubwenge bagakora cyane

105. Umusaruro w'umurimo ukaba mwinshi.

Muge murema amasoko murebe
Uwawukoze neza aba ikirangirire
Akubahwa cyane ibi by'ikirenga
Bikaba akarusho iyo harimo akazi

110. Ubunyangamugayo no kwiyubaha.

Mvuge iki se ndeke ikihe?
Ntimuzi wa mugani w'iwacu
Ko kora ndebe iruta vuga numve?
Ntimugakoreshe abana ivunanye

115. Gutoza abana si bibi rwose

Ariko kubakoresha imirimo ibavuna
Nko gusoroma icyayi no gucukura amabuye
Bijyanye kandi no kuyikorera
Ntimukabikore nibagane ishuri

120. Ni ryo bakeneye kurusha ibindi.

Mvuge nsubira nsige nahimbe
Ndambe iminsi izira imitaga
Ubuganga bw'umurimo nge mbona
Buratunganisha aheza bihebuje

125. Twe tubirebera kure ubungubu.

Twawuhaye gahunda zacu
Ngo utuganishe inzira y'iterambere
Wo na gahunda nziza nkenerwa
Zituganisha iyo nzira tujyamo

130. Umurimo rwose ni uw'ibanze

Reka twwunoze dutere imbere birenze.

Inyunguramagambo



Tanga ibisobanuro bw'amagambo akurikira

Ingeri, guhimbarwa, imigambi, kuja mu nganzo, gukengwa, gukungahara kakahava, umwaga, gusenyerera umugozi umwe, ubusabane, gusagamba, impuguke, imitaga, nsige (gusîga).



Umwitozo w'inyunguramagambo

1. Ubaka interuro ukoresheje amagambo akurikira: guhimbarwa, kujya mu nganzo, gusenyerera umugozi umwe, ubusabane, gusagamba.
2. Mu kinyatuzu gikurikira harimo amagambo afite ibisobanuro bikurikira:
 - Ubwoko butandukanye.
 - Imirimo ikoreshwa amaboko.
 - Imihana inyuranye.
 - Injijuke, abanyabwenge.
 - Imihigo, gahunda kwaguka, gukwira hose, kugaba amashami.

Soma ayo magambo ukoresheje amerekezo yose: iburyo, ibumoso, hasi, hejuru, uberetse kandi uyagaragaze mu kinyatuzu ukoresheje ikaramu y'ibara nyuma wandike buri jambo imbere y'igisobanuro cyaryo.

I	N	G	E	R	I	I	W	I
M	M	K	L	T	K	A	B	M
Y	M	P	K	P	L	M	J	I
U	G	Y	U	H	A	B	M	T
G	U	S	A	G	A	M	B	A
A	F	S	I	H	U	K	L	G
F	H	M	L	O	V	K	Z	A
J	I	K	U	R	H	F	E	K



Ibibazo byo kumva umwandiko

1. Ni iyihe ngingo y'ingenzi ibumbiye muri uyu mwandiko?
2. Umurimo umariye iki abawukora?
3. Rondora ingeri nkuru z'imirimo yavuzwe muri uyu mwandiko.

4. Ni ibihe bintu biranga umukozi mwiza bigaragara muri uyu mwandiko?
5. Ni ibiki umuhanzi agereranya n'umurimo?
6. Vuga ibintu umurimo udushoboza bivugwa mu mwandiko.
7. Ni mu buhe buryo umurimo uteza imbere igihugu?
8. Ni akahe kamaro k'umukozi w'impuguke mu iterambere ry'igihugu?
9. Vuga imirimo abana bemerewe gukora n'iyo bagomba kurindwa.
10. Ku bwawe usanga umurimo wateza imbere ute uwukora?

Gusesengura umuvugo



Garagaza ingingo z'ingenzi zikubiye mu muvugo.

Umwitozo w'ubumenyingingiro



Mufate mu mutwe uyu muvugo muzawuvugire imbere ya bagenzi banyu.

6.4. Umuvugo

- Uyu mwandiko ni bwoko ki? Kubera iki?
- Uhereye kuri uyu muvugo, erekana imiterere y'umuvugo n'ikeshamvugo rikoreshwa mu muvugo

1. Uturango tw'umuvugo (igisigo)

a) Ikeshamvugo mu muvugo

Kugira ngo umuvugo uryohere amatwi (kuko umuvugo wagenewe kuvugwa) kandi n'ikivugwa kirusheho gutera amatsiko, hari ibintu umuhanzi agomba kwitaho harimo cyane cyane injyana, isubirajwi n'isubirajambo.

b) Injyana mu muvugo

Mu bitanga injyana mu muvugo harimo: imikarago, inkubito, ihuzamitwe, ...

c) Umukarago

Umukarago ni wo wakunze kuranga igihangano cyo mu busizi ukaba ugaragarira mu ikoreshwa ry'interuro ngufi, ariko ukanashingira cyane ku bipimo nk'ibikoreshwa mu muziki. Imikarago ihuzwa no gusangira injyana (umubare w'utubeshuro ungana ndetse n'inkubito yayo inihura cyangwa inimitse).

Kwiga injyana y'igihangano nyabusizi ni ukubara utubeshuro twa buri mukarago. Mu busizi nyarwanda hakunze kuboneka injyana z'utubeshuro 12, 10, 9, 8, 6.

2. Ubusizi bw'ubu

Muri iki gihe abantu bagenda batita cyane ku mahame yarangaga ubusizi bwo mu gihe cya kera birimo injyana ipimye indinganire, intondeke zifite umubare ungana w'imikarago, n'ibindi. Kubera izo mpamvu, hagenda haboneka imivugo igaragaramo ubwigenge ku bijyanye n'ayo mahame yatumaga ubusizi budapfa kwigerezwa n'ubonetse wese.

a) Inkubito

Itangwa n'uburyo umugemo uvugwamo, utebukwaho cyangwa utindwaho. Hari rero imigemo itinda n'imigemo itebuka. Umugemo utinda utanga inkubito inimitse, naho umugemo utebuka ugatanga inkubito inihura.

b) Ihuzamitwe ry'imikarago n'intondeke

Ihuzamitwe ni isubiramo ku mpera z'imikarago ibiri cyangwa myinshi ry'ijwi rimwe rihuye cyangwa amajwi menshi asa. Amahuzamitwe y'imikarago agira amazina atandukanye bitewe n'imiterere yayo ndetse n'inkubito yayo.

Duhereye ku miterere y'imitwe y'imikarago tubona:

- **Ihuzamitwe ryorohereje:** rishingiye ku ijwi rimwe rigaruka
- **Ihuzamitwe rigereranije:** rifite amajwi abiri ahuye (ingombajwi+inyajwi cyangwa inyajwi + ingombajwi)
- **Ihuzamitwe ritubutse:** irishingiye ku majwi atatu cyangwa arenga asa.

Dukurikije inkubito yo mu mpera z'imikarago tubona:

- Ihuzamitwe rinhura: igihe umugemo ubanziriza uwa nyuma uba utebukwaho (udatinda).

Ingero

Umwanzi akubonye yahise **aganya**.

Intege ziba inteja abura aho **agana**.

(*Rugamba Cyprien*).

- Ihuzamitwe rinimbitse: igihe umugemo ubanziriza uwa nyuma utinda.

Ingero

Singizwa **keeza**

Cyangana n'**icyaaha**

Turakwambaza **cyaane**

Singizwa **mpiinga**

Yizihwe n'**impuundu**

Wanga abanyamp**uuha**.

(*Rugamba Cyprien*).

Inyurana ry'injyana n'ikibonezamvugo.

Ubusanzwe, ukwitsa ijwi mu njyana, guhura n'iyitsa ryo mu kibonezamvugo (imperera y'interuro cyangwa y'inyangingo). Nyamara hari igihe habayeho kunyurana kw'ibyo byombi nka:

- Iyo interuro y'umukarago umwe ikomereza ku mukarago ukurikiyeho.
- Iyo hari ijambo rimwe ryarenze ku mukarago ubanza.
- Iyo umukarago utangiriye ku mpera y'uwawubanjirije.
- Ibyo byose hari ingaruka bigira ku mvuguro no ku kivugwa.

3. Gusesengura umuvuguro

Inzego zo gusesengura umuvuguro

Hari inzego enye zo gusesengura igihangano nyabugenye ari zo:

- **Urwego rw'ibisobanuro bibumbatiwe n'amagambo yakoreshejwe:** Ijambo rishobora gukoreshwa rifite igisobanuro cyaryo gisanzwe, cyangwa rigakoreshwa mu mvuguro ishushanya (inyito shusho), ...

- **Urwego rw'ikibonezamvugo:** Imyubakire y'interuro.
- **Urwego rw'injyana:** Indeshyo y'imikarago, igipimo,...
- **Urwego rw'amajwi:** Uburyohe butangwa n'amajwi.

Kimwe no ku nkuru, hari ibibazo umuntu agomba kwibaza kugira ngo bimufashe gusesengura umuvugo. Uretse rero ibibazo twabonye ku nkuru, umuvugo ugira ibibazo by'umwihariko kubera ibi bikurikira:

Igihangano nyabugeni gikoresha amagambo atoranyije neza n'imvugo iziguye.

Haba higanjemo imvugo shusho n'ikeshamvugo.

Umuvugo ugira amahame yihariye awugenga ashingira ku isubirajwi, injyana, imikarago, n'imiterere.

Dore rero ibibazo wakwibaza mu gusesengura igihangano nyabugeni

Ibibazo rusange (ku myandiko yose.)

Ni iki mbona imbere yange?

Kuri iyi ngingo, usesengura yibaza kuri ibi bintu bikurikira:

- Ubwoko bw'umwandiko, umutwe wawo, uw'igitabo wakuwemo, izina ry'umwanditsi, igihe igitabo cyasohokeye, ... Ibi ni ingenzi mu kumenya ibihe n'ahantu umuvugo wahangiwe, bityo bigakingurira usesengura amarembo yo kuwumva.
- Imiterere y'umwandiko ku rupapuro. Bituma umenya ubwoko bwawo.
- Ibyo ubona ukiwukubita amaso: Bishobora gutuma ubona ibiwuranga.

Ni nde uvuga?

Hari amagambo bwite y'umubazi w'inkuru ari mu muvugo?

Ni nde uvugwa/ni iki kivugwa?

Abanyarubuga bavugwa ni ba nde?

Ibivugwa byabaye ryari?

Icyo gihe kigaragazwa n'ibihe inshinga zitondaguwemo.

Ni hehe byabereye?

Ni ahantu hariho hashobora kubonwa n’amaso? Ni ahantu umuhanzi yihimbiye hatabayeho?

Umuhanzi yifashisha ate amagambo mu gutaka icyo avugaho?

Ni ayahe magambo akoreshwa, imvugo shusho zirimo, ibisobanuro bitandukanye ijamba rishobora kugira,...

Ni iyihe mvugo yahisemo: Igaragaza ishavu cyangwa agahinda, ibyishimo, ininura, iyo guhangana,...

Ni uruhe rwego rw’imvugo: Iboneye, iya giseseka, nyandagazi,...

Ni irihe keshamvugo: Igereranya, isubirajwi,...

Ibibazo byihariye ku mvugo.

Umwandiko nyabugenzi wumvikana ku buryo bwawo wihariye. Bityo rero mu kuwusesengura hari ibibazo byihariye ugomba kuwibazaho:

- Ni iki kiwuha kuryohera amatwi/amaso rimwe na rimwe? Aha tureba isubirajwi, isubirajambo, ... tukongera kureba uburyo wanditsemo.
- Ni iyihe njyana yakoreshejwe; igipimo? Ni izihe ngaruka guharanira kuboneza injyana byagize ku kibonezamvugo? Imikarago irashyamba? Ijya kureshya? Cyangwa ni ubusizi bwanditse mu nteruro ndende?
- Inkubito inihura n’inimbitse zibangikanye gute?

Insanganyamatsiko

Mu mvugo kimwe no mu yindi myandiko havugwamo ibitekerezo cyangwa insanganyamatsiko zinyuranye. Hagati y’intangiriro n’imperera y’umuvugo hari ibitekerezo bitandukanye, bigenda byuzuzanya cyangwa bitondetse mu buryo ubu n’ubu.

Urugero

Nko mu gisingizo kirata ubwiza bw’umukobwa, umuhanzi ashobora kuva ku musatsi akagera ku mano, cyangwa agahera hasi agana hejuru.

Umuvugo wagenda usubira mu gitekerezo kimwe gusa ntabwo washimisha. Uburyohe bw'umuvugo rero bushingira no ku guhindagurika kw'ijwi, inzego zitandukanye z'imvugo, ... ibyo na byo bigomba kugaragazwa mu isesengura.

Inshamake

Mfashe ko: Ubusizi bwitaza imvugo isanzwe kuko bwita ku kuryoshya amagambo mbere na mbere.

Ku musizi, imvugo si inzira yo gutanga ubutumwa gusa, ahubwo ni n'imvano yo gushimisha, kunezeza; ikaba kandi yaremwamo ibyiza bibereye ijisho n'amatwi.

Ubusizi kwasobanurwa nk'ubugeni bw'ururimi bushingiye ku kubyaza umusaruro imiterere y'ubutumwa ubwabwo. Mu mwandiko nyabugeni, iby'amatwi yumva (uburyohe bw'amajwi) n'ibyo amaso abona (imiterere ku rupapuro n'imyandikire), bigira umumaro biba bidafite mu myandiko isanzwe.

Nshobora: Gusesengura umuvugo ngaragaza uturango twawo.



Imyitozo

1. Garagaza injyana yakoreshejwe mu muvugo "Tunoze umurimo".
2. Garagaza isano iri hagati y'umuvugo n'indirimo, uvuge n'akamaro kabyo.

6.5. Ubukorikori bwa Nzitunga



Mu myaka ya za 1980, i Mwiyanike hari umusore w’umunyabukorikori wakoraga ibikoresho by’umuziki wa kizungu bita gitari. Urebye ukuntu izo gitari zabaga zimeze ugereranyije n’izikorera mu bigo byabugenewe, wasangaga nta tandukanyirizo rinini ririmo, ari mu manota cyangwa ku isura iyagirana.

Uwo musore witwaga Nzitunga yakoraga umwuga wo kudoda ariko no ku ruhande akaba azi kubaza. Imyuga yayize imyaka ibiri i Goma muri Repubulika Iharanira Demokarasi ya Kongo. Aho i Goma yahigiyeyo no gucuranga gitari mu matorero y’idini rye ry’abapantekote. Yaje gutunga gitari yakozwe mu bigo kabuhariwe ayihawe n’umuzungu noneho aza kugira ibyago ihanuka

ari mu modoka iramenagurika. Kubera ko iyo gitari ye yamubabaje cyane, yashatse kongera guhomahoma iramunanira noneho yiyemeza gukora indi izayisimbura ariko ntibyamusubokera ku buryo bworoshye.

Muri 1983 yiga iforomo ya gitari yari asanzwe afite n'izindi yabonaga. Ibikoresho yakoreshega ahanini byari imbaho za tiriperegisi, ubukozo bwa kizungu n'akabaho kabaje neza kamanukaho imirya itanga amajwi.

Uburyo bwo gufatisha ako kabaho kamanukaho imirya ku gasanduku karangurura amajwi gakoze muri tiriperegisi ni bwo bwamugoraga kuko kugira ngo bifate yifashishaga ikibuye agerekaho bikamara iminota myinshi akakivanaho byabaye urutare. Nyuma yaho habaga hasigaye umurimo wo gushyiraho imirya myinshi itanga amanota n'utwuma dusobanura iyo mirya iyo bashaka ijwi iri n'iri. Gitari ya Nzitunga aho ifitiye isano n'izikorwa na ba kabuhariwe ni uko imigozi yayo yari isanzwe atari imikwege nk'iyi bamwe bigana gitari bajya bakoresha. Iyo mirya Nzitunga we yajyaga kuyigura i Kigali mu nzu Itorero Impala ryacururizagamo. Na twa twuma dukiranura imirya hasi yaguraga utwa kizungu bitewe n'uko ukoresheje gitari abishaka, cyangwa se agakoresha utwo yicuriye.

Kugira ngo iyo mirya itange amanota nk'ayo gitari zisanzwe zitanga, ntihagombaga gusa kumenya gushishoza ngo umuntu amenye kwigana uko gitari ishushanyije ase n'uyifotora uretse ko na byo ari ngombwa. Nzitunga abigerageza bwa mbere muri ubwo buryo byaramupfanye. Agitangira yagerageje kuri gitari esheshatu zose ziba mbi kuko zatanganga ibijwi bibi. Ibyo byaterwaga n'uko yapimiraga gitari agiye gukora ku yindi akibanda ku burebure. Hanyuma ni ho yaje gusanga amanota adatangwa na rwa rubaho rumanukaho imirya, ahubwo ko atangwa ahanini na ka gasanduku ko hasi imirya inihiriramo. Ijwi rero ritangwa n'umugozi ariko na wo ugakurikiza uko ka gasanduku kangana.

Iyo Nzitunga yashakaga ayo manota ngo agende uko ashaka yashyiragaho umugozi umwe akawufunga amaze kumva ko ageze ku inota yashakaga. Birumvikana ko kugira ngo amenye ko bitanze ayo manota asanzwe ari uko

na we yabaga asanzwe ayazi atari ukumva ikintu ngo ni inota kandi ari urusaku!

Gitari zari zifite amanota nyayo yakoze amaze kuvumbura ubwo buryo ni indwi n'izindi eshatu yendaga kurangiza mu mpera z'umwaka wa 1986. Izi gitari yagiye azigurisha mu duce dutandukanye tw'Igihugu. Yagurishaga izo gitari ku biciro birutana hakurikijwe ubwoko bwa twa twuma dusobanura imiryu. Iyo yabaga ikoresheje utwuma yaguze mu maduka, gitari yayigurishaga amafaranga ibihumbi bitanu naho iyo yabaga yatwicuriye yayigurishaga amafaranga ibihumbi bitatu.

Mu myuga Nzitunga yari azi ngo yumvaga umukurura cyane ari uwo gukora gitari ariko akazitirwa n'uko mu karere yari atuyemo uruburuko rutabyumvaga neza bikongeraho n'uko hari kure y'umugi ntihagire umenya ibyo akora. Umwuga w'ubudozi washoboraga kumutunga ariko agatekereza ko iyo abona abo bakorana bakarema ishyirahamwe byari kumugirira akamaro kurushaho, ariko na none ikibazo kikaba kubona abaguzi kuko yabonaga nka komande eshatu ku mwaka. Ku kibazo cyo kubura abo bafatanyu ngo yigishije umuntu umwe gusa kuko ari we wamenye gucuranga abimwigishije.

Uwo musore ngo yashatse no kwisunga itoreru rya muzika rikomeye ngo rimutere inkunga abone akazi k'umushahara ntibyamuhira. Ngo yaba yarakomanze ku muryango w'itorero Impala arisaba ko yajya ayikorera gitari ikicururiza ikamuhemba hanyuma bamusubiza ko bafite umuntu uziteranya kuko batumiza ibikoresho i Burayi.

Abantu nka ba Nzitunga baba bakwiriye guterwa inkunga kuko iyo Rwaramba aza guterwa inkunga yari kurushaho gukoresha impano ye muri ubwo bukorikori akabuharira igihe kinini kuko ubundi yabikoraga nimugoroba akitse indi mirimo yo kudoda. Ibi byari gutuma abakunda kwicurangira bamaze kubona koko ko nta nenge izo gitari zifite, batari gukomeza kugura izibahenda mu mahanga kandi bafite izisa na zo hafi yabo kandi zihendutse.



Tanga ibisobanuro by'amagambo akurikira:

Kabuhariwe, ubukozo, impano, guhomahoma, imirya, kunihira.



Imyitozo w'inyunguramagambo

1. Koresha mu nteruro ebyirebyiri amagambo akurikira wumvikanisha neza inyito zayo zitandukanye:
Kubaza, imyaka, imirya, gucura.
2. Uzuzura interuro zikurikira ukoresheje aya magambo: impano, kabuhariwe, kunihira, umunyabukurikori.
 - Ishuri ryacu rifite icyuma.....gifata amajwi.
 - Uyu mwana afite.....yo kuririmba.
 - Rwaramba yari umusore w'.....mu Karere ke.
 - Iyo inanga zitangiye.....binezeza abazumva.



Ibibazo byo kumva umwandiko

1. Umusore uvugwa muri uyu mwandiko ni nde? Yakoraga iki?
2. Ni iki cyatumye atekereza gukora gitari?
3. Ni iki mubona mu mwandiko gishobora kuba intandaro yo gukora ibintu by'agahebuzo?
4. Ukurikije uko umwandiko ubivuga inota rya muzika n'urusaku bitandukaniye he?
5. Ni izihe ngorane Nzitunga yahuye na zo agitangira gukora gitari? Nyuma se bwo yahuraga n'izihye ngorane?
6. Umaze gusoma uyu mwandiko usanga umuntu ukora umwuga runaka yakora iki k'ingenzi kugira ngo umwuga we urusheho kumugirira akamaro?
7. Ni iki washima Nzitunga ukurikije ibyo yakoze muri uyu mwandiko?

Gusesengura umwandiko



Tahura ingingo z'ingenzi z'uyu mwandiko nurangiza ukore inshamake yawo ku gice cy'urupapuro.

6.6. Ikomorazina mvanshinga

1. Inshoza y'ikomorazina mvanshinga

Ikomorazina mvanshinga ni ihimba ry'amazina mashya ufatiye ku mizi y'inshinga zisanzwe mu rurimi uru n'uru. Mu Kinyarwanda rikoresha imisozo itanu ari yo: -a, -e, -i, -o, -u na -yi.

Umusozo: ni akaremajambo gasoza inshinga cyangwa izina rikomoka ku nshinga.

2. Inzira z'ikomorazina mvanshingo

Ikomorazina mvanshinga rishingiye ku musozo -a

Rirakoreshwa cyane mu Kinyarwanda kandi rijyana n'ingereka zinyuranye.

Ingero

Inshinga	Izina rikomoka kuri iyo nshinga
kurima	umurima
gukama	ikama
gupfa	amapfa
guta	intabwa
kuganya	amaganya
gukenga	amakenga
gukora	ibikorwa
kwizera	umwizera
gusaza	umusaza
guta	amateshwa

a) Ikomorazina mvanshinga rishingiye ku musozo -e

Ribyara amazina y'ingeri nyinshi kandi rishobora no gufata ingereka.

Ingero

Inshinga	Izina rikomoka kuri iyo nshinga
kwiga	imyigire
kwigisha	imyigishirize
kurera	uburere
kubumba	umubumbe
kwiyoroshya	ubwiyoroshye
gutera	amatere
gutema	igiteme
gukwa	ubukwe
gucya	ubuke
gushya	ubushye
gukora	imikorere
kuramba	uburambe
kuraga	umurage

b) Ikomorazina mvanshinga rishingiye ku musozo –O.

Uyu musozo na wo urakoreshwa cyane mu Kinyarwanda mu ikomorazina mvanshinga. Ushobora no kujyana n'ingereka zitandukanye.

Ingero

Inshinga	Izina rikomoka kuri iyo nshinga
gutwara	intwaro/umutwaro
kongeza	inyongezo
gutera	umutero/igitero
kurya	indyo
kurunda	ikirundo
gutega	umutego
kwibuka	urwibutso
gutinda	urutindo
kugera	ikigero
kwanga	urwango
kuzirika	ikiziriko
gukina	igikinisho
gufunga	irufunguzo

c) Ikomorazina mvanshinga rishingiye ku musozo -I

Ukoreshwa inyuma y'ibicumbi by'inshinga bigizwe n'umugemo umwe cyangwa birengeje umugemo umwe kuko umusozo -yi udakorana na bene iyo mizi.

Inshinga	Izina rikomoka kuri iyo nshinga
Gutona	Umutoni
Guhiga	Umuhigi
Kunnya	Umunnyi
Gutwara	Ubutwari

Imyitozo



1. Mushake amazina yakomotse ku nshinga zikurikira, muyashakire uturemajambo n'amategeko y'igenamajwi yakoreshejwemo:

Gupfa, kuramba, gusarura, kwitanga, kuraga, gusaza, guhinga, gushishoza, kurya, kwibuka, kubyina, gutunga, gutwara, guhamiriza, gucumbika, kunnya, gushakashaka, kurera

2. Sesengura inkomoko y'amagambo akurikira:
Umusyi, umunywi, umuryi

d) Ikomorazina mvanshinga rishingiye ku musozo -U

Inshinga	Izina rikomoka kuri iyo nshinga
gupfa	umupfu
kunguka	inyungu
guhema	umuhemu
kuramuka	indamu
kuragura	indagu
kugemura	ingemu

e) Ikomorazina mvanshinga rishingiye ku musozo --yi
Rirakoreshwa cyane mu Kinyarwanda.

Ingero

Inshinga	Izina rikomoka kuri iyo nshinga
gusahura	ubusahuzi
gutera	imitezi
kwanga	umwanzi
gutunga	ubutunzi
gukora	umukozi
gutega	umutezi
kurera	umurezi
kugenda	umugenzi
kwica	umwicanyi
kurwara	umurwayi
kubaza	umubaji
kuvura	umuvuzi
guteka	umutetsi
guhaha	umuhashyi
kudoda	umudozi



Isuzuma risoza umutwe wa gatandatu

Urugendo rw'abanyabukorikori b'Abanyarwanda muri Kenya

Abanyabukorikori bo mu ishyirahamwe KORA rikorera i Kigali barimo abakora imbabura, intebe z'amagare, ababaza, abakanishi b'imodoka n'abadozi b'inkweto bagiye gusura bagenzi babo bo muri Kenya ku wa 19 Ukuboza 1987. Urugendo rwabo barutangiyeye ku itariki ya 19 barara i Mwanza, umunsi ukurikiyeho barara i Kisi ho muri Tanzaniya, basesekara i Nayirobi ku munsi wa gatatu. Buri muntu yari yagenewe amafaranga 40.000 y'impamba ngo yirwaneho ku icumbi n'ifunguro.

Abo banyabukorokori bacu bagarutse mu Rwanda ku wa 29 Ukuboza. Hagati aho bakoze iki? Basuye Yuwakari ari yo Gakinjoro y'i Nayirobi, basura ababaji n'abadozi b'inkweto. Banatembereye nyine n'umugi basura pariki

iwegereye ndetse n'ikibuga k'indege dore ko kibarirwa mu bikaze cyane muri Afurika. Umunyabukorikori umwe wenyine, bita Karinda Karaveri ni we wari ugiye i Nairobi bwa kabiri, abandi bose ni bwo bwa mbere bari bagiyeyo.

Abanyabukorikori b'Abanyarwanda basanze ububaji muri Kenya bwarateye imbere bidatewe n'ubuhanga bwinshi babarusha, ahubwo babasumbya imari. Bakoresha imashini ababaji bo muri KORA batagira nk'ibaza muviringo n'izibaza zishyiraho utuntu tw'umurimbo. Izi mashini nta zo bari bafite kubera ubushobozi buke.

Intumwa za KORA zigeze i Yuwakari, zasanze ubucuruzi bwo muri Kenya budakanganye cyane. Gusa babarusha ibikoresho kuko babibona hafi bitabagoye kandi bitabahenda. Nta mugayo kandi igihugu cyabo gituriye inyanja. Ibyo bituma ibyo bakora bidakosha, bagakora byinshi bakabona n'icyashara.

Intumwa za KORA zabonye ubwoko bw'amabati atarabaga mu Rwanda bakoramo indobo n'amasafuriya kuko bo bakoreshaga ibyuma by'amamodoka ashaje. Ubundi na none mu bucuzi bwaho hari ibintu byinshi bakoraga, bikorerwa mu Rwanda gusa ugasanga bidafite isura imwe kubera imideri itandukanye n'iyi mu Rwanda. icyakora hari aho abanyabukorikori bo mu Gakinjoro basanze bahiga ab'i Yuwakari. Ngo bagenzi babo bo muri Kenya ntibabarushaga gucura amacumu, amasuka, ishoka, umuhoro n'ibitiyo. Kubicura bisaba ingufu kuko baba bahondagura ibyuma binini. Muri Kenya ho gucura akenshi usanga ari ukugenda ukunja ibyuma byoroshye, tuvuge nk'ibivamo imbabura cyangwa ibyo batoboresha ibiti.

Naho ibyerekeye ubudozi bw'inkweto, abanyabukorikori baho ntibasanaga inkweto gusa ahubwo baranazikoraga ukagira ngo zivuye mu ruganda. Bakoreshaga impu bakazibohamo inkweto nziza zicuruzwa hirya no hino kandi ku giciro kiza. Abanyabukorikori bo mu Rwanda basanze ab'i Nayirobi bifitiye uruganda rukora inkweto nshyashya ariko na none ntibibabuze no kugira hirya no hino mu mugu aho basanira izishaje. Abanyabukorikori b'Abanyarwanda na bo babishobora. Bakemuye ikibazo cyo gukura impu bitabagoye, basigarana icyo kubona imipira yo hasi mu kirenge ndetse n'irangi ryo gusiga impu. Bagenzi babo b'i

Nayirobi irangi bararyikorera.

Abanyabukorikori baho barakora ibintu bakarunda, bakabirangura n'abacuruzi gutyo ibikorwa byabo ukabisanga mu magazini hirya no hino nk'ibindi bicuruzwa. Kuba babirunda si ukubura abakiriya, ahubwo babona ibikoresho by'ifatizo bitabagoye, noneho abanyabukorikori bagakora buri muni nta guhagarikwa no kubura ibyangombwa. Abanyabukorikori bo mu Rwanda nta kibazo cy'abaguzi bari bafite ahubwo nta bikoresho bari bafite. Bashakaga gukora indobo, bafite na komande ariko ibyuma byo kuzicuramo bikaba ingume. Igihe cyose nta bikoresho by'ifatizo bihagije, abanyabukorikori ntibashobora gucuruza ibintu bihagije. Nk' i Yuwakari washoboraga gukora komande y'imbabura ijana, magana atanu ndetse n'igihumbi ukazibona mu gihe mu Rwanda bidashoboka. Nk'urugero, ugira Imana akabona icyuma, akakivanamo nk'imbabura 2, uwo muni zikagurwa, agatahana ayo kandi yari gucyura menshi iyo ibikoresho bitabura. Kubera gucuruza akantu kamwekamwe nk'abadandaza, kubona amazu apanzemo ibintu by'ubukorikori gusa byaragoranaga cyane.

Mu ruzinduko rwabo, abanyabukorikori bacu bababajwe n'uko kubera umuni mukuru wa Noheli n'impera z'icyumweru hari aho bageraga bakabona ibikoresho ariko ababikora ari bake. Ibyo byatumye akenshi babona ibintu by'ubukorikori ariko ntibabone uko bikorwa. Ibi byatumye batabona umwanya wo gukopera nk'uko babyifuzaga, ngo bicare, ngo bakorane na bo kugira ngo babatware amayeri yabo. icyakora nubwo bataka gutyo, aho mu gakinjoro bafite nk'umuvuba ucuze mu mabati ukoreshwa banyongesha akaguru kandi ugira umwuka mwinshi ku buryo wahaza uruganda runini. Hari n'imbabura ebyizi z'ubwoko bunyuranye, ziramba kandi zisaba amakara make cyane, abanyabukorikori b'Abanyarwanda bashoboye gukora babikomoye ku byo bakopeye muri Kenya ku buryo nubwo bitabagendekeye uko babyifuzaga, basanga urugendo shuri rwarabagiriye akamaro.



I. Ibibazo by'inyunguramagambo

1. Tanga ibisobanuro by'amagambo akurikira:
Urugendo shuri, umunyabukorikori, icyashara, gukana, ingume, amayeri.
2. Uzuza interuro ukoresheje aya magambo: Abadandaza, icyashara, gukana, impamba.
 - a) Tubonaku munsu w'isoko.
 - b) Mu isoko habamo abacuruzi benshi, abaranguza n'..... bagurisha akantu kamwekamwe.
 - c) Abadozi b'inkweto bakunda impu ngo bazikoremo inkweto.
 - d) Iyo tugiye ku ishuri twitwaza kugira ngo tudasonza.

II. Ibibazo byo kumva umwandiko

1. Abanyabukorikori bagiye muri Kenya gukora iki? Ni iki bakoze mu minsi yose bahamaze?
2. Ni iyihe nzira banyuzemo kugira ngo bagere muri Kenya?
3. Ni iki ababaji bo muri Kenya basanze barusha abo mu Rwanda?
4. Ese nk'uko mu mwandiko bivugwa guturira inyanja bimaze iki?
5. Ni ikihe kintu k'ingenzi abanyabukorikori bo muri Kenya barushaga abo mu Rwanda muri rusange?

III. Ikibazo k'ikibonezamvugo

Mushake amazina yakomotse ku nshinga zikurikira, muyashakire uturemajambo n'amategeko y'igenamajwi yakoreshejwemo:
Guhinga, kubyina, guhamiriza, gushakashaka, kwitanga, gushishoza, gutunga, gucumbika, kurera.

III. Ibibazo byúbuvinganwo

1. Gereranya isano iri hagati y'indirimbo n'umuvugo ushingiyeye ku turango no ku ikeshamvugo bikunze gukoresha.
2. Himba umuvugo utarengeje imikarago mirongo itanu ku kamaro k'imyuga mu iterambere ry'Igihugu.

Umutwe wa karindwi

Imiturire

7.1. Gukumira imiturire y'akajagari



Gutura neza hakurikijwe ibyangombwa by'imiterere n'iterambere ry'imigi, ni kimwe mu bizakemura ibibazo biterwa no gutura mu kajagari, bityo no gukwirakwiza ibikorwa remezo byorohe. Ibi bikubiye mu byizweho mu nama igamije kwiga ku miturire n'iterambere ry'imigi mu Ntara y'Amajyepfo yahuje abakozi ba Ministeri y'Ibikorwa remezo n'abayobozi b'Uturere tugize iyi Ntara.

Mu nama y'iminsi ibiri yateranye kuwa ku wa 13 kugera ku wa 14 Gicurasi 2014 yahuzaga abakozi ba Ministeri y'Ibikorwa remezo n'abayobozi b'Uturere tugize Intara y'Amajyepfo, hagaragajwe ko ibibazo bitandukane bijyanye n'imiturire y'imigi mu Rwanda nko kuba hari abubaka amazu mu buryo butanogeye imiturire, kubaka amazu manini afite n'ubusitani bwagakwiye kubakwamo andi mazu yo guturwamo n'uduce dutandukanye tugituye mu kajagari. Bamwe mu bayobozi bungirije b'uturere tugize Intara y'Amajyepfo bavuga ko kuba hakiri iyi myubakire y'akajagari, biterwa n'uko nta tegeko rigena ingano y'inzu igomba kubakwa ahantu runaka, ndetse no kuba nta ruhare abaturage bagira mu igenamigambi ry'igishushanyo mbonera.


Umuyobozi w'Akarere ka Huye wungirije ushinzwe ubukungu, imari n'amajyambere yavuze ko ibyangombwa bya burundu by'ubutaka biha nyiri ubutaka uburenganzira bwo kubukoreramo icyo ashaka. Ngo kuba rero nta poritike igena ingano y'inyubako umuturage aba asabwa kubaka, ibi ngo akenshi usanga bituma abantu bubaka inyubako zitajyanye n'uburyo buberanye n'imiturire iboneye. Nyamara ariko, uyu muyobozi arashima ko hatangiye gutekerezwa ku igenamigambi rigamije kuvugurura no guteza imbere gahunda y'imiturire mu Rwanda.

Umuyobozi Mukuru muri Ministeri y'Ibikorwa remezo ushinzwe igenamigambi ry'imiturire y'imigi no guteza imbere imyubakire, avuga ko Leta y'u Rwanda yahisemo gushyira mu bikorwa ikerekezo k'imiturire idatwara ubutaka bunini, hazirikanwa ko uretse kubaka hanakenewe ubutaka bwo gukoreraho indi mirimo nk'ubuhinzi. Avuga ko Minisiteri y'Ibikorwa remezo iri mu biganiro n'inzego zitandukanye mu rwego rwo kuganira ku kibazo k'imyubakire n'imiturire mu Rwanda. Akomeza avuga ko ubwiyongere bw'abaturage buri hejuru, kandi ubutaka bwo butiyongera, ngo akaba ari yo mpamvu hari kuganirwa ku buryo hanozwa imiturire itarimo akajagari no gukoresha ubutaka.

Kuba umubare w'abaturage ukomeza kwiyongera nyamara ubutaka butuweho butiyongera, ibi ngo bituma ubutaka bukoreshwa nabi aho usanga hakomeza kubakwa amazu ku buso bunini. Ibi bikomeje gutyo, ubutaka bwo gukoreraho ibindi bikorwa bitunze Abanyarwanda bwabura, ari

na yo mpamvu hakomeje gushakishwa uburyo bunoze bw'imiturire.

Sobanura amagambo akurikira




Akajagari, ubusitani, ibikorwa remezo, isibo.

Umwitoto w'inyunguramagambo



Koresha amagambo akurikira mu nteruro: Akajagari, ubusitani, ibikorwa remezo, isibo.

Ibibazo byo kumva no gusesengura umwandiko



1. Ni iyihe mpamvu iyi nama yari yateranye?
2. Ni igiki umuyobozi wungirije w'Akarere ka Huye ashima muri uyu mwandiko?
3. Ni izihe mpungenge umuyobozi ushinzwe ibikorwa remezo muri Minisiteri afite ku baturage?
4. Ku bwawe ubona ubwiyongere bw'abaturage bufite izihe ngaruka mu iterambere ry'Igihugu?
5. Ni izihe ngaruka zo gutura mu kajagari?

Gusesengura umwandiko



Gereranya imiturire ivugwa mu mwandiko n'imiturire y'aho utuye no kuvuga ibyiza cyangwa ibibi byayo ndetse n'ingamba zo gukumira imiturire y'akajagari.

Umwitoto w'ubumenyi ngiro



Hanga umwandiko mvugamiterere uvuga ku ngaruka z'imiturire y'akajagari mu iterambere ry'Igihugu.

7.2. Ibihe bikuru by'inshinga



Itegereze interuro zikurikira ugire icyo uzivugaho ushingiyeye ku bihe zibarizwamo:

- Ibi bigamije kwiga ku miturire n'iterambere ry'Igihugu.
- Inama yahuzaga abahuzabikorwa ba Minisitari y'ibikorwa remezo.
- Hagaragajwe ibibazo bitandukanye bijyanye n'imiturire y'imigi.
- Umuyobozi avuga ko ibyangombwa bya burundu by'ubutaka byabonetse.
- Hakenewe ubundi butaka buzakorerwaho indi mirimo y'ubuhinzi.
- Ibintu byose bizashoboka nidushyira hamwe.
- Burya umwijima uhunga urumuri.
- Uvoma yanga avoma ibirohwa.
- Umubare w'abaturage ukomeza kwiyongera.
- Hari uburyo bunoze bw'imiturire.

Mu Kinyarwanda inshinga yose itondaguye igomba kugira igihe itondaguyemo hakurikijwe urwego rw'ibivugwa n'irebero (ko ibivugwa byarangiyeye cyangwa bitararangira) ryabyo. Habaho rero ibihe bikuru bitatu mu itondaguranshinga. Ibyo bihe ni igihe cyahise kivuga ibyamaze kuba kikitwa impitagihe. Hakaba ikivuga ibiriho ubu kikitwa indagihe. Hakabaho n'ikivuga ibizaba cyangwa ibizaza kikitwa inzagihe.

1. Indagihe

Indagihe ivuga ibiba muri aka kanya, ibiba ubusanzwe n'ibyabaye kera bivugwa mu nkuru bityo ikagabanywamo indagihe y'aka kanya, indagihe y'ubusanzwe, indagihe y'imbarankuru n'iy'igikomezo.

a) Indagihe y'ubu/ubungubu, mu kanya kaza

Iyi ndagihe yumvikanisha ikirimo gukorwa ubu aho uvugiye. Indangagihe yayo ni -ra- naho umusozo ni -a.

Ingero

- Ndahinga mu rutoki.
- Ubu ndandika ibaruwa.

b) Indagihe y'ubusanzwe

Indagihe y'ubusanzwe yumvikanisha igikorwa gisanzwe gikorwa. Ntawamenya intangiriro n'iherezo ryacyo. Mu isesengura ryayo irangwa n'umusozo -a.

Indangagihe yayo ni -ø-

Ingero

- Izuba rirasa mu gitondo.
- Nkunda gusoma ibitabo.
- Nigisha ubumenyi bw'isi.

c) Indagihe y'imbarankuru

Indagihe y'imbarankuru umuntu ayikoresha avuga ibyabaye kera nk'aho ari iby'ubu. Igira intego iteye nk'iy'indagihe y'ubusanzwe bigatandukanira ku nshoza. Indangahige yayo ni -a-ra-

Ingero

Umwarimu arahaguruka abwira abanyeshuri be ati: "Mwigane umwete bizabafasha".

d) Indagihe y'igikomezo

Indagihe y'igikomezo yumvisha igikorwa kirimo gukorwa ubu ngubu ntawamenya igihe cyatangiriye nta n'uwamenya igihe kiri burangirire, Indangagihe yayo ni -ra-ki-âa na -ra-ki-

Ingero

- Ndacyasoma igitabo.
- Aho aracyakoze wa murimo?
- Turacyamutegereje.
- Ibikorwa remezo biracyatera imbere.

2. Impitagihe

Impitagihe ivuga ibintu byahise kare n'ibyahise kera ikigabanyamo impitakare n'impitakera.

a) Impitakare

Impitakare yumvisha igikorwa cyarangiyeye mu gihe cyahise ariko kitarengeje uyu muni mu gitondo. Indangagihe yayo ni -a-.

Ingero

- Nateraga urubingo.
- Naharuraga umuhanda.
- Twateraga umupira.

b) Impitakera

Impitakera yumvisha igikorwa cyarangiyeye mu gihe cyahise uhereye ejo hashize ugana hirya yaho. Indangagihe yayo ni -â- na -â-ra

Ingero

- Nabyinaga mu itorero Indangamuco
- Natozaga ikipe y'igihugu
- Nasomye Bibiliya nkiri muto.
- Narabyinnye.

3. Inzagihe

Inzagihe ivuga ibiza kuba cyangwa ibizaba nyuma y'igihe cyo kuvuga. Yigabanyamo inzahato n'inzakera.

a) Inzahato

Inzahato ivuga ibiri bube nyuma yo kuvuga ariko ntibifatire undi muni. Indangagihe yayo ni -ra-.

Ingero

- Ku gicamunsi uratera umupira.
- Mu kanya uramperekeza ku isoko.
- Araza kukubwira igikenewe.


b) Inzakera

Inzakera ivuga ibizaba ejo hazaza cyangwa mu bihe bizakurikiraho. Indangagihe yayo ni -zaa-.

Ingero

- Tuzaririmba indirimbo z'agakiza.
- Muzadusura ryari?
- Tuzagera ku iterambere mu bikorwaremezo.

Dore uko ibihe by'inshinga biteye ku gishushanyo:



Mfashe ko: Mu Kinyarwanda kimwe no mu zindi ndimi inshinga itondagurwa mu bihe bitandukanye. Buri nshinga itondaguye igomba kugira igihe itondaguwemo hakurikijwe urwego rw'ibivugwa n'irebero ryabyo. Habaho rero ibihe bikuru bitatu mu itondaguranshinga. Ibyo ni igihe cyahise kivuga ibyamaze kuba kikitwa **impitagihe**, hakaba ikivuga ibiriho kikitwa **indagihe**, hakabaho n'ikivuga ibizaba cyangwa ibizaza kikitwa **inzagihe**.

Ubu nshobora: Gutandukanya inshinga zitondaguye mu bihe bikuru by'itondaguranshinga ndetse n'ibibishamikiyeho.

Imyitozo



- Garagaza ibihe bikuru by'inshinga n'ibigiye bishamikiyeho byose.
- Garagaza ibihe inshinga zitondaguye ziri mu nteruro zikurikira zibarizwamo:
 - **Nabonye** imbuto none **nateye**.
 - Igihe **nari** mu ishuri **wansakurizaga**.
 - Leta y'uRwanda **yahisemo** gushyira mu bikorwa ikemezo k' imiturire.
 - Umubare w'abaturage **uzakomeza** kwiyongera.
 - **Hari** ibindi bikorwa **bitunze** Abanyarwanda.

7.3. Ingaruka z'ubwiyongere bw'abaturage

U Rwanda ni igihugu kidakora ku nyanja, kikaba gihana imbibi n'ibihugu byo muri Afurika yo hagati n'iy'iburasirazuba. Gifite ubuso bwa Km² 26.338. Igihugu cy'u Rwanda gifite ubwiyongere bw'abaturage buri hejuru, ku ijanisha rya 2,9%, ibi bikaba byatuma mu mwaka wa 2020 abaturage bashobora kugera kuri miriyoni 16 niba ubu bwiyongere butagabanutse. Abaturage b'u Rwanda muri rusange baracyari bato kuko ikigereranyo ari imyaka 21 kandi 60% by'abaturage bakaba bafite muni y'imyaka 18.

U Rwanda rwagize umwihariko warwo mu mateka y'Afurika. Kubera jenocide yokorewe Abatutsi mu mwaka wa 1994, Igihugu cyatakaje igice kinini cy'abaturage bagera kuri miriyoni imwe. Nyuma y'ibi, abana benshi babaye imfubyi ubu bakaba bagomba gukora kugira ngo bashobore kwibeshaho. Abanyarwanda bari mu buhungiro bamazeyo imyaka myinshi bagarutse mu Gihugu, bituma ubushomeri burushaho kwiyongera.

Ibarura rusange ry'abaturage n'imiturire ryabaye mu wa 2002 ryerekanye ko Abaturarwanda bose ari 8.128.553, muri bo 4.249.105 akaba ari abagore ku kigereranyo cya 52,3% naho abagabo akaba ari 3.879.488 bakaba bangana na 47,7%. Igice kinini cy'Abanyarwanda batuye mu cyaro ku kigereranyo cya 83,1%, naho 16,9% gusa akaba ari bo baba mu migi. Ikigereranyo cy'abaturage baba mu migi kiracyari hasi kuko kingana na 16,9% gusa mu Gihugu cyose. Hakurikijwe imyaka, byagaragaye ko 53% by'abaturage bari mu kigero cyo gukora (hagati y'imyaka 15 na 65) naho 47% akaba ari bo badafite ubushobozi bwo gukora (kuva kuri 0 kugeza ku myaka 14, no hejuru ya 65). Ibi byerekana ko 47% by'abaturage babaho kubera abandi, ibi bikaba bigaragara cyane mu cyaro (93%) mu migi ho akaba ari 63%.

Imiterere y'abaturage hakurikijwe imyaka yerekanye ko muri rusange abaturage bakiri batoya ku kigereranyo k'imyaka 21,2, kandi ko kimwe cya kabiri cy'abaturage bari muni y'imyaka 17. Abatuye mu giturage byagaragaye ko

ari bo bato (ikigereranyo k'imyaka 21) ugereranyije n'abo mu mugu (ikigereranyo k'imyaka 22,2), kandi ko abagabo ari bo bato (ikigereranyo k'imyaka 20,5) kurusha abagore (ikigereranyo k'imyaka 21,9).

Ku byerekeye ikoreshwa ry'ibibanza n'igenamigambi mu gukoresha ubutaka, u Rwanda rufite hegitari 1.385.000 z'ubutaka buhingwa, bukaba bungana na 52% by'ubutaka bwose bw'Igihugu. Kuva kera, umuntu yatungaga ubutaka ahawe nk'umurage, ibi bikaba byaratumye bucibwamo uduce duto twinshi kugira ngo abaturage bese bashobore gukwirwa. Ibi byatumye umusaruro w'ubuhinzi urushaho kuganabuka.

Nk'uko bigaragazwa n'umuryango mpuzamahanga wita ku buhinzi n'ibiribwa (FAO), kugira ngo ubutaka butange umusaruro mwiza bugomba kuba nibura bufite hegitari 0,90. Mu Rwanda 50% by'imirima iri muni y'ubu buso ngenderwaho. Hari ndetse n'ikibazo by'ubutaka bukomeza kwangirika kubera isuri no guhinga imirima ubutaruhuka. Iri bura ry'ubutaka mu giturage hamwe n'urwego rw'inganda rukiri hasi mu Rwanda ni byo mpamvu y'ubushomeri no gukora akazi katagira umusaruro uhagije.

Umusaruro w'umuturage uri muni y'amadorari 250 mu mwaka ntutuma hari icyo ashobora kuzigama cyangwa ngo ashore imari mu bindi bikorwa, iyi akaba ari imbogamizi ikomeye ku mizamukire y'ubukungu cyanecyane mu rwego rwa mbere rw'ubukungu.

Ingaruka z'ubwiyongere bw'abaturage n'isano bifitanye n'umurimo bigaragarira mu nyigo yakozwe na ONAPO ku buzima n'imiturire mu mwaka wa 2000. Herekanwe ko abaturage bafite ubushobozi bwo gukora barushaho kugenda biyongera. Ibi biterwa ahanini no kubyara cyane (ikigereranyo cy'abana 5,8 ku mugore umwe) ndetse no gutangira akazi igihe kitageze ku rubyiruko rwivana mu mashuri.

Ikigereranyo cy'abaturage bafite ubushobozi bwo gukora gishobora gushingirwaho, ariko nta kigereranyo k'imirimo ihari cyashingirwaho gihari. Ikibazo cy'abantu benshi bahunga icyaro baza mu mugu na cyo ni intandaro y'ubushomeri mu mugu, kugeza na n'ubu kikaba kitarashobora kubonerwa igisubizo gihamye.

(Minisiteri y'Abakozi ba Leta n'Umurimo, (2007:10) *Politiki y'Igihugu igenga umurimo, Kigali*).



Inyunguramagambo

Tanga ibisobanuro by'amagambo akurikira:

Imbibi, ubwiyongere, umwihariko, imfubyi, ubushomeri, ibarura, ikigereranyo, icyaro, imbogamizi, umurage.

1. Ubaka interuro ukoresheje amagambo akurikira: Imbogamizi, icyaro, umwihariko, umurage.
2. Uzuzura izi nteruro ukoresheje amagambo yo mu mwandiko:
 - Mu Rwanda abantu badafite akazi ni benshi, ..
.....bwaragwiriye.
 - Umubare w'Abanyarwanda wagaragajwe n'.....ryakozwe.
 - Usanga akenshi imigezi ari yo ikoze z'ibihugu.



Ibibazo byo kumva no gusesengura umwandiko

1. Gereranya ingano y'Abanyarwanda batuye mu cyaro n'abatuye mu mug?i?
2. Inyigo yakozwe na ONAPO ku buzima n'imiturire mu 2000 yerekanye iki?
3. Mu mwandiko baravugaga ko ari iyihe mpamvu itera ubushomeri mu mug?i?
4. Kuba 60% by'abatuye u Rwanda bafite munsu y'imyaka 21 bishatse kuvugaga iki?
5. Ni izihe mpamvu zivugwa mu mwandiko zituma ubushomeri bwiyongera mu Rwanda?
6. Mu mwandiko baravugaga ko ikigereranyo cy'ubutaka buhingwa kugira ngo butange umusaruro ushimishije ari ikihe? Ese mu Rwanda byifashe bite?



Gusesengura umwandiko

Mugaragaze ingaruka z'ubwiyongere bw'abaturage zivugwa mu mwandiko ndetse n'izindi zitavuzwe mu mwandiko muzi.

Ese musanga ubwiyongere bw'abaturage ari ikibazo koko mu Rwanda? Nimusobanure mutanga ingamba zakoreshejwe mu gukumira icyo kibazo.

7.4. Uburyo bw'inshinga itondaguye

Musesengure interuro zikurikira maze mugaragaze uburyo bunyuranye inshinga zitondaguwemo kandi mutange n'inshoza y'itondaguranshinga.

Ingero z'interuro

- Ibi **bigamije** kwiga ku miturire n'iterambere ry'igihugu.
- Inama **yahuzaga** abahuzabikorwa ba Minisiteri y'ibikorwa remezo.
- **Hagaragajwe** ibibazo **bitandukanye** bijyanye n'imiturire y'imigi.
- Umuyobozi **avuga** ko ibyangombwa bya burundu by'ubutaka **byabonetse**.
- Hakenewe ubundi butaka **buzakorerwaho** indi mirimo y'ubuhinzi.
- Ibintu byose bizashoboka **nidushyira** hamwe.
- Burya umwijima **uhunga** urumuri.
- Uvoma **yanga** avoma ibirohwa.
- Umubare w'abaturage **ukomeza** kwiyongera.
- Hari uburyo **bunoze** bw'imiturire.

1. Inshoza y'itondaguranshinga

Inshinga mu nteruro ni ijamba ribumbatira ingingo yumvikanisha igikorwa cyangwa imimerere ya ruhamwa ndetse n'isano iri hagati ya ruhamwa na ruhamya. Itondaguranshinga rero ni uburyo bwo kuvuga ibyo ubona cyangwa utekereza, ubyemeza cyangwa ubihakana, wumvikanisha ko ibyo uvuga nta cyo ubishidikanyaho cyangwa ushidikanya, wumvikanisha igihe byabereye, ko byarangiyeye cyangwa bigikomeza n'ibindi.

2. Uburyo bw'inshinga

Inshinga itondaguye ishobora kujya mu buryo bunyuranye. Ubwo buryo ni ikirango, integeko, ikigombero, inyifurizo insano, inziganyo n'imbundo.

Uburyo ni imiterere y'ubwumvane hagati y'uvuga n'ubwirwa kimwe n'uko yitwara mu magambo ye. Iyo miterere yumvikanisha inshoza yo kuranga, gutegeka, kwifuriza, kugomba no kuziganya.

a) Insano

Insano ni uburyo inshinga iba iteye idafite indanganshinga ariko utundi turemajambo twayo tukaba utw'inshinga. Nta karemajambo kihariye kerekana insano.

Ingero

- Uhemuka aba atagira isoni.
- Asuzugura nk'imbwa iryana

b) Inyifurizo

Inyifurizo ivuga icyo umuntu yifuriza nyakubwirwa cyangwa nyakuvugwa yifuriza ibyiza cyangwa ibibi nko gutukana. Inshinga iri mu buryo bw'inyifurizo nayo igira uturemajambo, ariko akaremajambo kayiranga ni -ka-.

Ingero

- Kagire Imana n'amafaranga!
- Urakabyara uhinguye!
- Komera wo karama we!
- Uragahorana amata k'uruhimbi!
- Urakaruha uwa Kavuna!

c) Ikirango

Uburyo bw'ikirango ni uburyo bwumvikanisha ihame. Ni uburyo budashidikanya cyangwa ngo bwumvikanishe ikifuzo. Ubu buryo bwitaruye cyane uburyo bw'imbundo n'uburyo bw'integeko kuko bwo bugaragaza ibihe by'igikorwa kibumbatiwe n'igicumbi k'inshinga.

Uvuga ashobora kurangura ibikorwa mu gihe arimo kuvugiramo, kubyerekeza mu byatambutse ataravuga cyangwa akabishyira mu kizaza. Bityo inshinga iri mu buryo bw'ikirango ikagira indangagihe zinyuranye zijyana n'ibyo byerekezo by'igihe utasanga mu nsano cyangwa mu ntegeko. Indango yayo yemeza nta karemajambo kayiranga. Naho indango yayo ihakana irangwa n'akaremajambo nta-ta- cyangwa -i-

Uburyo bw'ikirango burimo amoko atatu ariyo: Ikirango gisanzwe, ikirango cyunga n'ikirango gisobanura.

Ikirango gisanzwe

Ingero

- Aramurebye arahumbya.
- Igikakarubamba kivura indwara nyinshi.
- Yahageze atinze.
- Turataha cyangwa turarara?
- Tuzagusura nubishaka.

Ikirango cyunga

Ni imigendekere iranga ivuga ahanini uko igikorwa cyangwa imiterere biherekeje ibindi ikabigira ivuga igihe cyangwa uburyo. Inyangingo kiremye ntishobora kuba yihagije ahubwo iteka iba igaragira.

Ingero

- Mvuye kwiga naniwe
- Iyi mvura yaguye twayishakaga
- Yazaga asanga twarabikoze byose

Ikirango gisobanura

Ni imigendekere y'ikirango isobanuye izina cyangwa se irindi jambo rishobora kurisimbura cyangwa se inyangingo ngaragira. Naho impakanyi yayo ni -ta-

Ingero

- Inzoga tunyoye iraryoshye (Kirasobanura izina)
- Izô nakuguriye zizagukwira (kirasobanura ikinyazina)
- Nkeneye ko muza hano (kirasobanura inyangingo)

d) Integeko

Integeko ni uburyo bakoreshamo inshinga ivuga itegeko ryaba rivuzwe kuri nyakuvuga cyangwa nyakuvugwa. Irangwa n'umusozo -a na -e.

Ingero

- Ndavuze ngo : "Taha".
- Cana iryo tara.
- Muzamuzane hano.

e) Inziganyo

Inshinga iri mu buryo bw'inziganyo ivuga uko igikorwa cyangwa imimerere bishingira ku kindi kintu ngo bishoboke.

Ingero

- Nibahagera umenyesheshe.
- Nzakwibuka nibitungana.
- Nibatampemba sinzabikora.

f) Ikigombero

Ikigombero kirangwa mu myumvire n'akarango kumvikanisha inkeko, ingwatirizo n'igenekerezo.

Ingero

- Tubonye akazi twakora.
- Dufite uburyo twakubaka.
- Dukoze cyane twakira.

g) Imbundo

Ni uburyo inshinga iba irimo igaragaza igikorwa kitaziwe ugikora n'igihe gikorerwa. Imbundo yisanisha n'izina ryo mu nteko ya 15 maze ikagena isanisha mu nteruro.

Ingero

Kubaha abanyu bose ni ngombwa.

Kwirinda biruta kwivuza.

Kuririmba kwawe kuradushimisha.

Mfashe ko: Inshinga y'Ikinyarwanda igaragaza igikorwa, imico cyangwa imiterere ndetse n'isano hagati ya ruhamwa n'icyuzuzo. Iyo itondaguye igira ibihe bikuru bitatu ari byo impitagihe, indagihe n'inzagihe. Iyi nshinga kandi igira uburyo burindwi ishobora gutondagurwamo ari bwo: Insano, ikirango, integeko, inyifurizo, imbundo, ikigombero n'inziganyo kandi buri buryo bugira akaremajambo kaburanga kihariye.

Nshobora: Gutondagura inshinga mu buryo bunyuranye.

Imyitozo



Inshinga ziri mu nteruro zikurikira zitondaguye mu buhe buryo?

- Gutura neza bizakumira ibibazo by'imiturire
- Umunyeshuri yigishwa na nde?
- Abayobozi baravuze ngo: "muceceke"!
- Imvura yarabuze.
- Abana bato bagira ikinyabupfura.
- Inama yahuje abayobozi.
- Igihugu cyacu cyokaramba kiradutekereza.
- Magayane akunda umugayo.
- Mukore umuganda twubake igihugu cyacu.
- Muhaguruke turwanye imiturire y'akajagari.
- Nibishobo katurabikora.
- Duhembwa neza twakwiteza imbere.

Huza inshinga ziri mu nteruro n'uburyo zitondaguyemo ukoresheje akambi.

- Igihugu cyacu cyokaramba kiradutekereza
- Magayane akunda umugayo.
- Mukore umuganda twubake igihugu cyacu.
- Muhaguruke turwanye imiturire y'akajagari.
- Nibishoboka turabikora.
- Duhembwa neza twakwiteza imbere.

Urugero

Cyokaramba	Ikirango
Akunda	Integeko
Mukore	Inziganyo
Muhaguruke	inyifurizo
Nibishoboka	Ikigombero
Duhembwa	

Himba interuro enyenyeye ugaragaza:

- Uburyo bw'imbundo
- Uburyo bw'integeko
- Uburyo bw'ikirango



Isuzuma risoza umutwe wa karindwi

Abaturage b'isi

Muri iki gihe, abaturage b'isi barasaga miriyari zirindwi na miriyoni magana atatu na mirongo itanu mu gihe mu mwaka wa 2011 bari miriyari zirindwi zuzuye. Mu ntangiriro z'ikinyejana cya 21 bari miriyari esheshatu na miriyoni ijana mu gihe mu ntangiriro z'ikinyejana cya 20 bari hagati ya miriyari imwe n'igice na miriyari imwe na miriyoni magana arindwi. Ikigaragara ni uko abaturage b'isi bakomeje kwiyongera cyakora ubu umuvuduko w'ubwiyongere utangiye kugabanuka kuko igipimo cy'abavuka kigenda kigabanuka cyane.

Mu mwaka wa 2015, ikigereranyo cy'ubwiyongere bw'abatuye isi cyanganaga n'abantu 244.000 biyongera buri muni. Uyu mubare ni ikinyuranyo hagati y'abavuka n'abapfa : havuka abana 400.000 ku muni, hagapfa abagera ku 156.000 ku isi, ibi bivuze ko ku mwaka abaturage b'isi biyongeraho miriyoni 89. Abaturage b'isi rero biyongera ku kigereranyo cya 1,2%.

Ku bijyanye n'imiturire, 54% by'abaturage b'isi baba mu migi nk'uko imibare yo mu mwaka wa 2014 ibigaragaza. Muri iki gihe ku batuye isi bose, umugabane w'Aziya utuwe na 59,8%, Uburayi bufite 10%, Afurika ituwe na 16,2%, Amerika ni 13,5% mu gihe Oseyaniya yo ituwe na 0,5%.

Iyo witegereje umubare w'abatuye isi, usanga Aziya irusha indi migabane guturwa, hagataho Afurika, Amerika, Uburayi hagaheruka Oseyaniya. Mu mwaka wa 1981, Aziya ni yo yazaga ku mwanya wa mbere, igakurikirwa n'Uburayi, Amerika igataho, igakurikirwa n' Afurika hagaheruka Oseyaniya. Ikigaragara rero ni uko abaturage b' Afurika biyongera cyane mu gihe mu Burayi n' Amerika ho abaturage bagenda bagabanuka kuko abavuka bagenda baba bake mu gihe abasaza bo barushaho kwiyongera bivuga ko ikigereranyo cy'abapfa kiyongera kurusha icy'abavuka.

Abaturage b'isi bari mu moko atandukanye, ntabwo bahuriye ku bwoko bumwe rukumbi. Ayo moko anyuranye

ntabwo yakwitirirwa aho atuye cyangwa amatsinda y'indimi bavuga. Niba Aziya yiganjemo abafite uruhu rujya kuba umuhondo, ntawavuga ko ari bo bayihariye bonyine, yaba yirengagije abera n'abirabura bari mu mwigimbakirwa w' Ubuhande. Nubwo Uburayi ari ubw'abera no muri Amerika, mu majyaruguru y' Afurika no mu burengerazuba bw' Aziya na ho barahaboneka. Ariko kandi uretse i Burayi honyine –na ho kandi hari abirabura, ab'umuhondo batari bake bahahiraye- mu yindi migabane y'isi nta ho utasanga abirabura batuye.

Ntawakwihandagaza ngo yitirire buri mugabane w'isi uruhurirane rw'ubwoko ubu n'ubu bwonyine, kubera ko abantu bavuye mu migabane itandukanye bakimukira mu yindi, amoko agasabana, agashyingirana, akabyara ibisusirane. Imibereho mibi, gushaka akazi, umutekano n'ibindi mu bihugu bimwe bituma bamwe mu babituye bimukira aho bashobora kubaho neza kurusha. Uko isi igendairushaho kuba umudugudu umwe kubera iterambere mu ikoranabuhanga, ni ko abaturage b'isi barushaho kwegerana no gusabana bikoroshya n'imihahirane. Gusa kuba abantu benshi bihutira gutura mu mugi igihiriri bitera ibibazo by'imiturire cyanecyane mu bihugu bikiri mu nzira y'amajyambere bidafite amikoro ahagije.

I. Ibibazo by'inyunguramagambo

1. **Sobanura amagambo akurikira:**
Umuvuduko w'ubwiyongere bw'abaturage, ikinyuranyo, umwigimbakirwa, igihiriri, amikoro.
2. Koresha amagambo akurikira mu nteruro: ikinyuranyo, amikoro, uruhurirane.

II. Ibibazo byo kumva no gusesengura umwandiko

1. Abatuye isi bangana iki ukurikije ibivugwa mu mwandiko? Garagaza uko bagiye biyongera ukurikije ibihe bitandukanye.
2. Ikigereranyo cy'abatuye mu migi kigana gute ku isi?
3. Ni uwuhe mugabane utuwe kurusha iyindi ku isi? Ufite abaturage bake se wo ni uwuhe?
4. Gereranya ubwiyongere bw'abatuye imigabane y'isi uhereye mu mwaka wa 1981.
5. Umwandiko uravuga iki ku miturire n'imibanire y'amoko ku isi?
6. Ubwiyongere bw'abaturage bufite izihe ngaruka ku miturire y'abaturage mu bihugu bikiri mu nzira y'amajyambere?

II. Ibibazo by'ikibonezamvugo

1. Ni hehe imbundo ihurira n'izina?
2. Wifashishije ingero sobanura uburyo bw'inshinga itondaguye.
3. Soma interuro zikurikira, ugaragaze ibihe inshinga zirimo zitondaguyemo n'uburyo bw'inshinga zirimo:
Ikigereranyo cy'ubwiyongere bw'abatuye isi mu mwaka wa 2015 cyanganaga n'abantu 244.000 biyongera buri muni. Uyu mubare ni ikinyuranyo hagati y'abavuka n'abapfa.
Abantu bavuye mu migabane itandukanye bimukira mu yindi, amoko agasabana, agashyingirana, akabyara ibisusirane. Imibereho mibi, gushaka akazi, umutekano n'ibindi mu bihugu bimwe bituma bamwe mu babituye bimukira aho bashobora kubaho neza kurusha.


Ikibazo k'ihangamwandiko

Hanga umwandiko mvugamiterere ugaragaza imiturire y'aho utuye. Nturenze impapuro ebyiri.

Umutwe wa munani

Ikoranabuhanga

8.1. Akamaro k'ikoranabuhanga mu mashuri



Tugeze mu gihe guhanahana amakuru byihuta cyane kubera ikoranabuhanga. Aho hadukiye itumanaho rya interineti bwo byabaye agahebuzo rwose. Iryo koranabuhanga rigenda rizana impinduka zikomeye mu bijyanye n'umuco, mu bukungu no muri poritiki ku buryo bukomeye. Abantu babona amakuru ku buryo bwihuse, ari mu bijyanye n'umuco w'ahandi, bakamenya ibihakorerwa,

bagashobora gutumiza no kohereza ibicuruzwa. Uburyo bw'imiyoborere, imigenderanire n'imibanire hagati y'ibihugu n'abanegihugu na bwo bugenda burushaho kwiyongera. Muri make dusa n'aho twerekeza ku gihugu kimwe mu isi yose: ibibera ikantarange turabimenya, tukabireba imbonankubone kandi natwe ibibera iwacu ntibikiri ibanga ku batuye iyo bigwa.

Ni ngombwa rero ko habaho impinduka no mu myigire n'imyigishirize, kugira ngo abarezi n'abarerwa bajyane n'igihe tugezemo. Impamvu ni uko abanyeshuri bo muri iki gihe, bahura n'ibikoresho by'ikoranabuhanga mu buzima bwabo bwa buri muni. Kubera imbuga za interineti, bashobora kubona amakuru menshi, bakanabona ibintu byinshi bakuramo ubumenyi.

Nyamara abanyeshuri bagomba kumenya gukoresha neza ikoranabuhanga ari ku ishuri ari no mu rugo, kugira ngo baribyaze umusaruro ukwiye. Bitabaye ibyo, ikoranabuhanga ryahinduka ikintu kirangaza abanyeshuri aho kubafasha. Ibibera i Burayi, muri Amerika n'ahandi, byose dushobora kubisanga kuri interineti. Ari ibifite akamaro, ibiteye isoni, ibyiza n'ibibi, byose tubisanga kuri izo mbuga, maze abazikoresha bakijonjorera.

Kugira ngo ukoreshe interineti neza, ni ngombwa kuba uzi icyo ushaka, hanyuma ukamenya guhitamo amakuru agufitiye akamaro mu bintu byinshi interineti ikwerekana. Ukoresha interineti ikamwungura ubwenge, ni uzi neza icyo akeneye gushakaho, hanyuma agafata n'igihe cyo gusesengura no gusoma mu mutuzo ibyo abona. Agomba kandi kuba ari umuntu utarangerira mu bindi, agakurikirana gusa ibyo agamije kugeraho. Bitabaye ibyo, interineti ihinduka ikintu kibi kiyobya urubyiruko aho kubafasha, ikababera nk'ikiyobyabwenge aho kubabera isoko y'ubumenyi n'ubwenge.

Gukoresha impapuro no gusoma ibitabo biracyafite umwanya ukomeye ku muntu ushaka kwiga by'ukuri. Ni ngombwa rero gushakira ingamba zatuma abanyeshuri biga neza babifashijwemo n'ikoranabuhanga aho kugira ngo ribarangaze.

Kugeza ubu kwiga hakoreshejwe ikoranabuhanga bimaze kugaragara ko bifite akamaro mu buryo bukurikira: abanyeshuri bagira uruhare mu myigire yabo, biga bashishikaye, bashobora kwiyigisha bo ubwabo, banashobora kwiga bari mu rugo kandi n'ababyeyi babo bakaba bashobora kubafasha ku buryo bworoshye.

Ikoranabuhanga riha umunyeshuri uburyo bwo kwiga we ubwe ari wenyine. Rimuha uburyo bwo gushakashaka no kwivumburira ibisubizo ku bibazo ashobora kuba yibaza.

Bityo rero ikoranabuhanga rigomba kwinjizwa mu myigire n'imyigishirize. Birumvikana ko uruhare rwa mwarimu ruzakomeza kubaho, mu gutegura no kuyobora amasomo, ariko noneho abanyeshuri bakazaba ari bo bashyiraho umwete wo gushakashaka no kumenya ku buryo bwimbitse ibyo bakwiye kwiga. Abanyeshuri bashobora guhabwa umwanya wo gukoresha ibikoresho by'ikoranabuhanga mu gice kimwe k'isomo. Isomo rishobora kandi gutangwa ku buryo bwa firime cyangwa bw'ikiganiro gihita ku byuma bitanga amajwi n'amashusho.

Nyamara ku bana bakiri bato, kwigira hamwe n'abandi biracyari ngombwa. Bifasha umwana kumenya kubana n'abandi, akamenya kumva ko hari abantu badahuje na we ariko bashobora kuzuzanya. Bityo amenya ko mugenzi we ari umuntu bashobora gukorana, mbese akumva ko ari umuntu umufitiye akamaro. Ibyiza byo kwigira hamwe ni uko umwana agirana ubusabane n'abandi akabasobanuzwa cyangwa na we akabasobanurira, bityo imibanire yabo igashinga imizi. Ni ngombwa na none ko umwana yiga kubana n'abandi, akiga gukorera hamwe na bo, kandi ibyo ntiyabyigira imbere y'imashini gusa.

Kugira ngo ikoranabuhanga rifashe umuntu wese ukeneye kwiga ni ngombwa kumenya gukorera mu mutuzo, agafata umwanya wo kwita ku byo akora kandi akabikora yumva abyishimiye. Ikoranabuhanga rero rishobora gufasha umuntu wese ukeneye kwiga, yaba ari ku ishuri cyangwa agambiriye kwihugura. Uko byagenda kose, umwete ni wo wa ngombwa kugira ngo umuntu yige kandi kwiga bitarimo agahato birushaho kuba byiza no gushimisha.



Tanga ibisobanuro by'amagambo akurikira

Imbuga za interineti, ikoranabuhanga, ingamba, ikantarange, gushinga imizi.



Imyitozo y'inyunguramagambo

1. Koresha amagambo: Imbuga za interineti, ikoranabuhanga, ingamba, ikantarange, gushinga imizi mu nteruro ngufi.
2. Uzuzura interuro ukoresheje amagambo yo mu mwandiko akurira: Ubushakashatsi, kwihugura, ikiyobyabwenge, uburyo bwimbitse, umwete, ikiganiro,
 - Ni byiza gukorana.....kugira ngo utere imbere.
 - Amasomo ashobora gutangwa nk' hakoreshejwe ikoranabuhanga.
 - Interineti ikoreshejwe nabi yabera urubyiruko.....
 - Umunyeshuri ashoboraukoresheje interineti.
 - Ni byiza gukora ubushakashatsi kugira ngo wihugure.



Ibibazo byo kumva umwandiko

1. Ni gute ikoranabuhanga ryahinduye ibijyanye n'umuco, ubukugu na poritiki?
2. Kuki ikoranabuhanga rikwiye kwinjizwa mu myigire n'imyigishirize?
3. Ni gute ikoranabuhanga rikoreshejwe nabi ryarangaza umunyeshuri aho kumuyobora no kumugezaho ubwenge n'ubumenyi?
4. Ni ibihe byiza byo gukoresha ikoranabuhanga ku munyeshuri?

5. Kuki kwigira hamwe ari ngombwa cyanecyane ku bana bakiri bato?
6. Hari ibyiza ubona aho mutuye cyangwa aho wigira wagejeweho n'ikoranabuhanga?
7. Ubona se hari ibibazo byakemurwa n'ikoranabuhanga cyangwa imirimo ubona ivuna abantu ikoranabuhanga ryabunganiramo. Niba bihari, tanga urugero.
8. Hitamo ikintu nawe wumva twakwitabazamo ikoranabuhanga maze werekane uko giteye hanyuma uvuge n'uburyo ubona cyakemukamo.

Ibibazo byo gusesengura umwandiko



- a) Mugaragaze ingingo z'ingenzi zigize uyu mwandiko
- b) Hina uyu mwandiko kuri ¼ cyawo.

Imyitozo y'ubumenyingiro



- a) Mutange ibitekerezo ku ngingo yo gutunga terefone ku ishuri ku banyeshuri bo mu mashuri yisumbuye. Ese koko bibatera kurangara? Mwebwe mubitekerezaho iki?
- b) Mu bihugu byateye imbere bageze kure cyane mu by'ikoranabuhanga ku buryo tudashobora kurushanwa na bo. Ese muremenya n'iki gitekerezo?

8.2. Amagambo adahinduka

Gereranya mu nteruro zikurikira amagambo akurikira aciyeho akarongo ukurikije uko yisanisha:

Uyu mwana agenda **nka** se/Aba bana bagenda **nka** ba se.

Nzajya kumusura **ejobundi**/Tuzajya kubasura **ejobundi**.

Ikirahuri Cyahanutse kikubita hasi ngo "**pooo**"!/Ibirahuri byahanutse byikubita hasi ngo "**pooo**"!

Uyu mwana ni mwiza cyane/Aba bana ni beza **cyane**.

Dore re! Ubu se urajya he?/**Dore re!** Ubu se murajya he?

1. Imigereka

Musome izi nteruro zakuwe mu mwandiko n'igika gikurikira, mugerageze gutahura imiterere n'imimaro by'amagambo yanditse atsindagiye:

- Tugeze mu gihe guhanahana amakuru byihuta **cyane** kubera ikoranabuhanga.
- **Aho** hadukiye itumanaho rya interineti bwo byabaye agahebuzo **rwose**.

Nkuba ati: "Usanze ndi mu byimbo byo kuza kugutirurira umuhoro wawe."

Noneho, ubwo twibonaniye, taha nange ndasiba **none** n'**ejo**, **ejobundi** nkakugeraho n'inzoga y'ishimwe". Ku wa kane, Nkuba abwira umugaragu we, ati: "Gira bwangu, reba urutete, ushyiremo inzoga iryoshye **rwose**, ushishire **neza**, **ejo** tuzazindukira **epfo** iriya kwa Gikeri.

a) Inshoza y'umugereka

Umugereka ni ijamba cyangwa urujyano rw'amagambo rudasesengurwa risobanura izina, ntera, inshinga cyangwa undi mugereka. Rivuga uburyo, ahantu, igihe cyangwa inshuro. Umugereka ushobora kuba buhangwa cyangwa ukaba urwunge rw'amagambo.

b) Amoko y'imigereka

Umugereka uvuga uburyo, umugereka uvuga igihe, umugereka uvuga ahantu, umugereka uvuga inshuro, umugereka wemeza ndetse n'umugereka uhakana.

Umugereka uvuga uburyo

Ingero

- Vuga **cyane**.
- Musome **bucece**.
- Twabikoze **neza**.
- Gira **vuba**.

Umugereka uvuga igihe

Ingero

- Uze **none**.
- Uzataha **ryari?**
- Azaza **ejo**.

Umugereka uvuga ahantu

Ingero

- Shyira **ejuru**.
- Erekeza **epfo**.
- Murabica **iruhande!**
- Ageze **kure** kubi.
- Umugume **hambavu**.

Umugereka uvuga inshuro

Ingero

- Dusibye **gatatu**
- Wangiriye neza **kenshi**
- Ni **gake** ngera i Kigali.

Hari imigereka igaragara nk'aho yagoragozwa.

Ingero

- **Mbere**→hambere.
- **Nyuma**→hanyuma, inyuma.
- **Ruguru**→haruguru.
- **Hasi**→ muni.
- **Epfo**→ hepfo.
- **Irya**→hirya, hakurya.

Umugereka wemeza n'umugereka uhakana

Ingero

- Yego koko ibyo uvuze ndabyemeye. Ni ngombwa kwitabira ikoranabuhanga. (Umugereka wemeza)
- Oya! Ntibikwiye ko abana banywa ibiyobyabwenge. Ntibyujje ubuziranenge. (Umugereka uhakana)

Ikitonderwa

Imigereka imwe y'ahantu igenda ihinduka ku buryo hari uwakeka ko yagoragozwa. Nyamara ntibishoboka, ahubwo twavugaga ko ari imigereka y'urwunge rw'amagambo iba yakomotse ku migereka buhangwa.

Inshamake

Mfashe ko: Umugereka ari ijambo cyangwa urujyano rw'amagambo rudasesengurwa risobanura izina, ntera, inshinga cyangwa undi mugereka. Rivuga uburyo, ahantu, igihe cyangwa inshuro. Umugereka ushobora kuba buhangwa cyangwa ukaba urwunge rw'amagambo.

Imigereka y'ingenzi ni iyi ikurikira:

Umugereka uvuga uburyo, umugereka uvuga igihe, umugereka uvuga ahantu, umugereka uvuga inshuro.



Umwitozo

Garagaza imigereka iri muri izi nteruro unavuge imimaro yayo:

- Gira bwangu uze unterure ndacikirijwe rwose.
- Ngiye kugushyira hasi nduhuke gato.
- Kera hari intare yakarihaga cyane, ikica inyamaswa umusubizo; imaze kugera mu za bukuru, ikubitiyeho n'indwara iyigashe rwose yigumira aho iteze uruzaza.
- Ifarasi iti: "Nyabusa nta kwihorera ku mwanzi utazakugirira nabi ukundi".
- Kugera kure si ko gupfa.
- Mubivuge mubivuye imuzingo, mwoye kubica iruhande.
- Babukaranze ndi muni y'urujy.
- Ni kenshi abantu bahemukira ababa barabagiriye neza.
- Buhorobuhoro ni rwo rugendo.
- Aragenda uruhogozambyeyi.

2. Indangahantu

Musome izi nteruro zakuwe mu mwandiko, mugerageze gutahura imiterere n’umumaro by’amagambo yanditse atsindagiye:

Nyamara abanyeshuri bagomba kumenya gukoresha neza ikoranabuhanga ari **ku** ishuri ari no **mu** rugo, kugira ngo baribyaze umusaruro ukwiye. Bitabaye ibyo, ikoranabuhanga ryahinduka ikintu kirangaza abanyeshuri aho kubafasha. Ibibera **i** Burayi, **muri** Amerika n’ahandi, byose dushobora kubisanga **kuri** interineti. Ari ibifite akamaro, ibiteye isoni, ibyiza n’ibibi, byose bapfa gushyiraho, maze abazikoresha bakijonjorera.

a) Inshoza y’indangahantu

Indangahantu ni ijambo ribanziriza irindi, rivuga aho umuntu cyangwa ikintu biherereye cyangwa ahabera ikintu iki n’iki. Indangahantu irema urujyano rw’amagambo abera inshinga ruhamwa cyangwa icyuzuzo nziguro.

b) Amoko y’indangahantu

Indangahantu ni eshatu mu Kinyarwanda

- “Ku” mu nteko ya 17
- “Mu” mu nteko ya 18
- “I” mu nteko ya 19

Ikitonderwa

Iyo indangahantu “ku” na “mu” zikurikiwe n’izina ridafite indomo cyangwa ibinyazina bimwe na bimwe, zigira impindurantego “kuri” na “muri”.

Ingero

- Atuye muri Zambia.
- Yubatse kuri Huye.
- Ndi mukuru kuri we.

Nyamara tuvuga

- Abana ntibagakinire mu muhanda.
- Ngiye ku iriba.
- Akora i Rusizi.

Inshamake

Ubu nziko: Indangahantu ari ijambo ribanziriza irindi, rivuga aho umuntu cyangwa ikintu biherereye cyangwa ahabera ikintu iki n'iki. Rirema urujyano rw'amagambo abera inshinga ruhamwa cyangwa icyuzuzo nziguro. Indangahantu ni eshatu mu kinyarwanda:

- **Ku** mu nteko ya 17
- **Mu** mu nteko ya 18
- **I** mu nteko ya 19



Imyitozo

1. Musome aka gace k'umwandiko maze murobanuremo indangahantu, muvuge indanganteko zazo kandi muzigereranye n'iz'amazina:
Umunsi umwe intashya yagiye kunywa amazi ku mugezi wa Rukarara, isanga igikeri kiyicariye ku nkombe cyota akazuba. Irakibwira iti: "ibikeri mwaranyobeye, ibintu bititerura bigahora bikururuka ku butaka. Kandi kabishywe mbivuze ntyo, twebwe intashya tugira imbaraga cyane n'iyo dushatse kujya ikantarange tuhagera bwangu." Igikeri kiti: "nyamara natwe nta kintu cyaturusha kwiruka muri iki gihugu, n'ubwo twiruka mu bishanga bwose"!
2. Tahura indangahantu muri izi nteruro maze uvuge n'inteko zazo.
 - Ku mpinga y'umusozi haba hari amafu.
 - Atuye kuri Janja.
 - Inuma y'i Burundi yatumye ku y'i Rwanda ngo: "hauguha"!
 - Munsi abitonda bahorane amahoro.
 - Ingwe ntiyafashe ku gakanu yarabwirijwe.

3. Inyigana

Intangiriro

Mu matsinda musome izi nteruro zakuwe mu mwandiko, mugerageze gutahura imiterere n'imimaro by'amagambo yanditse atsindagiye.

Umukino w'umupira w'amaguru

Twagiye kumva twumva ifirimbi ngo: **"Firirriiii!"** Ubwo umukinnyi wa mbere atera agashoti gato ngo: **"Poo!"** Ahereza mugenzi we. Agiye kuwutera awuhurizaho n'uwo bari bahanganye ngo: **"Piii!"**

Umupira urazamuka ujya mu kirere, biruka bawutanguranwa ariko umwe aramusumba ateza umutwe ngo: **"Pooo!"** Aba ahereje mugenzi we hafi y'izamu. Abafana bariyamirira n'amashyi menshi ngo: **"Kacikaci!"** Nyamara uwo mu ba kabiri yahise amutega, yitura hasi ngo: **"Pooo!"**

a) Inshoza y'inyigana

Inyigana ni ijamba riremberwa ku myumvikanire y'urusaku rw'ibintu bimwe na bimwe, ndetse n'urw'abantu. Rishobora kuremerwa kandi ku migaragarire y'ikintu. Mu mikoresherezwwe yayo isanzwe, inyigana iterurwa akenshi n'ingirwanshinga "-ti" cyangwa icyungo "ngo".

b) Ingero z'inyigana

Ikiganwa	Inyigana
Inka	Mbaa!
Intama	Maa!
Ihene	Mee!
Isake	Kukururukuuuu!
Ibuye bateye	Duuuu!
Injangwe	Nyawuu!
Ibuye mu mazi	Dumburi!
Amazi mu gacuma	Dudududu!
Amashyi	Kacikacikaci!
Urushyi mu gutwi	Zobo!

Kugotomera amazi	Gutugutu!
Isazi	Zuu!
Urushyi	Pyo! Pya!
Igishirira mu mazi	Pyiriri !
Igitambaro gicika	Tatatata!
Umurabyo (uburyo ugaragaramo)	Pya!
Ikintu bakubise ku kindi	Pooo! vutu, gutu, tiku, pyooo, paaa!...

Ubu nziko: Inyigana ari ijambo riremwa ku myumvikanire y'urusaku rw'ibintu bimwe na bimwe , ndetse n'urw'abantu rishobora kuremerwa kandi ku migaragarire y'ikintu.

Inyigana buri gihe ziherekezwa n'akatozo k'agatangaro.

Nshobora: Gutahura mu mwandiko no gukoresha uko bikwiye inyigana.



Umwitozo

Tanga izindi ngero eshanu z'inyigana waba uzi.



4. Ibyungo

Intangiriro

Soma izi nteruro zakuwe mu mwandiko maze ugerageze gutahura imiterere n'imimaro by'amagambo yanditse atsindagiye.

Ikoranabuhanga **rero** ryatuzaniye byinshi, **kuko** mu binyejana byahise, nta wari gutekereza **ko** umuntu azaguruka mu kirere, **ndetse** akajya **no** ku kwezi, cyangwa ko azajya ashobora kuvugana **n'uri** ikantarange akoresheje akantu gatoya ashobora kugendana mu mufuka, ari ko terefone igendanwa.

a) Inshoza y'icyungo

Icyungo ni ijambo cyangwa urujyano rw'amagambo bidashobora gusesengurwa bihuza amagambo abiri

cyangwa inyangingo ebyiri. Ibyungo bifite imimaro myinshi mu nteruro no mu gutanga ibitekerezo kuko ari byo bigaragaza inyurabwenge mu ruhererekane rw'ibitekerezo cyangwa rw'interuro.

Duhereye ku miterere yabyo ibyungo birimo amoko 4 akurikira:

- a) **Ibyungo buhangwa**: ni ukuvuga by'umwimerere bidakomoka ku bundi bwoko bw'amagamb. Urugero: na, nka, cyangwa, erega, ngo, maze, ariko, nyamara, aho, ko, kandi...
- b) **Ibyungo by'inege** kuko bisa n'aho bikomoka ku nshinga. Urugero: uboshye, ndetse, ubanza...
- c) **Ibyungo by'inyumane** kubera ko bisa n'aho bigizwe n'amagambo abiri kandi bikaba byunga igitekerezo ku kindi. Urugero: yuko, kuko, koko, nako... na+ko; ko+ ko.
- d) **Ibyungo bigizwe n'Urujyano rw'amagambo**: n'iyo, kugira ngo, kubera ko, icyo bikora,...

b) Imimaro y'ibyungo

- Icyungo “**na**” gifite umumaro wo kunga amagambo hagati yayo. Iki cyungo kigira impindurantego “**no**” ikoreshwa imbere y'imbundo.

Ingero

Rutamu **na** Butera

Inka **n'**ihene

- Icyungo **nka**, **boshye** na **kimwe** bifite umumaro wo kugereranya.
- Icyungo **nka** kigira impindurantego **nko** ikoreshwa imbere y'imbundo, y'indangahantu n'imbere y'umugereka w'ahantu.

Ingero

Uyu mwana agenda nka se.

Agira urusaku rwinshi boshye inkuba.

Nabikoze **kimwe** nawe.

- Ibi byungo **ko**, **ngo** bifite umumaro wo kuzuzza.

Ingero

Avuze **ko** mugenda.

Ndasaba **ngo** muze.

Ngo baje baramubura.

- Ibi byungo **cyangwa, keretse** bifite umumaro wo guhitamo.

Ingero

Ngwino **cyangwa** ugende.

Singenda **keretse** ugarutse.

- Ibyungo **uretse ko, nkanswe, nyamara, aho, ariko** bifite umumaro wo kubangikanya cyangwa kubusanya

Ingero

Turakora **uretse ko** tutabona umusaruro twifuza.

Aterura umufuka wa sima **nkanswe** ijerekani y'amazi.

Ntiyari yiteguye ibizamini **nyamara** yarabitsinze.

Bamubajije aho gusubiza araseka.

- Ibyungo **kandi, ndetse** bifite umumaro wo kongeraho

Ingero

Ni umuhanga **kandi** aritonda.

Yaramukubise **ndetse** aramukomeretsa

- icyungo **iyoye** gifite umumaro wo kuziganya cyangwa wo kugaragaza ibitaragezweho mu gihe cyahise kikagaragaza ukwicuza.

Ingero

Iyo uzinduka tuba tugezeyo.

Iyo mbimenya simba narishinze gutera umupira ngo gusoma ibitabo mbiharire umwanyana muto.

- Ibyungo **kubera ko, kuko, ko** bifite umumaro wo kuvuga impamvu cyangwa inkurikizi.

Ingero

Yatsinzwe **kubera ko** atize.

Bamuhembye **kuko** yakoze neza.

Ko wakerewe none tubigire dute?

- icyungo **nako** gifite umumaro wo kuvuga kwigarura.

Urugero

Nari nje **nako** nisubiyeho.

- Ibyungo **ubanza, ariko, nyamara, icyakora** bishobora kunga inyangingo ebyiri ariko imwe ikaba itavuzwe. icyo gihe inyangingo itavuzwe iba ishingiyeye ku gitekerezo uvuga afite cyangwa ku gikorwa abavugana baziranyeho. Bene ibi byungo bamwe babyita mbanza

Ingero

- Ubanza ngiye kugerayo.
- Ariko nawe uratinda ugakabya!
- Nyamara ni muzima.
- icyakora tuzajyanayo.

Ikitonderwa:

Mu byungo hari ibiri ngombwa, kuko iyo bivuye mu nteruro itakaza ubutumwa bwayo n'ibindi bita ntagombwa kuko iyo bivuye mu nteruro ikomeza kugira ingingo yayo.

Ibyungo ngombwa

Ingero

Agenda nk'umwambi. - Agenda umwambi.

Yifuje ko muba muhari. - Yifuje muba muhari

N'ingwe narayifashe nkanswe impyisi. - N'ingwe narayifashe impyisi.

Uraryamyeye boshye urwaye. - Uraryamyeye urwaye.

Ibyungo ntagombwa.

Ingero

Arahinga ariko ntiyeze. - Arahinga ntiyeze.

Turahaguruka maze turagenda. - Turahaguruka turagenda.
Babibonye nuko barabigura. - Babibonye barabigura.



Umwitozo

1. Vuga amoko y'ibyungo ugendeye ku mimaro yabyo.
2. Ibyungo birimo amoko yahe ugendeye ku miterere yabyo?
3. Soma umwandiko ukurikira werekane ibyungo byose biwurimo uvuge n'umumaro wabyo mu nteruro:

Uko ugenda Pariki y'Akagera ni ko uhura n'inyamaswa nyinshi cyane. Ariko iyo witegereje usanga imbogo, impara n'imparage ari zo ziganje rwose. Bavuga ko imbogo zigera ku bihumbi cumi na bitanu. Intare zo ntizikunda kuboneka kuko zitororoka cyane. Ubanza ahari ari ko Imana yabishatse, cyangwa kubera ko ngo zibyara igihe k'imvura ibyana bimwe bigatwarwa n'umuvu ndetse igihe za nyina ziba zagiye guhiga, bigatorongerera bikava mu ndiri zabyo bigahitanwa n'izindi nyamaswa.

5. Utumamo

Soma iyi nteruro yakuwe mu mwandiko hanyuma ugerageze gutahura imiterere n'umumaro by'amagambo yanditse atsindagiye.

Dore **re!** Barakicaye **pe!** Nimuze mutabare **ga!**

- Aya magambo yanditse atsindagiye ni bwoko ki?
- Tanga izindi ngero zitandukanye za bene ayo magambo.

1. Inshoza y'akamamo

Akamamo ni ijambo ridasesengurika riba rigizwe n'umugemo umwe. Akamamo gaherekeza irindi jambo kakariha inyito yo gutangara, yo kwakuza cyangwa itsindagira. Akamamo gashobora no guherekeza ikegeranshinga n'irangamutima.

2. Akamamo k'inshinga.

Ingero

Gutangara:

- Arabivuze **ra!**
- Have genda **ma!**
- Sinamukira **da!**
- Barikoze **nya!**
- Aragowe **we!**

Kwakuza: Bivuge **ye!**

Gutsindagira:

- Bivuge **ga!**
- Garuka **ye!**
- Bivuge **se!**
- Bihakane **se!**

Akamamo k'inshinga kayiherekeza kayiha inyito yo gutangara, kwakuza cyangwa inyito yo gutsindagira.

Ikitonderwa

Utumamo “da!” na “ma!” ni impindurantego. Akamamo “da!” gakunda kubwirwa umuntu w'igitsina gabo, akamamo “ma!” ko kakabwirwa umuntu w'igitsina gore. Uduzigaye two tubwirwa abantu hatitawe ku gitsina gore cyangwa gabo.

6. Ibyegeranshinga

Umwitozo

Soma aka gace k'umwandiko maze ugerageze gutahura imiterere n'imimaro by'amagambo yanditse atsindagiye:

Ayinkamiye: **Dore** sha Kama! Uriya si Sugira warembeye ku muhanda?

Kamanzi: Ehee! Uzi ko ari we! **Sigaho** utamunyeganyeza ndabona asa n'urembye! Ahubwo **hogi** tugende tuge kubimenyesha ababyeyi be!

Ayinkamiye: **Mbisa** ma! Nge ndashaka kwitahira. Ngeze mu rugo nkerewe bambaza aho niriwe.

Kamanzi: **Sigaho** sha **reka** imiteto, ubwo ugiye utamutabarije waba uri umuntu?

Ayinkamiye: Emwe ni koko! Noneho sigara umureba ngiye kunyaruka mbimenyeshe ababyeyi be!

1. Inshoza y'ibyegeranshinga

Ibyegeranshinga ni amagambo afite imiterere n'umumaro nk'uw'inshinga itondaguye mu ntegeko, ariko akaba adashobora gutondagurwa muri ngenga zose no mu bihe bitandukanye kimwe n'inshinga zindi. Bene ayo magambo akoreshwa cyane mu mvugo cyanecyane mu biganiro. Ibyegeranshinga bikunze gukoreshwa ni: have, dore, hogi, henga, reka, sigaho, erega. Amagambo: Dore, sigaho, hogi, mbisa, sigaho, ateye nk'inshinga kandi afite umumaro nk'uw'inshinga zitondaguye mu ntegeko ariko si inshinga kuko adashobora gutondagurwa muri ngenga zitandukanye.

2. Ingero z'ibyegeranshinga

- **Have** se!
- **Dore** ra!
- **Hogi** tugende!
- **Henga** nigendere!
- **Reka** nkwere ke uko babigenza!
- **Sigaho** kwica umuco nyarwanda!
- **Erega** ni ko nkora!

Umwitozo



Nimuhimbe ikiganiro cyangwa agace k'ikinamico mukoreshemo ibyegeranshinga bitandukanye.

7. Amarangamutima

Musome iki kiganiro maze musubize ibibazo bikurikiraho:

Umukazana: **Yoo!** Mukecu mbese wararwaye? **Yoo!** Ni uko wabaye? Ni ukwihangana.

Umukecuru: **Ahaa!** Mwana wange se ugira ngo ndacyashobora kwicara. Ahubwo nyegura buhorobuhoro nduhure akagongo.

Umukazana: Sa n'uwigira hino gato nkwiwegamize

Umukecuru: **Ororororororo! Aa!** Ndumva ntonekara umubiri wose! **Yuuu!**

Umukazana: None se mumaze igihe kingana iki murwaye?

Umukecuru: **Ashyi!** Mwana wange se ugira ngo ndacyamenya iminsi. Ni kirekire.

Ibibazo byo kumva umwandiko

1. Nyuma yo gusoma iki kiganiro urasanga abaganira bamerewe bate mu mutima?
2. Ibyo biragaragarira ku yahe magambo bakoresha?
3. Ni irihe jambo umukecuru yakoresheje agaragaza ko ari gutonekara?
4. Bene ayo magambo bayita bate mu Kinyarwanda?
5. Tanga izindi ngero.

Inshoza y'amarangamutima

Amarangamutima ni amagambo adasesengurika, akora nk'interuro, akaba agaragaza uko umuntu amerewe mu mutima, yaba yishimye cyangwa ababaye, yaba ashima cyangwa agaya. Amarangamutima yandikwa akurikiwe n'agatangaro.

Amarangamutima agira inshoza zitandukanye. Zimwe muri izo nshoza ni izi:

- Kwemeza: urugero: Nhuu! Nabikwemereye.
- Gutangara: ingero: Ahaa! Arongeye arabarushije pe! Yoo! Nta soni uko ungana utyo ugakora utyo!
- Kugaya: urugero: Apu! Hoshi uri imbwa gusa! Asyi! Wa kigoryi we.
- Gucecekesha: urugero: Shuu! Muceceke araje. Suuu! Mwisakuza.
- Kwiruhutsa: urugero: Ashyii! Reka nduhure akagongo. Ahuu! Navunitse umugongo wee!
- Kubabara: urugero: Orororororo! Arankandagiye! Ayiii! Aranyishe!
- Kwikanga:
- Ayi we! Dore intare wo gacwa we!
- Ehee! Aranyica noneho we
- Yuu! Aranyishe aranyishe we!

Ikitonderwa

Andi moko y'amagambo mu nteruro ashobora kuba amarangamutima bitewe n'uko yakoreshejwe cyangwa aho yakoreshejwe.

Mu myandikire yemewe y'Ikinyarwanda mu kwandika amarangamutima hashobora gukoreshwa inyajwi zikurikiranye. Zitarenze eshatu.

Ingero

Kamari wee! Baranyishe ntabara.

Igitegoo! Cyagezemo, bibaye bibiri.

Yoo! Ehee!..

Akamamo gashobora kujuana n'irangamutima, ijambo rimwe ari irangamutima, irindi ari akamamo, ariko iyo afatiwe hamwe yombi akaba irangamutima.

Ingero:

Ayi we! Dore umujura!

- Muri iyi nteruro:
ayi→irangamutima
we!→akamamo
ayi we! →irangamutima

Akamamo k'irangamutima

Ingero

Ayi nya!

Ayi we!

Mfashe ko: Amarangamutima ari amagambo akora nk'interuro akagaragaza ikiri ku mutima w'umuntu.

Amarangamutima aherekezwa n'agatangaro.

Mu marangamutima hashobora gukoreshwa inyajwi zikurikiranye zitarenze eshatu.

Nshobora: Gutahura mu mwandiko amarangamutima no gusobanura icyo amarangamutima ashatse gusobanura.

Umwitozo



1. Garagaza amarangamutima yakoreshejwe muri izi nteruro unasobanure inyito zayo:
 - Ayaya! Nari nyifashe none iranshitse!
 - Ahaaa! Uragira se ngo wamusangayo iki gihe?
 - Ayi we! Ihwa riranjombye.
 - Suuu! Nimuceceke umwarimu araje.
 - Ashyi! Inyota yari impitanye.
2. Rondora andi marangamutima nk'atanu dukoresha tugaragaza ko:
 - Dufitiye abandi impuhwe.
 - Dufite agahinda.
 - Turimo kuribwa.
 - Turimo gutabaza.

8.3. Ibitangaza by'ikoranabuhanga ntibisiba kwiyoungera



Gari ya moshi yihuta kurusha ijwi igiye gutangira gukoreshwa

Umuntu tumugereranyije n'izindi nyamaswa ndetse n'inyoni, dusanga asa n'aho yari yararenganyijwe ku bijyanye n'uko ateye ku mubiri. Inyoni Imana yazihaye amababa azifasha kuguruka zikagera kure mu mwanya muto, bityo bikazirinda kuba zaribwa n'izindi nyamaswa. Inyamaswa zo inyinshi yazihaye amenyo atyaye ndetse n'**amajanja**, iziha kunyaruka mu gihe ziruka, ndetse n'ubwoya buzirinda imbeho.

Umuntu we nta kintu na kimwe yari yahawe cyo kwirwanaho ku mubiri we: ntazi kwiruka kurusha izindi nyamaswa, amenyo ye ni ayo kumufasha kurya utuntu tworoheje gusa, mbese nta kindi cyari kumukiza inyamaswa igihe yabanaga

na zo mu ishyamba uretse ubwenge bwo gushakashaka akavumbura intwaro zo kwirinda akanakoresha n'andi mayeri yo gushaka aho aba hamurinda ibyakwangiza ubuzima bwe. Ayo mayeri yo kwirwanaho no gushaka ibyamwunganira mu mbaraga ze nkeya, ni byo byahindutsemo ikoranabuhanga.

Amateka atubwira ko mbere y'uko tubaho muri ubu buzima, abantu babanje kubaho nk'inyamaswa zindi, baba mu mashyamba, mu biti no mu myobo, bahura n'ingorane z'amoko yose.

Icyatumye abantu bataribwa n'inyamaswa ngo zibamare ni uko bagize ubwenge bwo gutekereza no gukoresha

ingufu zindi zitari iz'amaboko n'amaguru.

Ikintu cya mbere cyafashije umuntu kwigranzura inyamaswa no kugenga ibindi biremwa, ni uko yashoboye kuvumbura umuriro. Umuriro ni wo yakoresheje atwika amashyamba n'ibihuru byabaga bimwugarije, inyamaswa akazigizayo, akanawukoresha akora ibikoresho bigezweho byo kwirwanaho, mu gutema ishyamba no guhinga.

Uko imyakayashize indi igataha, ubuzima bw'umuntu bwagiye burushaho kumworohera bitewe n'ikoranabuhanga. Ni ryo ryatumye turuhuka imwe mu mirimo ikomeye yatugoraga mu bihe byashije, nko kwikorera ku mutwe, kugenda igihe kirekire n'amaguru n'ibindi.

Nimurebe nko kuba umuntu yakoraga ibirometero n'ibirometero ajya kuvoma amazi, akayikorera amuvuna maze mugereranye n'ufite robine mu rugo, yakenera amazi agakora kuri robine, amazi akaza. Igihe yatakazaga ajya kuvoma, n'ingufu byamutwaraga, ashobora kubikoresha mu bindi bimufitiye akamaro.

Ikoranabuhanga rero ryatuzaniye byinshi, kuko mu binyejana byahise, nta wari gutekereza ko umuntu

azaguruka mu kirere, ndetse akajya no ku kwezi, cyangwa ko azajya ashobora kuvugana n'uri ikantarange akoresheje akantu gatoya ashobora kugendana mu mufuka, ari ko terefone igendanwa.

Izindi ngero twazirebera mu rwego rw'amashanyarazi kuko kuva yavumburwa yafashije umuntu gukora ibintu byinshi kandi mu gihe gito bakoresheje inganda. Uretse twe tugikoresha umuriro akenshi kugira ngo tumurike, abandi bageze ku rwego imirimo hafi ya yose yo mu rugo, nko kumesa imyenda no kuyumutsa, koza ibyombo, guteka no gushyushya ibiryo, byose bikorwa n'amamashini.

Hanavumbuwe kandi ibintu byinshi mu rwego rwo gutwara abantu n'ibintu. Uretse amamodoka dusanzwe tubona hano iwacu, abahanga ubu bageze ku rwego rwo kuguruka bakajya mu kirere ndetse bakanamarayo iminsi, ku buryo ukwezi n'izindi nyenyeri tubona n'amaso yacu bikadutangaza, abandi babigezeho, mu gihe twe tutarashobora no kwikorera igare.

Ikoranabuhanga ryatugejejeho kandi ibyuma bitugezaho amakuru n'amashusho y'ibibera ahandi birimo amaradiyo na tereviziyo, n'ibibikwaho amajwi n'amashusho.

Nyamara ikimenyetso nyamukuru k'iterambere mu ikoranabuhanga kigezweho muri iki gihe ni mudasobwa. Ubu nta murimo utayikoresha mu gutegura impapuro no kubika amakuru, mu buryo bw'itumanaho bukoresha interineti na sikayipu.

Mudasobwa inafasha kandi mu buryo umuntu yakwigira kure, mu buvuzi, mu kubitsa no kubikuzza amafaranga mu mabanki, mu bucuruzi no mu nganda. Ntimuzatangare rero mu gihe kiri imbere, nimubona mudasobwa yasimbuye umwarimu ikaba ari yo yigisha.

Aho ikoranabuhanga ryateye imbere mu bihugu by'u Burayi, Amerika, u Burusiya, u Buyapani, u Bushinwa, n'ahandi, imirimo hafi ya yose ikorwa n'imashini: guhinga, gusarura, kubaka, guteranya amamodoka n'indege, gukanika, ndetse n'imirimo ikenenera gukoresha ubwenge.

Ubu hari imashini zijya kugira ubwenge nk'ubw'abantu bita **robo** zikorana ubwenge n'ubushishozi nk'ubw'umuntu.



Robo ikozwe mu ishusho y'umuntu itwaye ingorofani

Ntimwumvise se ko hari indege ziguruka zikajya mu kirere zitagira umupirote, zigatembera aho zishaka, zigafata amashusho y'ibibera ku isi kandi zikongera zikagwa ku bibuga byazo igihe zishakiye zimaze gusohozza ubutumwa?

Ubu hari inzu z'ubucuruzi winjiramo, ugafata ibyo ushatse, ukishyura igiciro gikwiye, imashini ikakugarurira amafaranga akenewe, ugasohoka ukigendera utagize umuntu muvugana. Nyamara ushatse gusohoka utishyuye wahahurira n'ingorane, kuko imashini ihita isakuza igatabaza cyangwa urugi rukanga kwikingura ngo usohoke.

Gukoresha imashini rero bifite akamaro, kuko ntizikenera kuruhuka nk'abantu, zikora amanywa n'ijoro, ntizishobora kugira icyo zibagirwa cyangwa ngo zikore amakosa nk'ay'abantu, nta burangare zigira cyangwa ubwigomeke bujya buranga abantu. Usibye ikiguzi cyo kuzigura no kuzisimbuzza zashaje, nta mushahara zikenera. Izo ni zo mpamvu umusaruro uba mwinshi kandi mwiza, mu gihe hakoreshejwe imashini.

Uwavuga iby'ikoranabuhanga ntiyabirangiza kuko kuri twebwe Abanyarwanda n'Abanyafurika muri rusange bisa nk'ibitangaza cyangwa

inzizi. Reba nawe kugeze ubu turacyahinga n'agasuka, turakikorera ku mutwe, gutega imodoka bidutwara igihe kitagira ingano buri munsu, no kubona ibidutunga bihagije byaratunaniye kuko nta nganda tugira zo guhunika no guhindura ibyo twejeje.

Ibi rero ni byo biduteza intambara n'amakimbirane y'urudaca ahora adusubiza inyuma tukirirwa turwanira ubutaka mu gihe abandi barimo gutekereza uburyo batura ku kwezi n'izindi nyenyeri. Ikindi kibabaje ni uko tugenda dukenera gukoresha ibyo bikoresho byose by'ikoranabuhanga, ariko ntidutekereze ngo natwe tugire icyo twakwikorera.

Kuki dukoresha terefone, ntitwibaze tuti: "Ese iyi terefone iva he, ikoze ite, twayikoresha neza dute?"

Banyeshuri mukibwiruka rero, nimwite ku ikoranabuhanga, mushake namwe muvumbure kuko Imana ni cyo yaduhereye ubwenge. Ntidushobora gukomeza kubaho nk'uko abasekuruza bacu babayeho: ubutaka bugenda buba buke, kandi ibyo dukenera kugira ngo tubeho si ibiribwa gusa. Niba rero twiga koko, nidukoreshe ubwo bwenge dutekereza, maze duhindure aho dutuye harusheho kuba heza n'abahatuye barusheho gutera imbere.

Ikinyamakuru: "Imboni" cyo ku wa 16 Kamena 2015, urup 1-9.

Tanga ibisobanuro by'amagambo akurikira

Robo, umupirote, guhindura ibyo twejeje, amakimbirane y'urudaca.

Imyitozo y'inyunguramagambo

Mumaze gusobanura ayo magambo, nimuyakoreshe mu nteruro ngufi zigaragaza ko mwumvise icyo avuga.



Ibibazo byo kumva umwandiko



1. Kuki umuntu tumugereranyije n'izindi nyamaswa, asa n'aho yari yararenganyijwe mu bijyanye n'uburyo bwo kwirwanaho yaremanywe?
2. Umuntu yashoboye kwiganzura izindi nyamaswa ate?
3. Ni akahe kamaro ko gukoresha imashini mu mirimo itandukanye aho gukoresha abantu?
4. Ni gute kudakoresha ikoranabuhanga biri mu mpamvu zidutera amakimbirane n'intambara?

Imyitozo y'ubumenyingingiro



1. Mwungurane ibitekerezo ku nsanganyamatsiko zikurikira: Itangazamakuru ubusanzwe rifatwa nk'aho ari urwego rwa kane mu bijyanye n'ubutegetsu nyuma y'ubutegetsu nshingamategeko, ubutegetsu nyubahirizategeko n'ubucamanza; nyamara hari n'abavuga ko iyo rikorehejwe nabi risenya aho kubaka. Ni akahe kamaro ikoranabuhanga rifite mu gushimangira ubushobozi bw'itangazamakuru?
2. Ni iki mwavuga ku myandikire y'iyi nkuru yo mu kinyamakuru? Nimutange ingero nibura eshatu.

8.4. Inkuru y'ikinyamakuru

Musesengure imiterere y'umwandiko (uburyo wanditse ku rupapuro, umutwe wawo, amashusho cyangwa amafoto arimo ...) n'ikivugwamo (insanganyamatsiko umwanditsi avugaho, ubutumwa atanga) hanyuma muvuge icyo mubitekerezaho.

1. Uturango tw'inkuru y'ikinyamakuru

Ubintu by'ingenzi biranga inkuru y'ikinyamakuru:

- Umutegeko wayo: Ni mugufi, uteye amatsiko kuko utuma usoma agira amatsiko y'icyo umwanditsi agiye kuvugaho.

- Inkuru yanditse mu nkingi eshatu zigizwe n'interuro ngufi.
- Harimo ibisubizo ku bibazo abantu bakunze kwibaza: ni iki cyakozwe? Cyakozwe na nde? Hehe? Gute?
- Itariki inkuru yanditsweho n'uwayanditse.
- Izina ry'ikinyamakuru.

2. Gutegura inyandiko y'ikinyamakuru

Inyandiko y'ikinyamakuru igira amahame ya ngombwa igomba kubahiriza.

- Umwanditsi agomba kwandika mu mwanya wateganyirijwe urubuga rujyanye n'ibyo yandikaho ntawurenze, bityo akaba agomba kwita ku burebure bw'inyandiko ye, kandi akayandika yubahiriza amategeko amugenga.
- Umwanditsi agomba gutara amakuru mu buryo asubiza ibibazo bijyanye n'icyo abantu bakeneye kumenya: Ni iki cyabaye? Ni nde wagikoze? Cyabereye hehe? Ryari? Gute? Kubera iki?...
Nyuma y'ibi haba hasigaye intera esheshatu ari zo:

a) Gutoranya ibyo ari bwandike

Ni ugutandukanya ibiri ngombwa byo kuvugaho, ibitari ngombwa cyane, cyangwa ibidakenewe na gato. Kureba noneho mu bitari ngombwa cyane ibyashishikaza abantu, ibyabafasha gusobanukirwa cyangwa ibisekeje, ariko ibyo abantu badekeneye akabikuramo.

b) Kuringaniza uburebure bw'inyandiko

Ni ngombwa kumenya uburebure bw'inyandiko ugomba gutegura. Iki ni ikintu k'ingenzi cyane kuko ikinyamakuru kiba gifite imyanya yagenewe buri bwoko bw'inkuru zigomba gusohorwa. Akenshi bikorwa hagenwa umubare w'amagambo ntarengwa, byaba ngombwa ntarenzeho 10%.

c) Kugena uburyo ubaramo inkuru

Abanyamakuru n'iyo bandika imyandiko nsesengurabumenyi bakunze kuyandika mu

buryo bwo kubara inkuru. Hari ibibazo bitatu agomba kwibaza kugira ngo yubake imbata abyandikamo:

- Mpere ku kinini njya ku gito cyangwa mpere ku gito njya ku kinini?
- Mpite ntangaza amakuru y'ingenzi hanyuma nyasesengure nyuma, cyangwa ngende nyatatura buhorobuhoro?
- Nubahirize uko ibyabaye byakurikiranye mu gihe cyangwa mbikurikiranye mu buryo nihitiyemo buberanye n'ibyo nshaka ko abantu bumva?

d) Gukoresha inganzo y'itangazamakuru

Inganzo y'itangazamakuru irangwa n'ibi bikurikira:

- Interuro ngufi (akenshi bakunze gufatira ku mpuzandengo y'amagambo 12 kuri buri murongo, ukirinda kuzuzamo imibare n'amahinamagambo.
- Amagambo yumvikana neza atumvikana neza agasobanurwa.
- Kwibanda ku bintu bifatika; byakwemerwa nk'ibishoboka.
- Ikoreshwa ry'amafoto cyangwa amashusho.
- Kuvuga ibintu ku buryo butaziguye, ugakoresha utwuguruzo n'utwugarizo, ugashyira ibintu mu ndagihe.

e) Gutera amatsiko

Interuro y'igika cya mbere igomba gushimisha umusomyi ikamukururira gusoma ibikurikiyeho. Itandukanye n'icyo bita interamatsiko zishingira ku gutangira inkuru y'ingenzi ku mpapuro zibanza ariko igakomereza hagati mu kinyamakuru.

f) Guhitamo umutwe uboneye w'inkuru

Umutwe w'inkuru ni ingenzi cyane. Ugomba kuba uteye amatsiko, utanga amakuru (Nde? Ryari? Hehe? Ni iki cyabaye? Gute?) cyangwa ukaba ushitura. Dore imwe mu miterere y'imitwe y'inkuru ushobora kwandika:

- *Interuro itangara:* Hehe n'uburezi budafite ireme!
- *Interuro ibaza:* Ni irihe banga ryo gutsinda mu mashuri?

- ***Ikibazo n'igisubizo:*** Waba wifuza gutsinda ku ishuri? Dore ibanga.
- ***Interuro yemeza n'igisobanuro:*** Gutsinda Ikinyarwanda: Inyobora yuzuye y'abanyeshuri.
- ***Gukuruza abantu imibare:*** Inama icumi zagufasha gutsinda amasomo yawe.
- ***Ikeshamvugo (isubirajwi, ihuzamitwe, ...):*** Kwiga ni ukwigana.
- ***Icurukiranya ry'amagambo y'ingenzi:*** Igira gutsinda, tsindira kwiga.
- ***Imishyamiranyo:*** Tsinda neza utavunitse cyane!
- ***Imvugo shusho:*** Itwaze mwarimu mu mufuka wawe (umutwe w'agatabo).

Umutwe w'inyandiko y'Ikinyamakuru ugomba kuba wumvikanamo umwihariko wayo kandi ukaba ari mugufi. Ni byiza na ndetse guhitamo umutwe nyuma yo gutegura inkuru.

4. Amashusho n'amafoto mu nkuru y'ikinyamakuru

Inkuru y'ikinyamakuru iherekezwa n'amashusho ndetse n'amafoto kugira ngo bishimangire ihame ry'ibivugwa mu nkuru igihe biri ngombwa. Akenshi hakoreshwa amafoto agaragaza ibivugwa. Ariko hashobora no gukoreshwa amashusho y'ubugeni, arimo asekeje yo gushushanya abantu bakurikije ibitekerezo byabo, amakosa yabo cyangwa bagambiriye kubanenga mu buryo ubu n'ubu.

Akamaro k'amafoto n'amashusho mu nkuru:

- Akurura abasomyi.
- Agaragaza ukuri kw'ibivugwa.
- Iyo uyasesenguye ubwayo aba afite ubutumwa agaragaza bwi Yongera ku bivugwa mu magambo. Ubu ndeste hari ikoranabuhanga rituma ifoto y'umuntu bayihindura uko bashatse, bakamwerekana yarakaye byacitse, aseka yishimye, ababaye arira, yambaye mu buryo ubu n'ubu, ari kumwe n'umuntu uyu n'uyu, kandi atari ko bamufotoye ameze. Ni yo mpamvu itangazamakuru ridatana n'ubugeni mu byo gutunganya amashusho n'amafoto.

Inshamake

Mfashe ko: Inyandiko y'ikinyamakuru ifite amahame yihariye ishingiraho ari yo:

- Kubahiriza uburebure bw'umwanya wagenewe inkuru.
- Gutanga amakuru asubiza ibibazo abasomyi baba bafite (habaye iki? Cyakozwe na nde? Cyabaye ryari, hehe, gute?)
- Gukoresha amafoto n'amashusho atsindegiye ihame ry'ibivugwa.
- Gutangiza inkuru interuro ikurura abasomyi.
- Guha inkuru umutwe mugufi, wumvikanamo agashya k'iyi nkuru, ubatera amatsiko.

Nshobora: Gusesengura no kwandika inkuru yanyuzwa mu kinyamakuru.

Umukoro wo kwandika:

Kora inyandiko igenewe gusohoka mu kinyamakuru ku nsanganyamatsiko y'ikoranabuhanga cyangwa indi nsanganyamatsiko wihitanyemo ijyanye n'ikoranabuhanga.

Isuzuma risoza umutwe wa munani

Umwandiko: Ikoranabuhanga mu gihe cy'ubu n'ikizaza

Ikoranabuhanga rifite uruhare rukomeye mu buzima bwacu bwo mu gihe tugezemo, ku buryo aho bigeze umuntu yakwibaza uko twabaho tutarikoresheje. Nyamara dukwiye no gutekereza ku byago ridutera, harimo intwara za kirimbuzi, n'iyangizwa ry'ibidukikije n'ikirere. Niba turi ibiremwa birusha ibindi ubwenge ku isi, ni gute dutekereza gusenya no kurimbura ibyo ubuzima bwacu bushingiyeho?

Ikoranabuhanga ridufasha mu bintu byinshi cyane, birimo ingendo no gutwara abantu n'ibintu, gusabana n'inshuti n'abavandimwe bari hirya no hino ku isi, kuvura indwara zitandukanye n'ibindi, riduha kwisanzura no kubaho mu buryo butworoheye. Ibyo ikoranabuhanga ryatugejejeho



rero nta wahakana ko ari byiza, ariko na none twagombye gutekereza ku buryo dukwiye kurikoresha neza mu gihe kiri imbere. Inganda zitandukanye, umwuka usohoka mu modoka no mu mamashini, bimaze kwangiza ikirere, ku buryo muri iyi minsi hari abantu batangiye guhitanywa n'izuba ryinshi mu bihugu by'Aziya n'u Burayi. Natwe kandi izo ngaruka zatangiye kutugeraho. Ibihe bigenda bihinduka. Reba nawe imvura ntikigwira igihe cyayo, yagwa na bwo, ikagwa nabi igahitana abantu n'ibintu.

Imyanda ijugunywa mu butaka no mu mazi igenda yangiza ibimera n'ibinyabuzima kandi ntisiba kwiyongera. Muri iyo myanda harimo za mudasobwa zishaje, terefone zigendanwa n'ibindi bikoresho by'ikoranabuhanga bigenda bisabagira hose, nyamara byasaza ntitubone uburyo bwo kubihinduramo ibindi, kandi umwanda wabyo ari uburozi.

Igihe tugezemo rero kidusaba gutekereza mu buryo bw'amajyambere arambye, duharanira gusiga isi ari nziza kurusha uko twayisanze. Ni ngombwa gushakisha ibibereye bese aho kugira ngo buri wese yirebe ku giti ke. Ni ngombwa guharanira ko isi, ibiremwa biyirihwa n'ubwiza bwayo bisagamba. Ikoranabuhanga dukoresha, ryagombye kudufasha kutworohereza ubuzima aho kubwagiza.

Ikoranabuhanga rero niridufashe gutegura igihe cyacu kiri imbere kiza, kandi ryanjire no mu kurinda ibidukikije. Rishobora kudufasha gukoresha ingufu, gutunganya ibijyanye no gutwara abantu n'ibintu dukoresha ibitangiza ikirere, no kubaka amazu tutangije ibidukikije. Ibyo tubigezeho ni bwo twaba twizeye ko dukoresha ikoranabuhanga neza. Amajyambere arambye ni amajyambere afasha abantu bo muri iki gihe kubona ibyo bakeneye ariko batabangamiye uburyo abo mu gihe kizaza na bo bazabaho.

Amajyambere arambye adusaba kubona ko ibibera ku isi ari uruhererekane, rugizwe n'ibikorera mu kirere, mu mwuka, ku butaka no mu mazi, kandi ibyo bintu nta mupaka bigira.

Iyo tubitekereje gutyo twumva ko niba wangije isoko y'amazi inyura muni y'urugo rwawe, uba wangirije abantu bose bayivomaho n'aho inyura hose. Niba hari uruganda rwangiza umwuka wo mu kirere mu Bushinwa, iryo yangirika ry'umwuka rigera na hano iwacu mu Rwanda kandi rikatugiraho ingaruka zikomeye. Niba hari imiti yica amafi imenwe mu ruzi rw' Akagera, iyo miti igira ingaruka ku bihugu byose urwo ruzi runyuramo kugera mu Nyanja ya Mediterane.

Iyo utekereje mu buryo bw'amajyambere arambye ubona ko ibikorwa ukora none bizagira ingaruka ku mibereho y'abana bawe n'abuzukuru bawe mu gihe kizaza. Gutekereza mu buryo bw'amajyambere arambye ni no gutekereza ku bintu byose bidufasha kugira ubuzima bwiza. Ni byiza kuba ufite ubuzima buzira umuze, ariko se ibyo byakugeza ku buzima bwiza niba uri umukene udashobora kwiga. Ni byiza kugira ubukungu n'amafaranga, ariko se byakumarira iki mu gihe uhumeka umwuka uhumanye, ubuzima bwawe bukahangirikira?

Amajyambere arambye rero ni yo dukwiye kwimiriza imbere mu ikoranabuhanga. Ibibazo duhanganye na byo ni byinshi, ariko na none ntitwabikemura turimbura ibyo ubuzima bwacu bushingiyeho, kuko twaba twiteye ibibazo birenze ibyo dufite kandi abadukomokaho bakazagorwa bikomeye n'imibereho yo mu gihe kizaza, kuko twaba tubaraze isi itagishoboye guturwaho n'ibinyabuzima.

I. Ibibazo by'inyunguramagambo

1. Sobanura aya magambo yakoreshejwe mu mwandiko:

- Gusabagira
- Gusiga isi ari nziza kurusha uko twayisanze
- Gusagamba
- Ubuzima buzira umuze
- Amajyambere arambye

2. Koresha mu nteruro amagambo umaze gusobanura

II. Ibibazo byo kumva no gusesengura umwandiko

1. Kuki dukwiye kubona ibikorera ku isi nk'aho ari uruhererekane?
2. Ibikoresho by'ikoranabuhanga nka mudasobwa na terefone bigira umwanda uhinduka uburozi aho bijugunywe hose, haba mu mazi cyangwa mu butaka. None ko bigenda byiyongera ubona hakorwa iki kugira ngo uburozi bwabyo butazahitana ibinyabuzima mu gihe kiri imbere?
3. Ko nta nganda dufite nyinshi, mubona twebwe iyangirika ry'umwuka n'ikirere ryatugiraho ingaruka?
4. Iyo bavuze "amajyambere arambye" wumva iki? Vuga icyo twakora kugira ngo tuyashyigikire.
5. Tanga ibitekerezo kuri iyi nsanganyamatsiko: "Niba umuntu ari ikiremwa kirusha ibindi ubwenge ku isi, ni gute akora ibintu bishobora gusenya no kurimbura ibyo ubuzima bwe bushingiyeho"?

III. Ikibazo k'ikibonezamvugo

Vuga ubwoko bw'amagambo yanditse atsindagiye muri aka gace k'umwandiko ugaragaze n'umumaro wayo:

Dutuye **mu** gihugu kiza **cyane**. Hava izuba ridakabije **kandi** nta n'ubwo hakonja **rwose**. Abanyamahanga **iyo** bahageze baratangara bati: "**Yooo!** Mbega imisozi mbega ibiyaga, mbega ibibaya n'ibisiza!" **Nyamara** babivuze ukuri koko **ngo** "uwambaye ikirezi ntamenya ko kera!" Kuri twebwe **reka da!** Wagira **ngo** ntitubona ibyo byiza habe na gato! Mu museso dukangurwa n'inyoni zirimbira zigira ziti: "**Swii!swii!**" Nimugoroba iyo unyuze ku gishanga wumva ibikeri bigonga ngo: "**Goood!Goood!**" Ibyo byose ni byiza bitatse igihugu cyacu, kuko nk'i Burayi ntiwapfa kubyumva **cyane cyane** iyo hakonje.


III. Ikibazo k'ihangamwandiko

Kora ubushakashatsi maze wandike inkuru y'ikinyamakuru:
"Waba uzi ibigezweho mu ikoranabuhanga muri iyi minsi?"

Umutwe wa kenda


Ububi bw'ibiyobyabwenge

9.1. Inkuru ishushanyije: Ihene mbi ntawuyizirikaho iye














Mutange ibisobanuro by'amagambo akurikira

Swingi, Agatabi ko ku mugongo w'ingona, Kore, Abasitari



Umwitozo w'inyunguramagambo

Uzuza interuro ukoresheje amagambo akurikira: Abasitari, ikigo ngororamuco, guta umutwe, ibiyobyabwenge.

- Umuntu unywa cyane kanyanga ashobora
- Bana mwirinde.....kuko byabangiriza ubuzima.
- Uyu mwana azwi n'abantu bose, uzi ko yabaye
- Abantu babuze uburere bajyanwa mu

Ibibazo ku nkuru ishushanyije



1. Sugira yageze aho banywera ibiyobyabwenge ate?
2. Ko yahagiye avuga ngo agiye kureba gusa, yaje kunywa ibiyobyabwenge gute?
3. Ko Rusabunga na Gatete bavuga ko kunywa ibiyobyabwenge bituma baruhuka, wowe wumva ari byo?
4. Ibiyobyabwenge bigira izihe ngaruka? Uretse izavuzwe mu mwandiko hari izindi ngaruka z'ibiyobyabwenge wowe uzi?
5. Ni izihe nama muganga yagiriye abanyeshuri bo ku kigo cy'amashuri Sugira yigagaho?
6. Aho uba waba uhabona ibiyobyabwenge ndetse n'abantu babinywa? Vuga ibyo biyobyabwenge ibyo ari byo unavuge uko ubona ababinywa baba bameze.
7. Umaze kumenya ko ibiyobyabwenge ari bibi, wagira iyihe nama ababikoresha?
8. Ni izihe ngamba ubona zafatwa n'abantu batandukanye, barimo urubyiruko, ababyeyi, abarimu, abayobozi, kugira ngo ibiyobyabwenge bicike?

Gusesengura umwandiko

1. Nimusesengure iyi nkuru ishushanyije mugaragaza ingingo z'ingenzi zivugwamo.
1. Muhine uyu mwandiko kuri 1/4 cyawo.

Imyitozo y'ubumenyi ngiro



1. Mwungurane ibitekerezo ku nsanganyamatsiko zikurikira:
 - a) Ibiyobyabwenge bimwe nk'itabi n'inzoga zikaze, bikorerwa mu nganda zizwi mu gihugu cyangwa bigatumizwa bizwi neza ko byangiza ubuzima. Ni kuki abayobozi batabihagarika?
 - b) Ibiyobyabwenge byangiza ubuzima. None kuki abantu babinywa kandi bazi ingaruka zabyo.

9.2. Inkuru ishushanyije

Mwongere musome iyi nkuru ishushanyije hanyuma musubize ibibazo bikurikira:

Iyi nkuru yashoboraga kwandikwa nk'ikiganiro kidafite amashusho, ahubwo buri jambo ry'umwe mu bakinnyi rikagaragazwa n'akanyerezo. Ugereranyije izo nkuru zombi, urabona zakumvikanisha kimwe ubutumwa? Ubona hari icyo amashusho yongera ku itambutsa ry'ubutumwa?

1. Inshoza y'inkuru ishushanyije

Inshoza: inkuru ishushanyije ni ingeri y'ubuvanganzo bushushanyije yo mu rwego w'imyandiko mbarankuru itambutsa ubutumwa hakoreshejwe ibangikanywa ry'imvugo n'amashusho.

2. Ibiranga inkuru ishushanyije

- Inkuru ishushanyije iba igizwe n'amashusho n'amagambo biri ku mpapuro zikurikirana. Buri rupapuro ruba rugizwe n'utuzu dutandukanye, turimo amashusho n'amagambo.
- Amagambo yo mu nkuru ishushanyije ashirwa na yo mu tuzu dushobora guhabwa amashusho atandukanye: uruziga, mpandenye, urukiramende, ... ariko buri gihe tukagira akagobe kagana kuri nyiri ukuyavuga.
- Inkuru ishushanyije ikoresha cyane inyiganamajwi, zigaragaza urusaku rutandukanye rutewe n'abantu cyangwa ibintu.
- Amashusho ashirwaho ibimenyetso bigaragaza ibyiyumvo by'abakinnyi, n'uburyo binyagambura.

3. Zimwe mu ngingo zitabwaho mu guhanga inkuru ishushanyije

- Guhanga inkuru ishushanyije bisaba gutekereza ku kiri bukinwe nk'inkuru, ku bakinnyi, aho bibera, n'igihe bibera, hanyuma ukanabishushanya.
- Amashusho agomba kuba agaragaza ibigenda biba, naho ubundi byagusaba gushyiramo magambo menshi yo kubisobanura bikabangamira umusomyi.

- Ni ngombwa kugenda ukoresha utwandiko duto kandi turimo amagambo akoreshwa mu mvugo kurusha akoreshwa mu nyandiko.
- Guhuza amagambo n'ishusho ya nyir'ukuyavuga birakenewe cyane kugira ngo ishusho igaragaze imyitwarire n'imiterere ya nyir'ukuvuga. Itondere imyandikire kuko mu nkuru ishushanyije, amakosa agaragara cyane mu twandiko duto tuyigize: inkuru ishushanyije igira amagambo make kuko ibindi bigaragarira mu mashusho y'abakinnyi.

Ipfundo ry'inkuru

Kimwe n'ibindi bihangano mbarankuru, inkuru ishushanyije ishingira ku mimerere itameze neza mu ntangiriro, hanyuma ikagenda yerekana uko byagiye bigana ku ikemuka mu mpera. Ugomba gukora ku buryo umusomyi yifuza kumenya uko byarangiye. Genda uhindura uruhererekane rw'ibikorwa bigize inkuru kuko kubibara umujyo umwe byarambira umusomyi.

Abakinnyi

Uko ushushanya abakinnyi bifite byinshi bisobanura mu nkuru: indoro, imiterere y'imisatsi n'uburyo bwo gusokoza, imikaya, imyambarire,...

Urubuga

Uko ugaragaza urubuga bisobanura byinshi mu nkuru ishushanyije. Bishobora kugaragaza ko abakinnyi bari mu rugo, mu muhanda, mu ndege, mu buriri, mu ishyamba, ...

Igihe

Igihe ibivugwa byabereye kigaragazwa n'amabara cyangwa ibimenyetso. Ushobora gushushanya umwijima ukoresheje ibara ry'umukara, umuseso ukoresheje ikimenyetso k'izuba rirasa (ritukura n'imirasire yaryo), ...

Umwitoto



Hanga inkuru ishushanyije ku nsanganyamatsiko wihitiyemo.

9.3. Iyiganteruro: Ibice by'interuro

Mu nteruro zikurikira nimutahuremo ukora igikorwa cyangwa ucirirwa imico cyangwa imiterere ivugwa mu nteruro ndetse mugaragaze n'ipfundo ry'ubutumwa buvugwa mu nteruro:

- Umwana ni umutware.
- Impamba y'umwana ihembura nyina.
- Abana babi bashuka bagenzi babo.
- Umutwe umwe ntiwigira inama.
- Inka nyinshi z'umusengo zirarisha ku musozi muremure uhanamye.
- Kera baravugaga ngo : "Imineke irya abana".

1. Ruhamwa na ruhamya

- Ruhamwa ni ijambo ricirwa igikorwa. Rishobora kuba ari rimwe, cyangwa rifite andi ariherekeje. Muri icyo gihe ryitwa itsinda rya ruhamwa.
- Ruhamya ni inshinga (itondaguye) ubutumwa bw'interuro bushingiyeho hamwe n'ibyuzuzo byayo.

Amoko ya ruhamwa

Habaho amoko atatu ya Ruhamwa

a) Hari ruhamwa ihita igaragara mu nteruro, inoroshye kuyitahura (interuro 1, 2, 3, 4, 5). Iyo ruhamwa bayita "**Ruhamwa mboneranteruro**" kuko iba yigaragaza. Ni yo iba igenga interuro ikanashingirwaho isanisha ryose.

Ingero

Abana beza bubaha ababyeyi babo.

Icyayi k'imusozi kiraryoha.

b) Hari ruhamwa iza inyuma y'inshinga, kandi ntigenge isanisha (interuro ya 6). Iyo ruhamwa yitwa "**Ruhamwa nyurabwenge**" kuko kuyitahura bisaba gutekereza byimbitse ukareba ukora igikorwa uwo ari we, ndetse ukagomba gusa n'uyicurukura. Urugero: Imboga zibona abana. Wakwibaza uti: "Ese imboga zirareba?" Ahubwo bashatse kuvuga ngo "abana ni bo babona imboga", cyangwa "imboga zibonwa n'abana" **Ruhamwa nyurabwenge** ni ijambo ricirwa igikorwa cyangwa imimerere ariko ritagenga isanisha.

Ingero

- **Imboga zibona abana:** Abana ni bo babona imboga.
- **Iyi fu yaseye umuhanga:** Umuhanga ni we waseye ifu.

Hari kandi ruhamwa y'inshinga yatondaguwe muri ngenga ya gatatu, igashingira ku gicumbi-ri. Yitwa “**ruhamwa mburabuzi**”.

Ingero

- **Iyo ari zo zije zitaha zabira. Ntibavuga:** Iyo ziri zo zije zitaha zabira.
- **Nabonye ari inka atari imbogo. Ntibavuga:** Nabonye ziri inka zitari imbogo.

Indi **ruhamwa mburabuzi** ishingiyeye ku nyibutsanteko ikoreshwa mu nshinga z'inshoberamahanga mu nteko ya 12, no mu nteko ya 16. Iyo ruhamwa igenga isanisha ariko itagaragara.

Ingero

- **Karahanyuze, karabaye.** Ni agaki? Ni akantu.
- Habayeho umugabo.
- Habanabakize.
- Hazatura umuhanga.
- Haraza abantu benshi.
- Habuhazi.

2. icyuzuzo

Musome interuro zikurikira maze mugerageze gutahura imimaro y'amagambo yanditse atsindagiye:

1. Bugingo akunda **umugati**.
2. Hitamo **ikiza** ureke **ikibi**.
3. Yahaye umwana **amata**.
4. Umubyeyi ahaye **umwana** umugati
5. Akubise impyisi **inkoni**
6. Yashinze umukozi we umurimo wo kubaka urugo.
7. Bakorera mu **ibanga rikomeye**.
8. Ni **ubwa gatatu** yiyamamaza ntatorwe.

1. Inshoza y'icyuzuzo

Icyuzuzo n'ijambo cyangwa itsinda ry'amagambo aherekeza inshinga akuzuzwa igitekerezo cyayo. Habaho icyuzuzo mbonera, icyuzuzo nziguro, icyuzuzo k'ingereka.

Icyuzuzo mbonera

Icyuzuzo mbonera ni icyuzuzo gikurikira inshinga kitagombye kunyura ku rindi jambo.

Ingero

- Bugingo akunda umugati.
- Ndashaka ikiza
- Yahaye umwana amata

2. Amoko y'ibyuzuzo

a) Icyuzuzo mbonera kibamo ibice bibiri

Hari ikibonezwaho igikorwa: Kitwa ntega; haba n'ikifashishwa kugira ngo igikorwa kigerweho: cyitwa ntegesha.

Icyuzuzo ntega

Icyuzuzo mbonera ntega gisubiza ibibazo:

- **Nde?:** Ukunda nde?
- **Iki?:** Mwariye iki?
- **Ngahe?:** Utunze inka zingahe?
- **Gukora iki?:** Agiye gukora iki?

b) Icyuzuzo ntegesha

Akenshi kijyana n'icyuzuzo ntega, ni rimwe na rimwe gishobora kugenda cyonyine. Icyuzuzo ntegesha kivuga:

- Icyo igikorwa kigenerwa: Umubyeyi ahaye **umwana** umugati.
- Icyo bifashisha: Akubise impyisi **inkoni**
- Icyo icyuzuzo ntega giteganyirijwe: Gushinga umurimo **umuntu**.
- Icyo batanga kugira ngo icyuzuzo ntega kiboneke: Gukwa umukobwa **amafaranga**.
- Icyo icyuzuzo ntega kibereye umutungo: Guha **umuntu** inka.
- Icyo icyuzuzo ntega kiriho: Hanagura umwana amarira **ku matama**.

Ikitoronderwa

Mu isesenguranteruro ntituzatandukanya icyuzuzo ntega na ntegesha, byombi tuzabyita icyuzuzo mbonera tubitandukanya n'icyuzuzo nziguro.

b) Icyuzuzo nziguro

Gisobanura ingiro kivuga uko igikorwa cyangwa imimerere biba, aho bibera, igihe bibera, inshuro biba n'ibindi.

Habaho icyuzuzo nziguro cy'uburyo, icy'ahantu, icy'inshuro, icyunga n'ikigereranya.

Icyuzuzo nziguro cy'uburyo

Ingero

- Kugenda **amaterekamfizi**.
- Gukora **mu ibanga**.
- Gusenga Imana **udatuza**.
- Kwiruka **amasigamana**.
- Ryama **wubanye**.

Icyuzuzo nziguro cy'ahantu

Ingero

- Batuye i **Rusizi**
- Abakirisitu basengera **mu Kiriziya no hanze**.
- Muba **ahantu heza**.

Icyuzuzo nziguro k'igihe

Ingero

- Ejo twari i **Nayirobi (Nairobi)**
- Ndaza **nimugoroba**

Icyuzuzo nziguro k'inshuro

Ingero

- Turya **inshuro eshatu ku muni**
- Twaganiriye **kenshi**
- Ni **ubwa gatatu** yiyamamaza ntatorwe.

Icyuzuzo nziguro cyunga

Ingero

- Utahe **na ntashya**.

- Guca ukubiri **no** gucumura.
- Ukarabe **no** ku birenge.

Icyuzuzo nziguro kigereranya kiyana buri gihe n'icyungo nka.

Ingero

- Yitwara **nk'umusinzi**.
- Kora **nk'uko wabyize**.
- Agaragara **nk'umunyabwenge**.
- Yahengereye **nko mu museso** arigendera.

3. Ibyuzuzo by'ingereka

Ni ibyuzuzo bizanwa n'uko ingereka yiyongereye ku nshinga cyangwa se ibyuzuzo bituma inshinga igira ingereka.

Ingero

- Ingoma zivugira umwami.
- Ahingisha majagu.
- Guhungana ihubi.
- Agasaza kamwera akandi kuzakamwa.
- Yigana terefone ku ishuri.

Ikitoronderwa

Hari ingereka zimwe na zimwe zizana icyuzuzo kibanjirijwe n'icyungo.

Ingero

- Uyu murima uhingwa na Karisa.
- Mugabo yigana na Gatabazi.

Izindi ngereka ntizitwerezwa ibyungo.

Ingero

- Nyirarukundo yandikiye Rukundo.
- Kuvomesha urutete.
- Ikinyarwanda kigika neza.
- Kanaburenge agendesha amaboko.
- Inka zatashye kare.

Imyitozo



Vuga ubwoko bw'icyuzuzo cyakoreshejwe mu nteruro zikurikira

1. Nakoze uko wabimbwiye.
2. Nakoze ibyo wambwiye.
3. Nabigenje nka kwa kundi.
4. Babwiye igikeri bati: "Uratahe na Ntashya".
5. Kugenda cyane bitera kubona.
6. Imvura yaraguye kenshi cyane muri uku kwezi.
7. Akaryana mu nkanda karyana no mu ihururu
8. Twashobora gukora isabune muri avoka.
9. Babukaranze ndi muni y'urujyo.
10. Mu itumba hagwa imvura nyinshi.

Ubu nzi: Ububi bw'ibiyobyabwenge n'ingaruka zabyo.

Ubu nshobora: Kubaka interuro ziboneye nubahiriza ibice by'ingenzi bigize interuro.

Isuzuma risoza umutwe wa kenda

Umwandiko: Ingaruka z'ibiyobyabwenge mu rubyiruko

Urubyiruko rwishora mu biyobyabwenge, rugira ibibazo bijyanye n'imyigire, ibijyanye n'ubuzima cyane cyane ubwo mu mutwe, ibibazo by'imibanire na bagenzi babo, ndetse n'ibyo gukurikiranwa n'inzego z'ubutabera. Hiyongeraho kandi ibibazo batera imiryango yabo, abaturanyi babo ndetse n'igihugu muri rusange.

Mu bijyanye n'imyigire, usanga abana bishoye mu biyobyabwenge basubira inyuma mu manota, bagahora basiba ishuri kandi ntibakore imikoro bahawe, ndetse abenshi bikabaviramo kureka ishuri burundu.

Byaragaragaye ko guta ishuri kw'abana no kwitwara nabi k'urubyiruko ruri mu mashuri, akenshi biba bifitanye isano n'ibiyobyabwenge. Abana banywa ibiyobyabwenge kandi si bo bonyine bigiraho ingaruka, ahubwo bizigira no kuri bagenzi babo bigana. Hari abagerageza kubigana, abandi bakabafataho urugero rubi.



Mu bijyanye n'ubuzima, usanga abanyeshuri banywa ibiyobyabwenge buzuye ibikomere ku mubiri baterwa no kugwa basinze, abandi ugasanga bafite indwara zituruka ku kwangirika kw'inyama zo mu nda, ndetse n'iziterwa no kwiyandarika harimo n'izandurira mu mibonano mpuzabitsina.

Abana bakoresha ibiyobyabwenge kandi bakunze guhura na za gisida zibaviramo urupfu, cyangwa bo ubwabo bakiyahura cyangwa se bakaba bakora ibyaha byo kwica kuko ibiyobyabwenge biba byabasaritse.

Kurwara sida na byo byagaragaye nk'ingaruka y'ibiyobyabwenge kuko benshi iyo byamaze kubafata ntibaba bakimenya kwirinda kubera ko baba bataye ubwenge.

Izi ngero nke dutanze zirerekana ububi bw'ibiyobyabwenge mu rubyiruko. Ku bijyanye n'ingaruka z'ibiyobyabwenge ku buzima bwo mu mutwe, twavugamo izi zikurikira: kumva yiyanze, kudakura mu bwenge, guhora yigunze no guhunga aho abandi bari, n'iyindi myitwarire idahwitse. Abanywi b'ibiyobyabwenge usanga bitwara nabi, ntibagire gahunda, bagahora batekereza kwiyahura, ndetse bakabigerageza. Abanywi b'ibiyobyabwenge usanga kandi barahawe akato na bagenzi babo kuko baba babangamiye.

Ikintu kibi gikomeye ibiyobyabwenge bitera ku muntu ubinywa, ni uko bibanza kumwangiza mu bwonko, bikamuhindura umugaragu wabyo, ku buryo igihe cyose atabibonye yumva hari icyo abuze mu mubiri we. Ubisomyeho rero ntaba akibicitseho, kuko mu mwanya muto ubwonko bwe buba bwatokowe, ntabe akibona ibibi byabyo. Buhoro buhoro rero bimuhindura imbata yabyo, ntabe agishoboye kubaho atabikoresheje, agatangira gusebayangwa, mu gihe gito akaba ahindutse umusazi. Si ikintu rero ugomba kuvuga ngo reka numveho rimwe, kuko usomyeho ntaba akibiretse.

Ibiyobyabwenge bigira kandi ingaruka ku muryango, bikawutera guhungabana. Ari ababyeyi, ari n'abana bavukana n'umunywi w'ibiyobyabwenge, usanga byarabagizeho ingaruka zo kubabazwa no kubona umuvandimwe wabo yitwara nabi. Ntitwakwibagirwa kandi ko ibiyobyabwenge bitwara amafaranga yakagiriye akamaro umuryango.

Umutwaro bitera igihugu wo uraremereye: ibiyobyabwenge bituma umusaruro uba muke, kuko abakawutanze birwa bakora ubusa. Bitera kandi ibyaha bitandukanye, kuvuza indwara zijyana na byo na cyo kikaba umuzigo uremereye. Kugira urubyiruko rero rudashobora gukora ni igihombo gikomeye ku gihugu. Uretse ko nyine byangiza ubinywa bikanababaza abo mu muryango we, umunywi w'ibiyobyabwenge atera ibibazo igihugu, kuko nta cyo aba akimariye.

Mu kwanzura twavugaga ko ibiyobyabwenge bifitanye isano ya hafi no kwitwara nabi k'urubyiruko. Ibyaha bikorwa n'urubyiruko akenshi bituruka ku biyobyabwenge. Abana bakiri bato rero bagomba kurindwa ibiyobyabwenge mu buryo bwose bushoboka. Nta mwana ukwiye gutozwa kunywa inzoga cyangwa gutekera itabi. Abana na bo bagomba kwirinda kwigana imico mibi babonana bagenzi babo, bakagendera kure abafite izo ngeso mbi. N'ubundi baca umugani ngo " ihene mbi ntuyizirikaho iyawe."

I. Ibibazo by'inyunguramagambo

1. Uhereye ku bivugwa mu mwandiko, sobanura itsinda ry'amagambo akurikira:
 - a) Ubuzima bwo mu mutwe
 - b) Byabasaritse/ gusarika
 - c) Imyitwarire idahwitse
 - d) Guha umuntu akato
 - e) Ihene mbi nta wuyizirikaho iye.
 - f) Gusebayangwa.
2. Koresha aya magambo mu nteruro ziboneye:
 - a) Guha umuntu akato
 - b) Imyitwarire idahwitse.

II. Ibibazo byo kumva no gusobanura umwandiko

1. Ni izihe ngaruka ibiyobyabwenge bitera:
 - Umuntu ubinywa?
 - Umuryango we?
 - Igihugu muri rusange?

2. Ibiyobyabwenge bigira ingaruka mbi ku muntu ubinywa. Kuki abantu bakomeza kubinywa kandi bazi ko byangiza ubuzima?
3. Ni gute ibiyobyabwenge bifitanye isano ya hafi no kwitwara nabi k'urubyiruko?
4. Umaze kumenya ububi by'ibiyobyabwenge, ni uwuhe mwanzuro wumva wafata kugira ngo utazagwa mu mutego w'ababinywa? Ni iyihe nama wagira abandi bana batarabinywa?
5. Niba hari uwo uzi ubinywa wamugira iyihe nama?
6. Ubona ibiyobyabwenge byacika gute mu rubyiruko?

Ibibazo by'ikibonezamvugo

1. Kora interuro ebyiri ziboneye zigaragaramo ruhamwa, inshinga n'icyuzuzo.
2. Garagaza icyuzuzo muri izi nteruro uvuge n'ubwoko bwacyo.
 - c) Twakoze ikizamini cy'Ikinyarwanda.
 - d) Mpera umwana icyo ashaka.
 - e) Musenge Imana ubudatuza.
 - f) Mukundane nk'uko nange nabakunze.
3. Sesengura izi nteruro ugaragaza ruhamwa, inshinga n'icyuzuzo
 - g) Imvura nyinshi yangije imyaka yacu.
 - h) Kugenda cyane bitera kubona.
 - i) Umunywi w'ibiyobyabwenge abera umuzigo umuryango we n'igihugu.
 - j) Ikoranabuhanga rishobora gukemura ibibazo by'amakimbirane.

Ikibazo k'ihangamwandiko

Hanga inkuru ishushanyije ku nsanganyamatsiko wihitiyemo.

10

Uburezi n'uburere

10.1. Uko ingimbi yarererwaga mu itorero

Umutware w'ibwami ni we watoraga intore, cyangwa rimwe na rimwe umwami akazitorera. Abatware bose si ko batoraga intore. Zatorwaga n'abafite abagaragu benshi kandi batunze inka nyinshi. Iyo umutware yashakagaga kurema umutwe w'intore yabanzaga kumvikana n'umuntu uzazigisha. Uwo mutware w'itorero yabaga yarabaye intore mu wundi mutwe, akaba azi iby'ubutore byose: indirimbo, ibyivugo, imihimirizo n'imihigo. Akaba azi kwiyereka icumu, kwiyereka umuheto, kwiyereka ingabo. Akamenya kwunikiza, gutaraka no kwiyereka byahebuje, azi guhashurana ari byo gukinisha amacumu, akamenya kumasha, gutebanwa barasa kure cyangwa batera icumu no kwiruka basiganwa. Mbese ari kabuhariwe mu by'ubutore. Nuko umutware yamara kubona uzategeka umutwe ashaka kurema, agatumira abagaragu be akabamenyesha ko agiye kurema itorero, akabaka abana babo bagimbutse. Bakava aho bazi ko bazatanga intore. Bityo umwana w'umuhungu utarashyingirwa, kuva ku ngimbi kugeza ku musore agatangwaho intore.

Umutware yabaga yarashatse umusozi mwiza mu misozi ye, uzashyirwaho itorero. Uwo musozi wagombaga kuba ufite ahantu hategamyeye, hategereye ingo, hadacibwa n'abantu benshi cyangwa amatungo. Mbese hatavogerwa. Kuri uwo musozi kandi ni ho hacibwaga ibiraro by'intore n'iby'ingishywa zabo. Hakubakwa n'icumbi ry'umutware

w'intore. Ni ho higurwaga imihimirizo y'amoko yose. Bahahigira kuba abakogoto barasa intego, bamasha uruti biga kuzibukira, bahiganwa kurasa kure. Ni ho bigiraga gutera icumu kure no kuboneza icyo bateye. Bahahitwaga kurwanisha ikitwa intwari cyose: inkota, icumu no gukinga ingabo. Bahigiraga no guca ibico n'ibindi byose byigishaga kuba ingenzi, kuba intwari zidakura ibirenge, ntizihinyuke ngo zihemuke. Mbese itorero warigereranya n'aho abasirikari bamashira. Intore zikaba ingabo z'igihugu z'icyo gihe.

Nta mwana wiyanywe mu itorero atajyanywe na se. Igihe cyo gutanga intore cyarageraga umubyeyi akaba ari we wiyanywe umwana akamwerekaga shebuja. Shebuja yamara kumubona no kumushima akamwoherereza umutware w'intore. Ati, "Mumushyire kanaka, ugenga umutwe uyu n'uyu ibunaka". Umwana yamara gushyikirizwa umutware w'intore, se akamucumbikira, akamusigira abamufataho igihe n'inka z'ingishywa, agasubira kwa shebuja asezera; hanyuma agataha. Umutwe w'intore wabaga ugizwe n'abana bageze nko kuri mirongo itandatu.

Intore zari zifite amategeko azigenga. Mu magambo avunaguye amategeko yazo y'ingenzi ni aya akurikira: kumvira muri byose, kubyuka kare, kutabura mu itorero na rimwe keretse urwaye, kutabura mu gitaramo no mu yindi mirimo y'intore. Mu burere bw'abana babaga bari mu itorero, abarezi babo bakomeraga cyanecyane ku kinyabupfura mu kurya, mu kuvuga, mu ngendo no mu ndoro. Bagakomera no ku isuku y'umubiri n'iy'inyambaro. Igihe cyose no mu byo bakoraga, babaga bari hamwe, uretse igihe nk'umwe yabaga agiye ku kiraro.

Intore zari zifite imirimo zishinzwe. Muri yo iy'ingenzi ni iyi: gutarama ibutware, kujya mu itorero igihe cyose ryabaye, kujya mu yindi mikino bitorezagamo imyiyereko y'amoko menshi; kumenya guhiga no kuvuga ibigwi. Igitaramo cyarimo ibice bibiri: igitaramo gisanzwe cyatangiraga ku mugoroba kitarangira ijoro rigeze hagati, hakaba n'igitaramo kidasanzwe; cyatangiraga ku mugoroba kigakesha ijoro. Icyo gitaramo kitwaga "inkera y'imihigo". Igitaramo kigishaga intore kumenya kuganira, kuvuga neza, gushira umususu no gushyomoka

cyangwa kumenya imvugo ikwiye n'idakwiye. Kubera ko intore zaturukaga imihanda yose y'u Rwanda, zigihura ntizahuzaga imvugo. Ni yo mpamvu umutware w'intore yashingwaga guhuza imvugo rusange y'intore. Agahimba indirimbo z'inkera, ibyivugo, kumenya kuvuga amacumu ari byo bigwi. Mu bitaramo habaga hari abantu bakuru bazi iby'intore bakazigisha, kandi bakazigorora buhoro buhoro ugasanga intore zijijutse kandi zisobanukiwe mu bitekerezo, mu mvugo, mu migirire, mu bugenzi, mu butwari budahemuka, ntihabe hari uwatererana undi ari mu kaga.

Uretse ibyo kandi, ni ho bigiraga uburyo bwo gucyocyorana. Ariko ntibapfaga gucyocyorana uko bashatse, bagiraga uburyo bakurikizaga, nko gukoresha imvugo ikwiye bakayikoresha mu gihe cyayo. Intore y'ukuri ntiyapfaga gucyocyorana hato na hato. Gucyocyorana abantu bakuru: umwami, ba shebuja, ba nyirabuja, ababyeyi, mbese abantu b'abapfasoni, ntibyemerwaga, keretse iyo babaga babasembuye ubwabo bagira ngo barebe ko atari ibigwari. Na byo kandi intore zabikoranaga ubwitonzi cyane.

Igitaramo kidasanzwe cyari igitaramo cyakeshaga ijoro. Muri icyo gitaramo umutware w'intore yagitumiragamo bagenzi be batoranyijwe, aziho ubuhanga bwo kumenya gukesha igitaramo. Umutware w'intore yateguraga icyo gitaramo yarabanje kwigisha igihe kinini intore ashinzwe. Abo yatumiraga b'abahanga muri byo, kwari ukugira ngo bagire icyo bagaya bagikosore kandi bongeremo ikibuze. Igitaramo cyari ikintu gikomeye cyane mu burezi bw'intore. Kuba intore nyayo, kuba ingenzi mbese ubutore bwuzuye, byagaragariraga ahantu habiri: ni mu gitaramo no mu itorerero. Imico myiza cyangwa se mibi y'intore kanaka, umutware wabo yayimenyeraga mu bitaramo. Abasinzi, abarwanyu n'abandi bafite izindi ngeso mbi, ni aho yabamenyeraga. Uwabaga yarashinzwe kurera abana bari mu itorerero, yagiraga uburenganzira bwose bwo kubahanisha ibihano byinshi. Yabacaga ibihano bikomeye, ndetse kugeza no ku nka. Igihano intore kanaka yabaga yaciwe, se yagitangaga vuba, kuko yatinyaga ko shebuja yava aho amenya ibyabaye ku mwana we. Byari ubusembwa bubu kuba igifura mu gitaramo. Yabaga agayitse, ndetse

ibi byakwimisha n'umugeni mu miryango. Ababyeyi bamenyeragaho ko umwana wabo atazashobora ubuhake, ndetse ga no kubaka urwe rugo no kubanira inshuti: ari iza se, ari n'ize bwite. Iyo umwana uri mu itorero yageraga aho kunanirana, se yamusimbuzaga undi. Atamugira, akamuca mu bavandimwe be cyangwa inshuti kuko byari inenge kugira umwana akananirana mu itorero. Ni cyo gituma ababyeyi babaga bafite umwana mu itorero bagombaga kumwitwararika cyane ngo ejo atazica igitaramo cyangwa akazaba ikigwari. Kugira umwana mu itorero ry'umutware uguhatse mu nka, byari ishema rihagije ku babyeyi.

Hacaga iminsi abana bitoza ibijyana n'itorero byose, umutware wabo yabona ko bamaze kubimenya, agasaba shebuja ko intore zimwiyerekera. Ubwo shebuja na we akararika ababyeyi bafite abana muri rya torero, cyane abigeze kuba mu matorero. Umunsi wo gucyura intore ubwa mbere wabaga ukomeye ku mutware wazo. Yabaga yitwararitse cyane ngo intore yigishije zitazagira aho zikemwa, akagayika kwa shebuja no ku babyeyi b'abana. Ku babyeyi na bo ni uko; babaga bafite impungenge, bagira bati : "Umwana wacu none yaba yarananiwe byazavugwa hehe"! Abana na bo, bahamirizaga neza ngo batagawa bakagayisha ababyeyi babo. Mbese uwo muni wabaga uwo kwerekana icyo amatorero amariye igihugu. Ishyaka ry'intore ryaheshaga ababyeyi ishema, rigahesha abana ishimwe ibukuru, ku mutware no ku babyeyi babo. Uwashinzwe kurera ba bana we, bikamuhesha ingororano kwa shebuja no ku bo arerera.

Intore zamaraga kwerekana imihimirizo, hagakurikiraho gutaramira umutware. Ubwo bakabyita ko umutware yavunyishije intore. Bateraniraga mu nzu imwe, bayahabuwa inzoga. Iyo nzoga kandi yafatwaga n'umutware w'izo ntore nyine. Inzoga bahabwaga ubwo yitwaga inzoga y'imihigo. Ikaza umutware amaze kwicara. Bayiterekaga imbere y'aho yicaye, we n'abantu bakuru batuwiwe. Iyo nzoga yashyirwagamo umuheha umwe rukumbi. Imihigo igatangira babanje guhanika ikobe. Hagakurikiraho indirimbo irimo ikivugo cya buri ntore.

Icyo kivugo cyatangiriraga iteka mu izina ry'uwo mutware w'intore. Urugero: Niba izo ntore zitwa "indahangarwa",

uwivuze wese yagombaga gutangiza “indahangarwa” avuga ngo “Ndi indahangarwa ikanika inshuro, ingabo nziza twibasiye ishyanga, ndi rusarikantambara”. Ukurikiye na we ati: “Ndi indahangarwa ya ruhararakuboneza, nyiri isuri idahangarwa n’intanage”. Bityobityo, uwivuze wese agahera kuri iyo nteruro rusange. Uwabaga arangije kwivuga, yateraga intambwe agana aho shebuja yicaye, Akegera avuga imihigo. Yageraga bugufi bwa shebuja, akicarira utw’abakamyi akavuga ibigwi, asezerana kuba intwari idahunga ku rugamba, kuri shebuja no kuri bagenzi be. Mbese kutazahana igihugu. Akarata ubutwari bwa se n’ubw’inshuti ze. Akarata ubutwari bw’umutwe arimo. Akarangiza avuga ko ubwo butwari n’ubwo bwiza bitazamutezukahaho.

Imihigo yararangiraga, abakuru batumiwe bakagorora intore. Aho bagaye, ari mu mihamirizo, ari mu gitaramo, bakahagorora. Aho bashimye bakahavuga. Ndetse habagaho n’ubwo umutware agororera bamwe mu b’ingenzi mu guhamiriza no mu gutarama. Inkeri y’imihigo yarangiraga mu rukerera, bagataha bajya kuryama. Amatorero ntiyaberagaho gushimisha abareba imikino cyangwa kumva imvugo nziza y’intore gusa. Ahubwo byari ukurera urubyiruko ngo ruzavemo abantu b’abagabo. Abantu bakunda abandi, badahana abandi mu byago, abantu b’ishyaka bakunda igihugu, bakakirwanira bacyungura mu byiza byose, bakirengera kiramutse gitewe n’abanzi. Mbese amatorero yaberagaho cyane kurera abantu b’intwari, b’umurava, bapfira abandi, ari mu itabaro, ari mu kaga ako ari ko kose. Itorero ryari nk’urugerero rw’abasirikari.

Imyitozo



Shaka ibisobanuro by’amagamo akurikira

Intore, kwiyereka icumu, kwunikiza, ingishywa, abakogoto, guca ibico, kugimbuka, gutebana, kudakura ibirenge, gufata igihe, intanage, kudahana igihugu.



Umwitozo w'inyunguramagambo

1. Koresha mu nteruro amagambo akurikira: Kwinkiza, kudahana igihugu, ingishywa, guca ibico.
2. Interuro zikurikira ni ibisobanuro by'amagambo ari mu kinyatuzu. Tahura ayo magambo mu kinyatuzu ukoresheje amerekezo yacyo yose: Uva iburyo ujya ibumoso, uva ibumoso ujya iburyo, uva hasi ugana hejuru, uva hejuru ugana hasi, ndetse unabereretse. Andika buri jambo imbere y'igisobanuro cyaryo. Koresha ikaramu y'irindi bara kugira ngo werekane aho ukuye ijambo mu kinyatuzu.

Urugero

Igihugu cy'amahanga: Ishyanga.

- Tangira ukore kandi ukore wizihiwe.
- Inka zimuwe zikajyanwa ahari ubwatsi.
- Umuntu ujijutse ushobora kurwanira igihugu kandi azi no gutarama.
- Abarwanyu bazi kurasa bakoresheje imyambi.
- Babyina biterera hejuru.
- Kuva mu bwana utangiye guca akenge.
- Ahantu habiri ubutore bwagaragariraga.
- Igihe bwenda gucyuza.
- Gukinisha amacumu.
- Ikinyobwa bahaga intore.

G	M	U	R	U	K	E	R	E	R	A	O
K	U	G	I	M	B	U	K	A	I	L	A
M	G	H	Y	W	U	K	I	Z	N	C	B
U	I	B	A	H	A	M	I	R	I	Z	A
I	T	N	C	S	S	H	K	M	K	E	K
T	A	L	G	K	H	N	S	Z	I	I	O
O	R	J	A	I	S	U	W	O	Z	L	G
R	A	N	G	N	S	J	R	E	A	J	O
E	M	O	O	T	T	H	T	A	K	L	T
R	O	G	Z	O	K	C	Y	L	N	D	O
O	V	B	N	R	O	L	P	W	U	A	T
K	Z	K	I	E	E	W	J	V	A	Y	Z
I	S	H	Y	A	N	G	A	K	I	D	S

Ibibazo byo kumva umwandiko



1. Intore zatorwaga na nde kugira ngo zitabire itorero?
2. Umutware w'itorero yabaga ateye ate?
3. Itorero ryakorera ahantu hameze hate? Kubera iki?
4. Mu itorero intore zakoraga iki?
5. Ni ayaha mategeko y'ingenzi yagengaga intore?
6. Ni iki abatoza b'intore bitwararikaga mu burere bw'intore?
7. Umwana wananiranye mu ntore yahanishwaga iki?
8. Umuhango wo kwiyereka wakorwaga ryari? Witabirwaga na bande? Wakorwaga gute?
9. Urasanga itorero ryari rifite ruhare ki mu muco nyarwanda ku bijyanye n'uburere bw'urubyiruko uherye ku bivugwa mu mwandiko?

Ibibazo byo gusesengura umwandiko



1. Tanga insanganyamatsiko nyamukuru ivugwa mu mwandiko ndetse ugaragaze n'ingingo z'ingenzi zibanzweho.
2. Tanga nibura ingingo ndangamuco 5 zigaragara mu mwandiko.
3. Gereranya itorero mu muco nyarwanda n'itorero muri iki gihe.

Kungurana ibitekerezo



Muhereye ku bivugwa mu mwandiko musanga itorero ryagira akahe kamaro mu burere rw'urubyiruko rw'iki gihe? Ese itorero ryakorwa gute? Ryakwitabirwa na bande? Basabwa kuba bujuje ibiki?

Iyiganteruro

10.2. Isanisha

Itegereze interuro zikurikira maze ugerageze kuzijora ugaragaza interuro zivugitse neza n'izindi zitavugitse neza kandi ugaragaze n'impamvu zishyigikira igisubizo cyawe:

- Umutware w'ibwami ni we yatoraga intore.
- Umwana atumvira se na nyina yumvira ijeri.
- Namubwiye ati: "Ndinda tujyane" aranga aransiga.
- Ni nge namutumyeyo.
- Ishya ry'amashyamba riterwa n'imiyaga ikaze.
- Intore zari zifite amategeko azigenga.

a) Inshoza y'isanisha

Isanisha ni ihuza ry'amagambo mu irema ry'interuro akajyana yose ku buryo butunganye. Iyo isanisha ritakozwe neza, interuro iba ikocamye bigatuma ubutumwa budatambuka uko bikwiye kuko abenerurimi bo baba bumva uvuga aba asa n'aho atazi neza ururimi avuga cyangwa yandika.

Ingero

- Umushyitsi muhire araturugendereye tumuzimanire.
- Abasore banini barahuye barahoberana maze barishima.

Muri izi nteruro uko ari ebyiri harimo amagambo agenga indangasano z'amagambo yandi bifitanye isano ari yo bita "amagambo ngengasano". Mu nteruro ya (1) ijambo ngengasano ni "umushyitsi", mu nteruro ya (2) ni "abasore". Amagambo afitanye isano n'ijambo ngengasano yisanisha na ryo maze agafata indangasano ituma ajyana n'iryo jambo mu nteruro cyangwa mu bice byayo nuko buri jambo rikisanisha na ryo ku giti cyaryo. Bityo interuro ikozwe ikaba itunganye.

b) Isano iri hagati y'amagambo mu nteruro

Ruhamwa: ni ijambo cyangwa urujyano rw'amagambo bigenga interuro rikanashingirwaho isanisha ry'andi magambo biri kumwe muri iyo nteruro.

Inshinga: inshinga ni yo igaragaza igikorwa, imimerere cyangwa imiterere ya ruhamwa ikanaheka ibyuzuzo biri mu nteruro.

Icyuzuzo: ni ijambo cyangwa urujyano rw'amagambo bivuga icyo imimerere cyangwa igikorwa cya ruhamwa

byerekejweho, uburyo cyangwa inshuro biba, ahantu cyangwa igihe bibera. icyuzuzo gishobora kandi kugaragaza ikiyongereye kuri ruhamwa cyangwa kugira ikigereranyo na yo.

c) Isanishantego mu nteruro

Isanishantego ryiga uko amagambo ahindura intego yisanisha mu rwego rw'ntego n'andi bihuriye mu nteruro; iryo hindurantego rikajyana kandi n'igitekerezo uvuga afite. Ibyo bigaragarira cyane mu itondaguranshinga. Amagambo yisanisha ni inshinga, ntera, ingirwanshinga, izinantera n'ikinyazina. Ayo magambo agenda yisanisha n'izina hakurikijwe inyito rusange cyangwa inyito bwite y'ijambo.

d) Inzira zitandukanye z'isanisha mu nteruro

Isanisha rigengwa n'inyito rusange y'ijambo

1. **Bene iri sanisha usanga muri rusange rigengwa** n'inteko y'izina ryisanishwaho n'andi magambo. Iri sanisha rigaragara mu nteruro ifite ijambo rimwe cyangwa menshi yibutsa inyito eshatu z'ibanze mu Kinyarwanda: Umuntu/abantu, ibindi biremwa n'ibitekerezo (ikintu/ibintu) n'umwanya n'igihe (ahantu/igihe). Ni isanisha rigaragaramo ingeri nyinshi zitandukanye, muri zo twavuga.
2. **Isanisha rigengwa n'izina ridafite interurajambo**
Izina rigenga isanisha riba rishobora kuvuga umuntu cyangwa ikintu. Iri sanisha rikorwa hakurikijwe inteko y'izina andi magambo agenda yisanishaho.

Ingero

- **Umuntu** munini arahinga.
- **Abantu** banini barahinga.
- **Dodo** imwe iraryoha.
- **Dodo** nyinshi ziraryoha.
- **Igiti** kinini kiratemwa.
- **Ibiti** binini biratemwa.

Isanisha rigengwa n'izina saa

Isanisha ry'amagambo ari mu rujyano rw'izina saa rishingira ku mubare w'amasaha.

Ingero

- **Saa** moya irageze.
- **Isaa saba** zirageze.
- **Isaha** ya saa saba irageze.

Isanisha rigengwa n'amazina ahujwe n'icyungo

Iyo amazina agenga isanisha ahujwe n'icyungo, isanisha rijya muri ngenga ya 3 y'inteko ya 2. Naho iyo amazina agenga amasano agizwe n'abantu n'ibintu cyangwa ibindi bintu bisa, isanisha rijya muri ngenga ya 3 y'inteko ya 8.

Ingero

- **Umwana** na se **barasa**.
- **Umwana** n'igitoki **biraguye**.
- **Inzara n'inyota** biranyishe.
- **Iyi nka n'iki gitebo** biragurishwa.

Isanisha rigengwa n' ikinyazina ngenga

Iyo isanisha rishingiye ku binyazina ngenga byo muri ngenga ya 1 n'iya 2, isanisha rikorwa nk'uko izina umuntu / abantu risanzwe ryisanisha, naho isanisha ry'inshinga rigakurikiza indangasano za ruhamwa zo muri ngenga ya 1 n'iya 2.

Ingero

- **Nge munini** ndagaragara.
- **Wowe muto** uragaragara.
- **Twe banini** turagaragara.
- **Mwe bato** muragaragara.

Isanisha rigengwa n'imbundo cyangwa inyangingo

Iyo imbundo n'inyangingo biba bifite inshoza y'ibintu, isanisha rikorwa mu nteko ya munani. Naho iyo imbundo ifashwe nk'izina, isanisha rikorwa mu nteko ya cumi na gatanu.

Ingero

- **Korora** birarushya. (nt.8)
- **Wigisha** umwana **bikamugirira** akamaro. (nt.8)

- **Kugenda** cyane bitera kubona. (nt.8)
- **Gutandukana** n'inshuti kurababaza. (nt. 15)

Isanisha rigengwa n'imigereka

Inege zimwe z'imigereka zigenga amasanisha ashingiye ku nteko zikomokaho.

Ingero

- **Kera** kabaye aba araje.
- Ageze **kure kubi**.
- Muragahinga **kera** keza Imana.
- **Abikoze kabiri** gasa.

Isanisha rigengwa n'izina rifite akabimbura -nya-

Igice cya kabiri k'izina rifite akabimbura -nya-gishobora kugenga isanisha ry'amagambo gisobanura.

Urugero

- Umunyagisaka k'imigongo.
- **Ubunyabungo bwa** ruguru.

Isanisha rigengwa n'igice cya kabiri k'izina ry'inyunge

Igice cya kabiri k'izina ry'inyunge gishobora kugenga isanisha iyo amagambo yisanisha agisobanura.

Urugero

Umugira (i)neza imurenza impinga.

Isanisha rigengwa n'inyito bwite y'ijambo

Bene iri sanisha rikorwa hashingiye ku nyito y'ijambo ryisanisha cyangwa inyito uvuga ashaka gushimangira, ntabwo riba rishingiye ku nteko y'iryo jambo. Iri sanisha rigaragaramo ingeri nyinshi zitandukanye, muri zo twavuga:

Isanisha rigengwa n'izina rikomatanya

Rikorwa mu nteko y'icyo iryo zina uvuga yahisemo mu byinshi rikomatanya.

Ingero

- Urukatsa bariruka (abantu).
- Urukatsa ziriruka (ingabo).
- Urukatsa ruriruka (agatsiko k'abantu).

- Rubanda babimenye (abantu).
- Rubanda yabimenye/rwabimenye (imbaga, itsinda).

Isanisha rigengwa n'izina ritazwi

Mu nteko ya 11 hari izina ritazwi rigenga isanishwa ry'inshinga zimwe na zimwe zifite inyito yo kwangana.

Urugero

- Imbwa n'injangwe **zurageretse**.
- Abajura n'abayobozi **ntirujya** imbizi.
- Ababyeyi bawe n'abaturanyi **zurageretse**.

Isanisha ry'ingobe

Bene iri sanisha riba kabiri mu nteruro imwe. Irya mbere riba rigenga ibinyazina ngenera naho irya kabiri rikagenga andi magambo yo muri iyo nteruro.

Urugero

- Nyina **w'iyi** nka irarwaye.
- Se **w'iki** kimasa yari inkungu.
- Haruguru **yawe hari** umuntu.

Isanisha rigengwa n'amazina bwite

Iyo interuro igengwa n'izina bwite risanzwe, indangasano yaryo igenga isanisha ry'ikinyazina ngenera kirikurikiye, andi magambo akisanisha na ryo hakurikijwe inyito rusange cyangwa inyito bwite.

Ingero

- Muvunyi **wa** Mutemura ni **munini**.
- Karyabwite **ka** Ryumugabe **rya** Munanira **wa** Masabo.
- Byavu bya Mureganshuro azagaruka ejo.

Ikitoronderwa

Iyo izina bwite ari izina nteruro ridafite interurajambo, isanishwa ry'ingenera riba mu nteko ya gatanu, igice cy'interuro gisigaye kigasanishwa n'inshoza rusange.

Ingero

- Simbizi rya Rutambambuga atuye i Kigali.
- Hitayezu rya Semavugo ndamubona.

Iyo izina bwite ari izina nteruro rifite interurajambo, isanishwa ry'ingenera rijya mu nteko y'iyo nterurajambo, igice gisigaye cy'interuro kikagengwa n'inyito rusange.

Ingero

- Barayorera **ba** Rwego aravuzwa ubuhuha.
- Buriminyundo **bwa** rukabukira azaza ejo.
- Rugiramahe **rwa** Rujugira yakundaga amirire.

Isanisha ry'amazina bwite atangirwa n'akabimbura

Iyo amazina bwite atangirwa n'akabimbura, isanisha ryayo na ntera cyangwa n'ibinyazina rigengwa n'indanganteko yaryo, iry'inshinga rikagengwa n'inyito rusange.

Ingero

- Nyakabwa **ka** ...
- Nyirakimonyo **cya** ...
- Sebatware **ba** ...
- Nyirashyano **rya** ...

Isanisha rigengwa n'indangahantu cyangwa umugereka w'ahantu

Iyo isanisha rigengwa n'indangahantu, ikinyazina ngenera gisanishwa n'izina riri kumwe n'iyo ndangahantu naho ikindi gice k'interuro kigasanishwa mu nteko ya 16. Umugereka w'ahantu wisanisha mu nteko ya 16.

Urugero

- Ku rugo rwawe haragaragara.
- Mu gutwi kwahe harari umwanda.
- I Rubona rwa Ngunda harera cyane.
- Ruguru y'inzu hari injangwe.
- Hirya yawe hazakuburwe.

Isanisha rigengwa n'interuro ihamagara

Mu nteruro ihamagara isanisha ry'ikinyazina ngenga n'iry'inshinga rikorwa muri ngenga ya kabiri naho iry'amagambo asigaye rikagengwa n'inteko y'izina.

Urugero

- Wa mwana we uri **mubi**.
- Wa ntama we uri **mbi**.
- Wa rwana we uri **rubi**.

Hari igihe isanisha ryose ry'interuro rigengwa n'ikinyazina mpamagazi

Urugero

Wa ntama we uri mwiza nzakugurisha amafaranga menshi unkize.

Ikitonderwa

Ingirwanshinga yisanisha nk'uko inshinga yisanisha.

Ingero

Ntibavuga ngo	Bavuga ngo
Wabigenje gute?	Wabigenje ute?
Babikoze gute?	Babikoze bate?
Yabimenye gute?	Yabimenye ate?
Iki giti kimeze gute?	Iki giti kimeze gite?
Ibi biryo byamenetse gute?	Ibi biryo byamenetse bite?

Inshamake

Mfashe ko: Hari inzira zitandukanye z'isanisha ry'amagambo mu nteruro, ariko izo nzira zose zikagenda mu mpushya ebyiri ari zo: "Isanisha rigengwa n'inyito rusange y'ijambo" n' "Isanisha rigengwa n'inyito bwite y'ijambo".

Nshobora: Rero gutandukanya inzira zose z'isanisha, gukoresha neza isanisha mu nteruro no gukosora interuro isanisha ryakoreshejwemo nabi ikaba interuro mbonezamvugo.

Imyitozo



1. Garagaza uturemajambo ndangasano tw'inshinga muri ngenga ya 1, iya 2 n'iya 3, mu nt. ya 1 no mu nt. ya 16.
2. Mu Kimyarwanda ijamba rubanda rishobora kwisanisha ku buryo butandukanye. Bugaragaze unasobanure aho inyito rigenda rifata zitandukaniye.
3. Kosora aho ari ngombwa:
 - Ibi bintu wowe ubikora gute?
 - Nkiri umwana, ikintu nakundaga zari inyama.
 - Maze gukura, ikintu nakundaga cyari inzoga.
 - Ndi mwene Bazinura wa Kinanguzi cya Munaba ya Rwego rwa Byuma.
 - Mu ishuri imibare zinanira abanyeshuri gute?

2. Imimaro y'amagambo mu nteruro yoroheje

Soma izi nteruro witonze maze ugerageze kwerekana interuro zivugitse neza n'izitavugitse neza kandi ugerageze gutanga impamvu:

- Umutwe umwe ntiwigira inama.
- Imbeba irya yototera umuhini isuka.
- Amazi meza nta bara agira.
- Imana y'abatindi ibogosha ni yo.
- Umwana utaganiye na se ntamenya ibyo sekururu yasize avuze.

a) Inshoza y'imimaro y'amagambo mu nteruro

Buri rurimi rugira uburyo bwihariye bwo gukurikiranya amagambo mu nteruro kugira ngo interuro ibe iboneye. Iyo umuntu uvuga yitaje ubu buryo arema interuro ikocamye cyangwa itumvikana n'iyi yaba akoresheje amagambo anoze. Haba n'ubwo interuro ihindura igisobanuro. Mu Kinyarwanda, muri rusange ijambo risobanura irindi (imfutuzi) rirarikurikira. icyakora ikinyazina nyereka, ikinyazina kibaza, ndafutura n'akajambo "buri" bibanziriza ijambo bisobanura:

Ingero

- Izo ntore zakoraga imihamirizo y'amoko yose.
- Zakoraga yose y'amoko intore izo imihamirizo. (irakocamye)
- Bateraniraga mu nzu imwe, bakahaherwa inzoga.
- Inzoga imwe nzu bateraniraga mu bakahaherwa. (irakocamye)
- Buri nkoko iri iwabo ishonda umukara.
- Inkoko buri ishonda umukara iwabo iri. (irakocamye)
- Ishonda inkoko umukara iwabo iri buri. (irakocamye)

Mu nteruro isanzwe higaragazamo ibice bibiri: ruhamwa (itsinda rya ruhamwa), na ruhamya (itsinda rya ruhamya). Buri gice (itsinda) gishobora kugabanywamo ibindi bice bito biturutse ku mimaro y'amagambo akigize. Imimaro y'amagambo ishingira ku gusobanura, guhuza, kwerekezaho igikorwa, igihe gikorwa, aho kiri, gikorwa cyangwa kibera, kwerekana imiterere, uburyo cyangwa imimerere, inshuro...

b) Imimaro y'ingenzi y'amagambo mu nteruro ni iyi ikurikira:

Ruhamwa

Ruhamwa ni ijambo ryitirirwa igikorwa cyangwa imimerere. Amagambo ashobora kuba ruhamwa ni:

- **Izina:** Imbeba irya umuhini yototera isuka.

- **Ikinyazina:** Umwe arya bihora.
- **Izina ntera:** Irigoyi ryica kurusha irirundi.
- **Imbundo:** Gukunda birashimisha.
- **Ikinyanshinga:** Utabusya abwita ubumera.
- **Umugereka:** Kera kabaye araza.
- **Urujyano rw'amagambo:** Ku kwezi ntihaba umwuka.
- Inshinga cyangwa izingiro ry'interuro
- icyuzuzo: kuzuza.

Imimaro mito y'amagambo mu nteruro ni:

Imfutuzi

Imfutuzi cyangwa insobanuzi ni ijamba ryose risobanura izina cyangwa irisobanura amagambo yo mu bwoko bw'ashobora gusimbura izina, cyangwa irisobanura umugereka. Ijamba risobanura irindi rishobora kuba ari ijamba risanishwa cyangwa ridasanishwa.

Ingero

Amagambo asanishwa ashobora kuba imfutuzi:

- Andika ibintu **bisomeka**.
- Amazi **anyobwa** nta bara agira.
- Umusozi **muremure**.
- Uriya **umwe** nagende.

Amagambo adasanishwa ashobora kuba imfutuzi:

- Umukara **tsiriri**.
- Amazi **buzi**.
- Inzovu **rubunga**.
- Intare **rutontoma**.
- Impyisi **mahuma**.
- Umuco **karande**.
- Inzira **nyabagendwa**.
- Inyaga **gahembe**.

Impuza

Ni ijamba rihuza ayandi cyangwa rihuza inyangingo. Amagambo ashobora kuba impuza ni aya:

- a) **Ibyungo**
 - Gahigi na Kalisa barakundana.
 - Ndabyumva nk'uko ubyumva.
- b) **Ingirwanshinga**
 - Ubabwire uti: "Nimusigeho gukubagana".
 - Ubikore utyo.
 - Ameze ate?
 - Aha ni wowe wahagize utya?
- c) **Indangahantu**
 - Ngiye mu nzu.
 - Atuye ku Ijwi.
 - Arashaka kujya i Bugande.
- d) **Urujyano rw'amagambo**
 - Kubera ko, kugira ngo, ku mpamvu z'uko...
- e) **Andi magambo ashobora kuba impuza:**
 - Akunda nyina **kurusha** se.
 - **Ahubwo** nimuze hano.
- f) **Uturemajambo tw'inshinga tumwe na tumwe tugira umumaro nk'uw'impuza:**
 - Ararya akaryama.
 - Uzarima unatere.

Ikitonderwa

Icyo twise imimaro mito y'amagambo ni imimaro cyanecyane iri hagati y'ijambo n'irindi, ikaba yinjira mu mimaro y'ingenzi.

Urugero

Iyo tuvuze ngo "umutwe umwe ntiwigira inama nziza". Ijambo "umwe", risobanura ruhamwa, bityo na ryo rikaba riri mu itsinda rya ruhamwa.

Bityo rero imimaro y'ingenzi amagambo agira mu nteruro ituma yigabanyamo amatsinda atatu y'ingenzi ari yo: Ruhamwa, izingiro (inshinga) n'icyuzuzo. Imimaro mito ni imfutuzi cyangwa insobanuzi n'impuza.

3. Interuro yoroheje



Itegereza interuro zikurikira, werekane interuro zoroheje n'iz'urusobe ugaragaza n'icyo ushingiraho:

- Igisiga kigurukanye inkoko ya Kayihura.
- Uyu mwana yiga neza maze agatsinda bishimishije,
- Umuyaya yahekanye umwana umujinya.
- Abanyeshuri bose bigana umwete isomo ry'Ikinyarwanda.
- Umunyeshuri udakererwa yiga neza.

1. Inshoza y'interuro yoroheje

Interuro yoroheje bita iy'inyabumwe ni interuro ifite inshinga imwe itondaguye yumvikanisha ubutumwa bumwe, budasobekanye.

Ingero

- Ngwino.
- Uyu mwana azagenda imitego.
- Ndakakwambura!
- Ugiye he?
- Urugori barukoresha imikebyo migari y'ibikenyeri by'amasaka n'imitamu y'insasanure cyangwa urumamfu.

2. Gusesengura interuro yoroheje

Mu gusesengura, interuro hari inzira nyinshi zishobora gukoreshwa ariko iz'ingenzi ni izi zikurikira:

- a) Imisesengurire isanzwe
Ni imisesengurire igaragaza ibice bitatu bigize interuro: Ruhamwa, inshinga n'icyuzuzo.

Urugero	Abana bagiye ku ishuri.
Ruhamwa	Abana
Inshinga	bagiye
Icyuzuzo	ku ishuri

b) Imisesengurire ya ruhamwa n'imvugaruhamwa cyangwa ruhamya

Iyi misesengurire icamo interuro ibice bibiri by'ingenzi ari byo:

Itsinda rya Ruhamwa cyangwa itsinda ry'izina: rigizwe na ruhamwa n'imfutuzi zayo zose. Iryo tsinda ry'interuro ryerekana ukora igikorwa cyangwa uwo igikorwa gikorwaho. Ni Ruhamwa y'inshinga. Hashobora rero kubaho ruhamwa igizwe n'amagambo arenze rimwe, icyo gihe ni bwo bavuga ko ari itsinda rya ruhamwa.

Urugero

Wa mukobwa muremure w'inzobe yiga muri Kaminuza.

Twibuke na none ko mu Kinyarwanda hari ruhamwa nyurabwenge idahita igaragara.

Urugero

Imboga zibona abana. Ijambo "abana" ni ruhamwa kuko atari imboga zibona abana ahubwo ari abana bazibona.

Ruhamya cyangwa itsinda ry'inshinga: ni cyo bamwe bita imvugaruhamwa, kikaba ari igice k'interuro kigizwe n'inshinga n'ibyuzuzo byayo. Ruhamya itangirira ku nshinga mu nteruro kuko ari bwo baba batangiye guhamya ruhamwa uko iteye, icyo ikora. Kubera ko icyo gice kigengwa n'inshinga kitwa itsinda ry'inshinga mu gihe itari yonyine.

Urugero

Ya nka nini y'umusengo yabuze.

- Itsinda rya Ruhamwa(TS. RH.): Ya nka nini y'umusengo
- Inshinga (SH): yabuze.

Impine zikoreshwa

RH	Ruhamwa
FUZ	Imfutuzi y'icyuzuzo

SH	Inshinga
Zn	Izina
UZ	Icyuzuzo
Kzn	Ikinyazina
TS SH	Itsinda ry'inshinga
Nter	Ntera
TSRH	Itsinda rya Ruhamwa
T	Interuro
TSUZ	Itsinda ry'icyuzuzo
Grk	Ingereka:
F	Imfutuzi
IKINY	Ikinyanshinga
FRH	Imfutuzi ya Ruhamwa

Imyitozo

Sesengura interuro zikurikira ugaragaza ruhamwa na ruhamya:

- Inzira ntibwira umugenzi.
- Imana iruta imanzi.
- Impamba y'umwana ihembura nyina.
- Twe tujyayo rimwe mu cyumweru na buri gihe mu biruhuko.
- We yiga nk'amasomo abiri buri muni.
- Uyu mwana ni inkubaganyi pe!
- Aya mazi ni meza.



Isuzuma risoza umutwe wa cumi

Soma uyu mwandiko hanyuma usubize ibibazo.

Tumwe mu turango tw'umuco nyarwanda

Umuco w'abantu batuye igihugu runaka akaba ari imbumba utakwitiranywa n'undi kandi aka ari urusobe rw'ibintu byinshi. Bimwe mu by'ingenzi bituma umuco nyarwanda uba umwihariko unozwe ni ubwisanzure bw'abantu mu bandi, uguhererekanya ibyagezweho, ururimi n'ubuvanganzo, muzika n'imbyino, ubupfura n'uburyo bumva Imana.

Umuntu yisanzurira mu bandi, haba mu muryango we bwite cyangwa mu wo akomokamo cyangwa mu bandi bantu banyuranye ahura na bo adafite icyo apfana na bo. Mu muco gakondo w'Abanyarwanda buri wese yagombaga gufatanya n'abo babana mu mirimo inyuranye ituma bashobora kwibeshaho ndetse no mu bindi bigamije umutekano wa buri wese cyangwa w'igihugu muri rusange. Hari n'igihe byabaga ngombwa ko umuntu atangwaho igitambo kugira ngo abe cyangwa abo akomokamo badahungabana. Nko mu mihango y'igitero, uw'indagu zereraga kuba umucengeri kugira ngo amaraso ye azazane insinzi yemeraga kwitanga kugira ngo umwanzi atsindwe.

Umunyarwanda wese kabone n'umwami ubwe yemeraga kumena amaraso bibaye ngombwa kugira ngo igihugu gisugire. Amatwara yo kwagura igihugu kugira ngo haboneke uruhumekero yabarirwa muri iyi gahunda. Hari imirimo rusange yashimangiraga ubucuti, ubufatanye ikanerekana ko akebo kajya iwa mugarura. Twavuga nk'ubudehe, umusanzu n'umuganda, gusangira, gutonora no kunywa. Abanyarwanda bibukaga ibihe by'amahina n'urugamba rukomeye bakarya imbuto enye z'ibanze bitaga nkuru ari zo uburo, amasaka, isogi n'inzuzi. Bityo ntihagire iby'ingenzi bibagirwa kandi n'ubusabane bwabo bugasugira. Ibanga ry'ubukeshya n'ubumenyi ngiro ryigishwaga abana bose, nta kuvangura ibitsina uretse ubwiru bwari bufite imiryango yihariye.

Guhererekanya ibyagezweho na byo ni inkingi ikomeye y'umuco. Mu muco karande w'Abanyarwanda, ababyeyi bitwararikaga kuraga ababakomokaho ibyo bakuye ku bakurambere babo. Ibyo byagaragariraga mu buvanganzo cyane nko mu bisigo, imigani, ibisakuzo, ibitekerezo, indirimbo n'imbyino. Uko guhererekanya ubushishozi, ubwitonzi, ubumenyi, urwibutso, ubuhanga n'ubugenge bw'ingeri zose kwagaragariraga cyanecyane mu butegetsi, nko mu bakuru b'imiryango, b'ibitsibo by'imiryango cyangwa abami. Ibwami bashyizeho uburyo bwo guhererekanya uwo murage w'abasokuruza bushamikiye ahanini ku buvanganzo. Ni uko hashyizweho, abasizi, abisi, ibikore, abacurabwenge, abiru n'impura zari zishinzwe umuhango wo kubandwa.

Iryohererekanya ryanabaga mu mihango iranga ibihe bikuru by'ubuzima bw'umuntu: ivuka, iyatura n'isubizwaho, ugushyingirwa n'irongora n'icyo kwitarura isi. Yego hose ibi birahaba, ariko uburyo, imihango, imvugo n'isesekaza bikanyurana. No mu bitaramo barahigiraga. Byararuhuraga, ariko bakanabyigiramo amateka, inozamvugo, kwifata neza no gutoza ugutwi muzika nk'iyo habaga umuduri, inanga n'ubundi bugeni bwerekeye muzika.

Nta gushidikanya ko uwo mwete wo kubungabunga ibyagezweho no kubigeza ku bandi ari byo byatumye abashakashatsi nka Padiri Alexis Kagame, Musenyeri Aloyizi Bigirumwami, umuhanzi Rugamba Sipiriyani n'abandi bakusanyije ibyerekeranye n'ingeriz'ubuvanganzo nyarwanda gakondo ku buryo bishobora kugera ku b'iki gihe bakamenya ubukungu buhatse.

U Rwanda rwateje imbere cyane ikitwa ijambo n'ubunozamvugo. Ururimi rw'Ikinyarwanda ari rwo nzira y'ingenzi y'ubwumvane hagati y'Abanyarwanda ndetse n'ingobyi ihetse umuco rwitaweho cyane. Mu buvanganzo, ijambo rishobora kwerekana imyifatire, imbamutima, ibiri mu mutwe w'umuntu, rigatuma ingiro iriherekeje itaba imfabusa.

I. Ibibazo by'inyunguramagambo

1. **Tanga ibisobanuro by'amagambo akurikira:**
Ubuvanganzo, gutonora, amahina, kunywana, kwitwararika, ibikore, ibitsibo by'imiryango, kwatura, gusubizaho, isesekaza.
2. **Koresha amagambo akurikira mu nteruro ebyirebyiri ziboneye kandi zifite ibisobanuro bitandukanye:**
Gutonora, igitero, inzuzi, ubugeni, ingobyi.

II. Ibibazo byo kumva no gusesengura umwandiko

1. Mu mwandiko barasobanura ko umuco ari iki?
2. Ni ibihe bintu by'ingenzi bisigasiye umuco nyarwanda?
3. Ni iki kigaragara mu mwandiko kigaragaza ubutwari bw'Abanyarwanda mu muco gakondo?
4. Ni iki abakurambere bacu bitwararikaga kuraga abazabakomokaho? Babinyuzaga mu ki?
5. Ni hehe usanga uburere bw'intore bwakorerwaga havugwa mu mwandiko?
6. Garagaza indangagaciro nyarwanda zigaragara muri uyu mwandiko.
7. Utekereza ko mu muco nyarwanda itorerwa ryagiraga uruhe ruhare mu kurema ubutwari mu Banyarwanda?

III. Ibibazo ku kibonezamvugo

1. **Vuga ubwoko bw'amagambo yose agize aka kandiko.**
Umwami ati: "Mbe sinkubwire, have nibakureke nta jambo ryawe na rimwe nahinyuye, iryo wavuze ryose nasanze ari ukuri, ndamuka nkwishe na none simbe urupfu nduguriye, genda uzizicirwe n'urwakuramutse".

2. **Andika aka gace k'umwandiko ushyira amasaku mu ntenuro zikagize**

Gacamigani ati: “Ndakabura ibyo mvuga, nange navuga ukuri, uvuga ukuri si urivuga rigahama”! Bati: “Wifuzaga ko umwami apfa”? Ati: “Ntarabyifuzaga se, se na sekuru bari hehe”? Bati: “Erega kuraho umugome atarinda no kwiyanga ye”! Umwami ati: “Muciriye inkoni izamba”.

3. **Sesengura izi nteruro ugaragaza ruhamwa na ruhamya:**

- Imburagihana yabuze gihamba.
- Uriya musozi muremure uherereye mu Murenge wa Mutete.

IV. Ibibazo ku buvanganzo

1. **Sesengura injyana y'uyu muvugo**

Bava iyo bibasiye iyo nama
Abavuzza ihembe imitwe irameneka
Abamotsi biheberera kuryama
Inkoni irarisha u Rwanda rwose.
Twebwe abatwarwa na Rwubusisi
Tuba dusanzwe tugira ubwoba
Ubwira ari ubwo kujya mu murima
Imirimo y'ino ingana guhamba
Ntawuririra guhumeka
Keretse ahari ku cyumweru.

2. **Vuga ikeshamvugo ryakoreshejwe muri iyi mikarago.**

- Bibasiye iyo nama
- Tuba dusanzwe tugira ubwoba
- Ubwira ari ubwo kujya mu murima.
- Imirimo y'ino ingana guhamba

V. Ikibazo ku ihangamwandiko

Kora umwandiko mvugamiterere y'umudugudu w'iwanyu ukoresha imvugo ishushanya.

1. Imyandiko y'inyongera

Ururimi rwoshywa n'urundi

Rimwe umunsi w'ubunani wari wegereje, hakaba umugabo n'umugore bari bamaranye imyaka. Ku mugoroba wa joro baricara baganira ibya mva he na njya he. Reka si umunezero bari bafite bombi, kurya uwo mwaka wari ushize bawufitemo amahoro n'amahirwe bitavugwa! Ariko se urwo rugwiro rwarawushoje? Byabara Kariharya! Henga imbeba, imbeba bubeba, igire itya... iti: "Turururu", ibace hagati yanduruke! Batangire kuyiha urw'amenyo, bayamirire kahave, baseke bakwenkwenuke, amaso yabo azemo amazonza, aho bazanzamukiye, umugore ati: "iriya mbeba nahoze nyibona muri iriya mfuruka y'epfo!" Umugabo ati: "Oya, imbeba iturutse mu mfuruka ya ruguru, ni ho nahoze nyibona."

Umugore ati: "Rwose waroye nabi iturutse haruguru!" Umugore ati: "N'ubundi ndakuzi ntacyo wemera!" Wakwemeye ko nayibonye neza!" Umugabo ati: "Ni ko abagore mwabaye, mujya impaka za ngo turwane!" Aho wenda ni ibyawe, wava aho uhakana ukuri nkubwira, ngo ni ay'abagore!" Umugabo ati: "Ndakuzi." Umugore ati: "Ndakuzi ari nge!" Si bwo umwe azirimukiwe! Si bwo undi afashe ubushungu! Si bwo bashunguranye ubwo!!! Ye, nguko, ngaho, ruri hasi ruri hejuru, ngurwo urushyi nturuzira, ngiyo inkoni ntuyizira, umva umugeri umva igipfunsi...! Nuko barakomeza barakazana, amaherezo baza gukizwa na mbuga. Kuva uwo mugoroba barasirika, ntihagira uwongera kuvugisha undi, barita hanze barawiriza bongera kuwukeshya.

Bukeye umunsi w'ubunani uragera. Noneho umugabo, iby'abagabo agerageza kurura umugore we. Aratangira aramubwira ati: "Nyiranaa... rwose ko urora umwaka mushya watangiye, tukaba tutari dukwiye kuwutangirana uburakari, twakwirengagije ibyo twagiranye, maze tukawusekera twembi icyarimwe ukazatubera muhire!"

Umugore ati: "Ni byo uwanyuze burya! Baherako basekera icyarimwe, ibyishimo birabasaba, bifurizanya ubunani, mbese biba nk'aho batigeze bagira icyo bakorerana kibi!"

Hashize umwanya, umugore arahimbarwa abwira umugabo we, ati: "Erega aho n'ubundi twari twapfuye ubusa! Wowe se ko nakubwiraga ko imbeba yaturutse hariya ukanga kubyemera!" Umugabo ati: "Ibyo byo kabishywe ntabyemeye, si ho yari iturutse, yari iturutse mu mfuruka ya ruguru!" Umugore ati: "Waroye nabi!" Umugabo ati: "Waroye nabi ari wowe!" Umugore ati: "Nta cyo wemera ndakuzi!" Umugabo ati: "Wavutse ntacyo wemera!" Umugore ati: "Urasubiye kandi?" Umugabo ati: "Urasubiye ari wowe!" Ubwo ga intambara iba irarose, baremvekana nanone barwana inkundura.

Icyo gihe uwabakijije, ngo ni "Ntawarubara". Nge sinari mpari, nari nigiriye i Bujiyibwa nidagadura na Bunani. Insubira mbi ni umuziro. Ziga ururimi ni mwene Biranteye untuye hafi.

Byavuye muri: Minisiteri y'Uburezi bw'Igihugu, *Gusoma*, *umwaka wa gatandatu*, Hatier, Paris, 1976.

Imenyeshamakuru ry'ubutegets

Imenyeshamakuru ry'ubutegets ryari rifite inzira rigomba kunyuramo, ari mu butegets bw'Igihugu ari no mu bubanyi n'amahanga.

Ku bijyanye n'ubutegets bw'Igihugu, rubanda ntibamenyaga amategeko y'imihango yakurikizwaga ibwami. Ryari ibanga ry'abiru. Icyakora abaturage bagezwagaho amategeko y'ibyho bagombaga gukora kandi abayobozi bakagezwaho ibitekerezo byabo. Byagendaga gute rero? Ibwami boherezaga intumwa ku batware b'intebe (abatware bakuru) na bo bagashyikiriza ubwo butumwa abatware bakuriye (abato kuri bo). Abo ngabo ni bo boherezaga intumwa zizenguruka imisozi zivuga ubwo butumwa. Izo ntumwa ni zo bitaga Abamotsi.

Amakuru n'ibitekerezo umwami yabibwirwaga n'abatware n'abatasi. Abo batasi yaboherazaga mu mpande zose z'igihugu, bakagomba kumenya umwuka Igihugu cyose gihumeka, bakumva ibyo abaturage bavuga ku bategets,

abakwiza impuha bakababwira umwami akabahana yihanukiriye, akenshi baricwaga. Ibyo byatumaga abantu baratinyaga kuvuga ibyerekeye ubutegetsu ngo batabizira.

Abasizi bahuzaga umwami na na rubanda, ariko ibisigo byabo byashimagizaga umwami cyane, bikavuga gusa ibyiza we n'abamubanjirije bakoreye igihugu, ibitagenda neza ntibabihingutse.

Ku birebana n'ububanyi n'amahanga, umwami yakeneraga amakuru yo hanze y'igihugu ke. Umwami yamenyaga ate amakuru yo mu mahanga?

Ku bijyanye n'amakuru yo mu mahanga, abatware bo ku nkiko bamugezagaho amakuru yo mu bihugu baturanye. Ikindi kandi, umwami yoherezaga abatasi mu mahanga, bakajya nko mu masoko yaho bigize abacuruzi, cyangwa bakajya guhakwa ibwami no ku batware bo hejuru, bakabeshya ngo mu Rwanda barabatoteza, bakavuga igihugu nabi uko kitari, nuko abanyamahanga bakabahishurira amakuru y'ingirakamaro ku gihugu cyabo bakazahindukira bakayabwira uwabatumye. Banekaga ibyerekeye ingabo n'intwari.

Umwami yoherezaga kandi intumwa abami b'ibihugu byegereye u Rwanda. Yazihaga ubutumwa bwe zikabubagezaho cyangwa zikavuga amakuru yandi, ari ameza ari n'amabi. Iyo u Rwanda rwagirana intambara n'ikindi gihugu, hari abantu bitwaga "abavuzi b'amacumu bagombaga kuyikurikira, bakazatekerereza umwami uko byagenze."

Igikoresho k'ingenzi mu imenyeshamakuru cyari ijwi, ariko rikagira ibindi bikoreshe byariteraga inkunga.

Umuntu yabwiraga amagambo uwo begeranye, uri kure na we akamuhamagara. Inkuru yashoboraga kurenga imisozi igasingira indi, ndetse ikaba yakwira Igihugu cyose, abantu bakoresheje uguhamagarana. Twabonye ko kandi hari intumwa z'ubuyobozi zazengurukaga imisozi zigeza ubutumwa ku baturage na zo zakoreshe ijwi. Umuntu wabaga atewe asagariwe cyangwa abonye inyamaswa y'inkazi, yatabazaga avuza induru, ateza ubwegaga kugira ngo bamutabare.

Ihembe ry'inka cyangwa ry'imbogo barivuzaga bagira ngo abantu batege amatwi, hanyuma bakabona kuvuga ubutumwa mu ijwi riranguruye.

Mu ntangiriro y'umuhigo cyangwa bahamagarana mu mpera zawo, abahigi bavuzaga amahembe bahamagarana ngo baterane. Igihe k'igitero cyangwa igihe cyose bagombaga gukoranya abaturage bavuzaga ihembe.

Ingoma yari igenewe imihango y'ubutegetsu. Hari amoko menshi y'ingoma kandi zose ntizahuzaga imirishyo (ntizivuga kimwe).

Hari ingoma y'**impuruza**, iyo yavugaga abantu bamenyaga ko hateye intambara; icyo gihe ingabo zose zigafata intwari. Impuruza zavuzwaga n'intumwa z'ibwami. Umurishyo w'indamutsa wari uwo kumenyeshya abantu ko umwami yibambuye (abyutse) cyangwa ko agiye kwibikira (kuryama).

Ingabe zari ingoma nkuru z'ibwami. Iy'ikirenga yari Karinga, ikagira n'izindi ziyigaragiye: Kimumugizi, Kiragutse, Mpatsibihugu, ... Izo ngoma zajyanaga n'ikemezo gikomeye: nk'umwami yavugaga abagomba kwicwa akorakora Karinga. Iyo baciraga umuntu mu mahanga bavuzaga imwe muri izo ngoma.

Imyironge na yo yunganiraga ijwi mu imenyekanishamakuru.

Urusengo rwari umwironge wa kera cyane. Iyo bacaga umuntu burundu ni rwo bavuzaga.

Umwironge wavuzwaga nijoro warangaga ahari umuntu (uwuvuza), wirukanaga inyamaswa n'abajura.

Indirimbo, imbyino n'inanga na byo byari ibikoresho by'imenyeshamakuru. Ni byo kandi ubusanzwe bivugaga byinshi: Uko abantu bameze, ibibazo biriho, inyamaswa, ...

Ibigwi by'ibisumizi

Amasomo y'ibyvugo yose ari muri iki gitabo yashyiriweho kugira ngo atoze abanyeshuri imvugo yabyo, kandi ababere urugero rwo kwihimbira ibyabo bwite bashishoje ibihe barimo bagacishiriza no ku kigeni k'ibyo beretswe. Dufatire kuri ibi byivugo by'ibigwi bya bamwe mu Bisumizi bya Ruganzu Ndori byahimbwe mu bihe byo hambere.

Ruganzu abimbura ibigwi ati: “Ndi Ruganzu, Rugambirira Abahunde rwa Muhumuza nyiri icumu ry'inganzamarumbo, nyiri mishumi yishe nyiri mishweko, ndi umukanguzi w'icyuma, Kitatire cya Mutabazi, naritatiye ndatera ndatikuza, ntera ababisha ubwoba mbyarira imana mu Bugondi u Bugoyi buragendwa; ndi Nyamunyaga iziribuwe izitaribuwe nkazinyagana ibyansi n'imyugariro. Nyamukubira umugabo mu izinga izuba rikazima, ndi nyamuganza inka igitugu igituza kizirasanira; nanyagiye Indorero z'imishongi mu Butambara, nicira umuhinza mu Bwegekangabo bwa Mashyiga; ndi umugaba kandi ndi umugabo. Mwe se muri iki mwa bahungu mwe?”

Aranamiza Muvunyi wa Karema karemajwe n'ibyuma, ati: “Ndi Muvunyi wa Karema ishyogo rya Karema, Sebitana, Mugabo utuma zijya mu itorero wa Rwabitega; nakubise Gogo uruguma rurenze iguriro i Buguzi na Mwito ndabarusha, mu Tumarankoni ndabarusha, mu Ishishi ndaharushiriza; nateye icumu ndarizimiza ryikoza mu ry'agaca rirahava, ryikoza mu ry'akanira rirahava, rijya mu rya Kagoma rirahava, riragaruka rikubita umushi mu gihumbi rimusatura umutima, ni gewe Ruhanga rucyuye bene Ndahiro ubuhoro.

Arirasa Bwojo bwa Mabango arahashinga, ati: “Ndi Bwojo bwa Mabango nyiri umuheto w'icyuma ubangishije ikindi cyuma, nkaba inkuba yo hasi, iyo hejuru yaza tugahuza ibaba!”

Aratinduka arahanika Cyaruhinda, ati: “Ndi Cyaruhinda kirirwa kivuga nk'imvura y'umuhindo itari bugwe kandi itari bupfe, bwira kigahingika umugabo ku njunga y'icumu rye!”

Aryungamo arahetura Muvunyi uvuna inka, ati: “Ndi Muvunyi uvuna inka ndi Muvunyi uvuna abandi, Muvunyi uvuna abamuvuna abatamuvuna akabavunagurira amabano mu mubiri !”

Igihembo cy'amahoro kitiriwe Nobeli



Aluferedi NOBELI

Igihembo cy'amahoro kitiriwe Nobeli gihabwa umuntu wagerageje cyangwa warushije abandi mu kunga abantu, mu guca cyangwa kugabanya imitwe y'ingabo n'intwari, mu kubumbatira no gusakaza iterambere ry'amahoro, hakurikijwe ingingo fatizo zashyizweho mu irage rya Aluferedi Nobeli: Ibyo birimo guharanira amahoro, uburenganzira bw'ikiremwa muntu, ibikorwa by'ubugiraneza bifasha abantu, no guharanira ubwigenge.

Igihembo kimwe gishobora kugabanywa abantu babiri, cyangwa batatu cyangwa se amashyirahamwe n'imiryango yaba yarakoreye abantu ubuvugizi cyangwa ikabarengera.

Icyo gihembo cyatanzwe bwa mbere mu mwaka wa 1901. Nta gihembo kigeze gitangwa mu gihe k'intambara ebyiri z'isi uretse mu wa 1917 no mu wa 1945, ndetse no mu myaka aho nta mukandida wemejwe ko agikwiye mu baba bagenwe ngo batoranywemo abagihabwa. Igihembo kitiriwe Nobeli cyabanje kuba umwihariko w'ibihugu byo mu Burayi na Amerika y'amajyaruguru, nyuma kiza gukwira isi yose. Abanyafurika bamaze kugihabwa barimo: Anuware Sadate (Anouar el-Sadate), Nerisoni Manderu (Nelson Mandela), na Peteri Bota (Peter Bota), Musenyeri Desimoni Tutu (Desmond Tutu), ...

Muri rusange igihembo Nobeli cy'amahoro cyagiye gihabwa abantu bakoze ibikorwa bifitiye abantu akamaro cyangwa abarwanije ugukandamizwa mu bya politiki cyangwa abaharaniye guca ubusumbane mu bantu nk'Albert Schweitzer, Martin Luther King, Mama Tereza, na Aung San Suu Kyi.

Nk'uko Aluferedi Nobeli (Alfred Nobel) yasize abigennye, abahabwa icyo gihembo bahitwamo na komite ishyirwaho n'Inteko Ishinga Amategeko y'igihugu cya Noruveji abandi bagahitwamo n'ikigo gishinzwe umuco n'ubumenyi cyo muri Suwedi. Impamvu ni uko mu gihe cya Aluferedi Nobeli (Alfred Nobel) ibyo bihugu byombi byari bikiri igihugu kimwe. Kijyana n'akayabo ka miriyoni icumi z'amakuroni (amafaranga akoreshwa muri Suedi), arenga gato miriyoni y'amayero (euro: ifaranga rikoreshwa mu ishyirahamwe ry'ibihugu by' i Burayi.)

Abatera amahoro barahirwa rero, kuko usibye ko ubwami bw'Imana ari ubwabo, no mu isi ntibazabaho nabi.

Byafatiwe ku byakuwe ku rubuga rwa Interineti : wikipedia.org/wiki, bihindurwa mu Kinyarwanda na NDINDA Blaise Pascal

Yariye Karungu!

Umugani baca ngo "Yariye karungu", bawuvuga iyo babonye umuntu warakaye yarubiye ni bwo bavugaga ngo "nimumubise dore yariye Karungu". Wakomotse kuri Karungu n'umugore we Nyirakamagaza bo mu Rwampara rwa Biryogo (Kigali), ahasaga umwaka w'i 1700.

Uwo Karungu yari mu Rwampara rwa Kigali, akaba umushumba wa rwoma, wahugiye mu nka gusa. Yabayeho mu gihe cya Mushoranyambo, ari we bita Serugarukiramfizi. Wa wundi uvugwaho ubusambo bw'agahebuzo.

Kubera iyo ngeso y'ubusambo, Serugarukiramfizi yamaze kunaniranwa n'abo mu Buganza, atura mu Bwanacyambwe, ahitwaga ku Gasharu, ni ho yise i Mburabuturo. Amaze kuhatura, umugore we abura amavuta yo kurunga, yajya kuyaguza mu baturanyi be bakanga kuyamuguriza. Serugarukiramfizi abyumvise, ati: "Ino si inturo ni imburabuturo", izina rifata ubwo. Biba aho biratinda bukeye arapfa, apfa azize ubusambo bwe. Asiga umugore we Nyirakamugore n'umukobwa we Nyirabishangari, n'umushumba wabo Rwujakararo. Yapfuye ari umutunzi wavugwaga cyane, ariko muri ubwo butunzi bwe ntagire abagaragu kubera ubusambo, ni cyo cyatumye apfa asize umushumba umwe waragiraga amashyamba atagira ingano.

Nuko haciyeho iminsi wa mushumba Rwujakararo na we arapfa. Nyirakamugore n'umukobwa we Nyirabishangari, basigara muri izo nka bonyine. Bakaba ari bo bakuranwa kuziragira. Umwe yaba yaragiye nka none, undi agasigara ku rugo. Babikora batyo ariko bibagora. Bukeye mu Rwampara hakaba umugabo Karungu, bamubwira ko muka Serugarukiramfizi ashaka umushumba umuragirira inka. Arahaguruka ajya gukeza Nyirakamugore i Mburabuturo, amusaba amata y'ubushumba, dore ko yari umushumba rwoma. Nyirakamugore abyumvise arishima kuko abonye inshungu yo kumugabanyiriza umuruho.

Karungu amaze kubona ubuhake, asubira mu Rwampara kuzana umugore we Nyiraneza (umukobwa w'ineza isa n'umuyange: Igisingizo ke k'ingeso nziza), ariko Karungu uwo ngo yari igisambo gutambutsa Serugarukiramfizi utararushwaga. Yimuka mu Rwampara n'umugore we, basanga Nyirakamugore i Mburabuturo. Abaha inka icumi z'imbyeyi z'intizo. Karungu amaze kuzishyikira aha Nyiraneza itegeko ati: "Uge unywa amacunda gusa, naho, ikivuguto n'inshyushyu bibe ibyange".

Nyiraneza yemera ubusambo bw'umugabo we, anywa amacunda, ikivuguto n'inshyushyu abiharira Karungu. Bukeye Karungu yongera kumubwira, ati: "Dore tumaze kubona amavuta, na yo ntukayakoreho ni ayange". Nyiraneza abyemera ariko agononwa. Bukeye agenderera abandi bakobwa b'i Mburabuturo, arabaganyira, abatekerereza urupfu yapfuye. Abandi baramuseka, bamwe bamwemeza ko azajya arunga bagasangira. Arita mu gutwi arataha. Nimugoroba Karungu acyura inka arinikiza arazikama. Zihumuje ajya mu nzu, umugore aramugaburira, amuhereza indosho na we yenda indi barasangira. Karungu aramureba ntiyamubuza, ariko arya ajiginywa, ku mutima, ati: "Nzaguharika!"

Bukeye, Karungu ntiyazuyaza ajya kurambagiza umugore ku Kacyiru, ahasanga umugore w'ikirongore witwaga Nyirakamagaza. Aramusaba, aramuhabwa, aratebutsa barashyiringira. Nyirakamagaza ageze kwa Karungu amugabanya inka na Nyiraneza. Amutegeka ko atagomba kurya ku birunge. Bukeye abantu b'i Mburabuturo bamaze kubimenya, bati: "Uyu si umushumba wa Nyirakamugore,

ubanza ari umugabo we wazutse". Nyirakamagaza we yemera amategeko, ariko akajya abirya rwihishwa. Bukeye Karungu arabimenya, ahimba amageza yandi. Abwira Nyirakamagaza, ati: "Kuva ubu nzajya ndya ibirunge bikonje ni byo bingwa neza!" Guhera ubwo umugore yarangiza kurunga agasanga umugabo mu nka akamusigariraho ngo ashokere. Undi agaca ruhinganyuma akajya kwiba bya birunge akabirya. Umugore yatahuka agakubitwa n'inkuba akayoberwa uwamwibye akumirwa. Karungu yacyura akabura ibirunge akamutonganya, bakarara ku nkeke.

Nuko biba akamenyero, Nyirakamagaza amaze gushoberwa atangira kugenzura umwiba. Bigeze mu mashoka y'inka, atuma umwana, ku mugabo we ngo amubwire ko agiye kureba iwabo bamuhururije ko barwaye (ariko ubwo yaramushukaga). Umwana amaze kubwira se, Karungu ashyira nzira ajya kurya ibirunge by'akamenyero asanganywe. Ageze imuhira asanga umugore yamwihishe. Asumira urwabya rw'ibirunge akoramo araroha. Nyirakamagaza, aramubaza, ati: "Ubwo uragira ibiki?" Karungu aramwara, aterura urwo rweso rwarimo ibirunge, arucinya umugore rumusandariraho. Nyirakamagaza ararubira. Afata Karungu amushinga amenyo ku mazuru arashingishira, arashikura aracira, amusiga na bya birunge, induru arayidehera. Rubanda barahurura, basanga Karungu yacitse amazuru avirirana, n'ibirunge byamuhindanyije. Inkwenene bayivaho bariyamira, bati: "Nyirakamagaza yariye Karungu, yamuciye amazuru amujijije ibirunge yamwibye"!

2. Ibisobanuro by'amagambo

Abakogoto: abarashi b'ibihangange. Abarwanyi bazi kurasa bakoresheje imyambi.

Abanyamusozi: ingabo zitazi kurwana.

Abasitari: abantu bazwi cyane kandi bakunzwe na benshi kubera ubuhanga bagaragaza mu bintu bikunze guhuruza abantu benshi nko kuririmba no gukina.

agandisha: agomesha, atuma banga kuyoboka ubuyobozi.

Agatabi ko ku mugongo w'ingona: urumogi.

Akambari: umwambari: umugaragu ugendana na shebuja.

Akazu k'ivundi nyakatsi: akazu gato gasakaje ibyatsi.

Akeza karigura: ni akagani gasobanura ko ikintu kiza kidahendahenderwa; nyiracyo akishyiriraho igiciro ashaka. Muri uyu mwandiko barashaka kuvuga ko ba mukerarugendo baza mu cyane mu Rwanda kubera ubwiza bwarwo.

Amadovize: amafaranga y'amahanga akomeye, akoreshwa mu isi hose. **Ingero:** amadolari, amayero...

Amagara: ubuzima bw'umuntu.

Amakimbirane y'urudaca: guhangana hagati y'abantu bitewe n'icyo bapfa.

Amakoro: amaturo yaturwaga umwami twagereranya n'imisoro y'iki gihe.

Amavamuhira: imbaraga umuntu aba afite ari bwo akiva mu rugo.

Amavi kiyashita ku butaka: kirapfukama, gica bugufi.

Amayobera y'igitabo: ibitekerezo bihishe mu gitabo bisaba ubucukumbuzi.

Amazimwe: amagambo y'amabanga wumvanye abandi nawe ukayavuga.

Amena ishyamba: yahuranya ishyamba, yambukiranya ishyamba.

Aragingimiranya: arashidikanya.

Aragororoka: aracururuka, aruruka.

Atabara nta nama, nta mana, nta mugaba: atabara

atagishije inama, atabanje kuraguza, adashatse uzayobora imihango y'igitero kugira ngo ingabo zitsinde.

Bamukoshereje ingobyi: ntibavuga kugura ingobyi bavuga gukoshya ingobyi.

Biba iby'ubusa: biranga, birananirana, ntibyagira icyo bitanga.

Bimwanga mu nda: ntiyashobora kubyihanganira.

Gakondo: ikintu abakurambere baje basanga .

Gashogoro: igihe k'imvura iringaniye gikurikira umuhindo, ibishyimbo biba bifite uruyange n'imishogoro myinshi. Mu ngo zimwe na zimwe ibishyimbo biba byarashije kubera ihinga ku buryo batungwa n'umushogoro.

Gaze karubonike: umwuka usosoka iyo umuntu cyangwa ibindi binyabuzima bihumeka, uba wanduye. Iyi gazi karubonike ni yo ibimera bikenera, mu gihe ibindi binyabuzima biba bikeye ogisijeni.

Guca ibico: gutega umwanzi kugira ngo umutungire we atabizi.

Guca mu myanya y'intoki: kubura ikintu ku buryo budasobanutse.

Guca urubanza mu mafufu: kurufifika. Kuruca mu buryo budasobanutse.

Gucanganyukirwa: gusara.

Gufata akabando: ni uguhaguruka ugafata urugendo.

Gufata igihe: kujya kwa sobuja uguhatse ukajya kumukorera imirimo ijyanye n'amasezerano mwagiranye. Uwabaga agiye gufata igihe yabaga asa n'aho avuye mu biruhuko.

Guha akato: kubuza umuntu kubonana n'abandi akaba wenyine.

Guha umuntu inkwenene: kumuseka umunnye.

Guha umuntu urw'amenyo: kumuseka cyane.

Guhakana umuriro kandi umwotsi ucumba: ni umugani usobanura ko ikigaragara ntawugomba kugihisha, kuko abantu baba bakibona. Bawuca bavuga ngo: "ntawuhisha umuriro kandi umwotsi uboneka".

Guhakwa: kujya kuba ahandi ukahakora akazi gatandukanye udahembwa bagutunze gusa.

- Guhanga umuntu amaso:** kwitegereza umuntu.
- Guhanyura:** kurya ibijumba cyangwa ubugari nta burisho.
- Guharamba inzovu:** kureba ikintu kinini cyane ntukirangize kubera ubunini bwacyo.
- Guhimbarwa:** gushimishwa , kunezezwa, kwizihirwa.
- Guhinamirana:** kutabasha kurambura ingingo.
- Guhindura ibyo twejeje:** gutunganya ibyavuye mu murima bikavamo ibindi bishobora guhunikwa igihe kirekire.
- Guhinduriza:** guhinduka mu maso kubera ikibazo kigukomereye cyangwa ubwoba cyangwa umujinya.
- Guhomahoma:** ni uguterateranya ibintu byangira.
- Guhomvomvwa:** kugenda utazi iyo ujya.
- Guhomvwa:** kuvuga ibidafite akamaro.
- Guhonoka:** kurokoka, gukira.
- Guhumana:** ni ukwibasirwa n'ibyangiza ubuzima ku buryo umuntu cyangwa ibindi binyabuzima byakurizamo urupfu.
- Guhuta:** kwica vuba. Babivugira ku ndwara z'ibyorezo cyangwa inzara.
- Guhwema:** kureka gukora ikintu.
- Gukayuka:** gushiramo amazi cyangwa uburyohe.
- Gukengwa:** gushidikanya , kunezezwa, kwizihirwa.
- Gukopfora:** gutinyuka kuvuga.
- Gukora iyo bwabaga:** gukoresha imbaraga zawe zose
- Gukorera umuntu ibya mfura mbi:** kumuhohotera akamugirira nabi.
- Gukungahara kakahava:** gukira bw'ikirenga/ bihebuje.
- Gusagamba:** kwaguka, gukwira hose, kugara, kugaba amashami.
- Gusenyerera umugozi umwe:** gushyigikirana, gufashanya, gushyira hamwe
- Gushengurwa:** kubabazwa n'ibibi ubinye.
- Gushinga imizi:** guhama, gukomera cyane.
- Gushoberwa:** kuyoberwa, kubura igisubizo cy'ikibazo.
- Gushwishuriza umuntu:** kumuhakanira.
- Gusimbagurika:** gushikagurika nijoro kubera ibibazo byarenze ubwonko.

Gusindagiza umuntu: kwumufasha kugenda umwiyegamije.

Gusongwa: guhuhurwa. Bishobora ariko no kuvuga (ahandi) gukorwa k'umutsima.

Gutaha ibigunda: guhungira ku gasozi usize urugo.

Gutega iminsi: kurindira ibibazo.

Gutekereza ku buryo bwimbitse: gutekereza cyane ugacukumbura

Guteza inzuzi: kujya kureba umupfumu ngo akubwire indwara urwaye anakuvure. Babyita kuraguza. Umupfumu we araragura, atera inzuzi.

Gutimburwa: gukubitwa.

Gutona: gukundwa n'umuntu ukomeye ugasumbishwa abandi mwari kumwe bikajyana no guhabwa ibyiza biruta iby'abandi.

Gutsindwa uruhenu: gutsindwa burundu.

Gutura nk'umusozi: kubaho igihe cyose.

Hari inyamaswa n'izindi ngo ngwino urebe: hari inyamaswa zitagira umubare, nyinshi cyane.

Ibarura: ikorwa ry'imibare y'abaturage mu gihe runaka.

Ibibondo: abana bato.

Ibigango: imbaraga nyinshi cyane cyangwa ubunini buvanze no gukomera.

Ibiharabuge: ahantu ubutaka bwashizeho hagasigara hambaye ubusa.

Ibikorwaremezo: ni ibikorwa by'ibanze iterambere rishingiraho. Hakubiyemo ibintu bitandukanye nk'imihanda, amashuri, ibigo by'ubuvuzi, amasomero, amavomo, ibibuga, amashanyarazi, imiyoboro y'itumanaho n'ibindi.

Ibintu byadogereye: ibintu byacitse.

Ibirorero: ahantu hirengeye, barebera ibintu byiza.

Ibirumbo: ni abantu badafite icyo bamaze.

Ibishahu: igitsina cy'umubisha wabaga wiciye ku rugamba, bikaba ikimenyetso ko koko ari wowe wamwishe. Ibi byatumaga hatangwa imidende bitewe n'ababisha wiciye ku rugamba.

Ibiti by'inganzamarumbu: ibiti byakuze cyane kandi bimaze imyaka myinshi.

Ibyorezo: indwara zanduzza, zica abantu benshi kandi vuba. Hano barashaka kuvuka ko amashyamba yibasirwa nk'uko indwara zibasira abantu cyangwa amatungo.

Igicuba: icyansi kinini babuganizamo amata cyangwa bakoresha badahira inka.

Igihangamanywa: ku manywa y'ihangu, hagati ya saa sita na saa munani.

Igihango: isezerano ridakuka.

Igisingo: ikamba, umwambaro wa cyami utatse amasaro meza cyane abami n'abagabekazi bambaraga.

Igitambambuga: umwana ukiri muto ukambakamba.

Igiti by'inkonzo: igiti kimeze nk'inkoni bamanuza amashami y'igiti cyangwa imbuto. Inkonzo bayikora muri rimwe mu mashami abiri asangiye imetero, ishami rya kabiri bakaritemera hafi y'imetero.

Ihogoza: ikintu kiza bihebuje.

Ijabiro: aho umwami cyangwa umugabekazi babonanira cyangwa bakirira abantu.

Ijabo: akantu k'akanyabugabo umuntu yishyiramo kakagaragarira mu bushobozi bwe.

Ikantarange: kure cyane. Ikoranabuhanga ryakuyeho imbibi zitandukanya abantu, isi iragenda iba nk'umudugudu umwe.

Ikibondo: umwana ukiri muto.

Ikigereranyo: icishiriza.

Ikirezi: umutako ufite ibara ry'umweru ukozwe mu ihembe ry'inzovu

Ikoranabuhanga: uburyo bukoresha ibikoresho bijyanye n'iterambere rigezweho mu rwego rwa tekini n'itumanaho hagamijwe koroshya imikorere n'imibereho y'abantu.

Imbangukirabigwi: umuntu w'intwari uhora aharanira kugaragaza ibigwi.

Imbazo: ni iranda: icyuma cyo mu ibaizo bakoresha bagira ngo urubaho rube neza.

Imbehe: igikoresho kibaje mu giti bariraho (isahani ya kinyarwanda).

Imbibu: imipaka, urugabano.

Imbogamizi: inzitizi, ingorane.

Imbuga za interineti: ahantu dusanga amakuru

atandukanye kuri interineti.

Imbumburi: umuntu muto cyane ariko ufite imbaraga.

Imfubyi: uwo ari we wese wapfushije umwe mu babyeyi be cyangwa bombi. **Imfubyi buriburi:** umwana wapfushije ababyeyi bombi nta n'undi muvandinwe agira

Imigambi: intego, imihigo, gahunda.

Imihango yo gukura Gicurasi: imihango yo gukura icyunamo cya Gicurasi ari ko ikwezi bibukagamo iyicwa ry'umwami Ndahiro Cyamatare.

Imikaka y'iminsi: ibisitaza/inzitizi z'ubuzima.

Imirimba: ikintu kiza cyane.

Imirya: imigozi itanga amajwi ku nanga cyangwa gitari.

Imitaga: iminsi bishobora no kuvuga imihana inyuranye.

Impamba: ifunguro umuntu yitwaza ku rugendo rurerure.

Impambi: umuntu w'ingogo, ukomeye kandi urwana ubudatuza.

Impanda: akarumbeti.

Impano: ingabire umuntu avukana ituma agira ubushobozi runaka ku buryo biba biri karemano kuri we, aba atari ibyo yize cyangwa yiganye.

Impomba: umuntu w'umunyantege nke cyane.

Impuguke: injijuke, inshabwenge, intyoza, intiti, inararibonye.

Imyavu: imyanda.

Indatwa: umuntu w'ibanze uza ku mwanya wa mbere kubera akamaro afite.

Indongozi: umuntu ujya imbere y'abandi akabayobora.

Indyo yuzuye: mu biribwa bikenewe, kugira ngo umuntu ategure indyo yuzuye hagomba kubamo ibiribwa byubaka umubiri, ibiwutera imbaraga n'ibiwurinda indwara. Ibyubaka umubiri twavuga nk'ibinyampeke, ibinyamisogwe, inyama, amafi, amagi, ibihumyo... Umubiri ukeneye n'ibiwutera imbaraga nk'ibijumba, imyumbati, umuceri, ubugari... Ibiribwa birinda umubiri indwara hinganjemo imboga n'imbutu.

Ingabo: igikoresho bikingiraga amacumu y'imyambi barwana.

Ingamba: ni ibyemezo biba bikwiye gushyirwa mu bikorwa kugira ngo hakemurwe ikibazo cyangwa se kugira ngo gikumirwe.

Ingangare: umuntu muremure kandi munini.

Inganji: umuntu watsinze ku rugamba.

Inganzwa: umugabo utegekwa n'umugore we.

Ingeragere: inyamaswa yo mu gasozi irisha, iruta gato ihene kandi izi kwiruka cyane.

Ingeri ndende: inyanja ndende.

Ingeri: ubwoko butandukanye.

Ingimbi: umwana w'umuhungu uri mu kigero hagati y'imyaka cumi n'itatu na cumi n'itandatu.

Ingishywa: inka zagishwe. Iyo ubwatsi bwabaga bugabanutse, inka bazimuriraga ahandi hari ubwatsi. Ibi ni byo bitaga kugisha. Ingishywa rero zikaba izo zagishijwe.

Ingorabahizi: ikibazo gikomeye cyane ku buryo kugikemura hagomga ingufu nyinshi.

Inkaka: umuntu w'intwari kandi ugendana ishema n'igitinyiro. Bamwita kandi igikaka.

Inkangu: umukingo w'ubutaka bwakushumuwe n'amazi.

Inkengero: ni ahantu hegereye ahandi hantu hazwi cyane. **Urugero:** Inkengero z'umugi, inkengero z'ikiyaga.

Inkingi ya mwamba: ni ifatizo.

Inshyimbo: inkoni iringaniye igenewe kwitwaza.

Insinzi: uburyo bwo gukemura ibibazo bwaraguwe n'umupfumu, igikorwa gituma abazimu bishima bakagororoka.

Intamati: imfizi y'inzovu.

Intanage: imyambi

Intara: bayita kandi urutaro. Ni igikoresho cyo mu rugo giteye nk'inkoko imitwe yombi ntingana, gikoreshwa bagosora imyaka cyangwa bayanika.

Intere: Indembe.

Intiti: umuntu w'umuhanga mu bumenyi

Intore: abasore babarizwaga mu mutwe w'ingabo runaka. Muri uwo mutwe (itorero) ni ho batozwaga

gukunda igihugu, umuco n'indangagaciro nyarwanda. Intore yabaga ari umuntu w'injijuke, ushobora kurwanirira igihugu kandi akaba azi gukesha igitaramo.

Intorezo: ishoka.

Inyamibwa: indatwa, umuntu w'ibanze uza ku mwanya wambere kubera akamaro gakomeye afite.

Inyana y'ishashi: inyana imaze gukura igeze igihe cyo kwima.

Inyangabirama: Umugizi wa nabi.

Inyaruguru: zimwe mu ngabo zo ku ngoma ya Kirima Rujugira zari zikambitse ku mupaka w'u Rwanda n'u Burundi, ubu ni mu karere ka Nyaruguru. Zabanje no gutegekwa n'igikomangoma Rwamahe.

Inyatsi: ukubura amahirwe mu byo ukora, bityo ugahora ukorera ubusa, n'ibyo ubonye bikaguca mu myanya y'intoki. Ni umwaku.

Inyubako z'akajagari: ni inyubako zinyanyagiye kandi zubatswe mu buryo butubahirije amabwiriza y'ibipimo byabuhenewe. Ni inyubako zivangavanze.

Iribagiza: umuntu ukeye mwiza cyane.

Isata: ni umuyaga mwinshi uzamura amazi y'ikiyaga akazamuka ameze nk'urufuro. Abanyarwanda bo hambere bavugaga ko ari inzoka nini iba yaje kunywa amazi mu kiyaga.

Ishavu: Agahinda gakomeye umuntu aterwa no kwibuka inabi yagiriwe cyangwa ibibi yabonye.

Isheja: Ibyishimo umuntu aterwa n'igikorwa kiza yakoze.

Ishinge: ubwoko bw'ibyatsi basakazaga amazu cyangwa bakabitegura mu nzu. Ibyo byatsi kandi bikoreshwa benga ibitoki.

Ishyamba kimeza: ishyamba ritatewe n'abantu, ryimejeje.

Ishyano: igitutsi bakoresha kuri bagenzi babo batishimiye bagereranya n'umugizi wa nabi.

Ishyari: ingeso mbi igaragazwa n'akababaro umuntu aterwa n'uko mugenzi we ameze neza, atunze, akunzwe...

Isibo: ikivunge, ibintu biri hamwe, urujya n'uruza, itsinda rikorera hamwe ryunze ubumwe.

Itumba: igihe k'imvura nyinshi, kuva mu kwezi kwa gatatu (Werurwe) kugeza mu kwa gatanu (Gicurasi)

Izirika iminsi: Igufasha mu minsi iri imbere ku buryo utazahangayika rwose.

Izuba rimena imbwa agahanga: izuba rikaze cyane.

Kabuhariwe: umuntu cyangwa ikintu gikora ibintu ku buryo bwa gihanga, mbese umuntu yavuga ko ari we cyangwa cyo cyabigenewe.

Kinigirije: cyambaye ikintu mu ijosi. icyo bambara mu ijosi bakita urunigi.

Kondora umurwayi: kumwitaho, kumuha ibyo kurya no kunywa bimufasha kugarura imbaraga.

Kore: ibintu bireduka bigenewe gukoreshwa mu gufatanya ibaho cyangwa mu gusana inkweto.

ku nkiko: ku mupaka.

Ku rurembo: ibutware.

Kubanga amatwi: gutega umuntu amatwi witonze ngo hatagira ibyo avuga bikagucika.

Kubaza amenyo y'inkoko ureba umunwa: ni umugani uvuga ko ntawukwiriye kubaza ibintu bigaragara, ashaka kumenya aho biherereye. Bawuca bavuga ngo: "ntawubaza amenyo y'inkoko kandi areba umunwa".

Kubika : gutangaza urupfu rw'umuntu.

Kudahana igihugu: kudatererana igihugu.

Kudakura ibirenge: kudasubira inyuma, gushikama ugakora icyo usabwa gukora.

Kudatera kabiri: kutamara igihe.

Kufira: kintoki ibyatsi byameze mu myaka.

Kuganga: kunyara kw'inka cyangwa n'izindi nyamaswa.

Kugenda ategatega: kugenda udafite imbaraga.

Kugera iwa ndabaga: kugera kure kubi, kuba bibi cyane kurushaho.

Kugimbuka: kuba ingimbi.

Kugimbuka: ni ukuva mu bugimbi, mu bwana.

Kugwa mu kantu: kumirwa ukabura icyo uvuga.

Kuhanya: kugenda wihuta uhumagira.

Kujya mu nganzo: kujya mu ntekerezo ukiherera ugahanga cyangwa ugahimba.

Kunegekara: kurwara ukaremba cyane.

Kunihira: kuvuga ijwi ryirangira, riganisha hasi.

Kuramira abarwayi: gufasha abarwayi.
Kurya iminsi: Kubaho igihe kirekira/kumara igihe kirekire.
Kutagira akarima ka kirazira: kuba nta karima ko guhinga na kamwe ufite.
Kutagira na mba: kuba udafite na busa.
Kuvuna abantu amaguru: kubaruhura urugendo rukaba rugufi.
Kwanduruka: kuva aho zari zibyagiye, kubyuka zikagenda.
Kwatisha: gutanga amafaranga bakagutiza umurima wo guhingamo mu gihe gito.
Kwaturira: kumenera ibanga.
Kwigabiza: kwiha ikintu ku ngufu.
Kwigaranzura: kurusha imbaraga uwari warazikurushije mbere/uwari waragutsinze mbere.
Kwigorora: kwiyunga.
Kwiha uruhu rw'ingwe utarayica: kwizera icyo utarabona kandi ushobora no kukibura.
Kwihanangiriza: gutanga gasopo, gutonganya umuntu umubuza kongera gukora ibyo yakoraga.
Kwinikiza: gukama inka, gutangira gukora umurimo kandi ukawukora wizihwe, utiganda.
Kwinumira: kutagira icyo uvuga ukicecececa.
Kwiyereka icumu: gukora akarasisi bitwaje icumu. Ni akarasisi nk'ako ingabo z'igihugu zikora muri iki gihe ariko bitwaje icumu.
Kwiyesura: kwiterera hejuru kubera agahinda ufite.
Kwiyuha akuya: gushyira ingufu mu byo ukora.
Magaramake: izina ry'umuntu akenshi aba ari irihimbano rivuga umuntu unanutse cyane utagira n'imbaraga.
Matene: ubwoko bw'inanyi.
Mpogazi: izina ry'umuntu rivuga umuntu ubyibushye neza inshinga ni uguhozagara.
Mu cyaro: mu giturage.
Mu gahinga: igice cy'umusozi gitumburutse, kidashobora guturwa.
Mu gikombe: ahantu hari ikena hagati y'imisozi. Mu matsinda abanyeshuri barasoma umwandiko basubiza ibibazo byo kumva umwandiko.

Ngesa: kugesha: guca ubushishi bw'uburo ukoresheje imbugita, icyuma. Gutema ikintu rimwe kikagwa. Gutema uburo/guca uburo babyita kugesha.

Nkurage intwari: nkwegurire impamba.

Nsige (Gusiga): mpange, mpimbe igisigo.

Ntugahaburwe: ntugashidukire ibibonetse byose / ntugakangwe ni icyo ari cyo cyose

Nyirakuru: nyina wa se cyangwa wa nyina w'umuntu. nyuma ikazamukana imbaraga nyinshi. Mu mvugoshusho babivugira ku muntu ufi te icyo arusha abandi.

Robo: imashini zikora imirimo imwe n'imwe nk'iy'abantu ku buryo zishibora gusimbura abantu mu mirimo itandukanye.

Rubundakumazi: ni umusinzi, umuntu ukunda inzoga cyane.

Rurikanwa: umuntu usingizwa ibyiza.

Rutigimbwa: umuntu utisukirwa.

Sebukwe: se w'umugabo cyangwa w'umugore wawe.

Sekuru: se wa se cyangwa wa nyina w'umuntu.

Sindagahindagara: sindagira ubwoba.

Swingi: ni invugo nyandagazi abanywi b'ibiyobyabwenge bakoresha bavuga uko bamererwa iyo bamaze kubisomaho.

Ubugenge: ubuhanga bwo gukora ikintu iki n'iki abantu bose batashobora.

Ubugeni: ni ugukora ibihangano binyuranye.

Ubugimbi: ni igihe umwana w'umuhungu aba ageze mu kigero cy'imyaka hagati ya cumi n'itatu na cumi n'itandatu.

Ubuhehere: ukuba ahantu hatose, hatumagaye.

Ubukaka: amarere, amashagaga.

Ubukombe: ikintu kinini.

Ubukozo: umuti umatira bakoresha mu gufatanya ibintu. Hari n'abwita kore.

Ubunararibonye: kumenya ibintu byinshi no kugira ubushobozi bwimbitse kubera ubuzima wabayemo n'igihe ubumazemo.

Ubusabane: umushyikirano.

Ubushomeri: igihe nta kazi umuntu afite.

Ubusitani: ahazengurutse inyubako hateye indabo,

ibiti cyangwa ibyatsi bituma hagaragara neza kuko biba byaragenewe kuharimbisha.

Ubwiyongere: kuva ku mubare muto ujya ku munini.

Umuderevu: umushoferi.

Umuhanuzikazi: umugore uvuga ibizaba.

Umuhanya: umutindi nyakuja.

Umuhinza: umwami w'agahugu gato abantu bubahaga nk'imana bakamutura amakoro na we akabaha imvura.

Umunyotswe: umuriro umeze nk'ivu.

Umupfumu rwoma: umupfumu uzwi cyane.

Umupfumu: umuntu ubwira abantu ko abahanurira ibizababaho kandi akabavura n'indwara zinyuranye, bakamuha amafaranga, inzoga, ibiribwa n'amatungo. Akenshi arababeshya ugasanga abantu barahaguye.

Umurage: umutungo wasigiwe n'umuntu cyangwa yakwiherereye ku mpamvu runaka.

Umurambi uteta umukenke: umusozi ushashe neza wameze ho umukenke mwinshi uhuhwa n'umuyaga.

Umurava: umwete.

Umurunga w'iminsi: igisubizo k'ibibazo/Igisubizo gihanye k'ibibazo.

Umusambi: bawita kandi umuce. Ni igikoresho kiboshye nk'ikirago ariko gito kigenewe kwicarwaho cyangwa kuryamirwa.

Umuse: umuntu wasimburaga nyiri urugo mu mihango inyuranye imugenewe akayimukorera iyo yabaga atabonetse; nko mu mihango yo kwita izina, kweza abapfushije,...Ntawubera umuse uwo basangiye ubwoko.

Umuseke: mu rukerera; igihe bwenda gucya.

Umususu: ubwoba butera umuntu gutinya gukora ikintu.

Umutayihana: umuntu udashobora gutererana ingoma.

Umutobotobo: ubwoko bw'agati kagira indeshyoyaba nka metero ebyiri kakagira udushami twinshi, guhera muri metero kagira, amahwa yigondoye buke ku isonga, aba ku mubyimba no ku migongo y'ibibabi, kakagira indabyo zenda gusa n'icyatsi kibisi, kakera utubuto twiburungushuye bita intobo cyangwa inyamaheri.

Umuzimu: kamere y'umuntu yitandukanya n'umubiri iyo yapfuye.

Umwaga: umushiha, umunabi, gukunda utuntu, gukunda kwikubira, ubugugu.

Umwega: umuntu wo mu bwoko bw'abega.

Umwihariko: itandukaniro.

Umwimerere: ikintu kitari ikiganano.

Uruboho: umuzigo, umutwaro.

Urufunzo: ibyatsi bimera mu gishanga kirimo amazi menshi.

Urugangazi: umuntu muremure munini kandi ukomeye.

Urugo rusaba umunyu: urugo rw'abatindi.

Uruhamo rw'umuryango: igice cyo ku nzu giherereye ku mu ryango kiremetse nk'urukinga kigashyigikirwa n'inkingi ya kanagazi kigatwikira umuryango kikawurinda amahuhezi.

Urukangaga: ibyatsi bimera mu tubande ku migezi mitoya, bikoreshwa mu kuboha imisambi n'ibirago.

Urukerereza: ryari izina ry'ishyamba ry'innyamba ryaremwe n'umwami rwogera. Aha mu mwandiko birashaka kuvuga ko bakomeje kumwitegereza kubera ubwiza bwe nk'uko iryo shyamba ryari ryiza.

Ururembo: umuharuro uri ku irembo ry'ibutware.

Urusenge: ikintu kimeze nk'urutara rururere bubaka hejuru y'iziko bakakibikaho ibintu cyangwa bakagitaraho inzoga cyangwa bakacyanikaho. Urusenge barwita kandi ubugamba.

Urwamo: ijwi rirenge, urusaku cyangwa induru y'ikintu.

Urwiyerurutso: igikorwa ukora kugira ngo ushimishe abantu ariko kitavuye ku mutima.

Zitonnye/gutona: kugira amabara y'ubudomagure, y'ubugondo.

Inyandiko n'ibitabo byifashishijwe

BIG,1985. Le Kinyarwanda, etudes de morpho-syntaxe, edit. Yves Cadiou, Paris.

BIGIRUMWAMI, A. 1985. Ibitekerezo, Ibyivugo, kuvuga inka, Indirimbo, Nyundo,.

Bizimana S, Kayumba C., 2011, Inkoranya y'Ikinyarwanda mu Kinyarwanda, IRST, 2ème Edition

Bizimana, S., Rwabukumba, G., 2011, Inkoranya y'Ikinyarwanda mu Kinyarwanda, IRST, 1ère Edition

Bpeperai, 1986. Amagenzi y'ihugura ry'abarimu bo mu kiciro cya mbere n'icya kabiri mu nyigisho y'Ikinyarwanda.

Charmeaux, E., 1975, La lecture à l'école, Cédix, Paris.

Conférence des Ministres de l'Education des Etats d'Expression Française, 1986, Promotion et intégration des langues nationales dans les systèmes éducatifs, Librairie Honoré Champion, Paris.

Dpeperai, 1986. Ikibonezamvugo cyo mu kiciro cya gatatu, Kigali.

DPES, 1986. Seminaire sur l'enseignement du Kinyarwanda a l'école secondaire. Kigali.

Fountain Publishers, 2011, Ikinyarwanda, Igitabo cy'umunyeshuri, Umwaka wa4, Fountain Publishers, Kigali

Fountain Publishers, 2011, Ikinyarwanda, Igitabo cy'umunyeshuri, Umwaka wa 5, Fountain Publishers, Kigali

Fountain Publishers, 2011, Ikinyarwanda, Igitabo cy'umwarimu, Umwaka wa 4, Fountain Publishers, Kigali

Fountain Publishers, 2011, Ikinyarwanda, Igitabo cy'umwarimu, Umwaka wa 5, Fountain Publishers, Kigali

Gagné, G., Pagé, M. na Arrab, E, 2002, *Didactique des langues maternelles. Questions actuelles dans différentes régions du monde*, De Boeck Universités du monde, De Boeck Université, Bruxelles.

Gasimba F. X, Niyomugabo C, Nsanzabiga E, Rusine J.B, Twilingiyimana C, 2012, *Inkoranyamuga ndimeshatu*, Kigali

Hameline, D., 1983, *Les objectifs pédagogiques (4ème édition)*, Editions ESF, Paris.

<http://www.acdi-cida.gc.ca/index.htm>

<http://www.rwandagateway.org/rw>

Igiraneza T, 1991, *Ikibonezamvugo k'Ikinyarwanda, Iyigamajwi n'Iyigamvugo, Igitabo cy'umunyeshuri umwaka wa 2 n'uwa 3*, BPS, Kigali

Ikigo Cy'Ubushakashatsi mu By'Ubuhanga n'Ikoranabuhanga (IRST), 1998, *Imiterere y'Ikinyarwanda, Igitabo I*, 1998, Pallotti-Press, Kigali.

Ikigo Gishinzwe Guteza Imbere Uburezi mu Rwanda, 2015, *Integanyanyigisho z'Ikinyarwanda mu kiciro cya kabiri cy'amashuri yisumbuye*, REB, Kigali.

Imvaho Nshya No 2120, 2011, tariki ya 08-10 Kanama.

Maurois, A., *Le Courier de l'UNESCO*, yo muri Gicurasi, 1961.

Minisiteri y'Amashuri Abanza n'Ayisumbuye, 1988, *Ikinyarwanda, umwaka wa munani, Reji y'Icapiro ry'Amashuri*, Kigali.

Minisiteri y'Amashuri Abanza n'Ayisumbuye, 1990, *Ikinyarwanda. Ikibonezamvugo: Iyigantego. Inshoza y'inshinga nyarwanda. Isomo ryateguwe na Igiraneza Tewodomiri*, BPES, Kigali.

Minisiteri y'Uburezi bw'Igihugu, 1976. *Gusoma, umwaka wa gatandatu*, Hatier, Paris.

Minisiteri y'Uburezi, 2008, Ikinyarwanda: Imyandiko mfashanyigisho. Igitabo cy'umunyeshuri, Umwaka wa mbere, NCDC, Kigali.

Minisiteri y'Uburezi, 2008, Ikinyarwanda: Imyandiko mfashanyigisho. Igitabo cy'umunyeshuri, Umwaka wa kabiri, NCDC, Kigali.

Minisiteri y'Uburezi, 2008, Ikinyarwanda: Imyandiko mfashanyigisho. Igitabo cy'umunyeshuri, Umwaka wa gatatu, NCDC, Kigali.

Minisiteri y'Uburezi, 2008, Ikinyarwanda: Imyandiko mfashanyigisho. Igitabo cy'umunyeshuri, Umwaka wa kane, NCDC, Kigali.

Minisiteri y'Uburezi, 2008, Ikinyarwanda: Imyandiko mfashanyigisho. Igitabo cy'umunyeshuri, Umwaka wa gatanu, NCDC, Kigali.

Minisiteri y'Uburezi, 2008, Ikinyarwanda: Imyandiko mfashanyigisho. Igitabo cy'umunyeshuri, Umwaka wa gatandatu, NCDC, Kigali.

Minisiteri y'Uburezi, 2008, Ikinyarwanda: Imyandiko mfashanyigisho. Igitabo cy'umunyeshuri, NCDC, Kigali

Minisiteri y'Uburezi, 2013, Integanyanyigisho z'Ikinyarwanda mu mashuri abanza: Ikiciro cya kabiri, NCDC, Kigali.

Minisiteri y'Uburezi, 2013, Integanyanyigisho z'Ikinyarwanda z'ikiciro rusange, NCDC, Kigali.

Minisiteri y'Urubyiruko, umuco na Siporo, Ibirari by'Insigamigani, Icapisho ry'Ingoro y'Umurage w'uRwanda, Igitabo cya mbere, Icapisho rya 3, Printer set, 2005.

Murayi, A., 1986, Ubumenyi bwo kwigisha: bigisha bate mu mashuri abanza? Editions Printer Set, Kigali.

Mutake T. 1991. Ikibonezamvugo: imbonerahamwe y'itondaguranshinga risanzwe, Regie de l'Imprimerie Scolaire, Kigali.

Ndekezi, S., 1981, *Imyuga y'Abanyarwanda, Inades-formation-Rwanda*, Imprimerie de Kabgayi.

ORINFOR, 1987, *Imvaho no 670 yo ku itariki ya 12-18 Mutarama 1987*. Kigali.

ORINFOR, 1987, *Imvaho no 672 yo ku itariki ya 26 Mutarama-1 Gashyantare 1987*. Kigali.

ORINFOR, 1987, *Imvaho no 674 yo ku itariki ya 9-15 Gashyantare 1987*. Kigali.